

منشورات مركز دراسة جهاد الليبيين ضد الغزو الإيطالي  
سلسلة الروايات الشفوية - 8



محمّد يوسف اللومني

# تسوية الروايات الشفوية

جزء خاص  
بالمنفذين

محمّد يوسف اللومني

إعداد

مجموعة من باحثي المركز

الجمهورية العربية الليبية الشعبية الاشتراكية العظمى


1988

مركز دراسة جهاد الليبيين ضد الغزو الإيطالي (سابقا)  
مركز جهاد الليبيين للدراسات التاريخية (سابقا)  
المركز الليبي للمحفوظات و الدراسات التاريخية (حاليا)

مجلس يوسف القروي

حقوق الطبع والاقتباس والترجمة محفوظة للمركز  
مركز دراسة جهاد الليبيين ضد الغزو الإيطالي  
طرابلس - ص . 5878  
الجمعية القومية الليبية الشعبية الاشتراكية المظفر  
موسوعة روايات الجهاد  
رقم الإيداع 88/666 / دار الكتب  
الطبعة الأولى - 1988م

محمّد يوسف اللواتي



# مجموعة روايات الحكماء

جزء خاص  
بالمنفذين

إعداد  
مجموعة من باحثي المركز

محمّد يوسف اللواتي

أَعَدَّ هَذَا الْجُزْءَ مِنْ بَاحِثِي الْمَرْكَزِ

عَلَى الْبُوصَيْرِيِّ عَلَى عَلَى بَشِيرِ الزَّوَاوِيِّ

عَبْدُ الرَّحْمَنِ عَمْرُ الرِّبَكِيِّ عَيَّادُ مُحَمَّدٍ سَائِسِي

مُحَمَّدُ عَبْدُ النَّبِيِّ دَقَالِي خَلِيفَةُ مُحَمَّدٍ الدَّوْبِيِّ

إِسْمَاعِيلُ مُحَمَّدٍ الْخَزْرَجِيُّ

مُتَاحٌ لِلتَّحْمِيلِ فُضْمَنَ مَجْمُوعَةٍ كَبِيرَةٍ مِنَ الْمَطْبُوعَاتِ مِنْ صَفْحَةِ

مَكْتَبَتِي الْخَاصَّةِ

عَلَى مَوْقِعِ ارشيف الانترنت

الرَّابِطُ

[https://archive.org/details/@hassan\\_ibrahem](https://archive.org/details/@hassan_ibrahem)

بِسْمِ اللَّهِ الرَّحْمَنِ الرَّحِيمِ

«الَّذِينَ أُخْرِجُوا مِنْ دِيَارِهِمْ

بِغَيْرِ حَقٍّ إِلَّا أَنْ يَقُولُوا رَبُّنَا اللَّهُ»

صَدَقَ اللَّهُ الْعَظِيمُ

مُتَاحٌ لِلتَّحْمِيلِ ضَمَنَ مَجْمُوعَةٍ كَبِيرَةٍ مِنَ الْمَطْبُوعَاتِ مِنْ صَفْحَةٍ

مَكْتَبَتِي الْخَاصَّةِ

عَلَى مَوْقِعِ ارشيف الانترنت

الرَّابِطُ

[https://archive.org/details/@hassan\\_ibrahem](https://archive.org/details/@hassan_ibrahem)

## فهرس المحتويات

الموضوع .....	الصفحة
المقدمة .....	3
المقابلة الاولى .. المنفى جمعة محمد سعد الشريف .. شريط رقم (2 / 476)	7 - 16
المقابلة الثانية .. الراوية محمود محمد الشريف .. شريط غير مصنف .....	17 - 44
المقابلة الثالثة .. المنفى احمد على الدهماني شريط رقم (4 / 241 - 242 ,	243 - 244
.....)	45 - 96
المقابلة الرابعة .. المنفى محمد عبد السلام اليوسفى .. شريط رقم (9 / 323 -	325
.....)	97 - 151
المقابلة الخامسة .. الراوية رزق عبد الله العوامى .. شريط رقم (14 / 395)	152 - 159
المقابلة السادسة .. المنفى محمد سعيد الهريشى .. شريط رقم (1 / 19 , 1 / 302)	160 - 188
المقابلة السابعة .. المنفى سالم منصور الصابرى .. شريط غير مصنف	190 - 210
المقابلة الثامنة .. المنفى ابو راوى عبد الحميد ابراهيم .. شريط رقم (1 / 163 ,	211 - 259
.....)	164 , 165 , 166

### الملاحق

1 - قوائم باسماء بعض الليبيين الذين تم نفيهم .....	260
2 - الرسوم البيانية .....	262
3 - بعض الصور التى تعبر عن الجرائم الايطالية .....	265

### المعاجم والفهارس

معجم توضيحي لبعض المفردات العامية .....	268
فهرس الاعلام .....	286
فهرس البلدان والاماكن .....	294
فهرس القبائل .....	304
فهرس المعارك .....	308

## مقدمة

تعرضت الشعوب التي وقعت تحت سيطرة الاستعمار الاوروبي الحديث الى صنوف القهر والابادة ، ولقد منيت بلادنا اثناء الفترة من 1911 - 1943م بأستعمار بغیض الا وهو الاستعمار الايطالى الذى مارس ايشع انواع القمع على هذه الارض من قتل ، ونفى وتهجير واعمال سخره دون مرعاه لابطس الحقوق الانسانية ، فقد مورست هذه الاعمال بشكل جماعى حتى على النساء والاطفال والشیوخ .

وفى اطار الذكرى السابعة والسبعين لاول عملية نفى جماعى تمت من على هذه الارض . الى العديد من الجزر الايطالية منها جزيرة ( تراميتى ) عقب معركة الهانى التى وقعت فى 23/10/1911م . وتكبدت فيها القوات الايطالية الغازية هزيمة نكراء مما جعلها تصب جام غضبها على العزل من سكان مدينة طرابلس وخاصة منطقة المنشية وماجاورها بعمليات قتل جماعى حيث بلغ مجموع من قتل فيها اربعة آلاف شهيد ولم يكتف الايطاليون بهذا العمل بل الحقوه بمحاولة اخلاء الارض من سكانها فقام الايطاليون يوم 26/10/1911م بأول عملية بلغ مجموع من ابعدها عن ارض الوطن 1367 منفياً حسب ماتوفر لدينا من بيانات أولیه . وقد توالى عمليات القتل والتشريد والقهر والتهجير لآلاف الليبيين الذين رفضوا الخضوع اثناء فترة الجهاد ضد العدوان الايطالى . كما اشار الكومودور بيهلر احد ضباط البحرية الامريكية فى كتابه الحرب الايطالية التركية ص 35 الى ان الجنرال كانيفا قد أبعد فى شهر نوفمبر 1911 ثلاثة الاف مدنى من سكان مدينة طرابلس . كاسرى حرب الى جزر قايتا ، اوستكا ، تراميتى (1)

وقد وزع المنفيون على اكثر ( من 26 ) سجناء اغلبها يتركز فى الجنوب الايطالى ونذكر منها الجزر التالية :-

« تراميتى ، فافيانا ، سيراكوزا ، اوستيكا ، وغيرها من الجزر انظر الرسم البيانى المرفق » ، ولاظهار هذا العمل ليكون شاهداً ودليلاً يعكس واقع المعاناة التى عاشها ابناء شعبنا من جراء ماأرتكبه ، دعاة الحضارة الانسانية - حسب ادعائهم وفى اطار الجهد الجماعى كلفت مجموعة من باحثى المركز بأجراء مقابلات مسجلة مع من تعرضوا للنفى والابعاد عن ديارهم والذين كتبت لهم الحياة لتكون مكمله لافادات ممن جرت مقابلتهم خلال المراحل السابقة لنشاطات المركز العلميه ، المتعلقة بتقصي وتجميع روايات حركه الجهاد « 1911م - 1932م . »

(1) The History of The Italian - Turkish War : September 29,1911 to October 18,1912 .

ورأينا ان نضمن هذا الجزء من موسوعة الجهاد ( جزء خاصاً بروايات المنفيين ) في ثمان مقابلات جمعت من بعض الرواه ممن تم نقيهم في السنوات « 1911م . 1914 . 1915م و 1917م . » من عدة مناطق في الجماهيرية ( طرابلس ، مصراته ، ترهونة ، صبراتة ، القبة الزاوية - طبرق » .

وحرصا على وحدة الموضوع ، ولفائده الباحث والقارئ رأينا اثبات المقابلات كما وردت جامعه لاحداث حركة الجهاد ، وعمليات القتل ، والنفي والابعاد . . وغيره وتوضيحا للعمل فقد الحقنا هذا الجزء بمعجم توضيحي لمعاني المفردات العامة ، حسب ورودها في صفحات المتن ، وفهرس آخر بأساء الاعلام والقبائل والمواقع . اضافة الى الشروح والتعليقات الهامشية التي رأينا ضرورة ايضاحها . . وبهذه المناسبة نود ان نشكر جميع الاخوة الزملاء الذين تعاونوا وتكاتفوا من أجل اخراج هذا العمل الى حيز الوجود ، ونخص بالشكر الاخوة المواطنين من المنفيين الذين تعاونوا معنا بهذا الخصوص ، كما نشكر الاخ / الدكتور محمد الجراري الذي كان لتشجيعه ، واقتراحاته اطيب الاثر لدينا . . كما نشكر ايضا الاخ / بالقاسم دبور الذي تفضل بطباعه مسوده هذا الجزء ونشكر كذلك الاخوة المنتجين بمطابع الثورة العربية في طرابلس على ما بذلوه من جهد طيب وعمل متواصل من اجل انجاز هذا الكتاب .

## الباحثون

مسیح یوسف (المسیح)

متاح للتحميل ضمن مجموعة كبيرة من المطبوعات من صفحة  
مكتبتي الخاصة  
على موقع ارشيف الانترنت  
الرابط

[https://archive.org/details/@hassan\\_ibrahem](https://archive.org/details/@hassan_ibrahem)



## المعاناة سجن ، نفى ، إعدام

مطلع القصيدة :-

العين فاقده ذاك السبب والراحة  
تنوؤ كل يوم اديرلى فى مناحه

الى ان يقول :-

واحد	عليه	إنادوا
واحد	صغاره	بعد رأسه سابوا
واحد	يوجه	بدالى
واحد	سنه	ماراش منهم والى
واحد	ملخ	جرده لبس عوالى
	واطبس	على البرميل والفراحة (1)
واحد	حذفوه	فوق
	لا	لان مايدروا
	المالى	على مطراحه (2)
واحد	قعد	فى الخيط
	ماتجيش	حتى
	موت	موتاه

---

هذه الايات رواها لنا الراويه . على احمد الوافى . من منطقة الزاوية الغربية على الشريط 1/236 / وقد سجن مع الشاعر "عبد الواحد احمد عبد الواحد الزنتان" واعتقد بأن الراويه قد جمع هذه الايات من قصائد الشاعر الكثيرة والمختلفة وقد يكون نظم هذه الايات مختلفة الا انها معبره عن حالات ثلاث هى السجن والنفى والقتل لهذا راينا تدوينها فى مطلع هذا الجزء الخاص بالمتنفيين العرب الليبيين .

( 1 ) يعنى "نوبانجى ينظف السجن

( 2 ) ظهر المالى / يعنى الليبيين الذين تم نفيهم الى الجزر الايطالية ويقصد به البحر .

## مشروع تجميع الجهاد

نموذج رقم 2

منطقة البحث رقم 2 رقم الشريط او الاشرطة 476/2  
تاريخ المقابلة \_\_\_\_\_ / \_\_\_\_\_ / \_\_\_\_\_ هـ 1988/8/7 م  
الاسم ثلاثيا : جمعة محمد سعد الشريف  
تاريخ ومكان الميلاد : 1890 م / طرابلس  
محلة قرقارش قبيلة شرفه  
اسم الام فاطمة على الشريف  
محلة \_\_\_\_\_ قبيلة شرفه

وظيفته : عاجز


علاقته بالطرق المنزلية وجمعيات المجاهدين : \_\_\_\_\_  
وظيفته المدنية : العسكرية السابقة : نفى الى ايطاليا في 1911/10/26 م  
الحالة التعليمية : متوسط  
اللغات التي يتكلمها : العربية  
الجهات التي سكن بها سابقا : طرابلس  
الرحلات الوطيلة التي قام بها بما فيها رحلة الحج : نفى الى ايطاليا في 1911 م  
هل سبق ان اجريت معه مقابلة : لا  
بواسطة من : \_\_\_\_\_  
اين : \_\_\_\_\_ متى : \_\_\_\_\_

ملاحظات : حول المقابلة :

اسماء الباحثين الذين اجروا المقابلة :  
على الزواوي  
الفرجاني الشريف  
محمد بن عبد النبي

## مقابلة مع جمعة محمد سعد الشريف

- في مساء يوم الاحد 1988/8/7 بمنطقة قرقارش وبمنزل الحاج جمعه الشريف .
- س . توا ياسى الحاج شنو اسمك تراقوللنا اسمك ؟
- ج . جمعة محمد سعد محمد الشريف .
- س . قداش عمرك ؟
- ج . في هذاك الاوان يحى 20 عام .
- س . لما دخلوا الطليان في سنة 11 عشرين عام يعنى تقريبا من 1890 المواليد هكى تقريبا ؟ والدتك شنوا اسمها ؟
- ج . فاطمة على الشريف .
- س . يا حاج من اى شرفة انتم ؟
- ج . برانية .
- س . من المغرب .
- ج . ايه .
- س . شرفة ودان انتم منهم ؟
- ج . ايه يرجعوا الى بعضهم .
- س . ايام الجهاد كنت مجاهداً ، شدوك الطليان بدرى في سنة 1911م .
- ج . الجهاد لاحضرته ولاغيره .



- س . آه ما حضرتش ايه ؟
- ج . احنا احتزنا فى طرابلس لاجاهدنا ولا غيره .
- س . باهى ما عندكش علاقة بالطرق الصوفية ، عروسي ، عيساوى ، بالطرق هذه زمان متع العيساوية عروسية ؟
- ج . ما عنديش .
- س . باهى عمى جمعة تقدرش تحكيلنا لما قولت انت جيت فى الحوش والسلاح والطلبيان سركلوا الحوش وخذوكم ؟
- ج . انا واحمد بن عبد الله كنا فى الغرب جاء فى الفندق انا فى الدكان واحد فى الدكان جاء سمعنا الى جاء الكول مداير تلفون كول من الترك .
- س . رايسى ؟
- ج . جاء نهار الاحد الى الدكان فيه والدى حكا له قاله انهار الفولانى احنا بنمشوا نقعدوا الى نصف الليل .
- س . هذا التركى حكى الى والدك ؟
- ج . ايه النهار الفولانى يتسمى نهار المنشية واحنا العيال كلهم فى طرابلس وقت بلح . جانى الوالد قالى توا نوضى حدر وقول لخوتك يظهروا ، هذا نهار الاحد ، مانبى شىء الا يظهروا .
- س . منوا خوتك هذين ؟
- ج . محمود وعلى .
- س . حتى امك قعدة ؟
- ج . امى مينة هذاك الوقت .
- س . متوفية باهى ؟
- ج . مشى لاحد حتى هو قاله هكى تسقدنا ، انا نتقت فى سورية متعت نوم .
- س . تسقدتوا فى الليل ؟
- ج . تسقدنا فى العيشة عيشة الاحد .
- س . وين مشيتوا ؟
- ج . حدرنا الى طرابلس .
- س . تبوا تمشوا نجيبوهم ؟
- ج . بتنا فى قبل الهانى . . . . لاولاد المرغنى احنا حدرنا معاه ، وصلنا عقاب الليل بتنا فى ليلة سلموا منا البندق الصبح سلمنا بنادقنا لمولى البيت .
- س . الى منوا ؟
- ج . مولى البيت .
- س . شنوه اسماه ؟
- ج . وين نعرفه .

- س . آه متعرفاش ؟ باهى ؟  
 ج . خشينا جانا الطليان فى الهانى انا خشيت لسائيتنا واحد  
 س . ماكلموكش منين خشيت ؟  
 ج . لا . لا ، اهدمشى الى سائيتهم ، اصبح سربوا شدونا ، تلاقينا انا واحد بناخذوا  
 بنادق من ابراهيم ..  
 س . بنادق اخرات ماغير الى سلمتوهم ؟  
 ج . هدوكا مشوا .  
 س . خلبيتوهم الى مولى البيت ؟  
 ج . ومنوا يدري عليه .  
 س . شنوا نوعهم هم كباك والا موزر ؟  
 ج . موزو .  
 س . احصلينهم من الخزنة من خزنة الترك ؟ والا شارينهم ؟  
 ج . شاريمهم هذاك الوقت الى معنداش جهد يشرى .  
 س . حصلتوا بنادق ثانياات ؟  
 ج . ايه .  
 س . باهى ؟  
 ج . بنادقنا احنا سلمناهم الى يشدوا فيه السلاح نقزوا الحيط الطليان خشوا من الباب  
 الطليان .  
 س . خشوا للحوش ؟  
 ج . خشوا للحوش ، احنا انقزنا شدونا .  
 س . انت وعمك ؟  
 ج . انا وابراهيم واحد .  
 س . منوا ابراهيم ؟  
 ج . ابو الاولاد هدولا .  
 س . ابراهيم بن مصباح الشريف واحمد بن عبد الله الشريف ، باهى شدوكم فى  
 الحوش ؟ وين رفعوكم بعدها ؟  
 ج . رفعونا الى ايطاليا .  
 س . قبلها مش رفعوكم لمدرسة الصنائع ؟  
 ج . ايه قعدنا فيها .  
 س . قداش قعدتوا يوم ؟  
 ج . باللك نهارين .  
 س . ممعاكش اصغار ثانيين وناس ؟  
 ج . لا يج ياسر .

- س . فيه شيابين ونسون ؟  
 ج . فيه اللي جابوه زقطوط .  
 س . هكى ماعنده شىء ؟  
 ج . ماعنده شىء ، فى مرقدہ راقد جابوه .  
 س . مايضربوش فيكم الطليان منين جابوكم ؟  
 ج . لا .  
 س . ماضربوكش ؟ باهى قعدتوا يومين فى مدرسة الصنائع ؟ قداش الى ركبتوا فى  
 البابور متقدرش هكى تقوللنا الف الفين ثلاثمئة أربعمئة ؟  
 ج . مانقدرش انقولك عليه هذاك الوقت كل واحد لاهى فى روحه .  
 س . كل واحد لاهى فى روحه صح ؟ امتى ركبت فى البابور . الصبح ، العشية ؟  
 ج . عقاب الليل .  
 س . سجلوكم خذوا منكم اسماكم والعمر قبل ماتركبوا ؟  
 ج . لا . لا .  
 س . ماخذوا منكم شىء ؟  
 ج . بعدين قيدوا  
 س . بعدين وين قيدوكم يا حاج ؟  
 ج . بعدين قيدونا فى ايطاليا .  
 س . قداش فى الطريق فى البحر ؟  
 ج . مامشيناش طول احنا بابور بضاعة بشويه يمكننا كيف روحنا يمشوا يحيى اربعين  
 عيل على ظهره فوق البابور بس بابور بضاعة يمشى وينزل فى البضاعة .  
 س . اربعين عيل قلت اصغار ؟  
 ج . ايه .  
 س . هذا ردوكم انت مع بعضكم ؟  
 ج . هدونا اصغار اللي محسوين اصغار هذولا . . . . .  
 س . الاحداث يعنى ؟  
 ج . هذولا فيهم من شارع بن عاشور فيه من الهانى فيه من بومليانة مغلطين ، هما روحوا  
 بينا اصغار يحيى 42 عيل .  
 س . اعمارهم قداش يا حاج منوين الى وين ؟  
 ج . يمكن فيه ولد اربعطاش وخمسطاش .  
 س . واكبر واحد ؟  
 ج . اكبر واحد هو انا .  
 س . فى حدود العشرين يعنى ؟  
 ج . هما كاتيين 18 عام اما الحقيقة فوق العشرين .

- س . مامعاشك نساوين ؟  
 ج . لا .  
 س . منين وصلتوا غادى يا حاج داروكم برواحكم الصغار والا مع الناس قاعدين مع الناس ؟  
 ج . لا ، مع الناس .  
 س . اعطوكم لباس وغطاء ، فيه اللي ماشى عريان انت قلت ؟ . . . .  
 س . الى مشيتم من الشرفة قعدتم مع بعضكم ؟  
 ج . احنا الصغار قعدنا مع بعضنا واما الشيباني الثاني هذاك رفعوه زعميتهم الشيبان لوهم مع بعضهم رفعوهم لمحل بروحهم .  
 س . الشيباني هذا شنو سماه ؟  
 ج . فرج بن محمد .  
 س . حتى هو من الشرفه ؟  
 ج . ايه .  
 س . قداس عمره هذاك الشيباني ؟  
 ج . يمكن يجي 80 عام .  
 س . احكيلنا عن البداية كيف الطليان لما حطوكم في الباخرة شن الايكال مافيش ضرب مافيش تعذيب ؟  
 ج . لا . لا مافيش .  
 س . بيقولو فيه الى رموه مع الفيران وفيه الى رموه تحت مع الزوايل والا . لا ؟  
 ج . يمكن في بعثة ثانية مجموعة ثانية .  
 س . انتم قداس بعثة مشيتوا ؟  
 ج . مهبول الى يقولك كدى . الناس الى شدوهم البابور واتى يمشوا فيه .  
 س . الى واتيين يسوقوهم ؟  
 ج . ايه .  
 س . قداس اقعدتوا في البحر من بداية الرحلة من طرابلس الى غاية ما وصلتوا الى ايطاليا ؟  
 ج . اسمع مايقولك حد الكلام الصحيح ، الناس الى شدوهم رفعوهم في بابور مشى ماشى طول .  
 س . صار فيه مناطق اخرى مار عليها ؟  
 ج . اية ، بابور ابضاعة .  
 س . يواطى في مكان آخر ؟  
 ج . إيات في المكان يقعد فيه مرات يومين والا ثلاثة ايام .  
 س . مافيش حدمنكم حطوه راييس عليكم ؟

- ج . لا . لا .  
 س . باهى لما وصلتموا غادى قلت بدرى حطونا فى عنابر مش معروف المكان الى  
 حطوكم فيه فى الاول ؟  
 ج . جزيرة فى البحر احنا الى مشينا الى رفعونا فى البابور هذه الجزيرة من قبل مدايرها  
 الظليان للمحاييس .  
 س . خاصة بالمحاييس ؟  
 ج . خاصة للمحاييس .  
 س . باهى ؟  
 ج . فيه اربعة عنابر العنبر كبره زى الفم هذا واكثر للمحاصلين .  
 س . حدود 6 متر طوله هكى ؟  
 ج . العرض 6 متر .  
 س .  $10 \times 6$  متر .  
 ج . يمكن ييجى 15 متر  
 س . قداش فيه نفر العنبر هذا ؟  
 ج . مليون من غير اعداد .  
 س . وباهى عندكم فراشات والانتباتوا على التبن ؟  
 ج . فراشى التبن ، مليون بالقمل .....  
 س . هادى الحاجات الى نبوك تحكيلنا عليها ؟  
 ج . القمل والجوع والماء .  
 س . الماء ماطرة والاطاسة والاشنوا يعطوا فيكم ؟  
 ج . الماكلة مرمده فيه ، حبات مكرونة فى الميه ..  
 س . وغطاكم شنوا كان فيه بطاطين والاملاحف ؟  
 ج . هذاك الوقت الا الى لابسها .  
 س . هذا فى الاول ؟  
 ج . ايه .  
 س . صار الى عنده شلتيات عليه وخلاص ؟  
 ج . ايه  
 س . قداش وجبه يعطوا فيكم فى النهار ؟  
 ج . وجبه وحده  
 س . فى الاربعة والعشرين ساعة وجبه ؟  
 ج . ايه .  
 س . شنوا هى الوجبه ؟  
 ج . الى بيه الزمان . حبات مكرونة وطرف خبزة



- س . كل واحد يعطوه قاويطة ؟  
 ج . قاويطة بروحه .  
 س . بيده ياكل والافيه حاجة يأكل بيها ؟  
 ج . هو شنوا يياكل . ، يياكل الميه . فيه الى مرضى ماياكلوش ، ماكله مرمده .  
 س . ماتعرفش اسمواتهم المرضى والصباح ؟  
 ج . لا . انا الاول كنت مريض .  
 س . باهى المرض هذا نتيجة التعذيب والانتيجة الجوع والافيه مرض آخر ؟  
 ج . فيه ، كل حد بجهدده ، الماكلة مافيش ماكله باهيه  
 س . الصحة معناها بتقل باهى المرضى ماداواهش ومادرلهش حاجة ؟  
 ج . جاهم طبيب .  
 س . غير اسم دواء ؟  
 ج . الدوة قداش بتعاودها مافيش فيها ثمرة  
 س . لاباهى هذه الثمرة احنا نعرفوا ان انت فى سنة 11 نفوك الطليان وقعدت فترة غادى وتعذبت ومرضت هذا كله نبوه ؟  
 ج . الناس وين كثر المرض جو وحدين طبه منهم يسألوا احنا الاولين جو زاروالقوا الماكلة وبونو ، بونو ( يعنى جيده ) لاكوا بونو ( يعنى الماء جيد ) بعدها كشفوا عليها لقوها اميه .  
 س . منوا الى كشفوا عليها ؟  
 ج . طليان ، اتصلحت بعدها الماكلة شويه ، كل واحد اعطوه طاسة زيت يصبوها على المكرونة هذا باهى خير من قبل  
 س . المدة كلها قداش قعدت فى الحبس ؟  
 ج . احنا 42 نفر اقعدنا خمسة شهور .  
 س . باهى الفترة هذه الى قعدتها يطلعوا فيكم فى الساحة الصبح والظهر ؟  
 ج . الصبح يظهروا فينا الساحة قياس 1/2 ساعة ونخشوا بعدها كل بابور بضاعة يجيبوا فيه شويه للبيين .  
 س . انت قلت لى اكثرتهم من طرابلس الى هناك الوقت معاكم ؟  
 ج . لا لا فيه من غات والى من ترهونة والى من الجبل . من كل مطراح ، الناس وقت بلح الناس اتصرف فى المعيشة فيه الى عنده ملكه فيه من غات فيه من غريان فيه من الجبل فيه من كل مطراح  
 س . الى يموت غادى كيف يديروله ، يدفنوا فيه والاكيف ؟  
 ج . يدفنوا فيه .  
 س . العرب يدفنوه والا الطليان ؟  
 ج . العرب .  
 س . كيف يصلوا عليه ؟

- ج . الله اعلم .  
 س . مدايرين جبانة خاصة جبانة المسلمين ؟  
 ج . انا مانقولك كذا والاكذا انا مامشيتش .  
 س . مافاتش عليكم رمضان وانتم غادى خلال الخمس شهور ؟  
 ج . باش رمضان بيصيموا على الجوع والا على الماكله هذه الميه شويه .  
 س . صار ماتلقاش فيه ميه تغسل بها ؟  
 ج . مافيش ، بئر مافيش .  
 س . كيف دايرين فى قضاء الحاجة البشرية ؟  
 ج . فيه مراحيض .  
 س . لما وصلتوا غادى قسموكم على اربع مجموعات والاقعدتوا مجموعة واحده فى العنابر ؟  
 ج . قسمونا فى العنابر .  
 س . الاربعة عنابر معبيات ؟  
 ج . كل واحد وداره ..  
 س . وبعثالى كيف اخذوكم انتم 42 الصغار نادوا عليكم كيف سجلوا اسماكم ونادوا عليكم وقالوكم هيا بتروحوا ؟  
 ج . ايه .  
 س . يعنى مسجلين اسماكم ؟  
 ج . ايه .  
 س . بعثالى ركبوكم فى البابور وجابوكم ؟  
 ج . ايه .  
 س . شنوا قالوكم منين بتروحوا ؟  
 ج . شنوا بيقولونا .  
 س . الجزيرة الى حبسوكم فيها يقولوها ( تراميتى ) ؟  
 ج . هى هذه .  
 س . النوفلين حتى هى يقولوها المنشيه ؟  
 ج . شارع شارع  
 س . لابد انتم مسجلينكم يقولوا من المنشيه ؟  
 ج . الى داخل السور كله منشيه .  
 س . المنشيه تشمل شارع بن عاشور والنوفلين .....

الوجه الثانى من مقابلة جمعه محمد سعد الشريف

س . الى كان يخدم فى السرايا الحمراء ... حتى هو كان صغير كان عمره عشرة

سنوات لما شدوهم الناس وداروهم في مدرسة الصنائع قال نعرفها الحادثة يعرف حتى الناس الى قتلوهم ، اعطانا بعض الاسماء الى قتلوهم ، الى هو الحاج على البارودي هذا في الظهر وعبدالله القهواجي عدموهم الطليان ؟

ج . احنا بروحنا فيه الى طابعينه احنا غير الاجل مازال .

س . طبعوكم حتى انتم ؟

ج . لا . لا الاجل مازال ربي نساهم على الطبع ، فيه الى طبعوه من تالى .

س . الطبعة وين نجي ، في الكتف الايمن وإلا الايسر ؟

ج . مش معروف .

س . كل من يلقوا عنده اسلاح يطبعوه باش بعدين يعدموه ؟

ج . ايه ابراهيم هذاي جاي واحد قداه اشبح لقاه مطبوع نداه مكتفين احنا مكتفين وهو مكتف نداه قاله تعالى ورمى رسالة قدامه نتشها الرسالة لوحها انتشها بسنونه باش اعتق الرجل من الموت .

س . اعتق الرجل من الموت .

4. بارك الله فيك يا عمى جمعة -

## ملخص المقابلة

الراويہ جمعۃ سعد الشریف من موالید 1890م یذکر بانہ قبض علیہ یوم 1911/10/26م ووضعی بمکتب الفنون والصنائع مع من وضعوا هناك وقد تعرض وغيره لصنوف القهر والتعذيب وكان معه عمه "فرج محمد" وعمره ثمانين سنة ونقلوا الى ايطاليا الى جزيرة ( تراميتي ) بشمال شرق ايطاليا وقد توفي عمه هناك وقد فصل الاحداث عن الكبار حيث كان معه اثنان واربعون طفلا ويصف بان السجن عبارة عن عتابر لاتزيد مساحة العنبر عن خمسة عشر مترا وبأن الاكل بسيط قليلا من المكرونة والماء وهو عبارة عن وجبه واحده خلال الاربع وعشرين ساعه ونتيجة لذلك مات العديد من المنفيين هناك اي نتيجة للاهمال وسوء التغذية وقد بقى الراوي هناك خمسة شهور ثم عاد الى ارض الوطن .

## مشروع تجميع الجهاد

نموذج رقم 2

منطقة البحث رقم \_\_\_\_\_ رقم شريط او الاشرطة \_\_\_\_\_  
تاريخ المقابلة \_\_\_\_\_ / \_\_\_\_\_ / \_\_\_\_\_ 1975 / 3 / 25 م  
الاسم ثلاثيا : محمود محمد عمر الشريف  
تاريخ ومكان الميلاد : الابيار  
محلة \_\_\_\_\_ قبيلة \_\_\_\_\_  
اسم الام \_\_\_\_\_  
محلة \_\_\_\_\_ قبيلة \_\_\_\_\_  
الوظيفة \_\_\_\_\_  
علاقته بالطرق الصوفية وجمعيات المجاهدين : \_\_\_\_\_  
وظيفته المدنية : العسكرية السابقة : يروى عن المنفى " فضيل حسين الشلماني "  
الحالة التعليمية : \_\_\_\_\_  
اللغات التي يتكلمها : \_\_\_\_\_  
الجهات التي سكن بها سابقا : الابيار  
الرحلات الطويلة التي قام بها بما فيها رحلة الحج : احد المعتقلين بمعتقل سلوق  
هل سبق ان اجريت معه مقابلة : \_\_\_\_\_  
بواسطة من : \_\_\_\_\_  
اين : \_\_\_\_\_ متى : \_\_\_\_\_  
ملاحظات : حول المقابلة :

اسم الباحث الذي اجري المقابلة : سالم حسين الكبي

## « رواية عن المنفى » . فضيل حسين الشلماني نفي سنة ١٩١٤ - وعاد سنة ١٩٢٢م

بداية الوجه الاول

12 / ربيع الاول 1395 هـ الموافق 25 / 3 / 1975 م يسرّ لجنة جمع التراث<sup>(١)</sup> ان تلتقي في مدينة اليبيار بالحاج ( محمود محمد عمر الشريف ) بمنزله ليحدثنا عن رفيقه وصديقه الشاعر المرحوم ( فضيل حسين الشلماني ) :-

س . نريد منك ان تعطينا نبذة عن حياة ( فضيل حسين الشلماني ) ؟  
ج . « فضيل حسين الشلماني ولد في زاوية المرحص وال تاريخ لم اذكره وسيرته وحياته فلاح وموال ثم انتقل في وقت جفاف في سنة 1914 م وجاء لبرقة هنا وسلم وجد " عبد الكافي الكزه » مسلم بقمينس وخش معه وبعد ما خش معه حاول ان يبيع غنمه وابله ويظهر على الدور بعد ما يجي وقت المطر وبعدين صارته ، خلطة مع اهل قمينس وتزوج منهم وليّة ( امرأة ) وبعدين حنّ على قمينس وقعد في قمينس ولكن هو يبيع في السعى ويريد ان يظهر بعدين « بو نويحي الشلماني » في الدور دار له جواب ويذكر فيه ان الدور منصور . والنصاري كل يوم نظردوهم وتخبرنا على مطيرة عندى في « البيش » والجواب هذا شاله واحد عرفى من زاوية طيلمون وحنّ على بنغازى معه جواب ويجهز للزواج وجاء مع الغنم ظاهر معاه جملين وحصان وفلوس وكسوه لما جاء في الفم فتشوه لقوا معه جواب هذا الكرابنير ( الشرطة الايطالية من العرب ) خذوا الجواب وخذوا الى معه وحطوه في الحبس وسألوا عن الفقى « فضيل الشلماني » ذوله في قمينس وجابوه وحطوه معه بعدها بقى في الحبس عشرين سنة هو والى جاب الجواب كيف بعضهما .  
س . من عام 1914 م ... ؟

ج . نعم . . مشى وشالوه من بنغازى بعد المحاكمة ونفوه لايطاليا وحطوه في جزيرة يقهلوها فنيانا . فنيانا جزيرة في وسط البحر وبقي فيها سبعة سنوات .

س . الى سنة 1921 م ... ؟

ج . نعم . وفي 1921 م صار العفو والى منهم موجود جابوه المحابيس والاسرى والى هناك كلهم جابوه هنا وكل واحد ذهب لأهله ، وبعدين هنا .

س . في اليبيار ؟

ج . لا في البطنان يالا زاوية المرحص ، جابونا احنا وياه للكوفينات .

س . في الشبرقد العقيلة ؟

( 1 ) بداية تكوينها بكلية الآداب جامعة قاريونس سنة 1972 م وقد قامت مشكورة بجهود كبير ومتواضع في مجال جمع ما يتعلق بروايات حركة الجهاد والحكايات الشعبية ، والآداب الشعبي . وقد صدر اول ديوان لها اطلق عليه « ديوان الشعر الشعبي » المجلد الاول سنة 1397 هـ 1977 م منشورات جامعة قاريونس .

ج . نعم هو شالوه وحطوه مع « الدرسي » في المقرون واحنا قعدنا في سلوك وظهرنا من شبردق والتمينا هنا في برقة وجاء هنا ولده « عبد العالي » الموجود وتوا استاجع وجاء وقعد عندنا وتوفي هنا في الابرار ودفن في مقبرة الابرار .

س . سنة كم ياسي الحاج ؟

ج . 1950 م او 1951 م لا . 1953 م اول ماتتوب النواب في اى عام

س . 1952 م ..

ج . 1952 م هو توفي في 1954 م .

س . كم عمره ؟

ج . عمره فوق السبعين - ستة سبعة ؟

س . 77 سنة عمره - هو كان يقرأ ويكتب ؟

ج . يقرأ ويكتب .

س . ويحفظ القرآن ؟

ج . ويحفظ القرآن والسنة ورجل طيب ومتفقه .

س . اشترك في الادوار / هل تذكر اى دور ؟

ج . لا والله امفيت هو طرقة هكاى يحضر معركة والا هكذا ما قعد في الدور .

س . هل تذكر انه حضر معارك اسقفه حاضرها ؟

ج . لا . لاحنا في البطان ساعتها .

س . ماهى المعركة الى حضرها بالضبط ؟

ج . حضر يوم في طبرق يقولوه يوم المدور ويوم الجمعية في طبرق ايضا هذين الى

نذكرهن انا بيدى . وهذه سيرته وحياته .

س . فيه قصائد الاولى « فنيانا » ومتع ياعين ؟

يقول : اللفة « 80 »

خرب	قرايك	دوم	يا فنيانا	
	بلاد	الكدر	والمرمدة	والهانه
الله	يخل	بوقك <sup>(1)</sup>		
	انعن البلاء	في كل يوم	ايتوقك	
وانعن	اغراب البين	صائح فوقك		
	ولايفرحن	ديمة	انساك	حزانة

(1) البوق ، هو مايكتنزه الانسان لوقت الحاجة وقد يستخدم للمأكولات والملابس والاموال .  
ثم ينتهى او يتلف ويقصد الشاعر هنا حلا فنيانا من كل شيء ان لايقى لها بوق

انت بلاد الظلم مكث جورك  
 سبب بعدنا من وطننا وبنانا  
 حرب قرارك دوم يافنيانا  
 بلاد الكدر والمرمة والهانة  
 قال : الله ينجريها  
 من حدها من شرق لا<sup>(١)</sup> ينجريها  
 هذي بلاد لاتعرف الله عريها  
 ولا عندهم ع المسلمين حنانة  
 نصراني ايدن افياشكة يشرها  
 وفيده دفاتر والقلم في دانة  
 يطلبنا على حاجة عطيب سببها  
 وكيف ننكروه الحجر مانجانا  
 علينا الى ما صادقي يصلبها  
 ويخلي كبير الشأن صاغر شأنه  
 ( 94 اللفة )

\*\*\*

---

(١) - لامغربيا « يقصد الى وقت المغرب (لا) اقتضتها الضرورة الشعرية والوزن »



ايوه هذين الى فاهمهم منها .

س . هذه ماهو سببها ؟

ج . سببها يدوى على فنيانا هذه .

س . والقصيدة الاخرى الى جائب عليها الايات ماعندناش ؟

ج . هذه ياراقدة ؟

ج . ( اللفة 97 )

ياراقدة طول الليل هنية  
ياعين نوضى خيرلك من النوم  
قري سوارك واتبعى الوصيثة  
وصل اوقاتك وفرضهن متموم  
عارفين يانك اليوم قوية  
غير الزها والصح لك مايدوم  
يجيك الدوى ومكر يا جهليه  
وتبقى فطليه ما تجيبى سوم  
وفراق النفس تبقى نعش مرمية  
والخفار يحفر والالحايد كوم  
ويجوا لسوالك مسرعين الجية  
ومعاهم حدايد حاميات سموم  
وينشدوك على دينك والاسلامية  
لسانك غرّص والجواب عدم  
فيت الكفن ما تكسبى نقلية  
جميع ما جريتي قبل غير هموم  
واخرى يوم ما غابت عليه قضية  
لاجان لقصى ولا طيور تحوم  
نهار حق فاصل ماتسير سوية  
ولا يعتدى ظالم على مظلوم  
هذى الدنيا مابها غيبة  
وكان تتبعينى تقعدى باليوم  
ايسدوك منها الى حباب لى  
عليهم اصبى العين دارف دوم  
« يونس » الخائل فوق من المعشية  
خزام العدو ساعة اصدار القوم  
« يوسحيف » وجويلة « و « بوجندية »

الى فجوته مسع توارت يوم  
وعليه الى ناره معاي قوية  
فارس القسي في المصخرة والشوم  
عليهم حزين العمر مالي سيئة  
ياعزوة الهافي ان جاء مظيموم  
ياما نزلتوا من افجوج اخلية  
واليوم مالكم بين القرى مقسوم  
« اللفة 119 »

\* \* \*

س . هذه حدها ؟  
ج . هذه حدها .  
س . توه « بوسيف وجويده ويونس » هذوم اخوته ؟  
ج . يونس اخوه وبوسيف ولد يونس واجويده ابن اخيه وبوجندية خوه وعليوه خوه .  
س . لما توفي في 1954م قبلها بعد انتهت الحرب وارتاح الوطن وكذا - هل قيل شعر في فترة الادارة ؟  
ج . بعد الحبس ما قدم شيء .  
س . خلاص مقال شيء هذين هن القصائد المذكورة ما قالش على الابل او الخيل ؟  
ج . قال . على مصراة وهم في الحبس قالوا : اهل مروة يديروا فيها في البادية ما اتحدود ايكسوا فيهم واوكلوا فيهم ويديروا كل شيء قاله او احد شلماني بن عمه من اهل الجبل قاله ياسي الفضيل احنا الله سبيحانه وتعالى خلقنا وقال اشكروني هو خلقنا لكن قال : نريد الشكر واحنا مثل العبيد نريدوا الشكر مصراة هذول ايديروا وايسوا ويفعلوا ومروة ويديروا واحنا ماعندناش حاجة انكافوهم بها الى لسانك هذا تشكرهم الى دار حاجة تشكره ...  
قال :

واللفة ( 137 ) ودي في تشكر لساء ... لكن را ادهاني غايبات

لوتشيت طامع في سعايا ... ولاهنشي حجاج كاذبات  
ولا هم لي من غادي دمايا ... الا مناصب شكر امقابلات  
طري منصور يصرف ع الكبايا ... بجاوي مامل قول هات  
واقف وقف ماهو من السهايا ... ينشد دوم ع الى عايزات  
عطاه الله ماوعامل جنايا ... يرضي في القلوب الشاكات  
وبويخنوق كساي العريا ... وحتى هناك عز الرايات  
والسيد حسن طالع له اعنايا ... واصرف مايعد الخاسرات

الى معلوم يروى الواردات	...	"ورجب على يوسف" كبير الخطايا
بهيرة في السنين الكاملات	...	"وبوكميكيس" كبير الوسيا
يردن كل خير محملات	...	يجن بالرار ووجوهن كبايا
ديمة هو خلاص الوحلات	...	"وسليمان هو حد الغوايا
يرضى في قدوم السائرات	...	ان جاء فوق مرفوع الشوايا
يوم عطيب يوما قيل مات	...	اكسرنا فيك انجا شطايا
ايباتن فوق طازه سامرات	...	الله الله ياقلت صبايا
خير غير ايامه هالبات	...	والزروق غالبهم اكفيا
فراع طوال من على النبات	...	اجواد الكل مامش زدايا
ولا هم قداسي احبسوا شايلا	...	مايستاهلوا حكم الجنايا
والا في قهواى مروحات	...	ودك فوق من سبق علايا
انعنهم في تساكرو جايات	...	بجاه الله واخوان الزوايا
ماهنش حجايح كاذبات	...	بعفو عموم صادر بالنوايا
وانهار سعيد يبقى ع النبات	...	ويبانوا في محلاتهم هنايا
	...	

«اللفة - 163»

س . من منصور؟  
ج . منصور البابور هذا لعيلة (البابور من الجهى راهوا من بنغازى

هناك حوش هذا عمر البابور هذا بوه قالوا يقطع في الشارع من هكي والشارع  
من هكي ، ومنصور هذا في الحبس وبوه يرسله كل شهر كنتك ماتطلب فلوس  
ياخذوا عليك مصراة المخطبة يصرفوا ماتصرف ماوى على قروش البابور اصرف

س . «وبو مخلوف» ؟

ج . بو مخلوف هذا لعيلة المخلوف «عبد الله مخلوف»

س . ولد السيد «حسن» ؟

ج . هذا «حسن» ابو ليفة

س . في بنغازى ؟

ج . نعم .

س . «ورجب على يوسف» ؟

ج . حتى هو سافر من هنا .

س . «ابو كميكيص» من ؟

ج . عيلة «بوكميكيص» هنول

س . «وسليان» هذا «سليان امينه» ؟

ج . «سليان امينه» .

س . والزرروق من ؟

ج . والزرروق هذا شائب من بنغازى كبير هلبات الى يقولك الحيرة غير ايامه هلبات .

س . هنول الكل كانوا معه مساجين ؟

ج . كلهم محاييس معاه .

س . الزروق من ؟

ج . الزروق والله كنت اعرف اسمه الى والعليم الزروق الرعيسى .

س . اقامة الفضيل . مقيم في البطان ، هل جاني الى طليمة برقة ؟

ج . لا مفيت وهو طرقي عمره ماجاء .

س . هو ادرسى ؟

ج . نعم لكن هو من يوم عاش بوه خال عمة بوى وديمة معانا هناك مقيم معانا .

س . ماذهبش لمصر هو ؟

ج . لا . لا اثناء النفي .

س . هل بقيت مدة طويلة في معتقل المقرون ؟

ج . قعدنا فيه ثلاث سنين .

س . هل ذكر شيء عن المقرون ؟

ج . لا ، قال .

اللفة - 191

انساعموك يا عيني ان كان اعميتي  
 جميع الهوايل كلهن راعيتي  
 انساعموك من جدى  
 جميع ماجرى فى هالوقت ايردى  
 لوما امدعه والدى من جدى  
 من بثر باللفا والله مارديتي (201)  
 بثر اللفا وبوالفاع هذا ياله الخط ما بينا وبين السلوم

(203) تمشى للوطن سائب ماعليك تعدى  
 ولاع المنافع يحبسوا حرיתי  
 انساعموك يا عيني ان كان عميتي  
 جميع الهوايل كلهن راعيتي (205)

\* \* \*

ما هناك ولا حاجة موعظة وتوحش وما يرددها  
 س . قالها فى المقرون هذه ؟

قال

بنيسة :  
 سماح  
 انساعموك (207)  
 مظلومة  
 حالك الى باين الله لا يدومه  
 لاليك حبايب ينظروا بالحومة  
 لاجار يفرح لاعليه لفيتي  
 لا تخضري ميعاد فيه عزومة  
 ولا عليك ناشد غايبة لاجيتي  
 الا مقمرة ديمة مثيل البومة  
 وامفيت البكاء معاد شيء قضيتي  
 انساعموك يا عيني ان كان عميتي  
 جميع الهوايل كلهن راعيتي  
 قال راضن عليك عتابي

.....  
 راضت عليك اللومة (216)  
 من الراى العاكس عارفك مظلومة

نلقا انك انت بيده خديت الحومة  
 لوما قد عتك كان بي مشيتي  
 قدعة عطية لازمة الجرومة  
 ريتك صلبتي الراي واجليتي  
 انساعوك ياعيني ان كان عميتي  
 جميع الهوائل كلهن راعيتي  
 سماح بنية  
 سماح جد مانحسب عليه خطية  
 انا الى ايامي بارمات على  
 مع كبر سني نقصن عافيتي  
 وقبيت زابط الرفة اتقول حويه  
 شداد للعيال اليوم لابن اخيتي (227)  
 تردع وقعد مع ابن اخيه بدأ يشد في العويلة  
 قالها :

سماح ماله وصايف :  
 انساعك اسماح ماله وصائف  
 غير في ايامك في اذنوب خائف  
 يامنظر نابك انجوع ظفايف  
 وصحاب يفرحوا بالجد وين طريتي  
 من يوم فنيوا ماجاك منهم ظائف  
 وحتى كي طريتهم ايام انسيتي  
 ياما فرقت مامن قلوب ولايف  
 الدنيا قليلة خير يالوريتي  
 انساعوك ياعيني ان كان عميتي  
 جميع الهوائل كلهم راعيتي (240)  
 هذا قاله وهو في الشردق ..

س . في ذلك الوقت كان شعراء كثيرون فهل هناك كلام بين الشعراء  
 ج . ماختلط بينهم .  
 س . هذه هي قصائد الفضيل فقط ؟ هل تذكر اخرى ؟  
 ج . فيه قول على الوطن وعلى حب الوطن وهو ديمة يجيب على البر هذا وغالى عليه مشي  
 البر لكن البر انتم ماتعرفوشي لكن هو يقول :  
 (258) يانظار شين الموح ماطقنن  
 تهاتن على البطنان وتريدنه

تريدن                      الصد                      الغالى  
 مرباكن الى عشتن عليه التالى  
 اتسيلن عليه ادموعكن شتوالى  
 ويرقن عزايكن بعد تطرته  
 ياما نظرتن فيه عز لىالى  
 بيت يعجب الحضار وين بننه  
 واليوم حجف مظلّم والحديد اقبالى  
 لاحبيب يرعىكن ولا ترعنه  
 الدنيا زهاما مايدوم لوالى  
 كم من قصر هداته وراح مدنه  
 ايعزيكن امسمى فات وطنه خالى  
 وباتن وشاشينه ايتامة منه  
 خالى الى صيته تقول اهلالي  
 مصفه تقول حليب ماولدن  
 ربى اليتامة والكبير البالى  
 ولاهو بخيل ولاو قليل عنة  
 شريف اصل واخوان سيد مثالى  
 ويفك اللواية الواحلات إنجنه (272)  
 هذا هو خاله جدك صالح الشريف .

(278) قال

اتهاتن                      ديمة  
 على عد تمت لظلال هى وكريمة  
 ياعون من قابل ابكم العليمة  
 وغوط بوزريقة لوراء فتنه  
 وحازع ليمنه قويت فيه ارجيمه  
 وروس العواصي هن الى حدرنه  
 وتاق على الكرومة وقيس هالمشيمة  
 ترابن ادر الهازلة بالبنه  
 حتى اثمت روجه بالمات رحيمه  
 لو كان الصبايا هن الى دفننه  
 ياانظار شين الموح ماطقتن  
 اتهاتن على البطنان واتريدنه  
 ياانظار محاييل  
 مازال ديمة دمعكن متسايل

ينزل مع روس الهدوب سكايب  
زميئة اضايق ماقدت انعنه  
انا هو الى صوبى معاكن عايب  
الغربة تخلى الكبد كيف الشنه  
اموالفات فى الفنايت ايام عجائب  
وهذاك الخبر معادش تلقنه  
الاصحاب موتوا والوطن راح داهيب  
الدنيا مشومة شلظها ريتنه  
وانا اليوم ياوراسى امبقع شايب  
ولاخير فاللى ما الشيب ايعنه  
اخيار البنادم عند كبره تايب  
إيحافظ على ورده ويرعى السنة  
ياانظار شين الموح ماطقتن  
اتهاتن على البطنان وتريدنه  
ياانظار سـمـاره  
خديتن الليل ودمعكن يحارى  
يخطر عليكن ماتقول توارى  
ابطولت الاجالى ماسهيتن عنه  
صلاب الحلب والمنطقش والقاره  
اويو مبصعه او جوف الخلاء تطرنه  
مزاته وبو قيله انسى القاراه  
ملفا كحيله عز ماتمنه  
وطراد لاجادن عليه امطاره  
وآن المساء يطلق ارياح الجنة  
وراس كيكان وقبله الخواره  
وحتى بو معيط وبو الغرايس كنه  
ايفن على الشاغرى واقتاره  
وحلق من قبله اكبار ايجنه  
وعين جنة فوق الصفاء الشراة  
يشبه قزاز الهند واصفاء منه  
عليها بنات القود دارن داره  
شوشة احوال مع خبر سمعنه  
يانا الى شينا اليوم جداره



فات الحديد وباب بسكارة  
 لا علم يأتي لآخر من هلنا  
 وردان في كفره قديم امعنه  
 وقبينا بعد خوجة اليوم فقاره  
 وفقد الغوالي هو الى شرّ لنه  
 يانظار شين الموح ماطقتن  
 تهاتن على البطنان وتريدنه  
 يانظار طب لعداي  
 انقنكم ديمة معكم بدادي  
 نلقاه انكم برتن من اول بادي  
 وايش عندكن في الغرب لين اتجنه  
 لاني عقوري لاسلوق بلادي  
 لكن نصيب اوجابني ندنه  
 هنتي مواكيري او دور اسياي  
 وتمت بلاد الكفر هي موطنه  
 يانظار شين الموح ماطقتن  
 تهاتن على البطنان وتريدنه  
 يانظار حيهها فيكن  
 ديمة ادميعتن على ميء فيكن  
 لاعاد انسكتكن ولانطريكن  
 لو هلهود احدى سيلتنه  
 وانجاء عفو من دون العرب ماايكن  
 لين هنا هامي حكمكن توفنه  
 غالباتي ديمه انطرد فيكن  
 تختارن الرأي العفن وديرنه  
 أيام قبل غايتهن لكل عاطيكن  
 وكم من حال مودايم الى ريتنه  
 واليوم اضبحن بالكن يروف عليكن  
 امفيت من خلقكن ما هناك محنه  
 يانظار شين الموح ما طقتنه  
 تهانت على البطنان وتريدنه



يانظار كنكن في  
 امظيلم ما معكن وطيت خطية

انتن الى ديمه تقودن في  
 والخاطر اتبعكن لين ظليتنه  
 خرابت قمينس مابلاداً ليّه  
 لو مانظر كن طاش وتبعتنه  
 هذا عشم من بيعت المرخيه  
 الى حقها في الغوط ودرتنه  
 كل عام تجاغم على قسميه  
 جميع البحر والبر خربتته  
 واليوم يا رزال الدور زاد على  
 واش عاد احداى الا حديث عنه

هودائها يتزوج ويطلق .

س . كم تزوج مرة ؟

ج . تزوج يحيى عشرة مرات وعدا الولية هذه والباقيات كلهن من البطانان .

س . زوجته متوفية او حية ام عبدالعالى ؟

ج . متوفية .

س . توفت بعده او قبله ؟

ج . قبله واخذ بعدها ثلاث صبايا اخرى ، واخذ من قبلها يحيى ستة اوسبعة والحاصل  
 مزواج .

س . انت ذكرت العديد من المناطق ؟ اذكرهن لنا ؟

ج . أسامى وطنا اباروعيون .

س . كلهن في البطانان ؟

ج . قدام العين ، عين الثنية هذه عين الغزالة ومزاته هذه اذا جاءت المطر تمتلىء ماء وتبقى  
 الابل عليه ، قبل الثنية في الخزمه ومن الخزمة مغرب من وطن البراءصة جاى هذا  
 يقولك «صلب الحلق» والحلاقة عند وادى المرأة دون الدف اشوى ، والمنطيس هذا  
 جوف وراء قارات مريم يقولوله جوف المنطيس اماكن كلهن<sup>(374)</sup> .

وقد تناول الاستاذ سالم الكبتي بعض الاسئلة حول بعض الشعراء الشعبيين في مواضيع  
 مختلفة ، ربما يكون الراوى قد حفظ عنهم اشعارهم الا انه اجاب بالنفى غير انه اشار الى  
 الشاعر بلحوق ومناظرته مع ارواق درمان وغيره من الشعراء حول هدنة ادريس السنوسى  
 مع الايطاليين ولمن يريد الاستفادة عليه ان يعود الى المقابلة بالشريط رقم ب / 2 جامعة  
 قاربونس لجنة جمع التراث بالمكتبة الصوتية مركز دراسة جهاد الليبيين ضد الغزو الايطالى .  
 ش . 2

وفي الشريط ب / 3 يواصل الراوية عن شعر فضيل الشلماني فيقول :

بداية الوجه اعادة لقصة التسليم مع (عبدالكافي الكزّه) وقضية الرسالة وقد سبق

الاشارة اليها لهذا رأينا بانه لاداعى لاعادة تكرارها واقتصرنا على ذكر بقية قصائد (فضيل الشلماني) حول السجن والنفي من اللغة (19) اعادة القصة - وهذه القصيدة هي بداية المأساة حيث سجن ثم حكم عليه بالنفي والقصيدة هي بداية حياته المأسوية :-

24

كان له صديق يقولوله (نويجي الشلماني) شاعر في الادوار (نويجي الشلماني) هذا عنده زرع في قمينس في هذاك الوقت وهو قعد في الدور عسكري والفضيل الشلماني يبيع في الابل والغنم يريد يمر الصيف ويرجع «فنويجي الشلماني» ارسل له جواب من الدور يسلم عليه ويقول له الدور طيب وبخير ومنصور وظم روحك وخليك على ، الجواب شاله واحد منحدر من الادوار من قبل وجاء لطيلمون وجاء لواحد عربي نازل عند الطيلمون ورجل خواجه عنده غنمين وعنده ابل وحصان وفرس امام البيت وعنده ابيه وامه حيين وزوجته صغيرة وعنده اوليد وابنية وخاطب وليه جديدة وقارى فيها الفاتحة ورافع جلب ماشي القدام ويريد يحدر للبلد لشراء الكسوة للمرية الجديدة فالراجل هذا جاء للبيت عزموا عليه قعد تغذاء مع التريس وقال فيكمش واحد يريد يمشى لقمينس قالوله لا والله فينا واحد يريد يمشى للبلاد قاله تشيل هالجواب هذا وكان ريت واحد من قمينس تعطيه له ، وقوله ينشد على واحد يقولوله فضيل الشلماني يعطهوله رجل لايقراء ولايكتيب لا هذا ولا هذاك ما يجيبو منه علم اش فيه اخذ الجواب وانحدر ركب على حصان واخذ معه اربع اجمال واخذ معه خدام اثنين ولا ثلاث وحدر للبلاد في جرت الجلب وباع الجلب واسوق مايريد من الكسوة ، الجواب معاد خطر عليه بكل شايه في مخلاته لين ظهر وين ما جاء للفم فتش في الفم ماكنوش يفتشوا في هذاك الوقت لكن بالصدفة فتشوه اجمال محاميل وهو على ظهر الحصان فتشوا لقوا الجواب في مخلاته قرؤه لونه من نويجي الشلماني للفضيل الشلماني في قمينس ان الدور منصور وانه وتخبرني على حالكم وتخبرني اولم روحك ، على طول حطوا فيده الكليشة وخذوا الحصان والجمال وحطوه في الحبس ودارو تلفون لقمينس انشدولنا على فضيل الشلماني وجيبوه لنا هنا ، قال انا بيدى خلعت ملابس نريد تنام في الدار الى انا فيها والباب يطق ظهرت لون كرايشير اثنين وزابطيه انت هو فضيل الشلماني قالوله بالله قالم خلوني ناخذ دبشي قالوله لا معادش فيه كلام لاترد حطوا فيده كليشه وشالوه حطوه في دار الى عند الصبح وقال انا انخمم اش داير واش كذا يحقوا في انبيع والاكذا ليلة هذيك مارقدت ، جئت الصبح شالوني في دار وانحدرت جينا للحيش وقال ودخلت مكلبش قال يحملوا هالباب وهالباب قال رابع باب لين خششوني لهذيك الدار لونه فيه راجل مربوط بكراعه وايديه مكلبشينه ويكي ردوا الباب الاول والثاني ، والناس كانت عصاره ولا عمرها حكمت ولا عمرها نظرت حكم ، والله نريد نبيكي حتى انا لكن يعرف ان البكاء ما يدير شيء قال بعد ساعة أو ساعتين والرجل يكي قال وانا بيدى رد لي عقلى وقلت له ياراجل سبحان الله شن يكي فيك الحبس هذا صنعة الرجال وما يجيه الا الرجال والحكم حكم الله وكل شيء له اجل وينتهى فيه ولا تخاف وشدد عزمك قال قالى انا والله معاد

نظهر من الحبس ، حلفه بالله بالله معاد يظهر وفعلاً صار ، ياراجل شن دوتك وعلاش  
محبوس انت قاتل او داير شيء كذا قال حكالي على القصة .  
قال ساعة ساعة يبدأ يكي . قال عاد أنقول<sup>(1)</sup>

اللفة 92

الوجه 1

بتنا نخمموا والقلوب شفاقة . . . والكبود راحن في الفواد تريد  
مفيت زول واحد ما معاي رفاقه . . . مقرون في ويحنن تقول غديد<sup>(2)</sup>  
في حجف ضيق زارتنى طاقة . . . وم العصر ياتون بقفل جديد  
ونبقى مطوح شبهة الشلفاقة . . . لا عند لمباكر وهو في ليد  
الدنيا قديمة للعرب فراقه . . . ان زهيت ايام تدور بالتنكيد  
ما عمرها حنت على بوناقة . . . ولا من ضنا حتى مغير اوليد  
ولاتروف في عيل صغير جناقه . . . تشيل والده وتسببه للكيد  
ديما ادير ريجها شلواقه . . . حتى ان قلت حلوة مرها في ليد  
ياما خذت ناشي وهو بأشواقه . . . مازال تعاب شورها ويريد  
وما من فتاة تموج بالعلاقة . . . وكل يوم تلبس في بيان جديد  
بعد زينها تمت تقول حراقه . . . جنها ايام الحزن والتهديد  
وياما خذت باشا كما الغنداقه . . . وحكم على لوطان كيف ايريد  
باد وانصرف تمن امغير اوراقه . . . والامغير قولة كان هنا سيد  
المولى كريم واجدات ارزاقه . . . وحاسب ايام العمر بالتفقيده  
يسلط على هالخاربة طرشاقة . . . ومدفع يناوب يشبه الترعيد  
نين يقطع الطليان واللقاقة . . . الى كملوا السلام بالتحشيد  
والا سيدنا هالي عليه زماقه . . . ايجيبه الله يقبى نهار سعيد  
الى لا شكح سيفه كما البراقه . . . ومايم الكفر ييقن احداه نضيد  
على باهي التحرير وفي ساقه . . . ومعاه جيش من المولى بوسط عبيد  
يكمل كلامي ربنا بأصداقه . . . ويحيد حكمهم من وطننا تحييد

والملف 122

1 ( هذه القصيدة نشرت بديوان الشعر الشعبي

المجلد الاول ، كلية الاداب لجنة جمع التراث

جامعة قاريونس ( 1977 ) ص 170

جاءت كلمة فتاد بديوان الشعر الشعبي بعد اعادة التفرغ اتضح انها فتاة وليس ( فتاد ) ص 170

وبعدین قال قعدوا یحددوا فینا ستة شهور واحنا قعود فی الحدید یحدد فینا نصرانی قصیر بطنه کبیره اسمه «دریو» هذا کان فی النصاری ، وین ما یجی یحدد فینا ویشکی الواحد من الحدید ایقوله هذا ایش قال الوردیانی الی امعاه یقوله هذا قالک رابط علیّ ارخی علیّ اشوی قال یزید طقه أخرى ایدینا هذین قال طارت جلدتهن سود تقول محروقات بنار بعد ستة شهور جابونا للمحاكمة تربیونار حربی وقال کل یوم نقتطعوا فی هذاک الوقت ، یسلط فینا تعذیب وخمسة وعشرین سنة ماشی بهصیفة وماشی ولا واحد ظهر بری من تلك المجموعة قال حاکمنا نحنا جابلنا الجویب هذاک وحطه قدام الطاولة قدامه انت فضیل حسین الشلمانی «قلت أنا فضیل حسین الشلمانی قاللی انت والی جاب الجواب حکمکم تربیونار بخمسة وعشرین سنة الاثنین کیف بعضکم عندکمش کلام تقولوه قالوا شن انقول حکم الله رضیتوا مشی شوری .

قال ردونا للمحس وقالولنا ساعة کذا کذا ترکبوا وتمشوا لایطالیا الساعة الی قالولنا فیها اللیل هذاک ما ردتش جابونا وحطولنا فی البابور وانتقل فی ایدی لونهم طایرات اتقول محروقات بنار جابونا للبابور وركبونا حينما ركبونا عند المغرب حلوا وعدوا قال نقول .

154

يانا الی طابن الیوم یدئ . . . وراحن تقول محروقات بنار<sup>(1)</sup>  
 داپرین بی دریو والوردیة . . . هوذیل من غادی وهم کفار  
 الواحد یمت ایدی بعین قویة . . . وان کان قلت یانا یکرب المسار  
 شداد عزم ما فیهم حنون علیّ . . . خاطر جدودی خربک دوار  
 بجاه من قروا فی الحزب وان عشیة . . . وقاموا صلاة بوضوفی لفجار  
 سلط علیهم جیش برآنیة . . . بقوة وتاما یعرفوله کار  
 میتن فرقاطه الی حربیة . . . ومیتن حایم فی السماء طیار  
 من فوق یفلتن فی قازکی لمویة . . . ومن اوطی مدافع یضربن بعیار  
 الی بیان بره یقرضوا طاریه . . . والی فی البلاد تشیط فیہ النار  
 ویصیریوم متسمى علی دقلیه . . . وعطابة علی قلة تربیونار  
 یحدر علیه السید من قبلیه . . . کما یحدر السارح علی الدوار  
 بالفین کوت مطبقات حتیہ . . . یعیط عیاط الغول فی لبرار  
 والفین شوعه طانجه معشیہ . . . علیها ولد مسمى یتاقی العار  
 واخری ثمان الاف م الرسمية . . . ضنوة سعادی روسهم حسار  
 کلهم اسلام مطیبین النیة . . . قساوی قلوب ونصب فی المنظار  
 وینصر الله اعلام لسلامیه . . . ویجیب الهلاک لفیة الفجار

(1) هذه القصيدة من نظم الشاعر بعد ان قررت سلطات الاحتلال الايطالی نفيه الى جزيرة فاغیاننا سنة 1914 سبق وان

نشرت هذه القصيدة بديوان الشعر الشعبي - مصدر سابق - ص 172 .

ونجى غضب عنهم مى بطيبة نية... وبيات حكمهم فاسد اديان الفار  
ونقطع ريف وليد شوفه بى... ونخبر على مدار فى وصار  
من يوم مشيتى الى عند يوم الجية... مكتوبات فى دفدر اسطار اسطار  
بابورهم عيط يحدر فى... نوى شيلنا من وطننا العقار  
فيه طرحونا فى عصر عشية... ولمد مخاطيفه نوى لسفار  
وخذ الليل متكاسى بجد ونية... نوى البعد لاجوبن ولاحتار  
وباتن غضابا حائرات على... وحتى لوتباكن غضب عالنظار  
ولاعاد تنظر الاسما وموية... والا حوت يزاقب وموج كبار  
داخوا ضنا لجواد من غلبية... عاشوا عصر ما يعرفوا القهار  
جانبنا على كوزة عرب روسية... الزين تشكره حتى من الكفار  
ع الحال سبحونا عند وان الجية... وحتى الدبش حطوه فى مبخار  
ولاهناك زول ولا وبناموسية... ولقيت الصوانى دايرات اسطار  
وكل نفر منا كلفوه بشية... ولاعاد منا جار يطلب جار  
ومنها سرينا سرورة جهمية... مقرونين فى سدئ تقول مدار  
حطونا على شيطي عمل دمية... شغله مخالف يعجب النظار  
حسه تقول زنيف رعاديه... وحرك دواليبه كما البندار  
ياما جاء على بندر عجب ساطيه... سبحان خالق البنائى والجيار  
ومام البلاد الى مغير كويه... زراعة سوانى روسها حसार  
تجى فازعة وكلها تعرش فيه... كما راس ضبع وجاء قبال همار  
وما من جبال تقوم غيم عشيه... يبانن علينا دايرات ادوار  
ع الحال فى ساعة يحن قبلية... يعيط كما فزاع يوم مغار  
باعد الناس الى عزاز على... لكن صبرنا والعزوم كبار  
طالبين فضله مايكن على... خالق الخلايق على المقدار  
ونزيده وجاهه بالرسول نبيه... الهادى الى شاعن عليه انوار  
وسيدى الى فى الوطن طق زوية... الى الناس تتعبه تريد مزار  
ان شاء الله فى ساعة يعاود بى... ومعاى جملة المسلم الكل حضار

(اللفة - 222)

قال حطونا فى بلاد يقوها فنيانا وفنيانا هذه جزيرة فى وسط بحر واحنا قال فوق منا  
طابقين واحنا فى الطابق الاسفل ، قال وخششونا بالخمسة بالخمسة مع بعضنا كل خمسة  
مع بعضهم ولبسونا لبس الحبس هذا وحسنوا لحيمهم واشناهم يظهر عليك الواحد من يوم  
ما نعاش وهو معاه وانت معاه مفيت أكلمك ما تعرفاش ، قال من الجملة سليمان منينه من  
عرب بنگازى رجل باشا قال اصادفنا فى لرايا قال يضر بونا ساعة ونصف فى لرايا برة فى

الصبح (ساعة تنفس) المحابيس يخلطوا في بعضهم قال وهو كلمنى في حد الدنيا ياسيدى  
الفضيل قال قالولى الجماعة . . أيكلم فيك سليمان منينة قال اش حالك اشنى هالعقابى خير  
من الاول ما عندك لنا شىء عزاء فى لحانا وشنا بنا قال قلت له والله يسترربى ، امباكر قال  
تلقينا فى لاريا كل يوم لرايا قال نشدنى اخرى اشنى درتلنا قال قلت :  
(249)

أنا بايت انفكر خاطرى متعكر  
صباح يبدد فى الخلا ملىان  
شفلى مطراهم .. باهين وتاهم  
الى هم ضراهم .. ساعة الدهشان  
ما من الخيرة .. عند قوله ديره  
اليوم فى دزيرة .. فى بحر طليان  
أن ناضن بدير .. والكلام قصير  
فارسه ايطير .. ساعة الزنان  
لموهم نصارى .. كلهم فى حواره  
خلوهم جضارى .. حالهم تعبنا  
حتى ونا معاهم .. شاطنى مطراهم  
تزيينه لحاهم .. غيبت لدهان  
اسماح المسائل .. هل البيت الخايل  
ركابة عريض الصدر بومسلان  
ان زغرت النوى بوقرون ملاوى  
ونقر الداوى خالى الجيلان

يجنه طرابة دايرات طيابة  
ركبهن كما جظة قطا عطشان  
على كل قبة باللب تجبى  
وان تاق ينطحنه مايولن عنه  
ولايل على الكفار عدو لديان  
ان جرد وجاهن قادات وتاهن  
محاميل من موزر ومن يونان  
ياما كسرنه نين راح مدنه  
نين عفن الغيطان والوديان  
وراحوا دقايل غالبين الشايل  
لاقن جيوش تقول غيم امزان

تسليم العصايا مولهم في غاية  
لكن قسامي جى هالكان  
مصراته بلادي جاين سدادى  
ريت السنوسى جبر وسليمان  
الاركان المجالس قاعدين كرايس  
عازلينهم كى عزلة الجديان  
حاكم عليهم حق موعاطيهم  
ما جاء على عهده قليل امان  
خلا انساهم دايجات بلاهم  
الدايم المولى يا كبار الشأن  
ياهل مراتب م القضا للكتاب  
للمدير لباشا فلان فلان  
وياهل تجارة مى قروش وباره  
ذهب صافى صاغ كيل بالميزان  
وياهل لفلاحه فى وطا السباحة  
ليش فى علاوى وليش فى وديان  
فى وسط برقة حاملين الطريقة  
سماح الوتابره وفى الحيشان  
وياهل علالى مزوقات عوالى  
ديما امالى عز للضيفان  
خلوكم خنايق حالكم مضايق  
مالين من الكسوة ومن الحسان  
يفرج عليكم راه موناسيكم  
قوى ربنا حاكم على ماكان (299)

\* \* \*

المفيد قال معانا واحد صديقنا وصاحبنا وعشيرنا من طبرق يقولوله الشيخ « عثمان الشامخ » رجل ، له اسم ومكانة فى مطرحة ويبداء يحكى للمحابيس ، والمحابيس يبدوا يقولوا كذاب هذا مغير تغرب واكذب واجعته هو يسمع فيه منهم المحابيس ، المحابيس مايقدر واحد ، قالوا يقولى زعمة ياسيدى الفضيل مايجينا خبر من وطننا ولا جواب ولا واحد يجينا يخرفنا على هلنا ونخرفوه على حالنا هذا قال كثر على قال ديمة وين مانجى وهو مرقد احدائى قال يقول والله يا سيدى الفضيل والله لو كان ولو كان ، قال يوم جينا قال قال ونبي ماريت حد قال قلت له اليوم ريت طوير صغير وقال قلت له ارسلت معه جواب لأهلى ، ونبي ، وانظنك يوصله قال يوصل واش قال قلتهم عاد قال قتلته :



( 325 ) يا طير يا طيار يا حيم السما  
 يا الى خلق لك ربنا جنحان  
 تعال هنا نشكى لك على حال ماجرى  
 راني غريب وانت م الحبان  
 يا خوى يا مشكاي راح لوطنا  
 بلغ سلامي والسلام امان  
 سلم لي على الجواد فرسان القسا  
 حماة الصبايا ساعة الزنان  
 على كبارهم وصفار والى فى اللقا  
 وجار جارهم والى يلحظ النيران  
 وعلى وطننا كله عموم عليه ولا  
 حتى كلاهم والذئب فى الوديان  
 وان كان ينشدوا على الحال فى حالة الكدا  
 مرايف عليهم خاطرى ولهان  
 بعد ايامهم والله لا ربنا زهاء  
 ولا رجلا جالت على جيران  
 فى حجب نازل فى تسابيع الوطا  
 مظلم علينا مالشمس تبان  
 مسكر بباب حديد واقفاله قوا  
 والى تنظره عيى الكل طليان  
 اول سلامى فيه من ساعة البدا  
 لعيت العبيدى هم كبار الشأن  
 يا بعد ما علمتوا الى صار عندنا  
 كسوة لعادى فوق من عثمان  
 لكن ثقیل الروز صابر للقضاء  
 غلى قلوب الخافين رزان  
 ونتنى بعيت رفاد سمحين الوتا  
 مناعه الى خايف ذرا البردان  
 وقل لهم حسين تعيش لله ماخذنا  
 والى بقى م الحى للفنيان  
 الدايم الله باكمل العرف والبها  
 لديد الطبايع ماعلينا هان  
 تراساً يردّ القوم فى ساعة البلاء  
 ودك يجى فاعز وهو عريان

والساعدي اللَّافِي عَالِي النَّقَبِ وَالنَّبَا  
 رِكَابٍ مِنْ تَوَالِي سَمْحَةِ الرِّدْحَانِ  
 يَاعِزْ ضَيْفَ اللَّهِ فِي الْكَرْبِ وَالرِّخَا  
 يَابُوا فَرِيقًا يَشْبَعُ الْجَيْعَانِ  
 مَاكَرَهُمْ شَيْءٌ لَا وَلَا عِيَاظُ وَلَا شَلَا  
 كَارَهُمْ نَوَاجِعُ يَضْبَحُنَّ طَيْرَانِ  
 يَجْنَهُنَّ مَعَاذِي مِنْ هُنَاكَ وَمِنْ هُنَا  
 هَانَاكَ تَبْرَأُ عَجْرَهُ الْحَبَانِ  
 لَوْ كَانَ هُوَ ضَنَا لَجَوَادٍ لِلْبَيْعِ وَالشِّرَاءِ  
 غَالِيْنَ مَا هَانُوا وَلَا بَثْنَانِ  
 لَكِنْ إِلَى قَدَرٍ عَلَيْنَا بِالْخَطَا  
 لَيْنَ جَابَ تَرْبَتُهُمْ لَهَا الْمَكَانِ  
 عَالَمِ عِدَادِ الْخَلْقِ وَالنَّجْمِ فِي السَّمَاءِ  
 وَعَالَمِ إِلَى صَايِرِ خَفَا وَبَيَانِ  
 مِنْ غَيْرِ رَبَّنَا مَالِي كَرِيمًا نَطْلُبُهُ  
 صَاحِبِ الْعَطَا وَالْجُودِ عَالَانَسَانِ  
 يَأْتِ بِعَفْوٍ عَمُومٍ يُطْلَقُ سَجْنَانَا  
 وَيُفْرَجُ عَلَى الْإِلَى خَاطِرُهُ مَلِيَانِ  
 وَيَمْحَى سَوَايَانَا وَيَغْفِرُ ذُنُوبَنَا  
 وَيَجْعَلُ اخْتَامَنَا عِنْدَ الْمَمَاتِ إِذَانِ  
 هَذَا جَوَابُ وَالصَّلَاةِ عِ الْمَصْطَفَى  
 نَبِيِّ دَارِ لِمَهْ كُتِبَ وَاسْنَانِ (389)

\* \* \*

قال قعدنا في الحبس اربع سنين على مايجن من هالجوابات قال لهل المحابيس هذول قال  
 ماريت جواب لواحد منهم دائما قال نهار الاحد نجى للكابو امتع الحبس ونقول انا بيد كنى  
 لا جاني جواب ولا ولا قال ديمة كل حد قال يوم وقال وهو يطلبني طلبني قال جيته قال قالي  
 انت لك زمان تقول ما جانيش جواب كم سنة وانت تقول ما جانيش جواب قال قلت له  
 ايوة ديمة نشكى لك وتقول ما جاني جواب هو اهله مشرق في البطنان وهو انحبس من هنا  
 ماعا رفينه وين العرب ساعتها ماداروا شيء قال لونهو جواب دايره لى اخ فى درنة وقال ولونه  
 يقول لى عزاك الله فى خالك صالح الشريف وعزاك فى خوك يونس وعزاك فى بوك عمر  
 وصبايك راهن أزوجن الاثنين كتبن غيبيتهن زوجين واولدك مازال حى وحاصل ، قاله

عندك الجواب شيله وعدى يلله ، قال جبت هذاك الجواب وقعدت على روشن عند راسي  
قال قعدت عليه قال وقعدت نقرأ في هذاك الجواب قال ادموعى ماكفن بكل ، المحابيس  
كنك يا سيدى الفضيل قلت لهم هكى صار وصار قعدوا يعزوا في ، اصحن عيونى  
طابقات قال هذاك الليل مارقدت اصبحت عيونى طابقات ما نحل فيهن الآ بالغصب قال  
عاد نقول :

( 434 ) يانا الى عيني تسمّر فيه  
وعقلى عليهم كل يوم اذكار  
يجيبن الى مدعاه موبانيه  
امغير كان في الفايث احدهن جار  
ويجيبن بعاد يقربنهم ليه  
نحس لين في جوفى ..... ( انقطاع )  
الى صيته تقول هلالى  
مصفى تقول حليب ماهو مدنة  
رباى اليتامة والكبير الجالى  
هو بخيل ولو قليل محنة  
شريف اصل واخوانى سيد متالى  
يفك الوايا الواحلات بحنة

سبق وان قيلت هذه الابيات ومنها هذا البيت شريف اصل الخ اذ بدأ الراويه يكرر  
قصيدة سبق وان قالها بهذه الرواية وعليه رأينا عدم التكرار الذى وقع فيه الراوية « اللفة  
278 » وحتى النهاية اللغات الوجه الاول 488 ——— « ..

بداية الوجه الثانى :-

فى بداية الشريط يعود الراوى الى بقيت القصيدة الا انه بدأها قائلا :-

14 - يانا الى عيني تسمّر فيّة  
وعقلى عليهم كل يوم اذكار  
ايجيبن الى مدعاه موبانيه  
مغير كان في الفايث حدهن جار  
ويجيبن بعاد ايقربنهم ليه  
نحس نين في جوفى تشيط النار  
ساعة على ساعة تصير سخية

عليهم تسفى دوم ليل نهار  
شرب دمعها وقتن ازعم مافيه  
غراغيز يسقن في قصب خضار  
وين مانقول ياعين يامدعية  
راك تنعمى والى م قدر صار  
تقولى خطاني ليش تنهى فية  
دموع الغوالى حق ع اللنظار  
وياخاطرى راهى عليك خطية  
تهاتيبهم في كل وان جدار  
مغير شبت ماتقضى ولا مقضية  
عليك باب باقفاله وكم دوار  
وديمة قبالة يبرموا وردية  
على اثر العداهو جنسهم كفار  
واتق مفيت الله يروف عليه  
هو الى كان اذن بش يندار؟  
ونلقانهم بعيد اليوم عاجندية  
ياصاحبى فرقت طرب لنظار  
هالغوش لاكابر ولا عشية  
جوابين ع الفاو وخليج الصار؟  
هالرحل لاقفز بعين قوية  
مايجى على دايمل ولا من صار  
كم دير متعل قوى بدرية  
بعد سيلته مافيه طشت نار  
ياكلوا عفاه ويشربوا الموية  
وهو بعيد مايصله ولا وكار  
نوار البدارى ياكلوه مزية  
وايام اللوية غوشهم يختار  
من قبل سلوق نطابع الغربية  
والا ع التميمى من يتم غرار  
في وطننا مانا غرب صفية  
عشنا فيه ع القيمة وعالقذار  
مع ناس مامنهم تحيك السية  
ولا يريموا ولا يجيشوا عاجار  
لزاد الرفق ماهم غلاض النية

اسراع القفز لضيف والزوار  
 هالبننت تعزم لا لفورقية  
 تبان ع الدمالج قارنة بسوار  
 وهالكوت عافى طالقين نصية  
 كيوفى وصاحب نام فى لنذار  
 الى يشمهم يصدر وماله نية  
 قدميين صفهم صف العدو كسار  
 واحنا زاد لانا من الذمية  
 ولانا من الى فالتين ويرقدوا ع العار  
 ولانا ودابل كل يوم رمية  
 ولا عمر فاسد مالنا غوار  
 وخادين الى فصلها روسية  
 هلهام سامى من انقاب كبار  
 وعما السابقن تسبق كما النيسية  
 سيدها من يؤمن عاش فى الفخار  
 ثقل روزما يجفل أنفاقن مية  
 ويدين نصب لالمن على المنظار  
 ونكان ميعدن براى والخلوية  
 كيف ما تجلى الصقر للدوار  
 عارف غيابه مو غياب نسيّة  
 الا مغير حيزو فأمرنا مختار  
 جن دونا جبال وطاقطيمة  
 ومشين ثمان ايام فى لبحار  
 لو كان هو الى فى الوطن عازه فيه  
 على سبايبي خاصم تربيونار  
 راه دلخى سعيد وباعنى بالنيه  
 كيفما تبيع الكيش للجزار  
 على الله نرجعوا ويأذن الله بجيه  
 ويندم الى سيأت فينا دار  
 ياربنا يالى حنون عليه  
 ياعالمن باسر والاجهار  
 يابن السنوسى وياخوان زويه  
 وياشيخنا الشهر يانغار

وياجدودنا لشراف ياروسيه

ويامن بعد وضوه تلا لسوار  
نحننا في غريق ونطلبوا بالننيه  
ساعة اجابة كلكم حضار  
طلبت جاهكم يفرج الله عليه  
بعفو كافي لامها بالدار

قال تموا يطلبوا حطونا في وقت شتاء ساعتين ونحننا في الثلج بره ، ويجينا قال طبيب  
قال ويبقى يوازي فينا ( يختار ) هذا صاح وهذا موصاح يريدونا في خدمة نخدموا في  
الحوث في بلاد يقولوها "فارقونه" البلاد هذه قال يديروا فيها في السردين وتن هوينه الى  
وهو صاح يريد يشيلوه يخدم فيها قال يوازوا فينا كيفما توازي الحواله ( الخراف ) والله  
جايب كلام وكلام باهي لكن والله مودر منه بعض قال نقول .

انذارى على عيني وخايف تنعمى  
وهى مغير تدرى دمعها سيال  
هيالى نسكتها ومافيه عزي  
تساهيني اشوى تنهال  
تعتة على لجواد فرسان القسى  
الى يشونوا فيهم تقول جمال  
يستاهلوا الحد والحزن والبكى  
هداية المشالى يوم جور المال  
اليوم ماهناك قران مضيت على البكى  
كيف الجلب واقفين لسلعزال  
كل يوم مطلوبين ويجينا اسطى  
هذا صاغ وهذا فيه خيال  
تمينا تقول عبيد للبيع والشرى  
نصراني وماصدق علينا دال  
هذى الدنيا لاعليها تعتبي  
وحتى لو ترادع شيلها ميال  
اوقات شابة في غناديق عمرها  
ومرة عجوزه دون كل اجيال  
واوقات ناقة خير يربيك حلفها  
ومرة ناب مطليه مع الشوكال  
توحش رقيق العزم مايريد كسبها  
ولا وده يتوقلها عليه خيال

قسامى اوراد الله بالعيش والخطى  
 ما حكم منك ياردى لفعال  
 كل طاغى انهالك وكل شىء للفى  
 وكل شىء دايرله الله ميجال  
 القوة بغير الله ميمولها حيا  
 حتى لو بنت منها الناس جبال  
 مغير بهتوا لدار ياجواد تصبروا  
 كم من جيل سابقنا طروه وزال  
 وماتنظروا النمروود مافيها طفى  
 نين دار روحه رب للجهال  
 وحارب الله طفى بطيور فى السماء  
 وقالوا ضربته نين دمه سال  
 جاء سبيه بناموس ردها وانتناء  
 وبعد قوته تم امغير خيال  
 ايهن ارياح الخير وهون القضا  
 ولاسبد ما ترجع بعد لمحال  
 يرجع طويل العمر ويجى لوطننا  
 ويبقى الى صابر امغير علال

\*\*\*\*\*

شكرا ياسى محمود ونتمنا من الله سبحانه وتعالى ان يطيل عمرك ويوفقك «114»  
 نهاية الحديث مع الراوية محمود محمد عمر الشريف  
 عند اللفة «114» من الوجه الثانى

## ملخص المقابلة

تتناول هذه المقابلة حديثاً حول المنفى الشاعر فضيل حسين الشلماني والذي ولد بمنطقة المرصص قرب طبرق حيث نشأ هناك وقد اتم حفظ القرآن وتعلم الفقه واجاد القراءة والكتابة وقد كانت له مكانة بين سكان تلك المنطقة واشترك في معارك الجهاد ضد العدو الايطالي قرب طبرق ومن المعارك يوم المدور ويوم جعيده ، وعند انتقال شاعرنا من طبرق الى نواحي قمينس حيث مكث بها وتزوج ، وفي سنة 1914م قام العدو الايطالي باعتقاله وحكم عليه بالسجن مدة 25 عاما بسبب تعاونه مع المجاهدين ونفى مع من نفى الى ايطاليا ومكثوا بها مدة سبع سنوات بجزيرة ( فنيانا ) ورجعوا اثر عفوا عام سنة 1921م وعلى اثر هذه الحادثة سطر الشاعر كل الاحداث في قصائد شعرية توضح صنوف القهر والعذاب التي تعرض لها وشاهدها كما صور اشتياقه الى ارض الوطن .

وبعد ترجيعه استقر بمنطقة البطنان وعاد الى مزاولة اعمال الراعى والزراعة وعند اقامة المعتقلات بأمر من السلطات الايطالية كان الشاعر فضيل الشلماني من ضمن معتقلي المقرون لمدة 3 سنوات الى ان تم الافراج عنه ، وقد بقى شاعرنا على قيد الحياة بمنطقة الالبير مع اهله حتى وافاه الاجل سنة 1954م .  
ولمزيد من المعلومات حول هذه المقابلة أو توضيح لبعض المفردات بالابيات الشعرية يرجع الى ديوان الشعر الشعبي - المجلد الاول . كلية الاداب - لجنة تجميع التراث منشورات جامعة قار يونس - 1977م من ص 165 - 181 ...



## مشروع تجميع الجهاد

نموذج رقم 2

منطقة البحث رقم 4 رقم الشريط او الاشرطة 241/4 ، 242 ، 243 ، 244

تاريخ المقابلة \_\_\_\_\_ / \_\_\_\_\_ / \_\_\_\_\_ هـ 1982/ 5/ 23 م

الاسم ثلاثيا : المنفى احمد على الدهماني

تاريخ ومكان الميلاد : مصراته

محلة الزروق \_\_\_\_\_

اسم الام \_\_\_\_\_

محلة \_\_\_\_\_ قبيلة ذكيران

الوظيفة : \_\_\_\_\_

علاقته بالطرق الصوفية وجمعيات المجاهدين : \_\_\_\_\_

وظيفته المدنية او العسكرية السابقة : \_\_\_\_\_

الحالة التعليمية : \_\_\_\_\_

اللغات التي يتكلمها : العربية

الجهات التي سكن بها سابقا : مصراته

الرحلات الطويلة التي قام بها بما فيها رحلة الحج : نفى الى إيطاليا سنة 1915 م

هل سبق ان اجريت معه مقابلة : \_\_\_\_\_

بواسطة من : \_\_\_\_\_

اين : \_\_\_\_\_ متى : \_\_\_\_\_

ملاحظات : حول المقابلة :

اسم الباحثين اللذين اجرايا المقابلة : محمود احمد الديك وعزالدين الفقى

## بسم الله الرحمن الرحيم

بتاريخ 1982/5/23 م . ، نلتقى مع المجاهد حمد على الدهماني ، محلة الزروق .

س : هيا تبدأ تحكي لنا . على معارك الجهاد ، اول ما مشيت مجاهد في البداية ؟  
ج . مشيت مجاهد يعني بندقه ما عنديش لكن شيخ القبيلة هديك الوقت «محمد بن عبدالقادر» ، قال : على كل حال ياجماعة نبي نهندزكم يعني تمشوا تخدموا استحكام جلوة قصر حمد تخدموا في استحكام . قلنا باهي ياسي . مضينا نقلوا في المسح والقفاف ، نخدموا في طابية ، يعني المجاهدين قاعدين في حوش التواني هنائي ، وهو عمامهم ، خدمنا استحكام وكملائه بعدين تموا الطليان يخدموا فينا يعني بالكور من قصر حمد ذيل من الفراقيط ومن كل جهة ، لين مرة مرة تصير بزه هديكه متریوز ومدافع وواحد ، تمشوا جاردين احنا بأيدينا والله لا عندنا بندقه ، شنوا مشينا حتى اسبابها منين كانش ايطيح واحد عنده بندقه ناخداها منه اذا كان ما فيش حد ، وين حد ما يطيع ياخدها منه الى ما عنداش بندقه إيضل يضرب حتى هو في الطليان يعني قعدنا وقت هكدي مستمرين في التالى بكله ، الحاصل قعدوا الطليان محصورين يعني قصر حمد ما عاش قدروا يظهروا مدايرين عليهم جيش ساعتها عسكر ، يعني قعدوا محصورين ، بره محصورين يعني في مدة ايجي سنة وهم محصورين وتالى الطليان قالها داروا محلات وباندات يقولوا لمن باندات يعني لموهن من راس جدير الى حكيت عليه هكديه الى عند حد مصراة من قبلى الى عند بادية سرت داروا محلات الحاصل وداروا ناس يعني وجوا جراريد ، سعتها انا قاعد في البلاد في الزروق .  
س . هذا "خريبيشه" ؟

ج . ايه ، باند خريبيشه وجت تهيل يعني جندرمه عرب وعساكر عرب وباندات ومخلطه وحيش والحاصل على كل شكل الطليان ، وين ما طقوا فينا في الزروق هنانيا قبل لا يطقوا في الزروق من حيش طقوا في حاشية مصراة ، الخط بتاع العسكر ، والحكومة واللى كانت شادة في قصر حمد ، ومدايره استحكام ، ما بينا تهمش الا حاجة ساهلة ، ما يجيش 50 متر أو 60 متر ، تعرف الى يخدموا فيهم بالمقلاع ، هديم شادين بره في راس القود في راس حمد وهديكنا لداخل مدايرين استحكام يعني بتاع شكاير وميزانات رمل مداير يبين استحكام ، قول ياسيدي يظهر سعتها الحكم سعدون سعدون عنده زوز مدافع ويظهر مع شارعنا هذايا ، يظهر هنانيا ، هو شارع غارق متدرق على الجنود ويظهر الى حاشية النخل وين ما فيه تو الشركات ، الى عند محل الشركات وينصبوا المدافع ، زوز مدافع ينصبوا المدافع وحتى راهو قرييين حذاهم حيش أنه ملكنا وشجرنا واحد في حاشية البلاد وهم يشبحوا فينا قال ها ياسيدي عقاب النهار ، وقال ها يطبسوا

تفريغ بالمدفع يضربوا مدفعين ثلاثة ، وبن ما يضربوا مدفعين ثلاثة وقالها هديكما  
مدايرين استحكام للمدافع درز يقولو له يطبسو المدافع بينا وبين الطليان ووين تفوت  
الكوره من حداك تموج ما تخليش فيك عقل ، إحنى نفرغوا وهم يجمدوا تحت الطوابي  
العساكر الى يفرغوا في المدافع لين هذوكم يوطوا شوى وقالها يبانوا من مكانهم هذاك  
ويزيدوهم كاراطية اخرى خمسة ستة مدافع هم ، هذا الطليان والعرب راهم ، ووين ما  
يتحركوا هديكما نبرقوا بالمرى منين ينوض الدخان يشبحوا وهم مقابلتهم الشمس الغربية  
هكديه وحنى ناسنا يفرغوا لشرقة هكديه ، هم فيهم الظل من العشية الى العشية قعدوا  
ايام ، بعد هديكن الايام وجت الباندة العرضى والعساكر والواحد ارتفعوا حطوا في  
حاشية الوادى من هنا بينا وبين تاورغا من هنا ، والباندة الى جايه خلطوا وهديكما  
قعدوا عام وهم مسلمين ما قدروا يظهروا من قصر حمد شادين عليهم ظهرن مرة  
كرهبتين .

س : حصلنوا سلاح يا حاج ؟

ج . حصلنا ، ظهرن كرهبتين ، لكن مشى نهارها ، صار بيناتهم يفرغوا في حيشان  
الملايطة لكن العرضى في جلوة الملايطة قريب حداهم ، يفرغوا في هذاك القوز بالمدافع  
وصارت زلة ، مشينا جاردين من هنا والله الا بايدنا كيف ما قلت لك يعنى بالك  
يطيح واحد مجاهد يعنى عنده سلاح وعقب منه ، ما حصلتش انا ، قول ياسيدى مشيت  
نشهد بالله بيظهروا وقاعدين زوز كراهب منحسات الفوشيك ما يدبرهن شىء ظهرن  
لعد حاشية الكردون حاشية القوز من تالا السيخة ، حد ما ظهرن قالها عندنا مدفع هذا  
بوخمسة يقولو له ، فرغوا في وحدة صابوها تعطلت واخرى بتدور بعد كثر عليها الضرب  
بالمدفع والبارود وبتدور وفيه جوفار من الطريق لوطى جت على حاشية البنيكهينة قالت  
هكى على ركن جوها جماعة «سعدون» منهم شوشان قاعد حى الى توا في بنغازى «مادى  
الريضى» يقولو له .

س : هذا شنو كان ضابط والا جندى ؟

ج . نفر ، وواحد ينقاله «عبدالله لسود» من الزروق جوها يجاروا هم الزوز الرومى الى  
منها ، كلا «عبدالله بتاع الزروق» هذا فرغ فيه هو استشهد كلا من الشوشان تقفاه  
هذاك الرومى جاء من تالى قالها ضربه ضربه بالبندقية ، من الليد شدوه بيقته هو ،  
قالو له لا لا ، قلوه للبي ما قتلوش جابوه يكروا فيه لعد «سعدون» الرومى ، وهديكن  
الكرهبات قعدن معطلات ظهورهن في الليل هم كروهم كر وبعنى مسافة بين جماعة  
العرضى وما بين المكان الى طاحن فيه الكراهب يجي أنظنه 200 متر هكديه ديه ،  
كروهن النصارى ، كروهن الكراهب وانحزت هديكى الملطم ، بعدين هوينه عاد  
بنجوا لظهره العسكر وكنزوا في حاشية البلاد ووين خلطوا فيهم جماعتهم الى جايينهم  
من الغرب هديكى بانه خريبيشه ايقولو لها ، وين خلطوا فيهم قالها ظهوروا ، ظهوروا  
النصارى وخلطوا في بعضهم وطقوا لعد المواطنين وما عاد لاقاهم حتى حد قعدوا في  
مواطين .

س . وين قعدتوا ، طلعتوا مع جماعة «سعدون» ولا قعدت هنا ؟  
ج . انا قعدت هنا ، ناس ياسرة قعدت راهى ، قعدنا فى الزروق هناى ما طولنش انا بعدها يعنى نقدر انقولك يعنى ملكونا خلاص جماعة العساكر وسعدون وقفوا من درجة ادرجه لين طقوا فى سرت غادى ، قول ياسيدى ، بعد طقوا فى سرت غادى الوطن ملكوه كله ، جلوتنا هادى وسرت هذا ملكوها الطليان مشيت انا فريت من هناى من بوى والله زامق الا زامق على بوى مشيت لسرت انطارد يعنى فى حق شاهى ودخان ما غباك الصغير انت ، مشيت بنخدم ، مشيت لسرت وحصلنا خدمة قعدنا نخدموا سعتها الفلوس ضايعات ما هناكش وين ، اليومىة بقرنك ونص قول ياسيدى قعدت ايام والدنيا راحكة ، بعدين فيه قالو محله سيدك حمد السنى عنده ناس وعنده مجاهدين من سرت غادى .

س . صفى الدين والا احمد السنوسى ؟  
ج . هو صفى الدين هو احمد السنوسى والله ما نقدر نفرق بينهم ، قول ياسيدى يوم من الايام الطليان مدايرين عسه تظهر البره يقولوا لهم كرابنير دوريه ، قالها حاطين عليهم الجماعة هديكم بتاع سيدك الشريف هذا ، ما ندرى عليه حمد الشريف والا صفى الدين والا قول ياسيدى رابطين لهم الجماعة بتاعين سيدك صفى الدين وقالها فرغوا فيهم عماهم براقدير رومى وزوز عرب كرابنير وين فرغوا فيهم ضربوا الرومى طاح وراكب على فرس وين ما طاح الرومى قالها هديكما لطوا جواديرهم وجوا يتجارو للقصر قصر سرت ، توا انا حاضر غادى .

س . حاضر الواقعة هادى ؟ باهى شنو صار فيه الى طاح ؟  
ج . انا حاضر الواقعة هادى ، مات ، وما غيبك الناس الجهال هكديه ديه خدوا كبايطه وتشوا فيه النار ، ودارو له مش باهى ، هديكما وين طاح الرومى قالها قدعوا جواديرهم وجوا طالعين مروحين هارين للقصر ، فرس الرومى لحقت عليهم جوا خشوا للقصر قاعدين انجمموا الطليان ، قالوا : هالفلاقة الى مدايرين لنا عرضى هنايا ، هديما لابده انديروا لهم محله ونمشوا نضبطوهم ، قول ياسيدى داروا محله لقطوها نقدر انقولك ، احنى ماكانش نعرفوا راس اجدير لا ، لكن هالغرب ترهونة ومسلاته وغريان وهالجهه الغربية نواحي طرابلس هديم كلهم لموهم وورفلة ومصراته داروا يعنى بانادات شىء عطوهم السلاح وشىء سخروهم تسخير هالى عندهم الببل باش يقلوا يعنى العوين والمتعة ومعاش للعسكر وثقلية بتاعهم ، وكانوا الكراهب ضنان حتى عند الطليان ما عندهمش ، اكثر الجبخانات والواحد يديروا فيهن فى صناديق وترفع فيهن الببل يسخروا فيهم تسخير بالسيف ضرب راهو دارو هديك المحلة وجت على ورفله وجت ما بين ورفله وما بين البحر كيف ما نقولوا ايرات الحسون كان تعرفها لجلوه حتى طقوا فى سرت لكن محلة كبيرة ، والمحلة رايسها رمضان شتيوى ، ووقت حضورها هناى بتسقد تتوجه بتأخذ البرية وبتقص جرت الفلاقة وين دارو لها .

س . تابعه لرمضان ولا تابعه لسعدون ؟  
ج . تابعه لرمضان سعتها رمضان هو لول وبعد ان مات تولى سعدون قول ياسيدى داروا هديك المحلة محله مخلطة جماله اصحاب جمال يقلوا يعنى فى المتعة والدبش والصناديق وكل حاجة تلزمهم مدايرين لها جمال يعنى كروانة بروحها ، وبعض الناس عاطينهم سلاح ويعنى واما قالو لهم بتحافظوا على اللى رافعين الادباش هديم انا مرات داكرق تريح ، بانددة بكثرة والكثرة من زليطن ومن ترهونة .

س . هديم جاين جى ، جاين لمصراته والاوين ماشين هالبانده هدى ؟  
ج . لموهم كيف ما تقول فى مصراته هنا وقالو لهم خذوا البرية ونظفروا على محلات يعنى فيهم مية مدايرهم خبراء يعنى يجابروا بيهم وين مكان المحلات اللى فيهن الماء على انه الماء هالفج الى ما بينا وبين سرت هذا من فوق ما فيش امية فيه سوانى . لكن الناس ما يعرفوهنش . يمشوا يباتوا عليهن هم . برا . برا لين وصلوا فى سرت .  
س . توا انت قاعد فى سرت ؟

ج . انا قاعد فى سرت . قالها قاموا نهارين فى سرت بعد وصلوا . لكن شىء بكثرة يا حبيبى الى فى طرف المحلة من عند وين يعنى وصلوا لهم ينوض من الصبح الى الليل يمشوا بالله باش يطق فى المكان اللى باتت فيه اول المحلة من الكثرة ، وما يمشوش فى مسافة واحدة . قول ياسيدى طقوا فينا فى سرت فيه واحد من ضنى عمى وين طقوا فى سرت قاله يابى .

س . شنو اسماء ؟  
ج . اسماء احمد الاشهب الجمرى / ولد عمى .  
س . بي هذا كان ؟

ج . لا . مجاهد مدايرينه مجاهد مع بانددة الطليان . وين طقوا فى سرت . حتى كارسين جماعة فى سرت ونخدموا . وين طقت المحلة فى سرت . على خاطر فيه ملابسات بعد هديكن الكرابير الى طاحوا . قالها . داروا كل بيت لادوابيه على المحلة امتاع سرت كلها خدوا من حاشية البحر من بحره دار وابية على السبخة واداروا بيه لين جابوه بيتوه فى البحر من قبل .  
س . حبيلة (اسلاك شائكة) .

ج . حبيلة ، يعنى قعد مسكر ، حتى البادية الى مسرحين تعطلوا ما عاش فيه طلوع بعد المناشات هديكن .

س . هذا ليش يا حاج ، ليش داروها الحبيلة ؟  
ج . الحبيلة هادى دايرينها تابعة لسرت ، ليش اذا كان جوا الفلاحة والاجوا حد والا مشى ما يقدرش يخطم من هديك الحبيلة ، والفم اللى بيعخشوا منه الكراهب واللى منه الظاهر واللى جاى هوينه بالورقة ما تظهرش الا بورقة كان ما هذا مسكر سكروه فى هاذيك الوقت لا فيه ورقة لا حتى حاجة . ما عاش الواحد لا يقدر يظهر لا واحد انجش . قلنا كيف الدوه . قول ياسيدى ما طولوش لين طقت انجش . قلنا كيف الدوه

هذه . قول ياسيدى ما طولوش لين طقت فينا المحلة عاد غادى . هذا قبل المحلة راهو . وين طقت فينا المحلة قالها لمدوهم حطوهم . هى قرية سرت جاية فى رأس قوز عاليات . جاية فى رأس القوز . وهالى من القوز بره هذا سبطة وحوش يتسمى صالة بن سعود والهنشير جايينيه مدايرين فيه كوشة الطليان بتاعت جير ، هذا احتاز اللبرة . هادى المحلة الى طقت قالها الحاصل حصروهم فى هذيك السبخة ما خلوهمش يخشوا بعدين جماعة المحلة هديما شكوا اللبى . رمضان قالو له : يابى رمضان الواحد مستحق فى مداس وواحد مستحق فى بلغة بلغته تقطعت على خاطرهم قعدوا ايجي 20/15 / يوم باش وصلوا فى سرت وهم متسقين من هنا ، إحنى يعنى الواحد لازمته سورية واحد حزام وواحد محرمة المهم الحاصل شروه ، وكيف ؟ قالهم باهى ، كان يقرنهم فى ورقة كل عشرة ايجوا يفتح لهم الباب ، ايجوا لصاحب الكردون هديكى الى مسكر الى فى الفم (بورقه)

س . وين خشش — ؟

ج . لسرت ، هديم من بانده رمضان اشتوى راهم .

س . صار جماعة رمضان مايقدروش يتحركوا الا بورقة منه ؟

ج . بورقة منه ايه ما يخلوهمش يخشوا لسرت وعماهم عساكر حمر نصارى ، وعماهم حبش وعماهم باندات عرب بسلاحهم وثقلية كبيرة شىء فوق من يصور العجب . قول ياسيدى منين وصلوا سرت المكان هذاك قالوا له أحنى لازمنا نشوفوا البلاد نوا نشروا الزيت والى يلزمننا قيدهم كل عشرة انفار فى ورقة ايجوا وراها لصاحب البوابة هكديه .

س . ايطالى هذا ؟

ج . ايطالى .

س . الورقة هذه من رمضان .

ج . الورقة من رمضان .

س . باهى كيف الورقة من رمضان . مش رمضان يعتبر من الانصار ؟

ج . ايه عارف ، على كل حال .

س . مش فيه اتفاق بين رمضان و . . . . . ؟

ج . ساعتها فى يونهم هو رمضان هم الى مسخريه . هى الدنيا مبنية على غرركله وقت لموها المحلة هذه ويسقدوها قالو : مفهوم الى من بيكون عليها . حتى عندنا عيت بالمتنصر الى ضدهم "إشتوى" . قالو : هذه جبانة لرمضان إشتوى ليقطعوله رقيته ما تصيرله كان ماعنداش كيف . قالوا مافيش من يقدرها كان (رمضان اشتوى) نادوه . غير عالسمع انا راهو . نادوه قالو له "يارمضان" انت بتمشى راس عالمحله قال لايا ودى . قالو له يالمشى بالسجن مدة عمرك بالقتل . قال كان بالسيف باهى . لكن انا عندى شرط نشرط عليكم . كان يتقبلوا شروطى باهى نمشى اوكان ما هذا او بتقتلوني

اقتلونى قالوله باهى نعرفوا شنوا الشروط . قاللهم انا غشى رايس رانى لانسال فى قبطان لا فى طليانى لافى حبشى لافى عربى . الى انقلوه صبى اهنا ايصبى والى انقلوه أمشى يمشى تكون يعنى رياسة كامله على الكل . قول ياسيدى . توا احنى سيننا المبدأ و نرجعوا كل مرة اللتالى . قول ياسيدى قاللهم باهى . لكن جماعته هلى بانويدنوا فيهم غير للوظيفة هذه والله مايبوا الا قطع رقبتة . قال لهم باهى بعد تم شروطه قالو له باهى . قال ها ياسيدى داروه رانس وهو الى عاد اسقد رايس محله وعنده خوه رمضان اشتبوى هالمدة غادى عما سيدك صفى الدين والا هو حمد الشريف والله انا مانقدر نفرزهم من بعضهم .

س . شن ايدير غادى ؟

ج . مجاهد . قول ياسيدى كاتب خوه يعنى هو رمضان قال له . اسمع إحنى اهمى المحله كبيره وشىء فوق من يتصور العقل وراكم ما تتقوش انتم كانكم "300 أو 400 - شن نجو فى هديم . شن تجى (الغولة فى فم الغولة) ما تجو شىء راهو راكم كان ابتاخدو ناصيحتى تاخدو وجوهكم وتخلو الطريق . قالوا وين طق فيه الجواب محمد اشتبوى ، قاله لصفى الدين والا الشريف قاله ياسيدى : انا جانى جواب من ، خوى اوخوى هو رايس المحلة ، كيف الدباره . قال له ننصحكم خودوا وجوهكم راهم ماتتقوش يسحنوكم فى نهار وتغدوا هبا مشور . قال ، وين قال لهم صفى الدين ياجماعه هيا انخشو السوادين ونخلو لهم الطريق ، قالو بعض من الجماعة الى هم عما هديم قالوله هم بيطاردونا . بغينا انخشو سودان والا انخشو مصر والا وين ما كانت الحاله بيطاردنا راهم بيقضوا علينا ، حنا ماعندناش حاجة ميتين كان بنقابلوهم والى ايعيش ايعيش والى يموت يموت و خلاص قاللهم امالا باهى انا عندى لكم راى امالا اجهروا حفير خلوه يعنى حفير يدرق الراجل دوب ما . يعنى باين منه المضرب بتاعه واستكنوا فيه لين يخلطوا فيكم الى بيصورها ربي بتصير وخلاص ، مدايرين عسه هم سبع جويدرات فى قصر بوهادى هذا سيدك «حمد الشريف» اهل الجوادير ومدايرين فيه عشيشتات وقبل كانوا مدايرين فيه ملم كبير سويق لكن مش عامر ، ومدايرين هديك الجويدرات شوافات قدامهم منهم قدام وهم منهم غادى . نهار ثانى يوم بعد تريحت البانده هديكى متاعت سرت . قال لهم هيا بنفدوا مهمتنا .

س . فيه اتفاق كان بين رمضان والطلينان هناك الوقت كان بينهم علاقه باهيه ؟  
ج . لا .

س . باهى كيف انت قلت ياخدوا ادن برميستو ؟

ج . ايه هو عنده الواسطه كان غالبانده ومتهمينه فيها جماعة يكرهوه ويبوا يعنى تصيرله مصائب .

س . هذا قبل القرضابية ؟

ج . قبل القرضابية ؟ بعد وصلت البانده غادى وتريجو يومين وجى ولد عمى هذا

وفهمنا منه . قعد ييكي قال لنا شيخ القبيلة قال يابتعطيه اربعة بيتتو يا بتمشي تاخذ بندقه وتمشي وقعد يتظلم منه . وييكي . قال ماتغرضني ويعطيني بندقة الطليان ونحارب المسلمين . احنا عندنا جهل هذا متغرضنا وشكالي من الشيخ وقلت هذا له مسموع الكلمة .

س . تحركت باندة رمضان وجت ؟

ج . توا باندة رمضان في سرت والرجل الى خش بهديكي الورقة الى حكيت لك عليها في عشره ، وقلت له انت شنو الى خششك هنا . قال لي والله ياولد عمى انا ماعنديش مققات ونبي ناخذ حزيم نتلثم بيه ونبي . قلت له باهي . خشيت للسوق خديت له محرمه وخديت له حزام وسوريه وسروال سعتها السوق ارخيص درتهله في صدره وحطيطهله وصبح عند الصبح فيه قوافل بيظهرن وقوافل يخشن مازال الناس يخشوا ويتسوقوا . ظهر والله من هذيك الظهره ماعاد ريته لين تلاقينا في البلاد هنا رجعت حتى انا للبلاد هنا وتلاقينا . توا الثمره بعد تريجوا يومين وقالها تسقدو المحلة هذه - محلة «رمضان اشيوي» - وبعدين قالو هيا بنكملوا مهمتنا بنزيدو اللقدام انطاردوا الفلاقه وين الى هم تباعين جيش المجاهدين .

س . البانده الى مع رمضان ياسره ؟

ج . مش بكثره تقريبا 2000 عرب - واكثر من 3000 حبش .

س . تحت إمرة «رمضان» ولا تحت منه ؟

ج . كلهم تحت «رمضان» ومعاهم فوق 2000 عسكر احمر طلياني ايقولوا لهم عسكر بارساليري بتاع الريش . هلي ابراطيلم فيهم الريش ، هديما كلهم تحت اماره «رمضان» ماهو شرط عليهم شروط هو . قالوا له مايغرضك حد كان قلت لنا تريجوا نترجوا واكان قلت لنا هيا بنزيدوا .

وين نلتموا المكانات الى مدايرينه حد ادتهم بنصلوا فيه .

س . سعدون وين كان كان معاه ؟

ج . لاسعدون قاعد في البلاد عند اهله هنا في البلاد .

س . قعدوا يومين ؟

ج . قعدوا يومين وتسقدوا الى قصر بوهادي مش بعيد .

س . وين قصر بوهادي ؟

ج . من سرت غادي . هذا الى دار فيه الشوافات اهل المجاهدين هديم .

س . الى مدايرين عسه فيه ؟

ج . ايه امدابيرين عسه . وفيه عسيسات وقبل مدايرين فيه سوق غير تمشات حال ، قول ياسيدي بعد بانت عليهم البانده هدى وصلت ، اصحاب الجويدرات خدوا وجوهم وفيه اعشيشات منصوبات في قصر بوهادي هذين ، في هذيك العشيشات واطوا الطليان وين شبحو الجوادير فائن عاد لجماعتهم ، بعد الى عدن الجوادير قعدن العشيشات مايبوصلهن واطوا الطليان تو احنى مش بعدين على قصر سرت وبالبارود



نسمعو فيه ونصبوا الطليان المدافع وطبسوا في هذيك العشيشات . طاف . طاف ايجي  
عشره او اطناش مدفع طيحوا هذيك العشيشات وماعاش جابهلهم حد والشوافات الى  
كانوا فيهن هربوا عدوا شوى ياسيدى وين ما قابلهم شىء رفعت البانده وبدت سايره  
اللقدام مش بعيد من قصر بوهادى على الاستحكام الى حكيت لك عليه صفى الدين  
والا هو حمد الشريف وطقوا في العشيشات وما لقوا فيهن شىء قالوا هديم فلاقه وهربوا  
وما هناك شىء جوا دازين ، والى ينعت فينا بعدين خبرنا بعضنا وحصلنا خبر منهم .

س . توا انت وين قاعد في سرت يا حاج ؟

ج . انا قاعد في سرت .

س . الخبر يوصل لكم ؟

ج .

خبرونا بعدين ، بانده العرب الى سلاحهم ، عسكري جرده بانده بسلاحه مدايرنهم كول  
يعنى ايجي في المحلة من غربا واصحاب الجمال الى رافعين الكروانة والمدافع والحسبة يعنى  
السلاح والمتعة حتى براندات الضباط والواحد رافعينهم عرب على جمال حايزين اللتالى  
شوى والحبش هو القدامى وفي جرتة عسكر الطليان وبعدين مكملينهم بانده العرب وهم  
الطرفانيين ، نشهد بالله جو قريب .

نهاية الوجه الاول من الشريط 241

س تسقدت بانده السويحلى رمضان ؟

ج . بانده السويحلى بعدين انتموا الحكاية وتفلفت الحسبة ، والاتبى الاسباب الى جابت  
رمضان لتكبير البانده وقعد عليها راييس ، لكن هدى نجيوها حتى بعدين .

س . باهى خلافه مع عبدالنبي بالخير .

ج . خلافه هو وعبدالنبي والاسباب والى جاباته لهذا الشغل منين كبروهم .

ايوه توا خيلنا في البانده ماشى في البانده ؟

ج : ماشيين في البانده ، وقل ياسيدى بعد طيحوا هديكم العشيشات بالمدافع قالها رفعوا  
وهامة كبيرة شىء بكثرة وجودازين اللقدام بقرب استحكام الحفير بتاع المجاهدين اوين  
قربوه على مايوصفولنا ، انا ماريت ، قالوا بيننا ايجي 50 م واكل ، قريب يصبوا عالحفير قال  
لهم سيدى حمد الشريف ، باش الوجه يظهر يطيح اثنين وثلاث وحتى ميتين ميتين ساروا  
لين جوا على حاشية الاستحكام وطلقوا فيهم النار عطاهم الاذن قاللهم النار يلا شعلت  
فيهم النار وهم مايشعروش على غفلة ، توا الطلقة لوله جت في الحبشى بدا الطايح اكثر من  
الواقف تنزل الفوشكة كان بنالغ تظهر من اثنين وثلاث هم انكبوا عليهم وكثرت ريم  
وضابطين بعضهم يمشوا بالكومانده العسكر هديم ، يعنى طرحوا منهم طرحة باهية ، توفيه  
الى انجرح وماهوش مضرور وفيه الى ماجتش فيه توا هم ماشيين القبلة هكى ماعاش  
عندهم خرمة اللفوق مايقدروا يظهر وا ، . الغرب ماعاش عندهم خرمة الاكان بينهم  
وبين البحر مقدار ظنه ، بينهم وبين المي (الماء) بعد توا شاطت فيهم النار من قدام هذكم

الحبشي المجروح واللى طاح هذا فيه الى يرخى بندقته وفيه الى يجيب بندقته ، واللى يظهره  
من هديك الخزنة الى خاطيه الاستحكام هديكيه ويجبروا هكى لين يطيحوا في الماء بتاع  
البحر ويأخذوا حاشية البحر ويتجاروا وجاين مولين لقصر سرت .  
س . الحبش ؟

ج . ايه الحبش والطلليان كيفهم حتى هم صار لهم كيفه راهو حتى هم الطليان ، توا  
رمضان اشتيوى .

س . في الاخير قاعد رمضان ؟

ج . اية الاخير لكن مداير حصان ودابير عبد يقود له في الحصان ويركب مع الرومي  
القبطان الكبير .

س . من هو القبطان ؟

ج . والله ماندريش عليه يقولوله قلينه والا انضر شن سباه الرومي هذا قالوا ركب معاه في  
الكرهية ، هذا غير حكاية في التالى ، قول ياسيدى توه اتخذوا الحبش ولحقوا عليهم الطليان  
ولكن هالى شادين المدفع في التالى الطبعية تموا يضربوا في هذاك الحفير ينوضن بالخمسة  
بالسته مدافع مع بعضهم في اصحاب الحفير فيه الى ارتدم وفيه الى مات فيه الى يظهر من  
الحفير يشدوا عليه عقاب الكبانية هديكم وعقاب حتى ولت العسكر الطليان حر هديم كان  
الحبش مشوا قعدوا الطليان واللى بيظهر من الحفير بيهرب ، بينوضوا عليهم المدفع  
والضرب ياسر الى يظهر من هذاك الواحد ايجي يدرهب يطيح ، قالوا توه اصحاب البانده  
هالى منهم من هنا هي عاطيهم السلاح فيهم وحدين من مصراة قالوا هكى خوتكم  
المسلمين ياولادى يمزطوا فيهم النصارى وانتم تنفرجوا بسلاحكم ، قالوا واحد اظنه حتى  
الى بره قالوا هاجى ، قال خوتكم المسلمين وبعدها فرغ وجه وولوا على اصحاب هديك  
البانده خمسمية والاستمائة .

س . صار مش رمضان هو الى عطاهم الامر ؟

ج . لامش رمضان .

س . فيه ايقولوا الى رمضان بروحه اعطى امر باش ينقلبوا عالطليان .

ج . في التالى ، اول مرة لا ، وين هاجى هذيك الراجل الصالح قال هكى خوتكم  
المسلمين يمزطوا فيهم النصارى وانتم شادين بنادقكم حتى مازال عندنا موت اخرى قالها  
هذا فرغ وجه وولوا على هذيك البانده املا ببندقك وعطيه خدوها هديك العسكر بتاع  
الطليان دهكوه حتى هو الى مانضر بش واللى ضربته هيئة شويه خدى جرت الحبش وقالها  
فاتوا تالا البحر ماعاش عندهم فجوة تنجيه تفلقت الحكاية ، قال القبطان هكى يارمضان  
راهو العسكر بتاعك راهو البانده خذت العسكر راهو كملوهم العسكر راهو يضربوا في  
العسكر بتاعنا ، قاله توه تنزل لهم ونوريهم قالوا نزل من الكرهية والشوشان بحصانه مش  
بعيد عليه ماركب قال اضرب اضرب هذا رمضان .

س . صار كان يقدر يقول لهم اوقفوا ؟ كان يقدر يعطى اوامر بانهم يوقفوا .

ج . معاش يوقفوا اشقبت الحسبة معادش هذيك الساعة الا رمضان لا واحد معاش فيه جهدك يابو جهاد الى هذا على قدرته .

س . ماجتش فزعية من بره ياسى الحاج .

ج . منين تفزع ؟ هذه ارض خلوا .

س . زى الى عند رمضان الجماعة الى قلت حافرين ؟

ج . هذه ارض خلوها فيها شيء

س . الجماعة الحافرين جاين من بره ؟ منين جاين .

ج . هذيم ملقطهم من مصرارة بعد ان تفلقت الحسبة من مصرارة من هنا وطاشوا عقاب عيت شتيوى لمصر وشى من البادية وشى من الغرب والشرق .

س . من الى استشهد . ماتدكرش اسماء ناس اشتهدوا فى قصر بوهادى ؟

ج . مانعرفش . . قول ياسيدى .

س . والتانيقنى هذا شنو صارله . قتله رمضان قالوا هذا صحيح ؟

ج . والله مانقدر نقولك ماسمعتش عليه . . بعددين وين تفلقت الحكاية هلى كانوا يفرغوا فى الطليان بالمدافع وقدامهم صبه عسكر قالها سلو الزناد بتاع المدفع وخود وجهك وطيش تالا البحر هم الفجوة تالا البحر فاضية لافيه الفوشيك ولا مقابلهم حاجة قول ياسيدى سيولهم هديكم المدافع منصوبات .

س . مايصلحش رفعوا منهن الزندات ؟

ج . رفعوا زناداتهم ، معاش عندهم منفذ الا من تالا البحر توا اصحاب البلى فوق الالف زابلة معبيات هدم شيء جبخانه وشى يعنى سلاح وشى معاشات وشى متعه وين ماتفلقت الحكاية وصار البارود وعرفوها تفلقت اصحاب الجمالة الى هذا يجيد موس والا كمية ويقول هديكم الحمول هكى ويأخذ جملة ويولى للقصر . فيه توزعوا فيه الى رقى للفوق يعنى جهة المحلة الى فرغت الى فى قبضت رمضان رقى للفوق 9 بجملة بكل وفيه الى كلا الحمول هدين قطعن اكله حتى الى هرب بجملة ورقى للفوق يعنى مشى فارغ وهديكى البضاعة وهديكى المتعة والواحد قعدت مرونة فوق الزوز كيلومتر والا ثلاثة هدموم مافيش كان الحمل على الحمل . وقالها جومبرمين عالقصر اصحاب الجمال هدموم مطعمينهم بالمعاش والى جى مولى يياخذ معاش لكن تولايتهم حرفة والخيل تومرتا حين . . (غير واضح 126)

س .

وين توا هذا ؟

ج . من بوهادى غادى . . عند الاستحكام الى حكيت لك عليه يعنى ضجة من بعد الظهر بشوية ، ، ، ، ، (126 - 132) غير واضح ايجي ثلاثة كراهب عند الطليان سعتها مش موجودات حتى الكراهب عندهم راهو . . . . . (132) . . . معبيات بالجيف يعنى ونصارى ميتين وحيش .

س . انت شبحتهم ؟

ج . . ايه شبعتهم مكدين في سيارة . . . . غير واضح .  
س . رافعينهم الطليان؟

ج . ايه رافعينهم الطليان فيه اللي وفيه اللي ميت . . فيه فندق يقولوله ابودبوس في الشارع  
هذا حتى نتفرجوا وخاطمين هالفرق هدين حبش هذا جابوا ايحي ثلاثة كراهب (سيارات)  
جيف ومجاريح وحبش وجاين يسربوا . . يحطوا فيهم في هذاك الفندق فيه ديار دارولهم  
بالات بتاع تبين ورقدوا فيها الحبش والجرحى والي جايف داروه بروحه من . . . غير  
واضح .

اصحاب الجمال اللي ولوا هلي جاين يسربوا هم جوا حطب في النار مخلين حبش ايحي  
(200) او (100) نفر في القصر هديم قاعدين في قصر سرت هم جو خبروهم قالو لهم  
مصراته (158 - 159) . . بالقتل بالسجن هذا اسباب ذكر انحبست يروني .  
س . عملية تاسيرك مازالت ؟

ج . ايه مازالت مين عرفوها الحسبة انفلقت والباندة كبيرة .  
س .

تواحي في الجماعة اللي يقتلوا ؟

ج . الجماعة اللي يقتلوا فيهم عالبحر وهالي نقزوا في البحر ويقتلوا فيهم داخل شعلوا  
عليهم الاتريك خلوها تقول قايلة باش يعني يشبحوا هالي في المياه ويفرغوا فيهم قالوا  
عسكر العرب تحمس واحد شوره سكران والا ضاربتة غيرته والا مش عارف قال : توا  
هكي حتى مازالت عندنا حياة قالها ضربوا مدفعين في الاستحكام اللي شادين فيه الحبش  
مدفعين قالها القبطان بتاعهم والله هويسكن حدانا . حتى كاريين دويره (دار) في سرت  
يسكن حدانا انا كاري دار القبطان مضروب من هنا ظاهرة من هنا مثلثم بوحدة وقاعد  
يدوى شنوا هذا شنوا هذا . هذا القبطان بتاع العسكر معاش فيه قتل ، بطلوا المدافع  
معاش صار . هم عرفوه صاحبهم اللي فرغها لهم وقالها ياسيدي قال لهم : معادش فيه  
قتل ، بطلوا بطل البارود بعد صار فيهم هديكن المدفعين في الحبش اللي كانوا يضربوا  
وقريبين خلطوا في بعضهم هيك ، بطلوا قعدوا الى الصبح وفي الصبح تموا يجيبوا من  
هذيك الببل خششوها عقاب الليل الببل اللي كانت محصورة من الكردون برا خششوها  
داخل فيه رقب يعني ناض يعني من بحرا في قصر سرت حطوا فيه هذيك الببل تموا الحبش  
يختاروا الجمل الباهي ولكن لاحوية ولاحتى حاجة هم عاطينهم خيوط ويجوا للموق  
وياخذوا زوز يقشطوهم بخيوط على هذاك الجمال ومازالوا فيه يعني وحدين انفار . هم  
ماكملوش راهم بالموت ماهو حصلوا الاذن بطلوا عليهم القتل ، نوض انت ونوض انت  
انت مقعمرين والله انت مقعمر وترجي في الموت تطق فيك نوض انت ويقشطوا على  
هذيك الجمل اربعة انفار ويقولوهم يالا ويقودوا الجمل ويقلوه فيه قوز بتاع رمل قدو  
الموق . هوينه يجيبوه تحت هويد هذاك الرمل يغطوهم بالبالات وبعدين يقول هالاربعة اللي  
مشوا يقولوها يتلوهم الحبش يخلطوهم على هدوك ويردوا الجمل الحبش .

س . اللي يرفع الاربعة ينقتل ؟

ج . ايه ينقتل وين ايقولك نوض انت ونوض انت ماتقدرش كان ماهذه البندقية هوينه في صدرك تنوض ترفعوا هديكم الميتين زوز وتمشوا تحادوا في الجمل واحد يقود وزوز يسوقوا وين تسلموهم غادى تحولوهم من الخيوط قولها يقتلوهم . يقتلوا الحيين يقتلوهم . . قعدوا من الصبح من الضحى الى عند قيس قريب بعد الظهر بشوية قبل العصر .

س . قتلوهم كلهم يعنى الجمالة ؟

ج . قريب يكملوهم لكن زاد منهم هم خير ياسر . قول ياسيدى بعددين جى العفو من اطرابلس قالوا ما عاش فيه قتل .

س . رمضان عاود الى مصرانة .

ج . مانندروا عليه خدى وجهه ورقى للفوق . قول ياسيدى بطلوا القتل وكملوا هي موق والى بيقتلوه قتلوه . ومازال شوى وحى . عندهم بابور (سفينة) قالوهم نوضوا حطوهم في البابور بابور كبير وانتهى القتل . توا شن بيصير هل منين خشوا بسلاحهم وطبسوا فيهم ضرب تموا يتعلقوا كيف ماحكيت لك في لول : واحد عنده بن عمه وواحد لقي فجوة خاكد فيها صبحوا عند الصبح يفتشوا انت منين؟ وشنوا حرفتك ؟ وشنوا انت قاعد خاكد هنا اذا كان قلت مصراتي تروح في داهية مافيش كلام فين طق الدور فينا انا وواحد اخر طق فينا الدور كارين دكيكن عما نفرين اخرين ظهرنا وتحلبدوا واحد خش في حوش وواحد يعنى تحفوا ، عندهم ناس يعرفوهم وقعدنا انا وواحد اخر ينقاله عبدالسلام فريوان اهو من بلادنا من هنا في هداك الدكيكين ، بص فينا واحد كربنير عبد لعيث البى يقولوله مفتاح الكصمبيه قال اهو فيه جماعة مصرانة قاعدين اهم في هالدكان فيه واحد مرشان كافر طلياني جد مور اسود تقول عربى قول ياسيدى جى طق عالباب قرنصنا حتى قول تركب في الباب بيكسره قلت له باهى شن تبى نصت حليت الباب خش علينا ، منين انتم قتلته مصرانة في يده مشليط بتاع رتم من الليد يرقده عماى على رأسى ناض فريوان وراقد في عبيه على برانده بتاعت لوح قال لى يلا انزل نزلت ياسيدى ، ردى الى حداى واللله مافطن هالكلام بل فيه ردى ناض شنو خيرنا قل له منين انت قال له مصراتى ضربته حتى هو صربتين والا ثلاثة وقال لنا هيا تعالوا هيا ظهرنا عماه جانبنا للقصر لغنائهم لامين فيه نصيب من هلى متعقلين هديما وبصفتنا حتى شى من الكروانة وشى من اهل البلاد حتى اهل الدكاكين كل من لقاه عاقل لموا ايجي مئة نفر وخير . حطونا في القصر ظهر لنا واحد مدايرينه ترجمان لعيت بن قدارة من زليطن .

س . شن سباه .

ج . بن قدارة ، يقولوله بن قدارة من زليطن قال يا اولاد ماتخافوش واهوتوا البابور يتسقد وحطوا فيه عقاب الباندة وانتم بيقولوكم عماه في البابور هذا الى من مصرانة ننزلوه في مصرانة والى يعنى في زليطن ننزلوه في زليطن والى من طرابلس نقلوه لطرابلس وماتخافوش مافيش خوف ، هم بيظهروا وييسيو سرت لكن بعد عدينا حتى هم سيونا ، قلنا باهى طمنا شوى ، ساعة وشوى جابونا للبحر جتنا فلوكة واللله انا مدت عمرى مانعرف بابور لكن انا حكاى هذا غايى مانجداش لانه طويل ، جينا تحت السلم ورقينا رقا قبلى ثلاثة

او اربعة الى هذا لقينا الحبشى وين ماجينا فى السلوم من فوق لقينا حبش مسطرين من هنا  
ومسطرين من هنا فى قم السلوم الى يرقا يطبسوا فيه ضرب العفن بكل فى يده مشفا يجررها  
فى الواحدنين تمشى فيه هكى تظل الدماوات .

س . شن هى المشفا ؟

ج . مخراز بتاع حديد فيه نصاب .

س . فى لحم بنادم ؟

ج . ايه فى بنادم يا فى بطنك يا فى صفحتك ويا فى صدرك وشن ، عندهم فيك قول ياسيدى  
طقت انا تمشى هذا لابس طويقيه بيضاء وعباق تحت باطى الحاصل وفى سوريه عربيه قيش  
هذا انا حطيت كراعى بالدرجه اللفوقيه وقولها واحد يتبت بالله ويعطيها لى كف طارت منى  
هديك الطاقية ، طارت من على راسى بنطيس عليها بناخذها وبنقوله انا تخيرنى شن داير  
لغنائهم ثلاثه جاين الى هذا يتلاحق فيا واحد فى يده لوحه والحاصل الى هذا عنده باش  
يضر ب نشهد بالله طبسوا فيا كف كف وانا صحيح سعتها قول طبسوا فيا ضرب طحت  
لوطا انجى بين كرعين واحد نتعل عليه ونقول نسفاه ايطيح على ظهري من وراء وتمشى بيه  
لعدن القمره الى فى وسط البابور وبين ماطقينا فى القمره فيه ساندانيلا (حرس) ببندقته  
طلفته انا طاح منى منى واخبط فيا وقول هالساندانيلا صاحب البندقه يشذها من عند  
السنقى هى بستقيها (الحربه) ويقولها يجلولنى بيها انجى راسى اللوطا دهشت طحت والله ما  
نندرى على روحى وين ماشى قعدت ساعه مغشى ما نندرى على روحى وين بعدين جرت  
فيا الروح استاعيت ، برقت (نظرت) بعيون مطروح توا انا والله عباق تحت باطى ما  
طلقتها ملويه لوى ، قول ياسيدى لغنائته (اذا به) افيم كى قم الروشن ، كيف هالصنيديق  
قم العنبر تريته وكيت كراعى وتميت نقحز . . .

انتهى الشريط الاول 241/4

بداية الشريط الثانى 242/4

قول ياسيدى قحزت على قدامى ناشتنى هديك المغاره هلى نشبح فيها انا هو قم عنبر  
تريته وقالها نقحز بكرعيه الزوز ونجى فى قم العنبر وقالها نتصلب على راسى هو سبع  
دريجات بعد استاعيت سبع درجات والله ما حطيت فيهن كراع (قدم) متخرط لعند لوطا  
فى العنبر لقيت ناس مطرحين شىء مجرحين وشىء موق ، حتى الموتى واجدين صبيت  
(وقفت) توا انا نراعى هديكيا هالكينهم مطروحين كلهم هداك العنبر مضروب لعند راسه  
اعرف الى بتصير فيهم الكريه .

س . هو فيه موتى وجرحى وصحاح ؟

ج . مع بعضهم واكثرهم جرحى .

س . ورفيك وين يا حاج ؟

ج . في جرتي الى صار لي انا صار له هو غير توا مش قلت لكم ضربني الحبشي كف وطاحت طاقيتي وقالها يعني طبسوا فيا خبط بلي فيهم حصلت واحد من عند كرعيه سفيته جي فوق ظهري هكي من فوق وتميت نصلفق فيه لين جيت في فم القمره لغناته فيه هديكي الساندا نيلا لوان بالبنده طحت وبعدين نجبروا فينا هلي جوا مندكين فيه واحد ينقاله «سالم الزغلي» ورفلي حد ماضربوه خبا وجي مصبي والله ما بطلوا فيه تهيبك بالسناقي نين مات في مكانه وواحد آخر في جرتي قتلوه اوكانه فيك جهد تختق بحرارة الروح منين مازال عندك عمر قول ياسيدي انصلبت في هداك العمر لوطا .

س . توا مش عارف وين رافعينكم ؟

ج . مانيش عارف روحي وين انا ، قول نضت صبيت لغناته هداك العمر واسع اكبر من حوشي هكديه لغناته ناس مطرحه بلي فيها وتنين (تثن) الى . . (غير واضحة) وحتى سوريته (قميصه) ما تلقاش فيه بقعة يابسة عليه وفيه الى مقنبر من الضرب هكديه وداهش وقاعد واعى نضت صبيت وهو يقول لي هل في حد العنبر من غادي نصيب بيني وبينه ، يقول لي غادي بينا وبينك رسول الله ياودي انت مصبي راهم هدوما موق الى هنا بلي فيهم وين بتمشي اقعد في مكانك قتلته ياودي شن بندير لك ، صبيت شويه وتالي فيه يدبروله في براندات (اسره) هو البابور يعني مطروحات هكديه فيه قاطع مقطوع عميد هكديه منصوب مع هديكن البراندات وملينات البراندات بلي تحت منهن معفرين عفز قول ياسيدي صبيت نصيب وتالي جيت رقيت لهداك العميد اللي شيء مصبي هكي وشيء مبطوح هكي قلت وين ياكبدي والله ما عندك وين تحط كراعك الا كان على صدر واحد ميت عفج هكديه ركب من هداك العميد ، شديت العميد من فوق هكي في غمري وقعدت لاصق على هداك العميد بكرعيه هكديه نصيب تربتها هي الى خدتنا طلعت ليل الدنيا مظلمة قول ياسيدي انقيش هذا انفكن كرعيه بنطلق روحي حتى انا ايجي ساعة ونص والا ساعتين وانا فوق عود بتاع حديد مصبي مقعمرز ونطلق روحي طلقت كراعي لوطا فيه واحد مقنبر تحت مني ولغناته فيه هباكه في راسه هكي الداموات لغناته هداك الدم سايل عما سوريته رايجه والله ما تلقى فيها ما تطبق يابسه تقول قطعة زينقو عليه ، طقت كراعي في راسه برق فيا قال لي انت . . «غير واضح 53» قتلته انت وين تعرفني ياودي فعدت نبكي انا ، انت منوات ؟ قال لي انا محمد خوتنا من طبرق في الجمالة هو ، لكن ولد صغير وطويل وولد مبيوع مداير قطايطي وظافره من زوز وقهول يتركبوا فيه زوز حبش يدبروا كرعيه في كتوفه وقولها ينتلوا تظهر بجارها بكل الجلد بتاع راسه نجى محوله بكل بكل فعد كان العظم الدموات وخيرك ياودي شنو الى صار لك هكي . كي داروا لك قال لي تركبوا فيا زوز حبش وانا طايح قال تلومني هديك الشوشه نتلوا بجلدتها بكل وهذا الى راد ربي ياولد عمي قال لي تو انت الى امتي بتقعد مقنبره نين ايفرج علينا ربي انشاء الله قريب بيرمونا في البحر ويقتلونا . قول ياسيدي قال لي انزل . نزلت قال لي اهم زوز ميتين حدها من هني انا حاط عليهم كرعيه من هني ولكن فيسع قتلته والله ما نحط كراعي عالميت . كيف يا محمد ؟ تكيف ي . . . هكديه . قال لي اهو اندنه وحط اكرعك في اللوطا

واوكانك بتصلى باهى اوكان بتقعمز عليه باهى قتلته باهى ياسى . ميتين حنى . حطيت كراعى ولخرى مالقيت وين نخطها كافحت شوى وبعد تالى طحت والله ما قعمزت الا على واحد منهم قعمزت عليه قعمزنا . قعدنا هديك الليلة وقعدنا نهار . س . ماجاكم حد ؟

ج . ماجانا حد . كان فى حالتنا الى حنى فيها .

س . لا يكال ولا شراب لاشى ؟

ج . لا . لا مافيش . نرجوا فى الساعة امتى توقف عندنا يقتلونا . قول ياسيدى نشهد بالله ان قعدنا هديك الليلة هذا نهار قبلها . هوينه مش اليلة ومن غدويتها لعند قيس الظهر وحنى فى الحاله هذى بعدين قالها جابوا زوز بتاق بتاعت شرب بتاق (براميل) بتاح لوح . جابوزوز (اثنين) يعنى فضوا هالميتين حطوهم فى مكانهم وقاله ركبوا طربه اميه بحر املوها . ناضوا الناس وفيه الى مازال يتدعش صاحى وفيه عويله هكديه عما الطايحين من الضرب واجد . حد فوق راهو الكافر الكبير هو الشر . ناض الى هذا يقول أعطينى باش . ينعتوا كان نعته مافيش واحد يدوى (يتكلم) دارو الما على هديك الواحد ومدابيرين فوق منه غارف العويل فات فيهم الحال والله باعيني واحد جاي يتعنكش فى الكبانيه الى لايده على الريميل مالفاش منين يخش قالها رقى عما واحد ادنكس على راسه والله قريب مات فى هذاك البرميل .

س . هو صغير والا كبير ؟

ج . عيل صغير طناش هذا العيل . قول ياسيدى مابلطوا الناس يغرفوا من هديكن الوحدات البتاني . طقت فينا جغمه اميه (ماء) وين طقت فينا جغمه (جرعه) الميه استحيننا طسيشه (قليل) لغناهم جايين شكايير بتاع بشاط والله تشبها والله الاحمر من الكرويه يعنى ماتقدر تنفرشها الشكاره (الكيسه) وماك حى لغناهم برمونا فى عنبر اخر وبرمونا هلى فى هالعنبر حنى فى هالميه برمونا فى عنبر آخر ، تقدر ترقى ، ترقى عما هديك الدروج (سلم) يعطوك مل ايديك بشاط (خبز مجفف) ، وانت والله نقدر نقول لهم . والله كلا واحد شاهده بعينى كلا الاخر قالوا مات حتى هو حد ماقال له هكديه يرغب رغبان وريقه يابس هديكه حصل هنا فرفش فرفش ومات ، مات مشى . قول ياسيدى برمونا (غيرونا) فى عنبر اخر وتلقى كيف تقعمز وكان بتصبى وكلوا بعد عطونا رويحه البشاط وعطونا من الميه الناس تحايت . قول ياسيدى برمونا فى عنبر اخر والله الحمد الله لقينا الوسع شويه بعدين من غدويتها قعدنا قالوا اهو جايين الطيباء جايين ييبروا وهلى مجاريح هدوم بيداوهم . هالى ضربته ماكنه هذا ياخذوه واحد شاهده انا واحد لميت (لعائلة) ابو تركيه . انا مفلحني تفليح (جروح) هكديه على هديك القطنه زوز طبيا مقعمزين فى البرج الفوق وحنى نسرخوا عليهن الى هوناس ياسر يعنى مخرتم الفوشيك الى هو ضربته يبرقوا فيه خفيفه يداووا وكلا على ابوتركيه مضروب على مخاريقه وضاهره من كتفه وجايينه من جماعتهم زوز يحاذوا فيه يقوللهم انا صحيح ياودى مافيه شىء برق فيه الطبيب وقال «بوت ان مارى» معناها لوح فى البحر خدوه ايد وكراع يقولهم انا صحيح انا صحيح والله



لين اتدرك في المي ويقول انا صحيح . انا نبرق (أشاهد) واجدين من هالطبع (بالمثل) .  
والله هذا اللي حضرته وهذا اللي نعرفه .

س . اذكر لنا بالاسماء ؟

ج . على بن تركيه يقولوا له هذا باطوه في البحر .

س . هل كان كبير في السن ؟

ج . في خيار عمره . قول ياسيدي قعدنا في هذاك العمر والله استاسعنا واطمعنا حتى بالحياة لكن مانعين علينا الضرب عسكر بتاع البابور البحرية هذوم الباقي ما هم شويه العسكرية حبش بتاع البابور منعوا عليهم قالوهم ماعادش تضربوهم وهم يخدموا في الكويجينات (المطبخ) ايجيوا هذاك السطل قدر هم اللي يرفعوا فيهم بالوحدات بالعمد . داير روحهم يغسلوا في القدور ويقلوا (ينقلوا) هذاك القدر فاير (يغلي) يلقيه على حاشية العمر يصبوا اليه فاير في العمر . عما تواتر بهجات بن حسين . «حسين ولد الكرائي راقد على قفاه هكي صبوا عليه ايجي قاوطية اميه والله ما بطلت تاكل فيه نين مصارينه (امعاؤه) قاعدين بره ماطولش لين مات . مات في البابور في العمر هذا بزغوا (دلغوا) علينا مي فاير . باهي ويلمدوا نصيب شيش وايجي خاش هو ، هذا انت عسكري ، الطباخ هذا كيف هنا يبريش ما يلقاش منه حد يخافوا منه ياخذ هديك الشيشه وقالها يقج بيها اثنين والا ثلاث واحد تدمغه واحد تكسرله راسه . نشهد بالله انا سبيت العبيد وتلاحقت فيه فضاء تالا جاله البابور وعاطي بالقفا نحكوا انا وحياة على سليمان صاحبي وجماعة «تدخل من احد الحاضرين ؛ حتى عمي موسى الاربد عماكم يا حاج كان من الجماله» .

معانا انا مش في الجماله انا هربت من بوي هروب من هنا لكن يا ولدي درت خير واجد . وانا صغير . انقيش هذا انا مقعمر مهنر ولا بس سورية عربية ويحكوا الجماعة وهديكم الحبش ايجيوا المخطاف هذا اللي يحركوا بيه في الفحم بتاع الكوجينه والله ما نندري عليه نين سقطه في رقبته سوريقي وقولها يجبدني وعلى سليمان فارس الله يرحمه ويقولهم خلوا الرجل تواتر شادين السناقي وشادين كانك قريب الجلهه هديكي غير شبحك من الروشن بس يصلخوني يالا غادي وقولها يكرشوا في هذاك المخطاف ، باستا يا على باستا يا على اطلق يا على من خوف يشبعهم حد حتى سلكوه من رقبه سوريقي وقالها طلقوه من رقبتي وهربوا وانا رديت قعمزت والله لو كان لهوتوا الشايب ماعاد لحس خمسة .

س . من هم حبش والامين ؟

ج . حبش وعسكر طليان بتاعين البحرية . هم مانعين عليهم الضرب قالوهم ماتضر بوهمش لكن هم متغلين ايجوا بالسرقة . قول ياسيدي اشهد بالله بعد اللي سعفونا بالدواء وهلى ما ينفعش طوحوه وقالها سافرنا بالبابور وجابونا لطرابلس .

س . هذا اليوم الثاني - قداش يوم قعدتوا انتم في البابور هذا ؟

ج . قعد بينا يومين وهو مرسى غادي في وسط الطريق ايجي يومين جابونا لطرابلس طول .

س . قداش قعد بيبكم ما بين المرسى والمرسى ؟

ج . والله ما نندري عليه هي المسافة مش بعيدة ما بين سرت وما بين طرابلس مشى بعيدة

قول ياسيدى جابونا لطرابلس حطونا فى المحل كراتينا .

س . توا انتم واجدين يا حاج ؟

ج . ياودى الف وميتين والا انزل لوطا هلى حين لقينا الذرياسر مليون ومدارين فيه يعنى خانة فيها ايجى ستة والا سبعة ديار على طول صف من هنا وصف من هنا ما بيناتهم او كاط (طابق - دور) او طى هذا كاط فوقى . قول ياسيدى فى هديكن الديار بتاع الكراتينة . توا حتى قاعدين بدمنا قالولنا يلا بتعملوا بانويا (حمام) تنظفوا الدم ايديرونا اربعة اربعة . وهودم اسود هو يظهر يرب يقولوله نسلبوا دبشنا الى هذا يحطه فى مكانه ايجوا يخشوا العسكرية وياخذوا عصاء والا غطاف وكلها يخلطوها على بعضها بعض والله من جملتها توا يظهرنا اربعة اربعة ريقه عرايا والله مافينا عليه حاجة وقالها ينزلونا للبحر قريب ينزلونا هديكن الدريجات ويعطونا قريضه صابون ايجى كيف الثمره هكى كبيرتها كان لقيت ما نكش بالها بالميه والا مش بال روحك السوط انخشوا فى هديك البحر نزعروا صقع قالها انغمر شويه على راسى هكديه فيه الحبش من لوطا والى يغسل روحه ينوض يصبى ، انوضوا نصبوا على الرصيف هذاك اربعة اربعة

والله ما علينا جداده نين يخششونا لمكاننا انا لابس سورية عربية فيها كمام . وين نظهروا نطوح فيها فوق الباب من فوق ونلقى فيها فى مكانها مرتين احنا ظهرونا بهذه الحالة هكى دية فيه واحد من جماعة معدان من سرت يقولوا له حسين الفورق والله انا مقعمز وجابوا لنا الغذى قعمزت نتغدى ايجيوا لنا فى خبيزات والله ماعليه حاجة ونقولها نقطع كم منها قلت له هاك يا حسين ديره حزامية . خداه شرك من النص وتستريبه غير تستير من القفاء ومن قدام وخلاص قول ياسيدى قعدنا توا للخرافة الكبيرة الشيشمة فى فم الدار من برة هلى نشربوا منها لاسطل لا قاويطة لا شىء وين بتظهر تشرب . شنوتى ؟ نبي نشرب نبي لاكو . اشرب امية تظهر لهديك الشيشمة بالله ماتحط فمك عليها اذا كان حطيت فمك على البزيم ( الحنفية ) ويصب المي فى ايديك هكديه وتجغم من كفك والله ما تحطه فى ريقك نين يضربك الوقاف الى عليها عنده قطعة لوحة . وبيت الراحة حتى هو فى ركن فى تركينة هكديه يعنى والله ما تظهر تطق فيه والله ما تحشله نين تحصل صمته (ضربة) . باهى هونه توا النايب الرسيوى بتاعهم الى بنا فى فوق ايجيوا شكيرات خبزة ايجطوهم فى فم الدار ويقولونا اظهروا لابره كلكم نظهروا فى هذاك المستراح الى قدام الديار ووين تجى خاش انت بالسرا بالنفر ووين تجى خاش يعطوك فردة خبزة . فردة عسكرية ومعها شوية بصل والا حبات زيتون ملاح الى يعمق حبات الزيتون بتاع الملاح ضربه والى يعمق ( يأكل ) الخبزة ضربه ، وتقدر تقول ما نبش يكسروا لك رأسك يعنى نين تأخذ رويسات البصل والا حبات الملاح وتأخذ فردة خبزتك وتحط اوكانك بتتكيف وتأكل عاد غير كان ما تبش تمد كرعيك .

س . احكيها كلها بالتفصيل كيف ؟

- ج . هذا هو . الحكاية الى وقع لي انفسر فيه .  
 س . ايه بتاع الضرب وبتاع الواحد ؟ عالملكة ؟  
 ج . الضربة . ضربت الماكلة يعنى ما يعطوك فردة الخبزة نين يضربوك ضربه بلوحة  
 وما يعطوكش حبات الزيتون والا روس البصل نين يضربوك ضربه وما تشرش  
 لين يضربوك ضربه وما تمشى تطير الى نين يضربوك ضربه .  
 س . شنوا نوع الضرب يا حاج . الضرب بحديد او بلوح ؟  
 ج . بلوحة . قطعة لوحه هكذبه كى الوقافة قطعة ثلوثيه للضرب باهية حتى كان بتدق  
 بيها سبول ( ذرة ) باهية ثقيلة قعدنا ايجي خمسطاش ( 15 ) او عشرين يوم كان  
 هديك الخبزة والا راس البصل او حبات الملاح .  
 س . طيب ما يجيكمش ؟  
 ج . لا ما فيش طيب .  
 س . باهى ياسى الحاج يحطوا فيكم فى عنابر والا كل اربعة فى حجرة والا عشرة والا  
 كيف ؟  
 ج . هن حجرات مدايرات سطر واحد وفى تانى كاط وخلفهن كثير باش يحمل هذاك  
 الوحى حتى الدار الى اخنى فيها مئة نفر . دار طويلة طول و . . . . .  
 س . من فيها الدار . انتم ومن ؟  
 ج . انا وفريوان هذا الى حكيتلكم عليه من البلاد هذا مانعرف وفيه بعض انفار  
 نعرفوهم من بادية سرت واحد ينقاله حسين التونسى وعمانا من مصراته عمر بن  
 عبد الحميد وعمانا محمد الحداد من يذر منوا آخر الحاصل كبانية راحوا من بالى .  
 س . عمر من هنا ؟  
 ج . من الزروق من زاوية الزروق .  
 س . ومحمد الحداد ؟  
 ج . من يذر .  
 س . يجدموا فيكم يا حاج ؟  
 ج . لا . . . .  
 س . كيف البرنامج اليومى ؟  
 ج . تصبح نحى فى خربتك نين كانك بتطيرى والا بيحبوا لك . . . . والا نهار رابع  
 يوم خامس يوم بانيو هيا تعدى استحم فى البحر نصف روحك هذا هو قعدنا ايجي  
 خمسطاش اليوم وبعدين الناس خافت من الشخاخ ومن الواحد تمو من الجمعة الى  
 الجمعة يديروا لنا فى طبيخة ويديروا لنا حتى فى لحم بتاع جمال يجيبوا لنا فى هديك  
 المريقة الحاصل امية ( ماء ) وطريف لحمه ويعطونا فيهن عما الخبزة بعدين والله  
 جرت فينا الروح نفعت بينا شوى قعدنا الحاصل ايجي خمسطاش اليوم بهذه الحالة  
 من الجمعة الى الجمعة يديروا لنا فى طبيخة لحم بتاع جمال بعدين ، توا قاعدين  
 عرايا ، بعدين بعد تمام 28 يوم قالها جابوا لنا ثلاثة اربعة كرارس مافيش كراهب

والا شيء كراريس معبيات سوريات وسراويل ايطبس على زوز الرومى يحد  
فهملك كان جن سراويل هن الزوز بعدين انبدلوا لبعضنا حتى او كان جن سواري  
هن الزوز بلا سراوال الى بختك ( الحظ ) سعدك عطوهلنا قعدنا نبقصوا بلى فينا  
ولغنائنا بابور متراكى فى صقاله عالرصيف جابوتا كلنا وركركونا فى هداك البابور  
وين بيقلوننا سعتها يتحاربوا الطليان والالمان انقيش هذا اسقد بينا الببور  
طرابلس .

س . ما تتدكرش سنة كم هذا ؟

ج . ما نقدرش انقولك كالا دقة القرضابية سنة 15 قول يا سيدى الكلام هذا بعدها  
راهور رفعونا للبابور وسقونا نشهد بالله قيس قبل تمسايه الشمس اسقد بينا كلنا  
نشهد بالله قيس المغرب هكى ضلمت العين جابوا لنا النفاخ هذا حزامات بتاع  
التفساس ( طوق النجاة ) نعتانك محسوب كان عسكرى حلاط من هنا وحلاط من  
هنا متحزم بيه ، شو هذا ؟ شنو هذا ؟ قالوا هذا كان جانا العدو شور البابور تنقز  
حتى فى اللمية تقعد مصبى لين انخابروا ويحيينا من ينجدنا يعنى تلفا ما شاء الله ،  
ما غباك فى عزم العرب حتى والله بروحنا باهيين ، وحنى ماننفعوش والله خراف  
انا مش عاجبى ، نقدر انقولك فيه الى طاح داهش صار حتى الليبيين يعنى غطاس  
بيكسر البابور ، قالوا ما تخافوش غير ما ترقوش اللفوق وما تسبسوش ( لا تدخنوا )  
وما تديروش ضىء وما تديروش هرجة مشى بينا نصيب قيس الساعة عشرة تقريبا  
جى لبليله ، شنى هذه ؟ قالوا هذه مالطا ، المدينة فى مالطا داخل بين خشوم  
وقطرور هداك البحر ما يعوم البابور وكالا من خاطىء بابور واحد ، فرد واحد يمر  
ويلصق ويخش ، مافيش مد ايدك من هنا جبل ومن هنا جبل .

س . يا عمى الحاج تغير الحال توا ؟ بدأت المعاملة باهية ماعاش يضربوا فيكم ؟  
ج . لا ، ماعاش يضربو فينا ، الضرب مازال فى لوطية شوى ، مازال القدام شوى ،  
قول يا سيدى صمد بينا هداك البابور هديك الليلة عالطول وهداك النهار على طول  
ووين قريب تمساي الشمس قالها تسقد .

س . يعنى فى مالطا قعدتوا نهار وليلة ؟

ج . ايه فى مالطا .

س . ما نزلتوا من البابور ؟

ج . وين تقدر تنزل ولا مقابلتنا لا بلاد ولا ضىء بين الجبال هكى دى وخلاص ، ووين  
قريب تتساي الشمس قالها قلع ، قلع وفات ، وقيس قبل تهليت الفجر بشوية  
تكوا ( ورسوا ) بنا على بلاد شو هالبلاد هدى ؟ قالوا هدى باليرما سيشليانا قالها خمد  
فيها لقيس وقته مشى بينا ايجى ثلاث ليالى بهذه الحالة وتالى جابوتا لبليله الى فيها  
الفسحة ، بليدة أوستكا جزيرة كيف مالطا حتى هى هالطليان الى عندهم يعنى  
معاملات وعندهم كذا بيعاكموهم هلى حكمه واجد من العشرة سنين فوق واللى  
مدة عمره يحطوا فيه فى هديك الجزيرة منفى ، رسا بينا نزلنا فليكات ( قوارب )

ينزلن فينا بالخمسطاش وبالعشرين ولغناته السديل بتاعهن باش تخلصوا من المي  
كروسة دافينها خاشة في البحر انقزوا عليها ونزلوا منها بره قالو لنا رجدوا  
(تجمعوا) هنا لين كملونا بالتنزيل ، كملونا الحاصل يعني حتى حتى (نحن) .

س . عددكم ياسر ؟

ج . ايه واجدين ، ايحي الف وميتين وخير ، قول ها بعد رجدونا وتممونا بالتنزيل  
ماشيين عمانا زابطية كرابير عرب من طرابلس وفيه بالوصية بتاعهم بتاع الكياماتا  
هديم التالين ، لاسين جيب لعند الوطا وبسلاحهم حتى هم ، قالوا لنا ديرو  
اربعة اربعة درنا اربعة اربعة شادين في ايدين بعضنا ، عاد حتى واهقين  
(خائفين) العرب والله لا نعرفوا لا اربعة ولا خمسة شادين في ايدين بعضنا ودرنا  
اربعة اربعة خشينا البلاد ووين خشينا البلاد لغناهم جبال وهندي (تين شوكي)  
وجردينات (حداق) ووحى ونسوان في مزارعهن لغناهم يابوى ريت الحصان  
منين حتى عندنا ملعب نهار العيد قبل في الزروق هنا ، يلهد الخيل ونضل حتى  
مرجدين من هنا ، لغناهم كاسيين هديك الطريق حاشيتها من هنا وحاشيتها من  
هنا ، هديكن النسوان لغناهن بدوين ، الفلاحة زعميتها تخنق وتقول ياريتنى طاقة  
فيهم ، قول ياسيدى جينا في كنشيلو (باب حديد) ترعة هي في جردينة ،  
ضاهرات زوز « ائين » روميات جاييات خضيرة في قريطات ، والحاصل حلن  
الباب وقعدن يتفرجوا اشهد بالله حتى جينا قدوهم الاربعة الى فيهم انا فيه واحد  
ينقاله ميلاد البورى زليطنى لكن شيبانى ، لكن هذا صاحب عيت شتيوى قطعى  
(لص) من الثلاث يأخذ ائين قول ياسيدى تتركب فيه وحدة وتعطيله كفخة  
(لطمة) نندرى عليه لا برشادة لا بلوحة ويقول اطلق ، اطلق ايدى ، طلقت  
ايدى وقالها يولى عليها ، يرفعها فوق من راسه ، صبى هو والناس يرفعها فوق  
راسه وينكتها ، انفتخت هديك الرومية وولت تعيط ، ناضت تعيط جى الكرابير  
هذا الى عمانا عربى قاله نشهد بالله انك راجل ، اما هديكم الفروخ وهالنسوان  
هلى في حاشية الجبل واحد شاد ضلفة هندي بيحدفنا بيها واواحد برشادة واواحد  
بعضا واواحد كى الحصان الى بيلهد حتى ، حتى جابونا لوسط البليدة المحلات الى  
بيحبسونا فيهن هويئة لقينا عاد مدايرين عنابر بتاعات حبس وجينا حتى ايحي مية  
وخمسين - 150 - حطونا في عنبر واحد .

بداية الوجه الثانى :

س . وين حطوكم يا حاج وين جابوكم ؟

ج . في وسط البلاد في أوستكا . خشينا عاد موتين (مجهزين) لنا المحلات الى بيضيفونا  
فيهن ، خشينا في المحلات لغناته اروال هكى مدايرينله قيسان والله الا كى قيسان  
العرب (اقواس) طولته ايحي 1/2 ك . م . . . يعنى والله قالوا لنا خشوا ، خشينا

وقالها ياسيدى لغنائهم مدايرين لنا بتيه (برميل) هذى كانت فى تركينة كانك بتخفف والا بتطيرمى . والله مرتين والا ثلاثة نصى عليها ما طيحت فيها بعة نين بعدين وين ، والله نضل مقعمرين كبانيه ياكلوا والا يديروا فى حاجة ايجى واحد ييجى واحد يقعمر على هديك البتية من فوق مدايرين لويحات . باهى كنسوها وطقينا فى هديك المحل قالوا لنا هيا اختاروا انفار ، يعنى اعطوا نفرين يديرولكم الطبخة يطيبوا لكم (الطهى) قلنا باهى ، فيه واحد فزائى ينقاله رحومة طويل قال انا نمشى وعماه واحد آخر واختاروا من المحلات الاخرات الحاصل ثمانية هدموم طبخة .

س . الاكل باهى يعنى ؟

ج . باهى مكرونة ورز وفاصوليا ويخلطوا لنا او كالا الخبزة .

س . حالكم تحسن باهى ؟

ج . ايه باهى . قول ياسيدى قعدنا فى هديك الامور . قالوا يا اولاد يبوا منكم كابوا

(رئيس) مافيش واحد نازل فى عسكرية الطليان والا شىء ؟ قلناهم حتى جماعتنا حتى مافيناش واحد كان عسكرى طليان . فيه واحد من الجبل يعرف يدوى بالطليانى ينقاله (معيوف) ، حتى فى هذاك العمر يا سيدى ، يا معيوف اقعد علينا كابو قال باهى انا نقعد عليكم وانشاء الله مايكون الا خير ، يدوى بالطليانى زى المية (يتكلم بطلاقة) من الجبل هو . عندهم رطانة بروحهم هم عمانا نصيب جبالية ، نلعبوا فى ام السبعة نخططوا فيها تخطيط على الستاك هكى بالفحمه وفهمنا منه ، وين يقوله اكتسن بمعنى حطه تركينى ، حتى مانعرفوهاش دوتهم ، قول ياسيدى السى معيوف هذاك قعدنا ايجى عشرين يوم وحتى فى الغصن والحال قبل وشوف كتبتنا والساندانيل (الحرس) هونه بيندقته وغدريته هونه فى الفم ، فى الطريق ، قول ياسيدى جانا البروفيتو بتاع البلاد اوستكا ، الحاكم بتاعها ، قال شنوا حالكم ، قلنا له : شنو حالنا حال الكرموس (التين) فى الغرارة ، حالنا باهون واحنى يعنى قتلنا الصهد والقبل والظلام والحال . قال يا اولاد لو كان توا نعمل فيكم طيب انتم العرب قالوا لنا انتم كى السعى ، ماتهابوش ولا تخافوا وعندكم الى بينحبس كانه بيموت والجالى يهرب ويدير ، قلنا له احنا اولاد الى بيهرب وين بيهرب ؟ وتالى يعنى ، قال لو كان نعمل فيكم طيب توا تكافون بمقلوب انتم . انا بنعمل فيكم معروف تكافون بمثلوف مانى مسئول عليكم . والله لو يموت واحد او يهرب واحد ماعاد نفتح عليكم ضى وانا كوماندة البلاد . لكن اهو يعنى بندير فيكم معروف واشبح ، وشنوا المعروف الى بيديره فينا . قال اهو بنخلى عليكم الحبس محلول ، وواسع هو تطلعوا فيه ، نين تتغدوانين يعنى يفوت نص النهار وبعدين فى الليل تخشوا نسكروا عليكم قالها معيوف ، هديك لبيب قال هيا صفقوا له ، توا دارونا صفه ، من هنا ومن هنا طيسنا حتى نصفقوا فيفا . فيفا - نشاء الله تعيش ، صفقنا له ومشى غاب علينا عشر ايام وولى ، قال

شن الحال توا ؟ قلنا له انت وجهك وجه فرج علينا . احنا من ساعة الى ريناك وحنى فى الفرج . قال بنزیدکم معروف آخر . لكن الدالة الى بيان هو كذا قلنا له : ما ريتناش خينا او عصينا او درنا حاجة بطالة . . قال : اهو بنظهرکم برا ( خارج ) فى الطريق تتغدوا وتتفظوا التوزيرات ( الفرش ) مدايرين توزيرات بتاع سعف فراشاتکم وتتفظوا وتشبحوا الشمس ويعنى وتتغدوا برا ، خبزتکم وشربتکم بتجیکم برا بعد اتماو تتغدوا تخشوا داخل نسکروا علیکم قال يالازیدوا صفقوا هدى فرحة اكثر من الاوله .

س . هذا منوا الى يقول لکم صفقوا ؟

ج . الکابوا بتاعنا معيوف . نوضوا نصفقوا حنى ونشکروا نقولوا الله يطول عمرک وانت وجهک وجه فرح علينا وحنى طمعنا بالحياة . قال : کل محبوس مطلق وما تديروش البطالة وما تهربوش وما تطيحوش فى بحر ، هذا فى التالى بکله ، اهو بنخليکم حکر ساعتين ونصف او ثلاثة ساعات برا فى الضىء وتتفضوا والحاصل تتغدوا برا وتأخذوا فسحة لكن قال انا عارف بتصير الکاينة . قلنا له . لا ، تعذر له صاحبنا هديکى واسطى بالكلام قول ظهورنا برا تتغدوا برا . لكن الشارع يمروا منه نسوان ويفوتوا منه فلاحه ، ناس فلاحه يخدموا فى السوانى ، يقول قلنا لا نکلما حد لا يتعدى علينا حد لا يعنى يخبنا شىء قال باهى ، مشى غاب علينا عشرة ايام اخرات وولى لنا قال : الدالة بندير لکم مزية انتم تدعوا لى وفرحانين بى وتدعوا لى بطول العمر الداله ، لكن عارفها الداله بتجى عليا . قلنا له ما تخافش ، هذا يراجع فيه الکابوا بتاعنا قال له متخافش . قال الداله نبى نخليکم البحر آهو مش بعيد ، تعدوا لعند البحر تستحموا واللى يعرف يعوم يعوم ومش تحسابوا روحکم بتهربوا والا الى يهرب بينجى والا الى بيغرق فى اللميه ما عادش بيولى راهو سيوره ( مصيره ) الى محبوس مطلق راکم سيورکم تروحوا لبلادکم قول ياسيدى قلنا له باهى . تمينا من الصبح يفتح علينا الضحى هکى شوية وناخذوا ديشاتنا الى نستحقوهم ونمشوا للبحر . حقاف والجبل متعلی وفيه قصات زى البيار الى بيلعب ام السبعة يلعب واللى يستحم يستحم ومع الفسحة هذى ناخذوا فى رويحة من البحر باهى قعدنا فيها مدة .

س . ياعمى الحاج عندما نزلتوا فى اول يوم سجلوکم صورکم داروا لکم حاجة ؟

ج . ماداروا لنا شىء عدا اربعة اربعة ، ما داروا لنا حاجة .

س . ما خدوش اسماءوکم بکل ؟

ج . شىء .

س . ما صوروکم مش ؟

ج . الاسامى واخذينهم من طرابلس ، مسجلينا من طرابلس ، وين مستالد وشنو بوك . وشنو حرفتک ؟ وانظر شنو ، الحاصل من طرابلس . السجل عمنا من طرابلس .

س . تو لما تطلعوا من الحبس مش يتمموا علیکم يقولوا لکم مثلا عددکم کذا کذا

يتمموا عليكم والا ما فيش اللي يعد فيكم في الخشوش والطلوع الكبران عليكم ؟  
ج . الكبران هو عمانا في وسطنا وكل شيء قبلته .  
س . انتم واجدين عددكم ؟

ج . احنا مانا في محل واحد مفرقنا محلات .  
س . توا قداش انت مجموعتك اللي في ؟

ج . ايجي ميه وخمسين (150) ، قول ياسيدي حصلنا فسحة ، يوم من الايام فيه ولد هكى سميتو محمد ولد امبارك ، ولد الحاج حمد امبارك يدوى بالطليلاني شوى شوى والله انا مسكر ما نعرف حاجة ، لكن بعدين تعلمت ، مقبر من وقت اللي مسكرين علينا مقنبر في الروشن ويفوتوا يمروا النصارى واحد . برقيزى راكب على حمار شيباني قال يا على - كنشوا لا اوراي - تعرف تخدم ، قال له ايه والله ، قال امالا بنعدى أنديرلك ورقة من البرفتو بتاع البلاد برميسوا (تصريح) يعنى منه وتمشى تظهر عماى لعندى زوز اولاد عسكريه وشيباني وعندى جردينات وعندى مليكة ما عاش انلايم نخدمها واللى هذا معقب لى عيله . قال له باهى كان درتلل ورقة باهى . قالها مشى دار له ورقة من الرومى هذاك برميسو يقولوا له . قالها جابهله عطهله قال له هيا اظهر ، مدايرنله فيه حتى منين يصل ، ظهر ركب على واحد عنده زوز حمير ركب على واحد منهم ، ومشى هو واياه ووين روح قعدنا ننشدوا فيه قال ياسيدي والله شنو عندهم الفلفل والدلاع (البطيخ) وكل خير والبول والعنب وغير كل وقت يبي وقته . كل زمان يبي وقته . والله امبججه هكى يوم من الايام قاله قال لى ما فيش واحد آخر يعرف كيف . حتى العرب نحسابوكم كى الحيوان ما تعرفوا شيء قال له : فيه ولد عمى معنا . وقال له شن سياه ؟ قال له انشده بروحك وين انروحوا نادى عليه ايجي ، قالها ياسيدي جى هو واياه ضبح علينا ولد امبارك هذا قال لى اظهر اهو الرومى بيظهرك عماى تخدم باهى ، قلت له أوباهى كويس باهى قال لى شن اسمك قلت له اسمائى حمد الدهمانى ، قالها كتبت حمد ارماندى .

س . اسمك مسجل عندهم ؟

ج . مش عند هذا . يمكن في الملف عندهم وكالا في التسجيل مسجلينا حنا في طرابلس . وقول ياسيدي دارلى ورقة وركبنا حتى الزوز انا وولد امبارك هذاك على حمار قال الحمار لولدى ومولاه في العسكرية ومولاه سرجينتى ماجور ومولاه معقب عويلة وعنده سوينيات اهن قاعدات حارث له نصيب ويبي الخدمة ويبي التخريش قلنا له باهى . لكن هذاك الشيباني ما فيش اصح منه ، الحاصل مشينا حطنا في هديكى (تلك) الشريكات (ارض صغيرة) ، هم الجبال ، غادى من الجبل الى عند البحر طوله الشراك بتاعهم لغنائته مغرس عنب الحاصل والمطر ما تغيش عليهم ويجرثوا حتى في الطعام ويديروا في الخضار . قول ياسيدي قال لنا بتخربشوا شوى شوى قلنا له باهى . قعدنا عطانا فرماد جو وقعدنا نعزقوا اشهد بالله ماجى الليل . ما هو كنا في الحبس وايدينا رطبات لغنائهم بلاقيش من هنا ويصبن في المي لعند هنا ، انا قلت والله ما عاد مولى انا



معاك . قال لي ما توليش وتوا انديروا ، انديرو له ايريجنا شوية في نصف النهار . قال برمني الحاصل . قلت له باهى ، جانا من غدويتها ، وهو يسكن في المدينة ، في البلاد بروحها وحتى في طرف البلاد ، جانا ظهرنا عماه كى قبل قالها ياسيدى رفعنا عزقنا في هذاك الفول شن الماكلة ؟ هو ايجيب في فردة خبزة هالطويلة ، خبزة دقيق عندهم باهى طويلة ايجي دراع طولها ويحجب في برميل هونه ايقل انضنه فريشكة عصير الرومى هذاك وعنده كل شراك عنده فيه دار وماجن ودينه . قال هيا كان بتروحوا تتغدوا (تاكلوا خبزتكم . قلنا له باهى . قال تشربوا النبيد قلت له لا . قال حتى الى معاي لا . . . . . قال له راهو انا جايب سفنز قال له امطيينه في اماعينكم (الاولانى) واما عينكم اتطيبوا فيهن في الحلوف قال له الحلوف حنا لو كان انحصلوا الحلوف رانا في خيار الخير وين نلقوه حتى والله الا في الزيت تعال كان بتاكلوا باهى . قلنا له لا مانكلوش ، خدينا هديك الخبزة قال امشوا جيبوا نصيب فول ، لكن ما تحبوش من هلى موشح هذا طايب هذا راهو يوجعكم في بطونكم ، خذوا من هلى في مازال وتاكلوه بقشوره . وبعد تالى جربوا خذوا الى يصلح بيكم مشى جاب لنا نصيب في سطل فول ناكلوا في الخبزة ومزبودات الفول تغدينا ، واستمرينا وقت . بعدين هلى معاي نيته خربت جى ساومه واحد حتى اليومية بفرنك قاله انا اندير لك فرنك واربعين بارة صبح امبطل وتالى جاه لآخر ودار له حتى هو ورقة قعدت انا ، شفق منى قال لي توا حتى انت يومين وبتبطل قلت له انا ما نبطلش لكن خدمة واعرة ، قال لي نبيك تقعد بالشهر عماى والشهر ثلاثين فرنك مصوقرات وتشرب شاهى . والله ياولاد انجيب بوعشرين يعطونا بيه قهوة وسكر . ويعطوك شاهى وسكر بابوعشرين يعنى كيلوا العنب الى تشبح فيه وجهك والله الا بثلاثين بارة لكن سعتها الفلوس مهنالكش ، قلت له انا والله بنقعد حر كان قدرت نخدم باهى وانت خدمتك مشقة وواعرة . قال لي لا انت كان بتقعد معاي بالشهر يعنى وقال اضال عندنا خدمة حرث فول والا عزيز ولا حاجة تجيب لي من الجماعة من الى عماك تعرفهم انت وانت معنای كى الكابو حركة ساهلة تجيب لهم امية اتدير لهم حاجة يعنى تعارفهم شويه تورهم كيف تعاونهم يخدموا . قلت له باهى قال لي خدمة ما عادش هي الخدمة لوله ، قول قعدت ياسيدى بالشهر انا واياه والله طقيت معاه (18) - شهر وبعد كملنا الطمنطاش .

س . ايطالى تتكلم باهى ؟

ج . مش باهى لكن انفرز شوى شوى ، حركت خدمة والسانية والحوش والطريق هدين نعرفهن .

س . الاخبار انقطعت على الجهاد ما عادش فيه شيء عن ليبيا ؟

ج . وين حنا عادتوا .

س . وانتم في ايطاليا ما سمعتموا شيء بكل ؟

ج . شن بنسمعوا ؟ عمانا الروساء هذا المريض بتاع ترهونة وعمانا واحد ينقاله شلابى وهالروس مصطفى الترجمان وحد الشتوى واخوه سعدون هديم مدايرهم في محل

بروحهم في اوستكا معانا . هديما كبايرية العرب يعنى قول ياسيدى ، لكن ما نسمعوا في شىء انا رانى مشيت لايطاليا مرتين مرة الاولى محبوس والمرة الاخرى بطيبة خاطرى .  
س . لاخلينا توا في الحبس حتى نحكوا عالجبس ؟  
ج . قول ياسيدى .

س . الرومى مش عنده راديو ما تسمعش فيه ؟  
ج . لا ، لا ، ما فيش لا راديو لا كرهبة لا عندهم حتى حاجة .  
س . ما فيش من يقرأ عليكم اخبار الجريدة .

ج . لا لا ، ما فيش . هم يقرأوا في بعضهم لكن حتى ما ننشدوا فيهم ، يعنى الحرب سعتها بينهم وبين المانيا ، هذا ما فيه ، الباقي ما نسمعوش وراديو ما فيش ، قول ياسيدى قعدت عماه ايجى طمنطاش شهر بعدين جانا خبر الى هو المريض بتاع ترهونة ، رايس بتاع ترهونة محصل نصيب حبش هونه في وقت الحرب مع رمضان الشتيوى محصل نصيب حبش يسرا وحتى مصراة عندهم ، حتى حبش عند رمضان قول ياسيدى جابولنا اخبارية قالوا جماعة ترهونة بىروحوا صاحبهم انطاع وسيبدل الحبش الى عنده بالمحابيس يعطوه المحابيس بتاعه ويعطيهم الحبش بتاعهم ، وازوهم وروحوا قعدنا حتى انتباكوا اهل مصراة صاحبنا عاصى والله لا يسال علينا لا محبوسين لا ميتين لا حين .  
س . من هو ؟

ج . رمضان الشتيوى ، خوته عمانا ، قول ياسيدى قعدنا ايجى شهر وبعدين خطر لهم فكر قالوا حتى انتم بتروحوا لطرابلس لكن مش مطلوقين ، روحنا طرابلس ضربنا فيها سنة وحننا في الحبس .  
س . وين رفوكم بالزبط (بالتحديد) ؟

ج . في السراى الحمراء في طرابلس ، محلات بتاع سجون ، السراى الحمراء .  
س . فيه الصمعة الحمراء وفيه السراى الحمراء القرية عالبحر والا البعيدة عالبحر ؟

ج . السراى الحمراء هدى الى محبوسين فيها ، مش بعيدة عالبحر عارف الى حتى ايدير خطأ والا حاجة وعندنا زانزنة يعنى هوينه لوطا تنزل لها ايجى عشرين درجة وبعدين تلقى حتى البحر فيها ، كان تحشى فيها اربعة وعشرين ساعة تنجن ظلام والقندى ، الفار هذا ياكل ايديك هذا الى ايدير حاجة عوجة من المحابيس يحطوه فيها وعندهم وحده اخرى يقولوا لها زانزنة لوحه ممدودة ويكتفوك من كراعيك ويصكروا عليك كيف القياد بتاع الجمل المحل ما ترفعش راسك فيه اللقوق ما يحملكش كان انت مقعمر ، لكن ما تطولش فيه ، هلى يتعاركوا والايدىرو حاجة ، قول ياسيدى قعدنا فيها سنة المدة ، لكن سعتها نفذوا (ارسلوا) واحد ينقاله احمد بن زعبية هو وولده عمانا قالوا له انت راجل معروف وراجل يعنى كذا ، عدى لمصراة وخاطب رمضان الشتيوى كان بيبدل هالعسكرية الى عنده نطلقوا له المحابيس بتاع السياسة هديم حتى محابيس سياسة لا ينشدك واحد شن درت لا انت منين عدا من لول تعطى اسمك ، والله شىء باهى

توا انا شنو المكان شنو الحل ما عندى شىء انا وواحد آخر ، وواحدين طبعى (مثلى) ، حبس السياسة هكى حاطينا وخلاص ، قول ياسيدى مشى ما عادش ولا (لم يرجع) قالها فيه واحد يهودى ينقاله ابراهم تركيه دزوه هناى من طرابلس ، طرابلس مسكرة ما يظهر منها حد راهو كان الى دازينه ، قول دزوه ما صارش منه ، بعدين فينا واحد لعيلة بوغوله بن ناصر بن غولة احتاز فى طرابلس دزوه هناى ما عادش عطى لا خبر لا علم حتى هو ما عادش ولا ، قول ياسيدى ايسوا من المراسيل الى يدزوا فيهم قالوا أهو بنطلقوكم فى طرابلس قلنا باهى كان طلقتونا عملتوا فينا طيب قالها ياسيدى دارو لنا دفيترات كونجيتي هما يقولوا له دفيترات يعنى ودارو لنا شومى ، القرش هذا ايجيب لك فردة خبز قالوا على خاطر انتم فيكم الى عيل وفيكم الى شيبان ما يقدرش العمل هلى يقدر يعمل القرش هذا يستعان به واوكان طير حق خبزه من برا خير ، لكن سعتها طرابلس متسكرة وفيها القرامات شر ما فيها شىء قلنا باهى خيرتين وفلاحة غير اطلقونا شر ما نبوش لايكال ولا شراب .

س . كيف كانت الحياة فى الحبس ؟ كيف كانت المعاملة ؟ احكيها لنا كيف السنة هدى الى قضيتها ؟

ج . معاملة باهيه ، اكل باهى ، شربه على كيفك وكل يوم يامكرونه مغلطة بحمص يارز مغلط بفاصوليا والخبزه يوماتى ، الخبزه هى الرسمى ، والغدوه الى عماها الشربة والطبيخة وكل جمعة لحم .

س . ضرب مافيش ؟

ج . لا ، ،

س . مافيش حد شنفوه غادى ؟

ج . لاشىء ، لاضرب لامقت لافيه حاجة واللله مامستحق حاجة الا ، يطلقوا سراحك .

س . هذا حبس السياسة ايقولوا له ؟

ج . حبس سياسة .

س . ومافيش حد قعد غادى فى ايطاليا فى الحبس لول كل رفاقك كلهم جو ؟

ج . حتى راس اللفعة مصراتة ، روحنا حتى ورفعوا عمانا آهالى سرت بتاعين سرت وبتاعين معدان هديم الى فى قضاء مصراتة كلهم روحنا ماقعد حد ، قول ياسيدى طلقونا عطينا هداك الدفتر فيه قرش يومى قالوا نهار عاشر يوم انجى لشارع ميزران الرقم الفلانى انجى ادير جرس يفتحولك واتخش تاخذ خمسة فرنك هدين تستعان بيهن على معاشك وعلى مونتك قعدنا وقت هكى لقينا طرابلس خايضة ومش باهيه هذا «كلام . . . . غير واضح» 369 وليت الى ايطاليا انا .

س . كيف يا حاج ، شنو كلام ؟

ج . كلام ، يعنى مافيش من تالا الحكومة انت جاهدت والادارولك والاكذا يعنى ممنونين ، قول ياسيدى .

بعد من مصراته ظهر للخمس ، قعدنا وقت واحنا في الحبس متعلمين عندنا واحد من بن عميني يعرف الطاقية ، ايجيوا لنا في القماش ، نرفي في الطاقية وياخذوا فيها هم بشمن يعطوك مكسب ويقلوا يبيعوا للحكومة بروحنا مانندروا عليهم شن يحصلوا من ورائنا من مكسب واما حتى نرفوا في الطاقية والطاقية اللي تكملها عندنا مهندز للطواقى فيه المليحه ، المصنوعة مليح وفيه الى سقد حالك الى هذا وثمنها يعنى ايجيوا لنا في القماش ونرفوا في الطاقية والحاصل نحصلوا في حق الشاهي والا قهوه والا الى يدخن والا شيء ، يعنى حالتنا باهية بعدين لقينا الحسبه بلهون في طرابلس ، من الشر والحاصل طلبنا الخدمة جينا للصقالة لقينا كان عبيد يواطوا في شمنت ويواطوا في بضاعة تلقى وجه مغبر ماباينات كان عيونهم وناس يعنى يخدموا باليومية كل يوم ودرجته ويعطوه هديكن الخمسة قروش والا ثلاثة فرنك بخمسة قروش هي اليومية هديكم العبيد وهديكم الخدمة يدهم على الطبرنة (الخمارة) وياخذ بيهن شيشه وياخذ صونية (صحن) حوت والا مأكلة وياكلهن يحطهن في مكانهن ويظهر ، ومن غدويتها يصبح مصبي في الصقالة ياخذ ورقة اخرى هذه حالته ، ماعجبتناش الحال ، نشهد بالله حتى إلتينا ثلاثة والا اربعة من مصراته ووحيدين من الزينغ ينقاهم مختار عقوب وخوه احمد عقوب ماتوا الزوزتوهم ، عمانا واحد عبدالله امبيه من النواهمه هذا هو نسيبي انا سعتها انا مازلت ماضهرت اشكابلي (اعزب) كيفي كيفه ، يعرف يقراء انا والله عندي معرفة ، نقراء انا بس ، رفينا الطاقية ، عقاب النهار هوينه تزخرف الحكومة واليوم فيه هوينه موزيكات ويدبروا في حفلات وبخاخات وعربيات يكرن ، مدينة فسحة عقاب النهار ظهرا بتنفسحوا نتفرجوا على هديكن العربيات وهديك الدنيا موزيكا وعساكر والمدنية قول ياسيدي جينا عما شارع ميزران هذا لقينا فيه اعلان اللي بتمشي تخدم في ايطاليا ، شنوا هذا الاعلان ؟ قال هذا يطلبو في خدمة ، كان مش بيزلبحوكم زلبحه سعتها عندنا نازل في العسكري عيب تنزل عما الطليان .

س . انتم لما جيتم من ايطاليا حطوكم في الحبس قعدتوا فيه عام وبعدين كيف صار فيكم انتم طلعوكم من الحبس ؟

ج . طلعوننا من الحبس وقعدنا هايمين في طرابلس ، برامن الكردون مافيش الكردون مسكر في قم الباب الصور بتاعه مسكر لامن يظهر ولا من يخش ، مافيش ، ساعتها رمضان الشتوى عنده عساكر طقوا العند سواني بن يادم انا وين ظهرت في سواني بن يادم لقيت فيه عسكر السويحلي ، ولقيت السويحلي غادى ، لكن ظهرت بحيله لكن هدى مازلت مانطقش فيها ، مازلت ، قول ياسيدي هذه خدمه توا جاء عبد الله قال خدمة ، قول جينا للجرس هبزهنا ظهر لنا رومى من داخل ، شنى ياولاد بتعدوا للخدمة قلنا له انعم قال باهى خشوا هيا . خشينا سجلنا ، شنى صنعتك ووين مستالد ووين بلادك ، بعدين قال مافيكمش حد من هنايا عنده عيال بيعقب لهم فلوس نخصموا من يوميته ونعطوا لعياله هناى لانه مافيش بوصطه (بريد) تمشى ونحى بنجيب لكم فلوس من غادى . تمشى لبر بعيد قلنا له حتى مصراته ماعندنا حد هنا ولا من طرابلسية ولا عندنا

لمن نعقبوا . توا عقيدتنا حتى حتى الى بتخليه ياخذوه منا ماتحصل شيء . كان  
 ما عندكش حد . سجلنا ياسيدى وقالها خامس يوم ، نهار خامس يوم تلقوا اعلان آخر  
 وتسربوا راهوا من تحت الصليب تعملوا كشف الطليان يقولوا لها . . . . . (484)  
 قول ياسيدى قلنا له باهى . ولينا نهار سادس يوم قال غذوه اتجوا الكشف فى المكان  
 الفلان قلنا له باهى قالها ياسيدى مشينا للمكان الفلان عندى عقاب جريد مانلبسوشى  
 هالوقت هذا مشيت بعته باربعة فرنك

### الشريط الثالث / رقم ٢٤٢

ونواصل اللقاء مع الحاج أحمد الدهمانى ، محله الزروق الشريط الثالث .  
 س . ابوه ياسى الحاج قلت عندك جريد بعته ؟  
 ج . ايه بعته موتين روحنا للسفر ، قالوا لنا تعدوا للعمل الفلان نديروا فيه كشف  
 ووين مايامروكم يعنى تخشوا المحل الى هو وييجيكم بابور وراهوا بيقلكم وخدمة لكن  
 انتم العرب عندكم غشامة الى مش خادم فى العسكرية متاع الطليان ماتعرفوش لا  
 اليمين لا اليسار وانتم بتمشوا للبلاد يعنى منتظمة وترنفيات ومدينة والناس يعنى باهوات  
 وناس كذا نبوا نعلموكم الادب شويه ، قول ياسيدى مشينا للمحل هذيكيه للكشف  
 عمانا الرئيس متاعنا كبانيا ينقاله عبد الله امبيه هو الكبير .  
 س . منين هذا ؟  
 ج . من ، بعددين النوامسه تناسبنا .  
 قول ياسيدى مشينا لهداك المحل خشينا قلنا له كيف توا انت ياسيدى عبد الله انت  
 عندك سقاط نايضه عليه بندقه ساعتها فى العرس ضاربتة فى ساقه مطرطشته ، قلنا له  
 انت فيك سقاط كان ماخشيت احنا وين ماشيين كيف بنخطط فى الظلام ما عندناش حتى  
 من يقودنا آحنا ماناش ماشيين قال بنديروا راي ، اشنا الراى قال نخش انا الاول كان  
 قبلون انتم بتلحقوا على جرتى وكان وماقبلونيش مارانا حد نروحوا وخلص قلنا له  
 باهى خش كلموا عليه برقوا فيه ، قال قالو الى خش قال خشيت ، محتاجين بالخدمة هم  
 وخش وين خش قالوا هيا منوا الى بيعش خشيت انا احنا ثلاثة خشيت انا لغناته  
 عندهم بسكوله متاع ميزان ، ثلاثة نصارى حد ماخشيت قال لى حل سروالك قلت له  
 باهى حليت سروالى ، قال هاكمش الذكر والبيضات عما بعضهم ، قال ها قال لى ترا  
 كح كحيت قال برا وا صانوا صانوا ، صحيح قال لى حل فمك حليتة فمى قال برا وا  
 انت براوا خش خشيت لكن فيه واحد عطيب ولد تبر هذا الى قلت لكم شوشته  
 محصوده عمانا .  
 س . صح ؟

ج . صح . . وعمانا ونكروا فيه كبانيه ، خش لكن راجل حشومى لين دائر بكل بكل  
 وحد ماخش قعدت انا مصبى فى مكانى قال لى خش انت انت خلاص ، قعدت انا

مصبى حد ماخش قال له هيا حل سروالك ، قال له كيف نحل سروالى ، قال له انا راجل كيفى كيفك ، ماهو كيف هلى مصبى هذا قاله والله مانحل سروالى ودغدغه من هنا دغدغه من هنا ، قلت له يا محمد حل سروالك ياراجل ، توا هو رومى توا متحشم منه قال والله مانحل سروالى حد وين قاله ترا حل فمك ، قال له ترا كح قال باهى خشينا جينا لدويره اخرى لغناته فيها البسكولة وزنوك قداش فيك كيلوايه وكيلوا قداش وغلضت قداش الحاصل مافاتوا يخششوا فينا من دويره لدويره من محل لمحل لين نجى لتركنتى الى قعدت فيها محبوس قلت نشهدوا بالله انا وسيدى عبد الله احنا محبوسين جميع نشهدوا بالله هذا وين حضر لى دعاء الوالدين ويقول لى انا والله الزوز كيف بوى كيف امى ، قلت له نشهدوا بالله الا حضر ، توا لقينا روحنا فى الوسع وفى المدينة ما بطلنا ندوروا لين نجوا دغرى والله الا لتركنتى الى كنت فيها ضربت فيها عام فى الحبس ، فى الكرنينه توا ، - لاحول الله لاحول الله ، توا واحد ييكى وفيه ناس هلى طايشين هذه الدرايك والرقيص ودنيا واحد ييكى قول ياسيدى ويديروا عما انا اربعمئة يهودى فروخ يهود .

س . يهود ؟

ج . ايه ، اليهود يومانى لما الماكلة وقرطاس دخان هوينه القرطاس الازرق هذا الى يلفوا فيه فى الورق دفتر وصندوق وقيد هذيم يومانى سوا تكمله والا ماتكملاش ، انا مانشرش فيه الدخان مبطلها ، قول ياسيدى لكن شن يخلصنا من هالمغارة الى خشينا لها وكنا فيها محابيس لقينا رواحنا برا حبسنا روحنا بروحنا قال هاياسيدى قالوا انتم ما عندكمش ادبيات وما تعرفوش وماشين لبلاد يعنى فيها الماكنيات وفيها طرفنيات وفيها ناس وفيها يعنى طرق وفيه الممنوع وفيه الى لا طرق متاع يعنى فبريكات كل منبو خادم عسكرى يجى منه ظهروا مننا نصيب قالوا لهم انتوا بتقعدوا كبارين والاخرين بنقسموهم يعنى كباين كباين .

س . توا جماعة الرياس ماتعرفوا حد منهم ؟

ج . شنوا .

س . سعدون وجماعته ؟

ج . هدم احنا روحنا وخليناهم لكن روحوا بيهم بعدنا .

س . ماطلعوهمش برا الكردون ؟

ج . لا . . ما فيش من يطلع هذا الوقت .

س . انت ماتعرفاش سعدون ؟

ج . ايه .

س . فى طرابلس لما كتتوا فى طرابلس غادى ماشفتاش سعدون ؟

ج . سعدون لاماريتاش ، كالا فى الحبس مغلطين جميع والله جينا يعنى ندوروا فى عقاب

سباسبى والله كل مرة نفزعوا له ابن بيت وهكديه .

س . خوه حمد معاه ؟  
ج . لاهو مغلطينه عمانا احنا حمد بروحه ، لأنه في الباهوات الكبار هدم . سعدون صغير .  
س . قداش عمره هذاك الوقت ؟  
ج . يمكن بتقول في العشرين تمنطاش .  
س . لكن مع هذا عنده هيبته يعني والا لا ؟  
ج . اجنا هيبينه لانه ضنا بيتية ، باهوات وناس جابرة عندهم حتى يجبسوا ويطلقوا في حوشهم .  
س . باهى .  
ج . قول ياسيدى توا وين خليتها انا .  
س . خليتها في التركينة ؟  
ج . ايه ، التركينة ، ناضوا قالوا فيش من خادم عسكرية قلنا لهم يمكن فيه انفار ظهوروا انفار الى هذا داروا له خريقة متاعة شنة ، وادارو له منطاز هذه خادم عسكرية مع الطليان قالوا هذيمة بيعلموكم داروا كباين - كباين ، وكل كبانية يوازونه احنا هلى قصار شوية دارونه بروحنا وهلى طوال وكل كبانية داروا لها بريجه وسيكونده وتيرسة وكويتته كويتته الخامسة الكبانية الخامسة قول ياسيدى داروا لنا كابوا قروبه هذا يحكم على مئة وكابوا سكاذه يحكم على خمسة وعشرين وقالوا يالله هيا بتعلموا جابوا لنا اللماطر جدد لغنتهم هديكن السيور يلهم تقول متاعات عسكرية ولغناهم بطيطنات زوز مقرونات حتى هنا معصينهم عسكرية وكسيوه متاع عسكرية سوارى شكل كتان المخالى لاعند لوطه وتحت منها سروال حتى هو ، وشكاربوا متاع عسكرية هدى عسكرية ، مانبوش العسكرية احنا ، قول ياسيدى طبسوا قالوا يالله هيا لابد للتعليم ثم كل خمسة وعشرين نفر يعلم فينا واحد أتنه ربوزوا نحضر استريح احنا عندنا وهما أتنه توقف انت هكى تدير ايديك عما طرفك تحضر روحك ريبوزا اتقول هاتطلق ايديك وتبدل كراعتك تستراح ، قول ياسيدى قعدوا يعلموا فينا هكديه احنا ميتين في الطبيخة لاعاد قدرنا نقدموا لا نوخروا شن لراى توا الى بنديروه فيه ناس مرخيا روسها كيفنا احنا جماعة مصراة قال ها جانا واحد رومى تنيقنى والا قبطان قال نشبحوا فيكم وين طقيتوا في التعليم يعنى فيكم الى هبا وفيكم الى موش راضى الى بيرمى كسوه الحكومة يزود خطوتين لقدام خلى يعدى يروح لاهله توا جت في البلمة كيف هكى ، كيف يا مفكر متاعنا انت ، الرومى هذاك قال لو كان هى عسكرية الحكومة تقول لكم عسكرية وخدام خدام انما يعلموكم الادب تتادبوا حكومة ما تاخذش بالدرقة ماتزلبحش زلبحة وعدا ، كيف يا مفكر انت قال يا أولاد لو كان هى عسكرية توا مدة عندنا قاعدين في طرابلس هاهو الطليان كذا سنة ريتوش يعنى يهودى عسكرى هدى دليل لو كان نتوكل على ربى عسكرية وا يهودى والا الى هو .  
س . من هو الى يفكر ؟

ج . هو الى عمانا هذا عبد الله انبيه قال لو كان همى عسكرية اول الرومى هاهو نذرهم قال لكم الحكومة ماتحادعش خداع لو كانتك عسكرى يقولوا لك عسكرى ومايقدرؤا يجبروك عسكرى بالسيف ، قول ياسيدى نيتنا طابت على القعداء قعدنا علمونا هديكن الايام والكسوة كسوة عسكر وداروا لنا طويقيات متاعات العسكر الحفيان هذه يلبسوا فيهم الاخرين مايعطوش فيهم مدايس حفاية يقولوا له عسكر الحفاية ايوه ، طويقيات حمر وياسيدى كسوة كسوة عسكر وبطانيتك وحدة من هنه ووحدة من هنه وماطره كاسك بانى ، يعنى مخلاة متاع الخبز ايه وعسكرى ما مخصوص حاجة الا كان البندقية البنادق ماعطوناش قول قعدنا هديكن الايام ويروحوا للمحل الى نسكنوا فيه لغناه هديك الفراقيط والعات وهديكة الرقيص وهديك الدنيا ياعليك خطرة حرفه شن نخلصنا منها هذى قول عطينا احكامنا لله صابرين عسكرى والا كيف ما كان الامر قعدنا ياسيدى نشهدوا بالله راهى فى السفرة التالية التولاية لطاليا هدى ، جانا بابور ركبونا فيه وعطونا الطفاح كيف ما حكيت لكم المرة الاولى يصك بينا هداك البابور والله وين يدير الضى يعلم الفجر يضوى الضى على البلاد الى مبيتها بيعقل فيها يظل يرحل والله دوب ماينوش فى الماء انتم تشيحوا فى الابابر ايوه يظل يقشع فى الماء لهنا ولهنا نقول احنا ماظننيس يطق فى الماء بكل يقوى فى الجرى .

س . ياعمى الحاج توالا قبل تركبوا فى البابور وتمشوا ، نبوك تحكى لنا على الحياة العادية داخل طرابلس ؟ كيف كانت كان الطليان هما متحكمين فى البلاد وفيه ناس ليبين نبي تحكى لنا كيف كانوا يعاملوا فيهم وكيف كانت الناس عايشة ؟

ج . الناس احرار فى عملهم كل منهم عنده بيع وشراء يبيع ويشرى وكل منهم بيطلب الخدمة يحصل خدمة يخدم ومايتكومد هم حتى حد احرار ايوه احرار .

س . وانتو نفس العملية احرار وتشتغلوا لكن هل تسمعوا اخبار على المجاهدين ؟

ج . يقولوا لنا بلادكم فيها الشر وبلادكم حكومتكم يعنى هذا فى التالى بلغنا الكلام هذه .

س . قبل تمشى لايطاليا قبل تمشى المشية التالية ؟

ج . ايه .

س . توالا احكى لنا قبل لاتركبوا البابور انت وصلت عند البابور احكى لنا على الاول ؟

ج . الاول كان احنا فى طرابلس مستراحين .

س . ايه كل الاخبار تحيكم من بر طرابلس من مصراة من تاورغاء كيف الاخبار تحيكم يعنى ؟

ج . يجينا خبر يقولوا لنا حكومة عرب وحكومة عدل وحكومة باهية ولكن مستحقة يلقطوا فى عساكر ويجيوا فى العبي ياخذوا فى العبي ويفصلوا لهم فى كساوى يديروا فيهم العسكر وسلاح ونظام كويس .

س . يعنى مازال فيه حرب ؟



ج . مازال فيه حرب ، حرب فيه توحتى مشيتي للخدمة هدى والحرب قاعد والع مازال بعد ظهرنا .

س . مافيش حد من الناس يطلع من السور يعدى بره ويرجع ؟  
ج . لا لاشيء شىء كل مرة ايجي واحد طايش من هالنواحي الغربيات نحصلوا منه في اخبار هكدي يقولوا قال فلان وقال فلان ولكن الدنيا جايعه والدنيا واكله بعضها والحاصل مشى باهى وماممش مستراحين نحصلوا في خبر من بره وكالا الحرب قاعد والع وكل شىء يعنى مرتب في مكانه .

قول ياسيدى مشينا ركبنا في البابور مشينا هداك البابور يطق بينا ستة ايام وست ليالى ، ست ليالى مش ست ايام حتى هو يخاف في النهار يعقل في البلد لين وصل بينا في بلاد يقولوها نابولى .

س . توا هذا سنة قداش ؟  
ج . والله مانقدر انقولك تقريبا انا نهندز غير في عمرى هكديه تقريبا جلوه الثنين وعشرين .

س . توا يا حاج انتوا مشيتوا لى قلت عليها قعدتوا فيها قديش ؟

ج . قعدنا فيها تمنطاش شهر .

س . وبعدين جيتوا لطرابلس قعد توا عام ؟

ج . قعدنا عام ايه .

س . الحرب متاع الالمان مازالت موجودة ؟

ج . ايه مازالت موجودة حتى وصلنا غادى وميجوده .

قول ياسيدى مشى بينا ست ليالى وصلونا في بلاد ، توا وين جينا في الطريق في البحر ، جانا قبطان البابور قال يا اولاد انتم عندكم مربوط يقولوله عبد السلام وتديروله في وعده ويفزع فيكم وكل من يعنى يستجاه له بالطلبة وبالدعاء يعنى يفزع فيه هيا ندبروا له وعده بيش انشاء الله مانتلاقوش احنا وصاحب الشر .

س . هديمه طليان ؟

ج . ايه .

س . عندهم عقيدة في المرباط ؟

ج . ايه في المرباط سيدى عبد السلام قال مش تديروا له في وعده ويفزع عماكم وينجيبكم هذى عقلية طليان هكى . قلنا له اى نعم قال انا هديم تلثمته فرنك ديروهم في المحرمة وانتم كان عندكم واحد عنده فرنك والا قرش والا الى يقدر واللى مش عاطى هديم تديروهم وعده قول لقطوا له والله واحد فزع بفرنك وواحد بقرش وواحد هو عطاء تلثمته فرنك ، قال هديم في محيرمه وعلقوهم ربطوهم في الصارى قال هذى وعده الشيخ باش يكون عمانا وبركته عمانا ومايلاقيناش يعنى غطاس متاع جرمانيا يفلق لنا البابور ساعتها مرة مرة يفلق في واحد ، قول ياسيدى .

س . توا انتم واجدين في البابور يا حاج ؟

ج . مجموعة كبيرة الف عربى واربعمئة يهودى ، شوى ياسيدى ركبنا فى البابور ومشينا طقينا فى نابولى هذى ، قال ايه المقصود حصل حصل المرباط فزع فينا وحضرت لنا البركة وهدين كيف بتديروا بيهن تفرقوهم على بعضكم ، قلنا احنا بنأخذوا بيهم حاجة فاكهة هكذى نفرقوها شوى شوى ناكلوها وخلاص خلاص هو ما ياكل قال باهى واطاهن من جملتها نزلت انا عما الى نزلوا نزلوا منا ثمان انفار وغادى البابور مسمط على الرصيف مدايرين له كان قومات ووحدات كيف مادايرين له فى طرابلس باش وين يتحرك البابور مايخبطش الحيط ، قول ياسيدى نزلنا دار بينا نصيب وين انبرق انا فيه رواشن هكديه مش فى وسط الطريق برقت انا هكديه لغنيته قراز وتحت منه ناس يتحركواشنوهذا ياالواد مشينا لغنه فم السوق لوطى هذه نزلنا بجى سبعة والا ثمان درج لوطا لغناته سوق ناس واخضار واحد خدينا الى خدينا وظهرناه فى قرطلات وكرو كروسة كراهب مافيش سعتها واجدات كروا كروسة حطوهم فى هديكة الكروسة وجبناهن وجينا ولينا لبابورنا رفعناهن من هديكة الكروسة والكراسى قلع واحنا هديكن القرطلات جابوهم للعنابر فرقوهم علينا فى البابور ، واحد يصح له شمريخ متع عنب وواحد يعنى تفاح واحدة وواحد اخضار يعنى كليهن وخلاص ، بعدين قعدنا مرسين يومين فى البابور قعدنا فى البابور يومين ، جابوا لنا شمنديفير العربيات هذين نفضنكم تعرفوهن انتم ، ماعندناش توا فى ليبيا ، بابورسكة ايه لغناته فيه خمسة وثمانين عربية كل وحدة تفل خمسين نفر وماكيتين ، وحدة تكرر كر من قدام واحدة تدف دف على انه التران طويل ، قول ياسيدى قالوا لنا هيا انزلوا طرحوا لنا لويحة هكذى غير على سبه الكدوة يعنى باش تظل مواتية للشباك متاع العربية بنزلوا فيها ومواتية لدرجة البابور نسربوا عليهم الحاصل هذى خمسين يقول ها ايدفها الورانى يكرها اللقدامى نجى الفارغة . لغناتهم مدايرين فيه نصيب عسكر ومدايرين فيه بقر ومدايرين فيه الحاصل متعه بيقلوها شورها عندهم جيوش لقدام قال لها ياسيدى عدوها هديكة التران وقالها عيظت الماكينة وطبست الى تدف فى وراء تدف والى تكرر من قدام تكرر اوفات تطق بينا ست ايام وست ليالى هذين فى البرية ياالواد شىء فوق احنا خشت بينا قناريه يقولوها فى تونس هناى تحت الجبل قناريه هذى خش بينا قناريه القناريه هذى نقر فى الجبل مدايرين فيها سكتين وحدة ماشية وحدة جاية باش مايتلاقش البايير وهذى فى منها سبندانيلة يعنى كرجول بالبندقية ومن غادى فم زى الاوله وبيناتهم التلفون راهو الشمنديفير الفلانى راهو جاي فى السكة الفلانية راهو باش مايصادفنش وحده من القناير الى خشينا لهم غير بنقول لكم سبحانه الله من قال طالبا تنفلق ايوه ، الى خشيناها قالوا مشية عشرة ايام على كرعيك وانت تحت الجبل ماتشبح الشمس من تالا وين الشمنديفيرات يديرين فى دخان فم القناريه هذا الى بنخشوا منه مداير غيقة كيف النواله وين تظل زحمة المطيخ لكن قالوا لنا سكروا الرواشن سكرنا العربيات والتران هذا يابيت الراحة فيه والشيشمة فيه والحاصل اللزوم اكل والسوق فيه وكل حاجة فيه هو يمشى يجرى على السكة قول ياسيدى سكرنا البيان لقينا السندنيله مصبى فيرما فيرم صاحب الماكينة قال سكروا

الرواشن سكرنا الرواشن وقالت ها فاتت بينا بره يلاقينا واحد هوينه كى الكراهب منين يتلاقن تحت هذبيكة القنارية مره مره نبرق انا الفرق تلقاه يتعبن فى الدخان يظهر فى الدخان متاع المكاينات ايوه ضواية نلقاها شهادة صك بينا نضنه يجي اطناش ساعة ، تحت توا تقولوا هذى يعنى كلام يعنى لو كان موش مشاهدة بنفس انا منصدقش تحت الوطا بعدين ياسيدى حدد الجبل هذى الى خشينا تحت منه ويلاقن فينا نهار متاع اميه وعيون ووديان متاع اميه والله مافيهن الا القلاعات والمراكب ويصيدوا فى الحوت حوت احمر متاع اميه حلوه يعنى كيف بتقطع السكة متاع البابور مدايرين له شكل النخلة الطويلة عندنا احنا عمد مسكر تسكير فى بعضه هكى ومادين عليه السكة والى بيمشوا على كرعهم مدايرين لهم صنيديق هونه فيه عمود غادى وعمود من هنه انظر شن يديروا له من حركة يركبوا فيه هذى الصندوق بالاثنين ويقول ها يمشى عم هذى الخيط لين يصبى على هذى الجبل ويعدى غادى سبحان الله .

س . باهى قعدتوا ماشيين فيه ؟

ج . قعدنا ماشيين فيه نشهدوا بالله نهار ساتت يوم جابونا لبلاد يقولوا لها يريتيا ، هذبيكة البلاد مدينة كبيرة لغنائها وشن هذى باش قلت لكم انا والله موش حتى مناسبة معاودته الفريكة الى احنا فيها قسمونا احنا العرب على اثنين وين وصلنا غادى قالوا لنا اليوم تريجوا وغدوه تبديروا اربعة اربعة وينديروا لكم يعنى ناس خبراء ويتعدوا وتخشوا

الفريكة وباش تعرفوا كيف تمشوا وكيف مجدوله كى القصب احنا عندنا تجديل والله نخطا يعنى الطريق الى ناعتينها لك اماكين السقف من فوق قزاز ومن اوطا الاماكن الى هذى بسيرها تلوى وحده تصنع فى الكور وحده تصنع فى البندق ووحده تصنع فى المدافع ووحده تصنع الحاصل الى هذى صنعتها الكورة هذى يجيبوا اعمود حديد ويديروا له الا فى التسترات متعات الواحد هدين الى يقطعن فى الحديد ويقولها يوكوا فيه الضى ويضل يخدم تفصله قطع قطع يجيبوه يحطوه فى الفرن لين يظل يدير منه الحديد اميه تظهر منه فيه الى يصبوا فيه صب ، فرقونا على الفبريكات فتكم بالكلام ظهورنا قالولنا اليوم راحة وجابولنا زوز ثيران كالا واحد عجل صغير وواحد غليظ وذبحوهن لنا وداروا لنا طباخة الحاصل ومشيننا للفريكة ادهورنا وقسمونا على الكابوات وداروا كابوات منا فينا كيف ما قلت لكم فى الاول تمشوا نظهروا للفريكة الفريكة هذبيكة العدد متاعها فيها اربع اقام العدد متاعها تلطاش الف ، توا يخدموا فى النهار ويجي بدلم تلطاش الف اخرين احنا قسمونا على كبايتين نخدموا خمسطاش يوم فى الليل ونخدموا خمسطاش يوم فى النهار يعنى هاهو باش تشبح فيها تلطاش فريكة ، هذى الفريكة الى احنا فيها فيها تلطاش الف مرة مرة يطفوا الضى ويقولوا جانا الطيار متاع الالمان يوروا فينا فى حفر يعنى مليانات اميه ووين يستحركوه تضرب السيرينا هذى يطفوا الضى والى هذا فى مكان الحاصل لين يقولوا هوينه عدا ويقول ها يضربوا يخدموا ليل انهار هذه هى خدمتنا .

س . يخدموا في السلاح يعني ؟  
ج . يخدموا في السلاح السناقي والوراور والبندق والمترىوزات المدافع ماريتهنش .  
س . كيف الحياة غادى ؟  
ج . احنا مفرشكين العرب غير املى له جيبه بالفلوس واعطيه ، يدقوا حتى في الفينو ، حتى العصير يدقوا فيه .  
س . الفلوس يخلصوا فيكم ؟  
ج . ايه والله اليومية خليناها بفرنك ونص وزوز فرنك في طرابلس غادى بسبعة فرنك ونص قلتنا احنا يعني شركة ، هما الفرخ الى مايسواش والا مرا يعنى ماتصلحش والخدمة اكلهم فروخ الصحاح كلهم عسكريه الشيباني تلقاه . حادب كيف حدوي اناتوا والا فرخ مالاش بال والا نسوان النسوان كى المعيز ذكور مافيش يخدموا ليل نهار يعنى توا نخدموا احنا هذاك النهار ووين نكملوا الخمسطاش يوم متاعات النهار بيدلونا في الليل بيدلوا فينا اليهود حطوهم في بلاد يقولوها ميلانو واحنا حطونا في بلاد يقولوها بريشيا والحاصل قسمونا حتى احنا تقسيم وزطنا فيها قعدنا فيها سطاش شهر في هديكة البلاد لكن العرب هذا كيف ماقلت لك غير املى له بطنه ، وين كملت اجلتنا بنروحوا قعدنا ثلاثين يوم واحنا موقفين في مكانا كل يوم فرقه تصبح منا مهناش هارين من الكاوش الى احنا فيه وكيف يظلوا يدوروا فيهم يظلوا يدوروا فيه لين يعرفوه يعنى ، بجلوته ودوته يدووا عماه يجيبوا كل مرة يجيبوا لنا كبانيه وروحنا وعقابنا منصرع قالوا بعض هارين جابونا لطرابلس نزلنا في طرابلس .  
روحنا لطرابلس لقينا طرابلس ماتعجبش يعنى مسكرة وكيف احنا بنطولوا هلنا وكيف بنمشوا ، قعدنا مسكرة غمى انا لقيت واحد من بلادنا معرفتنا مداير بيعة وشروة ييقل في التمر قلت له ياولد توا احنا جماعة مصراته والسويحلى هاهو في سوانى بن يادم وتوا احنا قعدنا قصدنا محروصين هنا وكيف بنطقوا في اهلنا قال يقولوا بيديروا صلح ، قتلته والله مانعتقد ياولدها هم الطرابلسية عندهم شمنديفير يعنى محطة في الظهره يقولو لها في الظهر الشمنديفير يمشوا فيه ناس يقلوا في بضاعة ويبيعوا ويشروا ويروحوا لعند سوانى بنيادم مدايرين فيها سوق يخلطوا الطرابلسية ويخلطوا عسكر السويحلى كان لقينا كيف انحايلوا نبوا نطقوا ووين نظهروا لسوانى بنيادام نهربوا نروحوا هلنا وخلاص قال لى كالا انا مانيش هارب توا احنا في صالة طرابلس هديكية وولينا عماى ولد انبية هذا الى قلت لكم مسألته في التالى قال لى بننزل عسكري قلت له وخيرك قال لى والله الا بننزل عسكري قلت له كان بننزل عسكري وشنو الضرورة الى طقت فيك فلوس هاهو عندنا مروحين بفلوس وشنوقال لى باش نحصل بندقه ونبي نهرب بيها قلت له اما لا احنا عندنا . الطليان عيب لكن حتى انا بننزل عسكري . قال لى خلينى نشبح مشى ادهور في المدينة يتلاقى هو واحد ينقاله عبد الله المجدوب مصراقى من هنا .

انتهى الوجه الاول

تلاقى هو واحد ينقله عبد الله المجذوب ، هلى دار حسان هه نازل عسكرى منطاز قال له ياولد امالا كانك نيتك صافية وبتنزل عسكرى خلى نحصل انا خمسة فرنك الى يجيب نفر يعطوه خمسة فرنك يعنى بقشيش قال له امالا خلى نحصل هالخمسة فرنك انا تمشى عماى قاله تمشى عماك مشى عطوه الكسوة وعطوه سنيقى وحصل هذاك بقشيشه وجانى قلت له ماشاء الله انت توا يا عبد الله والله نصرانى الا ربيع قال لى هذا هو يمكن ماعادش نجيك انا لقيت جماعة سرت معدان شن ينقله بوهديمة شمشاشى معلقين له شمشاش الطليان وعماه عشرة انفار من اهله من غادى قال قالولى انت مصراق شنودوتك الى نزلت توا ، قال قلت لهم انا والله الا باش نحصل بندقه وينهرب معنأى قال قالولى احنا هالراى مصححين عليه هاهو بوهديمة الشمشاشى متاعنا وينختاروا ليلة من الليالى لكن طرابلس من بعد السور مرشقين بالشيش لايد عليها لوذ اللايد على كبره . المدينة بللى فيها مدايرين عليه هلى يسك فى الناس اذا كان تمسه ييسك . قول ياسيدى قال قالولى كانك بتهرب امالا كون واحد منا قال بيتنا هكى قال لى انت ماتستحقش تنزل امالا انا راهو حاطينى على الماكزينة على السلاح وعلى المتعة متاع العسكر شنه يعرف يقيد هو وحاطينى نوزع على العسكر ويجوا يرفعوا منى بالكراهب وبالشمنديفير والواحد ماتستحقش انا كانى صاير منها الكبانية هدى نعطيك بندقه قلت له خلاص هذا المطلوب احنا قول ياسيدى مشى غاب علينا يجى عشرة ايام وجانى قلت له كيف صار فى حكايتكم انا كارى فى فندق ينقله فندق فى سوق الترك هو فندق الهنشيرى ينقله فندق الهنشيرى فى سوق الترك ويجينى هو قلت له كيف صار قال الجماعة العرب هدى ماعندهمش عقيدة قال لى صبحوا فارين هم العشرة والله لا قالولى لاهديك لاهدى سيونى قال سيونى لكن الدين الى يقراه رب العالمين مانى راخى لين مقضى عليهم ان شاء الله نتلاقوا غادى ونعزهم .

س . هما هربوا من طرابلس ؟

ج . ايه هربوا .

س . حصلوا كيف يهربوا ؟

ج . ايه ، حصلوا كيف يهربوا هربوا هم عسكرية بشمباشيهم بكل بكابوهم بكل قول ياسيدى قال لى باهى هذا الى صار زلبحونى ويصفق فى ايديه ويتحسر قلت له باهى متحسرش اهو رمضان الشتوى طق فى سوانى بن يادم والعسكر هاهو هناى وقالوا بيصالحوا تحمل ساعات ويصير الصلح نروحو لعيالنا على ايش قال لى انا شنو بنصالحوا وين بنطق فى هلى وانا ببندقى وعسكرى معاش نقدر كان مش هروب قول ياسيدى انا فى المدينة واحد ييقل فى التمر من عرب الزروق جيت قعمزت بحداه قلت له يابن حسين هيا نقدروش نظهروا لسوانى بنيادم قال لى نقدروا هاهم يركبوا

من الظهرة في شمنديفير وشنوا حرفتك وشنو بتدير تقول لمانا بنبيع ونشري وعندي بضیعة وكذا تركب وفي العشية نروحوا نباتوا في مكاننا قلت له والله الا راى هذا لو كان غير نحصل من الصور بره مانى موللى عليهم قال لى الى بيولى والى قلت له كيف الدبارة كى الحل تو قال لى اسمع بنمشوا ناخذوا مقطع كتان متاع نسوان وبنأخذوا زوز اردوات وبنأخذوا شكاره فلفل كرم الله الحضور وبنأخذوا يعنى شوى عطرية حنة وبضیعة هكذیة وعندي سنیزة تمر هى الواحد هذه الى یرفعوا فيه هكذیة كيف میزان الصوف ماهیش سنزه اصلية نرفعوهن وكان تبینا قلت له امالا هيا جميع قال لى باهى نبوراسمال قلت له باهى قديش انت راس مالك قال لى انا عندي ستین فرنك قلت له حتى ان هاهن ستین فرنك انا خادم ومروح وعندي فلوس واجدات خادم ومروح عندي عشرين كارطة متاعات مئة فرنك والله نتعشى آ الغربة انا بوى یعزر فیا يقول لى والله كانى انا متت لغناك تساسى على بنى عمینك ، نتفكر فى كلام بوى والله نتعشى فى خبزة وبصل ومانى نصرف منهم من خوف يعنى الانسان یغلبه النوم والا یخلط فى ناس والا شىء مدايرهن فى جلیلة متاعت طلیان صدریة وخیطهن بالسلك مهبز الكوارط مهبزهن بیش كانك حى بتجبدهن تحبك منها شلموت الرأقد میت هذى یعنى راى الزوفریة هكدى قول یاسیدی مدايرهن غیط علیهن قول قال لى باهى والا نزیذك قال لى لا سادات هذین تمشوا ناخذوا شكیرات فلفل باربعة فرنك والا خمسة فرنك فلفل یابس ایه وناخذوا دبیشات متاعات عطریة وبنأخذوا مقطع كتان كیماقلت واهو عندي اربعة شكایر نخیطوهم ندیورهم ظلالة ایه وانضلوا نبیعوا ونشروا قلت له والله غرایب نشهدوا بالله درناهن هالوق هذای ومدايرنهن فى خویشة دبیشاتنا باللى فیهن وجینا للظهرة احنا نسكنوا فى المدینة لداخل مسافة شارع الشط هذا جینا للظهرة لقینا الشمنديفير .

س . والشمباشى ؟

ج . اى شمباشى ؟ المعدان .

س . ایه ؟

ج . هربوا عدوا هذوكما .

س . الى خلوه بروحه الى قلت خلوه ؟

ج . هذا عسكرى بروحه احنا مصراته ماناش بادیه هدیكیه هما وین خلط فیهم قالوله قال لهم انا والله حالى الا بتنزل باش نحصل بندقة وبنهرب بیها قالوله احنا هذا الرأى الى ماشیین علیه وهذا اللی فى فكرنا .

س . باهى هما هربوا ورخوا بیه ؟

ج . اى نعم قول نهار بتسقدوا ونلقوا كى نخرجوا یعنى وهو قاعد فى الماکزینة ، الماکزینة المخزن متاع السلاح ومتاع الكسوة ومتاع المتعة ، بیتوا هالراى هذا لكن بعدین خطر لهم فكر سلوا ارواحهم هیا قال لى الجماعه هربوا وانا قعدت قلت له باهى احنا توا الفرج قریب حذانا هاهو رمضان الشتیوى طلق فى سوانى بنیادم هناى

والعساكر بن عمنا توا هاهم بيديروا سوقى واللى داروا سوقى اهل المدينة كل منهم بيدير بضیعة وبعدى الطليان يفرحوا ، بيديروا صلح وخش ماعرفوش توا هما قبل بيقبضوا عليه قول ياسيدى استعدنا انا وایاه الراجل هذاك درنا مئة وعشرين فرنك وخدينا بيهن بضیعة ودرناهم فى شكارة وجينا الصبح جينا للشمنديفير التران مسلسل فى بعضه افاقين ركبنا فى وحده شنوا انتم يا اولاد قلنا لهم واللّه عندنا دبیش وبنبيعه وصلنا الظهرة نبونظلعوا درنا خويشتنا هذكية متاع البضاعة البضاعة تقول جاية من بريطانيا روس فلفل وشويه حنة ومقيطع كتان هديكية لكن سبلة غير سبلة ركبنا فى العربة عطانا بولييط نخلصوا فرنك ونص النفر عطانا بولييط وقال ها اسقد بينا مشينا ظهرا برة من المدينة وعاد برة من الكردون مشينا مسافة راهو ييجى اربعين كيلو متر مشينا ياسيدى وين مامشينا لغناه سوقى ولغناته مدايرين براكة كبيرة كيف براكة الخضرة قبل واكبر وهدى يجلسوا فيها الضباط وحتى الطليان وين يظهرها يجوا فيها قول ياسيدى ولغناهم سوقى يبيعوا فى الحصيرة ويبيعوا فى الدبش وساعتها طاقة عندنا مئة فرنك هه ذراع كتان ماتلقاهش بكل وياخذوا فى بضیعة هللى يعنى يمسروا هديعة ويهربوا لمصراتة هناى ويجويبيعوا طاسة الشاهى طاسة شقف هذه بمئة فرنك مهنالكش اسكر البحر عليها ليبيا من هه مصراتة يعنى مصراتة قول ياسيدى طقيننا نصبنا هديكة الشويرقه وقال ها فتح السنيزة وقعدنا نبيعوا فى هديكة الفلفل ونبيعوا فى الحنية ونبيعوا فى مقاطع هديكة الكتان الى يبي شى عندنا هند ازه ساعتها يقولوا الهندازة نكييلوله وكل شىء بشمنه نلقاها شهادة .

س . هذا فى السوانى ؟

ج . ايه فى سوانى بنيادم اشمند يغير مداير طوبون مليان اميه ويشربوا من اميه الشيشمة من الشمنديفير السوقى هذكيه يظم فيه شمنديفير ويعمر فيه وفيه ناس يقعدوا فيه ناس يقعدوا ، قول ياسيدى احنا هللى ظاهرين من المدينة قال لى باهى نزيدوا بضیعه قلت له انا عندى مكاوة مليانة سويريات ماهو كنت فى ايطاليا وفى الخدمة الخدمة الى خدمنا فيها فى ايطاليا نخدموا فى النحاس يدبروا فيه بوصلى هلى يدكوا فيه فى الكوره ، المدفع يطيحوا فيهم فى اميه الفرق وبسبلة اميه الفرق هديكيه كان هى طقت فيك تمزق الحوايج الى عليك كل يوم نطلب فيهم فى كسوه ، ، نقول لهم الكسوه الاوله هدرشها ، ناخذ فى فانيليات وناخذ فى سوارى وناخذ فى بعض حاجات نلبسهم ، قول ياسيدى ملقط انصيب سوارى وعندى مندلينه يقلولوا لها الجبه متاع الحبش هذه ، متاع حبش هى عسكر طليان وين احنا كنا فى ايطاليا غادى مدايرين حتى فاشات عسكرية كل حاجة عندنا قول ياسيدى وين طقيننا فى السوقى جاء تراس خاطم هذا فلان تعال هنا يافلان ناديت بآسمه قال لى انت مازلت حتى قلت له مازلت حتى قال هلك داروا عزاك ويجسبوك قلت له هاهن ها الفاشات متاعات عسكرى ومدايرين له كروين متاع عبا وكبوط قلت له اهى هالمندلينه خوذاها باللى فيها كمل بيها وخودها الفاشات هذين تلوين

على تولى عسكري صافي قال لى ماعنديش مانعطيك قلت له ماتعطينى شىء .  
س . وين تلاقيتوا يا حاج ؟

ج . فى سوانى بنيادم فى السوق عطيتهن له هكذيه لله فى سبيل الله روحنا قلت له يابن حسين انا ماعادش بالى فى تجارة انا بالى بننتق وعندى سوپريات وعندى ماكينه ، عندى ماكينه سيراتيرا ساعتها سيراتيرا عندنا هذى كى المدفع احنا والله مانعرفوا الا الولد الى عماى يعرف يولعها احنا نخدموا وين نجو مروحين نجو مدهمين على سوق حدا سيدى عمران فى المدينة تلقى هوينه حزيمة حطب والا كرينفيات والا عصيات نجوا هوينه عندنا ساعه يعنى راحه نظيبوا فيها غدا نا نتغدوا خدينا كرينفيات شورهن خضر يطعن هكديه جينا وقدناهن مرتين وانا نخط فى الوقيد وندير لهم فى سعفه يطعن نضربهن كالشوا هن ومركابهن والله ياعبدالسلام اليوم ناكلوا خبزه هديكه والا كان خاطرك فى زيت انغمسوا بالزيت والا نديروا سلاطه ، تعرفش تولع الماكينة والله لانعرف الماكينه سيراتيرا هى نزلنا لسوق الترك لقينا واحد تاجر عنده قلنا له باش السبراتيرات قال باربعين فرنك قلنا له لا ياسر قال انا بنعطيك عماها فريشه القاز وبنعطيك سبيرتوا باش تولعوها وبنعطيك يبره ، انت تعرفها ياعبد السلام قال لى باهى خديناها بدينا افنديه بعد اخديناها يولع فيها صاحبى هذاك نمشوا تنفسحوا فى المدينة احنا نروحوا قبل تمسايه الشمس بشوى نخشوا فى الثياتروا ونخشوا فى الفسحه وفى الواحد ونروحوا قياس العشاء هكديه يقول ها ينخسها تنوض تقد هونه طويسه متاع شاهى زيت وطريف لحمه كيف الكبده الى يديروا فيها الدواء تقتل فى الكلاب يقرضها على قرضتين وطيب لنا هديكه الطبيخة فى لمحده كيف بعد غداكم هكذيه نغمسوا هذيكن الخبيزات صاحبى ضعيف شويه موش وكال كالا انا فرده والله نهرد فيها وكالا هو نصيف فرده مايكملش فيها نهرد فيهن الزوز انا ابدينا افنديه اى بنقول لك .

س . بتروح انت ؟

ج . توا بنروح انا بن حسين قلت له عندى ديشات وعندنا ماكينه وصاحبى ماهو عاطى فيهن شىء مشى حتى هو للخدمة عمانا لطاليا وروح عمانا لكن روح بفليسات ماطقش اسبوع لين كملهن جيت لقيته فى الشارع وين تسكن ياعبدالسلام قال اهلى على ظهري والله ومانسكن كان فى الجامع قاعد فى الجامع قلت له هيا عدى عماى قال شنوا والله مانكساب قرش ياولد عمى صارلى هكى وصارلى هكى خرفنى على خراف قلت له باهى غير تعال هيا آخر بكل انت تعرف ترفى الطاقية ناخذ كتان انت اقعد ارفى الطاقية وانا اهو من جيتى من غادى شنى نخدم تولى مافيش يعنى فياكه يقولوا لها الطليان مافيش حيله ومافيش ربيوزه ومافيش يعنى بطاله ديمه ناخذ فى يوميه تامة وناخذ فى الريقالوا عماها هما ماهم مطلولين بالخدمه ساعتها الطليان غادى نحصل فى خمسين فرنك هذيه خايطى اليومية ونحصل فى مئة وخمسين ميتين فرنك هذيه فى اليومية كل خسقاطش اليوم نحصلوا ايوه مصوقر فليسات قول ياسيدى بعد لاجينا بنروحوا عطونا دفيدرات انت ازبايل امشى ماعندك شىء انت تمشى باهى وكويس وخدمت باهى اهى ورقه دفيتير وين



مافيه خدمة عند الطليان حد ماتصبي يخدموك لو يطلوا واحد قبلك شهادة قلت له انا اهو عندي شهادة وانا يعني عندي فليسات وياودي اخر بكل مانخليكش ولد عمي ولد بلادى هكديه في مهمه ناخذ لك الكتان وارفي الطاقه ، قال لي باهي ، قول ياسيدي استعدنا انا واياه وجاء سكن عماى قعدنا ايام نرفوا الحسبه في طرابلس فيه قلانيه فيه شر الحسبه مصعبه شويه الخيزه غير بالتسكره بالقرامات قلت له يا عبد السلام انت اقعد ارفي في مكانك وانا نبي نعدى باركوا يقولوا باركوا الجيما مدايرينه الطليان رسمى مدايرين له عياطه تعيط وخدامه منتظمين انا بنعدى نطلب خدمة وينشيج الدفدر الى عطوه لي هذا فيه نتيجة والا لا قال لي باهي خليفته هو في الدويره اللي نسكنوا فيها ومشيت انا مشيت خشوا الخدامة باللي فيهم تعطلت شويه انا جاء الرومي الكابو متاعهم انجنير هو قال لي كوزا قوليو ، شنى تبي قلت له نبي الخدمة قال لي ايه احنا عندنا مئة وستين بنقصوا منهم ستين قلت له انا هذيم بالك كلهم اهل البلد انا اهل بره مانيش طرابلسي وانا يعني كنت نخدم مع ايطاليا وهنايا ماعادش حصلت حق خبزه وعاطييني كونجيدى قالوا لي كل خدمة عند الطليان تصبي عليها يخدموك قالى ترا هو وريتهله قراه قال لي والله كلام وشنى الصنعه اللي نخدم فيها قلت له تلناياموا يعني نجار لوح غير بالقوة لكن خادم عما الى يخدموا في اللوح وراهم السقریات هذيم الى يقصوا ساهله هي قول ياسيدي قال لي توا اليوم هاهو فاتت يحيى ربع ساعة والخدامة خشوا وغدوة تعال ياسى قلت له وانا ببش نتعشى قال لي ماتصبرش حتى لابعد نص النهار في خدمة نص النهار تعال لي قلت له باهي نص النهار ماهو نحصل باش نتعشى قال لي باهي قلت له باهي قعدت نترجى وقت فات وقت الخدمة وعيطت العياطه كي عياطة البابور . جيت خشيت قلت له مش عاهدتني هاهو الكونجيدو وبنخش الخدمة قال لي ياودي اليوم نص نهار واحنا تونبي نقص في مكانك وكذا تعال غدوه قلت له انت تماشى فيا قول لي مانيش مخدمك وكان هذا بنعدى نشكى قال لي سيقورا دوماني ماتينه فينيرى ، غدوه الصبح تعال كلام اكيد قلت له باهي دخل دخلت قال لي شنى الصنعه متاعك قلت له نجار لوح فيه عسكرية وخدمة فريك هي ماهيش خدمة يخدموا فيها حتى العسكرية كرفي هكى وخلاص . قول ياسيدي ساعتها فيها كابوا التاجورى انا جيت بعد التاجورى ، التاجورى بطل منها منهو نعرف منهو على ولد عمر الشوشان هاهو الى كان دار مغازه مقابل الغيران هذا ماعرفت من جماعة يدر لقيته يخدم . قول ياسيدي جيت قال لي فينى كواجينه قال لي ترا افتح الوحده فتحتها قال لي سكرها سكرتها قال لي باهي قلت له شنوا الفصالة الى تبونى نفصلها هما يعملوا في اللوح بيقصوه والى بيدبروه اننى وذكر هذا بيخشوه في بعضه يديروا له في علامات قال لي باهي قال ها ومد لي لوحين والا ثلاث هذى قصها هكى وهذى يعني فيها كذا وكذا قلت له باهي خذيتهن طرحتهن قدام الوحده وولعت الوحده ناضت قصصتهن وستفتهن قال لي باهي اخدم عما العسكرية الى يخدموه اخدم وين جو العسكرية قالوا على نون لورا رى ريبوز قويرنوا فنكولوا القويرنو ، القويرنوا بينلى غير ماتخبرش علينا قلت له باهي .

س . شن يديروا ؟

ج . يخدموا في اللوح ينجروا يخدموا في السقريه يخدموا ينجروا فيه يديروا في بيان .

س . كيف ماتخبرش عليهم ؟

ج . الرايس الخدمة وين يجي يلقاتهم راقدين بيكتب لهم يعني جزاء قلت لهم انا باهي انا واحد منكم ماتخبرش ماتخبروش عليا حتى انتم قول ياسيدي قعدت مستمر في العمل اقعدت مستمر في العمل يجي شهر والا شهر ونص وبعدين الانجنير هذاك جيت نشرب من الشيشمة داير فمي في البزيم ويقول على قال لي نون بيقي كوزي انت ما تشربرش هكذي قلت له وكيف بندير قال لي خل البزيم يصب في كفك انت تواتدك في البزيم في فمك ويجي واحد آخر بيدك فمه فيه قلت له عندك الحق باهي احنا راهو أدبياتنا شويه العرب ومره جيت خاش على واحد يعني طلبت منه قلت له برميستوا قال لي او انتي خشيت وين خشيت قضيت حاجتي منه وجيت ظاهر خلعت الفم محلول قال لي تعال هنا ولحق عليا قال لي موش هذه اول مرة قال لي تو نعطيك كالشوات قلت له كيف قال لي الباب مين جيت كيف لقيته لقيته محلول والا لقيته مسكر ياثور قلت له عندك الحق واهو كل سفره تعلمت حداقة تعلمت انا هذي اصول لقيت روعي محقوق . قول ياسيدي قول الكابو هذاك قلت له ياسينورانجير انا مازاد عليا شي وعندي ولد عمي ماعنداش كونجيدى والى نحصلهن ناكلهن انا وياه وقاعدين جيعانين قال لي ويش تبيني نديرلك قلت له نبيك تدخله عماى في الخدمة قال لي لالا الخدمة واجدين لو كان انت لولاها الكونجيدى ماشبحت منى قرش ولاقلت له باهي ياسي مشيت ايام نجى ناخذ حويرت دحى وناخذ شوشاو وهو والله الا شوشاوديك زعميته وقلت ها جيت عند الصبح وين خشينا الخدمة للعمل هو عنده دار تقعد مفتوحة ويتفقد في الناش ويقيد قلت ها خشيت حطيتها تحت الباب وين جيت ظاهر علي كوزا فارى كوا قلت له غير نحسابك قاعد خشيت خش هو يحسابني سرقت منه حاجة والا شى لقي هذاك الدويك ولقى حويرتين هذاك الدحى قال لي اى على انت فوربوا انت زقطي خذاهم وسكت قعدت يومين ماييتش نراجعهم نقول له هذيم بقشيش والا حاجة قال لي ولد عمك اللى عماك قاعد مازال عماك قلت له مازال عماى والى نحصله ناكل فيه انا وياه . لاهديكه ولا هادى قال لي هاته بهاذاك البقشيش الطليان بقشيشهم ساهل حاره دحى تروج شغللك عماهم قول ياسيدي جبته دخل في الخدمة انا محسوب فنى اسطى ناخذ في ثلاثة فرنك ونص هو خدام عادى هكى وخلاص .

س . المهم احكى لنا كيف بتطلع انت ؟

ج . كيف بتطلع . . هو بعدها جاء صاحب التمر هدياه وظهرنا انا وياه لعند سوانى بينادم ومبيت انا وياه غير بنولى عندي ديشات عندي هديكه الماكينه واخذها باربعين فرنك بنبيعها بعثها بعشرين بعدين في سوق التركة ويعنى عندي كبيطات بنبيعهن وديشات هكى وسويريات زایدات ومانحسابوا قبل انا كنت في كسوه كى كسوتكم هكى قلت انا توبنظهر لبلادى الواحد كانه عريان في سروال عندنا عيب احنا نتحشم

فيها بعتهن السراويل والكبايط والوحدات كلهن وشريت جرد وروحت عربى اصلى . .  
قول ياسيدى نصبنا هديكه الشويرقه توا انا صاحبى ماهو قلت لكم مشينا من الظهر  
ووصلنا غادى .

س . انيه ؟

ج . لا . . متاع الزروق هذه . .

ووصلنا وبعنا وروحنا وبنلوا من غدويتها وين بنلوا قلت له انا والله ماعامل كان  
على الهروب يا محمد قال لى باهى هنا مافيش فتش خشيت ومشيت روحى لاهلى ،  
نشهدوا بالله النهار الثالث انا حنا نصبنا الشويرقه وقمعزنا انا مقعمر بعيد فى الفيم وهو  
ييقل بالسنز هديكيه ، محمد بن حسين متاع الزروق هذه نشهد بالله لغناهم ثلاث  
اجمال محملات حصيره وجايات بانن عليا من قبله عما الطريق قافله لا والله الا هاللاث  
انفار . قول معبيات حصيرة قول ياسيدى وغرد رمل هو رمل ونخل وشجر .

س . وين هذا ؟

ج . هو فى سوانى بنيادم ، قول ياسيدى قلت له يابن حسين جو برکوا جمالم وواطوا ياودى  
متملحين من الطريق وقعدوا مصابى الحاصل جيت انا خلطت فيهم لغناهم واحد خالى ايه  
امى من بلادهم نقول له ياخالى ، عثمان الشحيح وواحد مزبور ولد على سليمان وواحد على  
ساطى الشايب ايه يا على سلامتك كيف انك انت نوضت من تحت الوطا والا من فوق والا  
منين هلك داروا عزاك قلت لهم والله هانى مازلت حى امته بتروحوا تعرفوا رانى ناوى  
الخربة بنهرب عماكم توا انتم من ضنا بلادى وهانكم تعرفوا الطريق وعندكم جمال قالوا  
كمانا فى هالخصيرات الى زائدة بنبيعهم وبنا خذوا ديشات من هنه دريعات كتان ومروحين  
شنوا عندنا هنا قلت لهم باهى قالوا لى انت موشى تمشى وتجى وقاعد هنه وين تشبحنا كملنا  
الخصيرات ، وتالى بديت نشرب انا وباهم فى الشاهى بيتنا الوقت الى يروحوا فيه كملوا  
وخذوا بضيعه قول ياسيدى بن حسين قلت له يابن حسين احنا بيناتنا رأسمال قال لى والله  
لو كان غير قعدت فيه مكسب والله فيه مكسب خير وبركة قلت له والله ماتحاسبنى على  
قرش ولاى واخذ منك قرش مانبى منك شىء اعطينى الستين فرنك ويبقيك الله بالعافية  
ياودى فيه هاهو يصحن لك ييجى عشرين فرنك قلت له هاهو انظر شن هو قلت له الله  
يساعحك فيهم والله ماتعطينى وحده قال لى باهى ياسى نلقهاها شهادة بيتنا ليلة الى بنهرب  
جبت ديشات فى شنيطة شكاره وبيتنا انا وجماعى هذوكما وقلت هيا ياسيدى اسقدوا  
واسقدت مدايرك شكاربوا متاع طليان وغادى من المدينة والله ماوصلت هناى الا وانا  
اسود كى العبد وكرعيا ادبرن وتملحت والله مروحين يزوايلهم رافعين ديشات هما والله  
ماواحد سفه قال لى هيا اركب ، ندهموا على مغيغرات فى الطريق فى شقران وفى النقازة وفى  
كل مكان وفى العلوص لين طقينا فى زليطن كل واحد مداير زرية نجو نشربوا عنده  
الشاهى باش ينطلقن كرعينا شوى بيش الباي ياودى يقول بريال قلت لهم الريال شنوا انا  
مانعرفاش الريال هذه ريال سيلييه ثلاث نكلات هذا هو الريال قول نعطى فى البايات انا  
عندى فليسات لين وصلنا مصراته هاناى وصلنا مصراته هاناى طقيت عاد لقيت والدى

• متوفى ولقيت الحسبة متفلقة وامى راده ولد عمى اول مرة عماها بالحوال بالحوال وتالى هيا سعى وعنده واحد تالى رادته نشهدوا بالله توا هذا خراف نضنه موش تالاكم هلى ببدا فيه طقيت عاد فى حوشنا هاناي وقعدت ماطولتش قعدت انا نكر فى شوراي تحاطيت انا وامى قلت لها انت عاد توارديتى راجل عدى فى حوشه ماتقعديش فى حوشنا هاناي تحاربنا .  
س - توا الطليان هنا فى البلاد .

ج . آه

س . الطليان؟

ج . الطليان ايه فى البلاد ، لا ساعتها الشتيوى حكومة الشتيوى .

س . منو رمضان؟

ج . اية قاعد رمضان .

نهاية الشريط رقم 243/4

س . احكى لنا ياعمى الحاج على الحرب والصراع الى قاده رمضان؟  
ج . نلقاها شهادة انى قعدت فى البلاد ، وكنت عاملا نشتغل فى الفلاحة ، على حال نفسى ، وبعدين شيخ القبيلة هناى .

قالى لى :- نبي انحطك عسكرى قلت له باهى . . قالى انت نحصل منك فى عشرة فرنك فى الشهر وانحصل منك فى مرطة دقيق واحنى من لول فى المجاهدين . . . ساعتها العسة فى قصر حمد وفى الملايطة وفى الشواطىء

س . من الشيخ ساعتها؟

ج . احنى شيخنا الرعيض .

محمد الرعيض» او فى التالى اخترب محمد - اخترب هو و على بلعم فرقه قعدت مع على بلعم او فرقه الرعيضات مع الرعيض .

س . صار مقسمين اثنين ؟

ج . قالى انت شن . . المحصل منه قلت له كذا وكذا قلت له حطنى انى قالى انحط خوك قلت له كيف بنحطه ، قالى ماشغللكش ، بنضرب بيناتكم القرعة بتجى عليه هو وقلت له كيف الراى هذا ياودى حطنى انى وخوى خليه بينه ، رغم اننا متخاطين كل واحد على حاله . .

قالى لا ، حدرنا احنا الزوز قاله يا احمد هاك حصتك انت وخوك ، واحد بنحطه فى العسكرية ، قلت له ياعمى «محمد» مايلزمش حطنى انى الصغير ، حطنى فى العسكرية او خلى احمد قالى لا ، نضرب بيناتكم القرعة كان صار منك تعال انت ، قاله هات حصتك احده سعة مقطوعة قطع منها شوى وقال هاعطاه له او قالى : انت هات حصتك درت احداى بعرة جدى وولا حولى او قالها حاطتهم تحت جردة . . او قال ، هاقسم السعة بين

زوزا ورفع البعرة ماحطهاش اودارهن ، فال هيا سمي قال سمي يا محمد انت الى سمي قال هاسمي قاله هدى الى تمشي او هن سعفات الزوز او كان دار حيله اخرى راهو ظهر على حيلته . . لكن هو السعفة قسمتها بين زوز الى بيمشيها ايجي على السعفة المهم نقلوه للعسكرية تسقد المقدم الى مع الشيخ قاله : وصله للملايطة يعطوه كسوة وبندقة ، قاله : باهي البندقة اهي عندي انا ببندقة الى كان في العسة ، ايقبل ببندقتك واعدي يعطوه الكسوة غادي او كيف ماتقولوا باهي او قال هانقله المقدم الى مع الشيخ . . ساعتها «الشلبة» امر القوات وين وصلوا غادي البندقة ماعندهاش سيردار لها حبل او قعد يكر فيها قاله : ياسي محمد توه هكي ببندقة الحكومة تكرها كر ، قاله : يالغن ولديك ولدين الى باعتك جي للشيخ .

س . عارفه هو الى مدايرها ،

جي للشيخ قاله عمك هذا الى اخترته تحرز على ودفل على وسبني (شتمني) اوسبك انت قاله وين الدم الى فيك انت ناقله للمجزرة والله ماهو ولدي عمي الى ماقتلك ، قول ياسيدي قعدت اني جاني الشيخ كل شهر مرطة دقيقة او عشرة فرنك .

س . وافين تحصل فيهم ؟

ج . والله ما انتلفق الا تلفيق ، مرات انبيع شعير ومرات ما نحصل حتى فرنك .

س . ماه عندك فرنكات الى جايبهم معاك من مصراثة شن درت بيهن ؟

ج . كملتهم ، ماني مرضت وين وصلت هنأى والله ما صحيت لين كملتهم .

وجيت للفلاحة ، قعدنا على محصول برسيل التمر والمرطات شعير المهم قعدنا مستمرين ، لين جت الهامية هديكه ، والناس شادة والعرضي ، اوحيرونا خدمنا استحكام من عند الشوارنة الى عند بره . . هذا كله ضربناه بالقفة وبالمسحاة والله ثلاث مرات او هي اتجيني الولاية (الدور) او نخدموا فيه الاستحكام وينده في وايقولي : توه بانحطك في العسة لا بد اتجي اتعس مع الجماعة انقلوه باهي . . الحاصل ماحطنيش في العسة .

قعدنا وين ماتصير هجمة والا دعة غمشوا «لقصر حمد» فيه قرايلا . . ولكن خاربة ، بيدينا ماهاناكش سلاح كانش اطياح واحد والا واحد متغلب ، نحصلوا ببندقته .

س . رمضان شتيوي احك لنا عليه ، كيف ؟

ج . ساعته «رمضان الشتيوي» قعد شاد الملطم او قعد حي شاد المرتبة .

ج . احك لنا عليه كيف كان يحكم ؟

قعد حي ، يعني شاد المرتبة بعدين . . قبل كان اخوه هو او «عبد النبي بالخير» رياس ازوز او هذاك حتى هو صاحب منصب او صاحب شرف ولكن النظارة «لشتيوي» اكل حتى ترهونة حاربناهم حرب اوسلم «المريض» اوجبناها ترهونة ومسلاطة بدريع الحرب وانفقوا . . بعدين تخاطوا . . ومنين عارف الشئ الى صار بيناتهم ، صار ناقد «رمضان اشتيوي» على عبد النبي بالخير ، ماهوش ممنون قالوا دزله مرتين والا ثلاثة ، على الخبر سمع ماباش يسمع كلامه . .

قال عبد النبي ، عجباته نفسه . . لا بده من تأدييه مضبوط ظهرله من سواني بن يادم من

غادى من طرابلس ودا روله عسكرية ، والعسكرية عندهم مدافع والطبجية من ورقة ، قال ها تلقوه الفواتير ، قالوله ، توه جاى عيد ، توه يابى رمضان «بدل هالساعة ابغيرها قاللهم والله مانى مولى (راجع) لين نمشى لعنده ، يانيسره يانسمع كلامه ، يانصطلحوا كيف مايصير باهى . . قالوله ، الدعوة فى الى يفوت هالوادى هذا غادى فيه واد اقرب لمصراة من غربا . ياودى ماخذيتش ابخاطرنا يابى . . قاللهم دعوى والا مافيش دعوى ، واللهمولى ، لين نصل لعنده مشى ، نبتت فيه دعوة الفواتير ، زليطن ، امشى وصلوا غادى اوخطوا ، ونفذله واحد ينقله ، ، العورانى وخاله ، لعيث الكريك اشتوى واحد مجهم ادمس حتى الفاس اجيبه فى غمره ، ومعاه واحد اخر قاللهم امشوا جيسوه او هاتوه هنا مشواله .

س . مشوا لعبد النبى ؟

ج . مشوا لعبد النبى فى القصر امتاع الحكومة . . انى راهو غير خبر الى نسمع فيه ، مشوله خشوا عليه وين ماخشوا عليه مازال بينهم او بينه فم ، برق فيهم شبحهم ، قال للحراس امتاعه اضربوه راهو عدو ، هدوكم رجعوا وقالها هدوكم نصبوا المدفاع فرغوا مدفع والا اثنين ، جماعة سويق فيها بئر واحد جو عرضوا فيه حيطه يعنى سكره معاش حصلوا منه الى او قطعوا عليه امية وفيهم بالبارود من هنا ومن هنا تقابصوا هو وجماعته فى الحوش ، قعدوا فيه يومين والا ثلاثة . .

س . رمضان ؟

ج . عطشت الناس تم الى يجيب سطل امية ياخذ فيه اربع بنادق . . الناس ضاعت ما عندهاش امية . . عطش اوشر متلاقى عليهم ، حصروه رمضان اشتوى فى هذاك الحوش ، لكن عنده ضديات فى مصراة هناى امدابير باندَة اتقنصله او كان يلقي يقتله هو عبد القادر بن المنتصر .

س . عبد القادر المنتصر ؟

ج . امدابير باندَة او صايره بيناتهم رقة ، ماهم قاتلين بالقاسم ضنى «اشتوى» بلقاسم ولد عمر قول ياسيدى تقابصوا فرغوا الى فرغ او هالنقلية الى ماشية مع «رمضان» جماله وعساكر سلموا ارواحهم اوقعد هو وكبانيتة فى الحوش ، والله مابطلوا فيه ضرب لين قضوا عليه ، قالوا جوا لعبد النبى احنى قضينا عليه . . راهو حاصرناه فى الحوش ، او كيف قاللهم جيب مانجوهلش . . كان وصل هنا ماموتش . الحاصل ضربوه مات .

س . من الى ضربه ؟

ج . وين ندرى عليه هو واجماسته الى متقابل هو وياهم ، قول مات «رمضان الشتيوى» فيه بعض من السفها وبعض من باندَة عبد القادر قالوا كيف توا هذا ولد اشتوى اقطعوا راسه » قطعوا راسه او قالوا خذاه عبد القادر نقله لعند طرابلس قاللهم هذا الى مدره كبداكم ، هذا راس الى «رمضان الشتيوى» يحساب روحه بيحصل شىء والله حتى الكمبيالات الى مداير بيهن باندَة والله ماباع بيهن الا الملك ( عقارات ) وتلفها ماعطوه

حاجة . . هذه حكاية البى رمضان شوى جماعة مصراتة امدايرين قسوة اوشادين فى وادى قريب يوصلوا فيهم لكن الى جا هم من الجمالة هذكم المحبوسين قاللهم البى رمضان مات وخداها من خداها واحترت ، ردوا ، والله لو كان جبدوا على ورفلة راهى قبضوا ورفلة بما فيها . لكن قاللهم الرايس امتاعهم هيا بالك .

س . سعدون الرايس متعهم ؟

ج . يمكن حمد " الرايس امتعهم امكبرين واحد عليهم من البياده ولوا خساين . . بعد رمضان الشتيوى " قعد خوه حمد " وسعدون . . سعدون وقعدوا يحاربوا هناى امدايرين عساكر ونظام ودينا وشادين على قصر حمد ، العرضى فى القوز والمتعة فى الحيشان امتعات قصر حمد وفى الملايطة الى عند السواطى هذه مواقع المجاهدين ، ومره مره الطليان يشيطوا علينا بالمدافع . .

س . ياسى الحاج القصة امتع بلقاسم ؟

ج . هذه القصة خبرنى عليها سعدون وخبرنى فى ايطاليا غادى .

س . من الى خبرك ؟

ج . خبرنى سعدون بروحه .

س . صار هدرزت معاه سعدون .

ج . هدرزت معاه .

س . باهى قولى شنى الخبر الى صار بينكم ؟

ج . هدرزت معاه وساعتها عيل صغير هوه

س . لكن عقله كبير ويفهم .

ج . باهى ولكن جابوا هالريس وخوه حمد معاهم وحطونا غادى فى الحبس احنى برواحنا ، فى حبس ، كيف ماحكيتلكم حضرنا مع واحد رومى انحطوا فى قريشات مره مره يجينا هو ، يحصل فى طاسة شاهى منه ( يعنى سعدون ) احنى غادى مقطوع علينا القرش كان ماتخدمش والا عندكم حد ينفدلك ( بيعث لك ) من بلادك ، والا شىء يعنى مانكساب حتى بوعشرة ، ولا قرش . فيه بعض جماعة ابرقوا فيه ياخدوله قرطاس دخان ويجى يشرب فى الشاهى ، ويهدرز علينا وايروح لمحله الى ييات فيه يوم . .

يوم من الايام اجتمعت انا واياه قلت كيف اسباب العدوى الى درتوها .

س . هذا غادى فى ايطاليا ؟

ج . العدوى الى درتوها انتم وعيت بن المنتصر ، قال انخبرك البى رمضان وبلقاسم خوت ، صحاب يجى رمضان لعيت المنتصر هنا فى المواطنين ويقعد بالميجال ، وهم ازراذى وفسحة ومدايرين خيل يجينا بلقاسم غادى ويقعد عندنا بالميجال ( اسبوع ) حتى هوه .

س . يجى لمصراتة ؟

ج . يجى لحوش عيت الشتيوى ، هم فى مصراتة اكل يضيفوا فى بعضهم وبياخذوا فى فسحة واحباب يوم من الايام بلقاسم فى مربوعة عيت الشتيوى فى زاوية المحجوب . . ورمضان وخوته ماعناكش فيه بنت خالتهم تخدم فى خالتها ام ضنى الشتيوى اتخش

عليهم ، اونا س عياشة مطيرين معاشهم عيت اشتيوى ، هم فى شى راهو . . اونه كانت تغسل معاهم امعين ( اوانى ) . .  
س . امراه كبيرة يعنى . .

ج . خالتها وبنيتها كيف فازه ، قول جت خاشة للسقيفة ، برق فيها هى كل مرة تخطف عليه اتخش للحوش داخل ماعليهاش مانع والمربوعة من السقيفة داخل ، برق فيها كايته نفضه الشيطان قال ، خشه من الخشات دعس عليها ، كرها لبنيه تلاه ، دارت دوشة قال ها ظهرت العزوزه خير الضيف اللى فى المربوعة شراى لو كان مانتلتش روحى ، الضيف اللى مخليه فى المربوعة عمل فى هذيك الفعل .

الدوه هكى ، جى رمضان . وحمد . وسعدون ماليش بال ساعتها ، قالتلهم امهم التدى اللى مرضعكم ضنى شتيوى لامازال . . الا ماتقتلوه موش مازال يجينا الا ماتقتلوه الا قطعته بمنجل التدى هدا قالوا لها لاتقطعيه بمنجل ولا حاجة بعد كسر حرمانا ولقيناه عسكر سوسة معاملته معاملة كفر ، ماعليكش فيه ، قعدت اتراجى فيهم قال هاداروله دوايسس يالايموه فى مصراتة هنا مالايموشى هو مره مره يمشى لطرابلس على حصان ، كانت لا كرهبه لأكروسة .

عنده لزوم فى طرابلس مشى ، خبروا رمضان واحمد قالوا لهم راهو بلقاسم عدى لطرابلس هو بروحه يمشوا يديروا له خطاط واحد يهودى ايقولوا له براهيم تركيه ، قالوله توه انت متربى فى حوشنا بتتلهيلنا " بلقاسم " متى يروح من طرابلس قاللهم وين يستعد ويعول ويدير على حصانه نعلمكم انى قول القافلة اسقدت قبله ، مانيش عارف بواسطة تليفون والا كيف ضبطه ، اللى صار او حصل الخبر اليهودى دارلهم اشارة اومدايرين اماره بينهم او بينه قاللهم راهو زقل الا فى اللى وصيت عليه راهو فى الطريق ، قالوا خلاص وقالها ركب رمضان على حصان او حمد على فرس وقالها مشوا شدوا زليطن فى عين كعام فيه فجوة يقولوها عين كعام خالية شدوا فيها قعدوا شادين فيها حتى لين جى بلقاسم ومعه واحد ينقله درم من لحمتهم راكب على حمار وهداك على حصان قالها وين حاذاهم قالها فجوا عليه قالوله اللى يعادى الرجاله يمشى بروحه هو قالها هجم على حصانه عنده دقره صغيرة فرغ فى حمد ضربه فى كتفه .

س . بلقاسم ضرب حمد ؟

ج . بلقاسم ضرب حمد الشتيوى والله ماخبرنى الا سعدون رمضان والله ما عنده الا مقرون وين ضربه هاذيك عاطى بالقفى ويقولها يحطوله المقرون فى كتفه ويقولوه بالك ؟ قال جى مقشوع .

س . رمضان ؟

ج . رمضان اللى ضربه ، قال قعد الى معاه يعيط قالوا له لا تعيط لاشى كلام والله مانا امكلمينك اركب حمارتك وعدى فى حالك . عدى خبرهم وقلهم يحى يرفعوا ابطانتهم او هذا الحصان احنا لاشين فى حصان لعلا غير ذلك .

س . ليش ماتلوه لآخر حتى هو ، بيش ماخبرش ؟



ج . هم مامش خائفين دايرين حكومة اوحبس هم جباره .  
هم ماتحركوا من حداه لين هو ميت ؟  
قالها روحوا . . ساعته الي " عمر " في سرت كلا من لاولاد ما نقدرش انقولك هربوا  
او كلا اشتيوى بوهم شدوه اوحبسوه .  
س . شدوا رمضان ؟  
ج . شدوا بوهم .  
س . بور رمضان وحمد ؟  
ج . مانيش عارف هم شدوهم ، مانيش مستحضرها  
س . توا الكلام هذا اللي تقول فيه هذا على لسان سعدون  
ج . على لسان سعدون . قعدت سنوات في الحبس اومات الشتيوى ولا نقدر انقولك لولاد  
هذيم في الحبس احمد ورمضان مع بوهم ، هم يمكن حبسوهم ، واداروا محامي ظهروا  
محامي بره ، واكلا الشتيوى مات في الحبس بوهم جبار قطعي ، هذه اسباب العدوى بينهم  
س . هذا الكلام على لسان سعدون ؟  
س . باهى سى الحاج انت حضرت فترة مع رمضان طبعاً كايين امدابير حكومه هنا ؟  
ج . ايه امدابير حكومه .  
س . كيف منظم الامور ؟  
ج . مداير فيه ناس ، ياخذوا في ضرائب لكن حاجة ساهلة واتاهم الحظ ، حرث الحرث  
في الوديان اوجى عام صابه داروا قيزان من الشعير ، او يخدموا فيه الحبش اوداروا مطامير  
واحد احدا ، اتى بروحي سخروني اومشيت الى " بوجعران " وجبت حمل شعيراتي  
وكبانية معاي . . خشينا للقصر واطينا هذيك الغرائر . لقيناهم مدايرين لوحه ترد شعير ،  
مربوعة علوها حوالى خمسة متر مليانة شعير ونرقوا على هذيك اللوحات وانصبوا في هذيك  
الشعير .  
فيه وحدين مسارق جزاهم . . وضعهم في الحب اوكل من هو عنده خطا مشهور يعنى  
سارق والا قطعي دايره قبل كان عنده بقرة او جمل والا حاجة واذا كان مانكش متوسد فأس  
والا بندقه بيش تضرب يرفعوها من حداك هذا قبل رمضان الفترة اللي وعينا فيها قبل  
" رمضان " هذا قبل مانهرب اتى من بوى . .  
واما مع رمضان اشتيوى . . في الوادى والا في الدافية والا في اى مكان تربطها وترجعلها  
تلقاها في مكانها . . تعلق عباتك في الطريق ، تولى تلقاها في مكانها ، يعنى واحد يسرق  
بلحة ولا زرع او غلة والا شاه . . . طول ينقلوه للمطمور .  
س . داير هو مشايخ اومداير مجلس ؟  
ج . مداير ناس . . يعنى قهائمية المداير هذيم اصغار يسموا بالمدرء ، اوهوراهوا ما  
تطق فيه كان الشكوى الكبيرة هو في غرفة بروحه او كان القهائمقام ، وكم من قضايا يقضوا  
فيهن ما يطقوش فيه هو ، كان عندك مسألة كبيرة متصعبة تدبر له عريضة ، يستوفى  
الكلام .

س . يعنى فى نظر الناس كان متكبر شوية ؟

ج . عمره .

س . لا . . . نقصد هل هو متكبر او مترفع على الناس ؟

ج . نشهد بالله انى جابتنى الجلوة تلاه مره عندى شكوى صاير بينا وبين بن عمى من هناى اوفيه ظلم شوى درتله عريضة اومشيت خشيت عليه فى الغرفة امتعه والله لافى سوريه عربية بيضاء وجريد وانقدر انقولك مانتبهتش منه زين يمكن حتى السروال ماهو عنده امقعمز على كرسى ، ولا بس اجرید وسورية عربية اومعركة والا طاقية حره ، يعنى كسوه عربية لا عنده تكبر ولا عنده ظلم اويضحك فى وجهك ويسارك سيره حسنة . . لكن عنده ساعته القائم مقام ” الحداد ” هذا متع الشكاوى خوه رايى ضابطيه .

س . من ؟

ج . خوه ولد الحداد

س . شن سياه ؟

ج . ابراهيم الحداد . . استشهد فى الحرب

س . وين استشهد ؟

ج . استشهد فى معارك قصر حمد .

حوش ماطوس يعنى كان الطليان إيجارب فى الصوالح والا فى الجلوه الفوقية ، اوروحوا مكسورين . . لما روح الجيش من عسكر الطليان قالوا واحد منهم يتوضا قدام حوشه شوره طلبوه قالوا له . هات لنا اميه ماء قاللهم انتم شن والله مانى عاطيكم حتى شربة اميه . . ضربوه قتلوه اوخشوا للحوش لاخلوا فيه لامراه ولا عيل قتلوهم جملة يعنى الى فى الحوش كلهم قتلوا . . .

او قالوا داروهم فى جب والا فى ماجن لتو . . هذا على السمع انى ما حضرتش . .

س . وقصة حوش حباره ؟

ج . حوش حريب .

س . شن صار فيه حوش حريب ساعتها نجبروا فينا العسكرية انى مانيش حاضر معاهم قالوا احنى حاطين كشف كول قدامهم ، بيديروا قدام الاستحكام او هذا فيه انفار الغادى اذا كان فيه عدو او قالوا فيه عسه واحد مدايرين جندى عليهم . . والمسافة قريبة ماتجيش خمسين متر ما بين استحكام العرب وما بين استحكام الطليان . واحد من الجماعة قالوا ساعات ما انتحادفوا الا بالمقلاع احنى وياهم اظهر يافلان عماهم من عسكرية العرب . . نشهد بالله ظهرت مجموعة 3/4 من الحبش اوجت لهذا الجنان اودخلوا على هذكم والله مساكين لا بارود لاشئ والله إلا ضرب بالسناقى قتلوهم سبعة والا ثمانية هذه قصة حوش حريب هذه كاينة اوصارت وسامعيتها احنى كلها هذيم ظهورهم فرقة حبش وقتلوهم .

س . ما عندكم حد مات فى حوش حريب ؟

ج . لا . . .

س . فيه جماعة رفعوهم للقوز . . شن اسماه القوز يا حاج ؟

- ج . قوز التيك . . عدموهم غادى .
- ج . يا ودى ما عندنا حد عدموه احنى مشايخنا الى من بعد شاد السلطة قتلوهم كل حد فى جبل واحد يقول . قالولى ، اوقالولى . يعنى الثلث ارباع خلوهم فى العازة .
- س . شن سماءهم هؤلاء المشائخ ؟
- ج . « على بلعم » هذا شيخنا وبعدين اختيروا المشائخ فى بعضهم . . احنى شيخنا محمد بن عبدالقادر الرعيسى هذا سجلته انت .
- س . ايوه نبوا اسماء الى عدموهم ؟
- ج . هو حياة الرعيض « هذا مات فى الحبس نلقاها انا احنى كنا برة والحاصل استحقينا اوطال علينا الوقت ، واحنا سلمنا واللى بيخش يقولوله طلين . . خشنا واللى عنده جبل سلموهم فى قصر حمد ودخلنا مكسورين الخاطر اهو اللى ايلم ( يجمع ) فى السلاح اوسلمهلم يعنى مشوا عليه طريق والا اثنين نهارها ، ايدور فى دجاجة ولا ديك بينقله الى البرقادير فى قصر حمد ، ويوم مامشى لهم فى قصر حمد قبضوا عليه ، والله ما عا دريناه ، ولده مشاله لقاه فى الجديده محبوس . . قال مشيت بكيت احده . . اوقال جيلى اوجيلى قال درتله عيش ( بازين ) فى المدينة اوجهته لله والله ما طول لين قالوهم : مات ، وعلى بلعم كيفها حتى هو .
- س . على بلعم هذا ايش ايكون ؟
- ج . هذا نظيره . . حتى « على بلعم » شيخ قبيلة الذكيران ساعتها قبائل ، ذكيران ندوق .
- س . ماهو على بلعم « ساعتها قعد حتى على الخيل رايس خياله ، مداخله من احد الحاضرين للقاء »

انتهت المقابلة عند اللفة ( 433 ) أ - من الشريط / 4 / 244 —

#### ملخص المقابلة : 241/4 - 244

احمد على الدهمانى . مصراته . محلة الزروق .

تعتبر المقابلة جيدة ولكن الاحداث الزمنية غير مرتبة ، وهذا يرجع للفارق الزمنى فى الاحداث .

كانت بداية المقابلة حديث عن معارك مصراته سنة 1922 م وبالتحديد معركة قصر احمد وحصار المجاهدون للعدو بقصر احمد ثم هجوم قوات العدو وباننده خريشة بتاريخ 1923/2/1 م وكانت قيادة المجاهدين لسعدون السويحلى حيث تصدوا لهم فى معركة السليحيه والقطار والحمام وعين كعام وسيدى زلى وسيدى سرور وغيرها من المعارك ، وامام القوات الايطالية الزاحفة تجمع المجاهدون فى منطقة السدادة وميمون ونفذ حيث پداء وافى الاستعداد لمواجهة قوات العدو

المتحركة ومن أشهر المعارك ، معركة المشرق في 4/5/1923 م ومعركة سواني العوكل وحوش حميد في 7 و 8 من سبتمبر سنة 1923 م ومعركة بشر الكراريم في 13/10/1923 م .

يتحدث المجاهد عن معركة القرضابية 28 ، 29/4/1915 م والتي تكبد فيها العدو خسائر كبيرة وتحصل المجاهدون على اثرها غنائم كثيرة من السلاح والعتاد وفي هذه الاثناء كان الراوى من ضمن القاطنين بمدينة سرت وهي تحت السيطرة الإيطالية للعمل هناك وكرد فعل للحامية الإيطالية بسرت قامت باعتقال كل الليبيين المتواجدين هناك وعلى الخصوص اهالي مصراته وشرعت في نقلهم الى طرابلس عن طريق البحر ، وكان من ضمنهم الراوى الذى يسرد تلك الواقعة بكل تفاصيلها وما تعرض له من انواع التعذيب وما شاهده من جرحى وقتلى من الليبيين وسوء معاملة وتعذيب من الجنود الايطاليين وكيف كان الطبيب يامر برمي الجرحى في البحر متعللا ان جروحهم لا تشفى كانت الرحلة من سرت الى طرابلس حيث تم حجزهم الى ان حان موعد الرحلة للمنفى بايطاليا ويروى المجاهد احداث الرحلة ومروءه السكان لهم وتوزيعهم على السجون كل مئة وخمسين شخصا في حجرة وقد تعرف الراوى على بعض الاشخاص ذوى الشهرة في ذاك الوقت منهم المريض « وشلاي » و « مصطفى الترجمان » و « حمد الشتيوى » وقد سخر المنفيون للعمل بمزارع ايطالية ، وعقب استبدال الاسرى رجوع منفيو ترهونة في البداية ثم منفيو مصراته بعد مرور شهر الى طرابلس ووضعوا بسجن السراى الحمراء لتبديلهم بالاسرى الذين كانوا لدى المجاهدين وبفشل تبديل الاسرى سرحوا المساجين للتجول داخل مدينة طرابلس ، وهنا يتحدث الراوى عن الحياة اليومية داخل مدينة طرابلس في ذاك الوقت ، وياعلان من السلطات الإيطالية بحاجتها الى عمال في ايطاليا تقدم الراوى للذهاب وعند بداية الرحلة كانوا خائفين من الغوصات الالمانية التي تهاجم البواخر الإيطالية ووصلوا الى مدينة بريشيا بايطاليا وقد اشتغلوا باحدى مصانع السلاح ومكثوا هناك لمدة ستة عشر شهرا بعد انقضاء هذه المدة عادوا الى طرابلس .

ويتطرق للحديث عن الحياة اليومية من جديد وخط السكة الحديدية الرابطة بين طرابلس وسوانى بن يادم ، كذلك تطرق للحديث عن الانخراط في العسكرية الإيطالية للحصول على السلاح والهروب الى المجاهدين ، ثم تحدث عن هروبه من طرابلس متخفيا بشخصية تاجر ووصل الى سوانى بن يادم وعن طريق احد اقربائه استطاع الوصول الى مصراته وكيفية توزيع المجاهدين في الخفارات الليلية وفرق الاستطلاع ... حديث عام عن « حكومة رمضان السويحلى » بمصراته ..... وخلاف « رمضان » مع « عبدالنبي بالخير » ..

## مشروع تجمع الجهاد

منطقة البحث رقم 9 رقم الشريط او الاشرطة 323/9 و 324 و 325  
تاريخ المقابلة — / — / — 15 / 11 / 1987 م .



الاسم ثلاثيا : محمد بن عبد السلام اليوسفي  
تاريخ ومكان الميلاد : ترهونة / 1877 م  
حالة سيدي الصيد قبيلة اليوسفي  
اسم الام حليلة بنت الحاج الصغير

علة \_\_\_\_\_ قبيلة \_\_\_\_\_  
الوظيفة : عاجز  
علاقته بالطرق \_\_\_\_\_ وجمعيات المجاهدين : \_\_\_\_\_  
وظيفته المدنية : العسكرية السابقة : مجاهد  
الحالة التعليمية : \_\_\_\_\_  
اللغات التي يتكلمها : \_\_\_\_\_  
الجهات التي سكن بها سابقا : ترهونة  
الرحلات الطويلة التي قام بها بما بها رحلة الحج : نفى الى ايطاليا 1915 م  
هل سبق ان اجريت معه مقابلة : \_\_\_\_\_  
بواسطة من : \_\_\_\_\_  
اين : \_\_\_\_\_ متى : \_\_\_\_\_

ملاحظات : حول المقابلة :

---

---

---

---

---

اسم الباحث الذي اجري المقابلة  
محمد عبد النبي علي دقالي  
الفرجاني سالم الشريف  
محمود الديك

بمنطقة ترهونة محلة / سيدى الصيد / وبتاريخ الاحد 15/11/1987 م .

الاسم :  
تاريخ الميلاد :-  
اسم الام :-  
محمد عبدالسلام اليوسفى  
1877 م مكانه / ترهونة . القبيلة يوسفى  
حليمة بنت الحاج الصغير

س . هل تقدر تنسب نفسك ؟

ج . عبدالسلام عبدالسلام حمد بن سالم . هذا جدنا عائلة سالم ماهى بيوت بيوت .

س . من هم البيوت ؟

ج . عيلة سالم حتى يقوللنا وبعدها الضبيعات وبعدها المراقيع وبعدها العمارات وبعدها  
الرحيمات وبعدها اولاد امبارك هدموم حد بيت عيلة اولاد يوسف .

س . عمى الحاج احكيلنا ، انت كنت متفى وقت الطليان نبوقبل النفى الظروف اى  
ماهى الاسباب الى جعلت الطليان ينفوكم ؟

ج . هنا والا فى ايطاليا .

س . هنا قبل النفى ؟

ج . من تاريخ 1914 م صارت طيبة هنا من وريلة وتعال جاي طايب الطليان والفوقية  
هادى مشت ، هى لو كان افتكت من بعضها ما ياخذوهاش الطليان يا شيخ لكن انا  
قعدت هنا ، ماعنديش باش نمشى مثل ماعنديش ماناكل وماعنديش علاش نرفع  
وانت فزيت فوق ، تولى هنا انت عندك بندقية وأنا تحت الطليان وماعندى شىء كان  
عندك شىء جرد يشدوك يا خذوه حتى هو يرفعوه الفلاقة لاخلت بل ولا غنم ولا بقر  
الا تحصله الا الفوق يرفعوه .

س . من هم يرفعوا ؟

ج . مسلمين عرب .

س . مسلمين فلاة ؟

ج . اى الفلاة عرب .

س . من هم بالضبط اى القبائل ؟

ج . ما تعرفهم الى هج مخلطين فوق الى عنده علاش فز هذا ابل وعنده علاش ونمشى  
هذا مشى ونلاقوا زى هلملاقية المباركة انشاء الله .

س . يا جدى هدموم الفلاة هدموم انتم قعدتم تجاهدوا الوطنيين الى عندكم وطنية وهم  
سيبوا بلادهم واتجهوا اتجاه آخر ؟

ج . هم . خشوا الاستعمار واحنا هنا قعدنا فى الخط .

س . زى الى طليانوا ؟

ج . فى الخط .

س . طليانوا والا لا ؟

- ج . هم بعدها والا توه ، الطليان ماخذاش البلاد حتى لين مات عمر المختار .  
 س . الفلاقة هم المجاهدين ؟
- ج . هذول طلعلوا لورفلة والقدادفة وترهونة الى فز من الوطن من هنا ومشوا فوق بداوا دايرين ارباع انت تحي انت وهذا وانت وهذا خمسة ستة سبعة اودورا ايمين ايسار لين تبجروا « تأخذ الابل او الغنم عن غفلة » غنم وابل تغيروا عليها ترفعوها وتمشوا .
- س . توه ياسي الحاج قبل هذا والكلام قبل مجي الطليان والمطالية هل حضرت معركة الهاني ؟
- ج . انهار الهاني في الجديدة منهم مشرق ماهو قبل بيدوروا على الهاني دوران راهم من مشرق احنا كنا في ( الاكواش ) الاكواش هادي في وجه تاجوراء هدم الناس فيسح زرتهم هم وين يصير لهم العياط والمهاجاة غير هناك من صحيح يلحقهم حتى لحوق بالعصاء ماهو ، وين نصير المهاجاة والعياط والتهديم وكذا يتخدوا ، هوينه احنا شدينا بعد وصالناهم للجديده - قدام ربطوا علينا الجديدة حتى هم قوة راهم من الهاني مشرق وقعد الحرب حتى قريب بعد العصر وهو بينا مطاقشه في التالي وبعدها عاد فكك الهاني .
- س . بالنسبة للجديده ، الاكواش ؟ ماتعرف الناس الى كانوا معك من ترهونة والا من اولاد يوسف ؟
- ج . الى قريب لينا هذا نعرفه .
- س . مثل من ؟
- ج . معنا ضو السائح اليوسفي « ونوري البوسيفي » هذا من ضنا سيدي ، ومعنا رمضان بن محمد بن رمضان « من الحمودات و » ضوباخير « و » حمد الفرجاني « عم على الفرجاني ومن آخر « وعمار التابت » ، واخيه عبدالقادر هدم عيلتنا الى في الخطبة هادي .
- س . من الرايس متعكم يومتها ؟
- ج . انهار في لول المبروك هوراس الحرب المبروك بن المنتصر ماهو ، احنا قبل شادين في غوط الرمان في لول ولكن وين جاء العياط وجاء كذا قول الرومي ظهر من هنا مع بير السطا ميلاد وين جئت فازعه هاديك ماصباش ( لم يقف ) هو كان في الاكواش والاكواش هادي في وجه تاجوراء وبعدها هوينه ادهمناه فيسع ، فيسع فات للنقطة الى غريبها ، النقطة الى غريبها شدتنا واجد .
- س . والسلاح عندكم والا كيف درتم في السلاح ؟
- ج . السلاح محصلين في لول هوينه منحيش نزل الطليان مش انفلقت هوينه الدنيا هو لوكان السلاح الى جاء الموزر الى جاء من الترك ساعتها في لول فرقوه بكري باهي لكن مافرقوهش لين انعزق فيها المدفع في البلاد وانفلقت ( انفجرت ) البيعة بعد حلوه ( فتح ) المخزن هذا واحد يحصل بندقيتين وواحد ثلاثة واحد بندقه واحد يموت من الرفس ( الزحام ) .

- س . المخزن تركى او ايطالى ؟ . . ؟
- ج . شن ايطاليا قاعدة عرب ماخشوش الطليان ساعتها .
- س . المخزن الى فتح لمن ؟
- ج . هذا من اصله هذا قبل لا يخش الطليان .
- س . تركى المخزن للاتراك ؟
- ج . تركى ايه .
- س . والاتراك ما بوش يجاربوا معكم والا كيف ؟
- ج . لا يجاربوا حتى هم مساكين ، الا فى التالى بكل قعدوا يجى عامين قعدت حاربته مش قعد لرايع عام .
- س . وبعدين ؟
- ج . بعدها هوينه سلموا الطليان . .
- س . قعدتوا بارواحكم ؟
- ج . قعدت العرب ، قعد المسلمين ويس .
- س . كيف تتحصلون على السلاح ؟
- ج . ما هوكل مرة نحصلوا منهم دعة باهية .
- س . من الطليان . باهى استمرار كان عندك كلام آخر ؟ بعد الجديدة كيف صار ؟
- ج . بعدها هم شدوا معادش ظهروا ، برة ، برة ، برة ، حتى لنهار بو عرقوب جايين زعمتهم بقوة ولكن اتخذوا ، فيسع حتى هو بعدها برة ، برة بعدها صار نهار فى جتوزور حتى هو كبير .

### معركة الاكواش :-

- س . نريد نرجع لمعركة الاكواش ، احكيلنا عن المعركة متى بدأت ؟ واى وقت خريف ، ربيع . . ؟
- ج . بين عقاب الربيع وبين الصيف والله وما نقدر تو هاذاك الوقت شتاء او ربيع ما نقدرش نقولك .
- س . انت ما تعرفش الوقت صبح ، ليل متى ؟
- ج . المعركة مع الضحى لين احنا جينا من قريب قصر خيار وهى قعده صار بينهم امطاقشه فى الاكواش لكن هديم ما قدموا وهذين ما هربوا لين جينا احنا من امشرق وبين جينا احنا من اليد عاد هم قلعوا ( انسحبوا ) .
- س . انتم كم نفر لما مشيتوا ؟ انتم فزع والا لا ؟
- ج . ايه فزعيه مش شوية .
- س . قداس تقريبا عددكم ؟



ج . فوق من الميتين .  
س . معكم سيب ؟

ج . ابي والله .  
س . قداس الخيل ؟

ج . والله عاد الخيل ما نقدر نعدهم ، ما نقولك قداس عشرة عشرين ما نقدرش واما الكل خيل وعلى كرعيه او احد على زائلة ما هو الى حاكم في النقطة هاذيك ما قعد فيها حد كان ظنين كلها جت هبضت هوينه حتى لين فكت قريب الليل .

س . باهي . ما هو سلاحكم ؟

ج . والسلاح والله كان فيه حتى بوصوانه وفيه الى موزر وسلاح الترك بوجه واحد يقولوه كاباك وجه واحد هوينه ، يقولوا لصبح هذا من اوطة ديرن له جنين تحشى الفوشيك اما الموزر هذا عشر فوشيكات يمشن جميع وحده في جرت وحده وهوينه وين تفرغ هاذيك تجبد الصبح تنظر الداخلية تحش هاذيك الموزر حتى هو سلاح باهي لكن فيه الدخان وهم ما عندهم دخان ، في الليل . .

س . من هم الطليان ؟

ج . احنا بارودنا فيه الدخان امتاع الموزر هذا وفي الليل حتى هو وين تصير العسة ويصير كذا هوينه هم يربطوا على الدخان هذا ، البارود هذا يدير في النار وهم بارود هم ما فيهم نار ، ما نشبع فيه ضىء ( وميض ) بكل . شىء . .

س . يوم الاكواش من الشهداء ومن هم الجرحى ؟

ج . الى استشهدوا مننا احنا اثنين ، من عائلتنا احنا خاصة « رمضان بن محمد » وحمد الفرجاني هذيم استشهدوا نهار الاكواش ، هذيم ما قدموش القدم موتومان ليد ، هدم موتوا نهار الاكواش موتوا الاثنين والمجاريح ياسرين .

س . كيف درتم للمجاريح ؟

ج . المجاريح الى يقدر يدب والى ما يدبش الى عنده اهل يرفعوه لاهله ساعتها حتى الطيبة ما فيش راهوا دواء ما فيش ، فيه واحد من العمامرة يقوله الحاج « رمضان » داير روحه طيب كان يداوى لكن ما هناش طب بكل .

س . ما هو الدواء الى يداوى بيه ؟

ج . الدواء يدير في ، تعرف الى تنشرك ( تتمزق ) بطنه ( معدته ) والا ينجرح يدورله ، يقول هاتوا جلد الارنب ، والا جلد فار ، ويحمله الرب ويغمسه ، يأخذ الرب ووبر هذاك الواحد ، يدره في هاديك الوحدة ، يدير له خيط سلك ، يدور عليه هذاك الواحد ويغمسه في الرب ، هنا وهنا وكان الجرح طول يمد معه عنده امية ، ما نقدرش انقولك ، حمرة ينقط عليه اوحيادات ، ويرد يخطط الوحدة هكى ويرد عليها الوحدة هذه وبعدها يزيد البونطوات عليها عليها ، وين عاد يعرفه برى

« شففى » يمشى يشد هذاك السلك ما هو ملوى على وبر الارنب يجيده وبعدها ينقط عليه اميها اخرى ويدير له بونطوات ويقعد يبره ، ها هو توا راسى فى القديم ديرينله قرعة القرعة الجراية .

س . راسك انت ؟

ج . ايه مجروح واضح ؟

ج . ها هى القلة ماشية من هنا بكل ، لكن باش نحكيك ، حتى هو دارلى القرعة حتى هو فلقى كبير راهو القرعة ، يقلوها القرعة السراية هوينه شوره عودها صحيح .

س . اين انجرححت / فى اى معركة ؟

ج . فى وجه تاجوراء هذا الخط . . من القره بوللى حتى الى معيطن يقوله العقربية ، هو الى انجرحنا عليه انهارها ، ساعتها الى عنده بندقه ما يقعد عن الحرب ، حتى بوصوانه بيمشى ، بوصوانه حتى هو كان قريب ياخذه ، فيه حارتين ثلاث قزدير وكان هونية عاد الموزر والكاباك واليونان هذا جاي من اليونان ، جلدته صفراء ، حتى هو قصديره يالطيف ، الطليان مسميه مدفع العرب .

س . معركة الاكواش من انتصر فيها ؟

ج . هم الى انكسروا فيها ، هم الى اتخذوا فيها « هزم الايطاليون فى هذه المعركة » .

س . ما تحصلتوش منهم على غنائم ؟

ج . شد ، الغنيمة حد ماشديناه منهم شد وغنيمة كل مرة نلقوا بندقه ملوحة الى يشرق يلوحه ويجرى والباقي ما شدينا منهم حد عاد فى الاكواش .

س . من اين تتحصلون على التموين ؟

ج . فرقت اشرابنا وماكلتنا والله كان شر فى شر ادير عوينك انت من نفسك امين بتاكل .

س . ما هو عوينك ؟

ج . سوق ، شعير هوينه يديروا فى ، عاد تعرف السوق زميته والا دقيق ابيض اديره خبزة والباقي الحكومة شن عندها ما تعطى .

معركة ( سوانى اللمسانى ) .

س . المعركة الى بعدها ؟ بعد الاكواش شن صار ؟

ج . بعدها ظهروا مع ( سوانى المسانى ) .

س . وين نجى ؟

ج . سوانى اللمسانى ( هذول قرجى من فوق « سوانى اللمسانى » .

س . جتزور . . ؟

ج . جتزور حتى هو صارت فيه معركة .

س . احكيلنا على سوانى اللمسانى ؟

ج . هادی هونیه ماصبوش یاسر راهم فیسع قبضوا ، فیسع قلعوا ما حصلنا منهم شیء غنیمه ولا حاجة ما حصلناها اسر ما شدینا منهم شیء .

س . متى كان هجومکم فی اللیل ؟

ج . لاهم الی ظاهرين احنا الی بره ، هم الا مع الفجر جوا داجین هونیه عاد وین ناض البارود العرب واتیه واحد ایچی من هنا واحد یعیط واواحد یهاجی اواحد کذا قشعوا فیسع معادش لحقناهم ما حصلنا منهم شیء .

س . من قائد المعركة ؟

ج . قائد المعركة هو الی شاد خط الحرب فی وین ما یصیر یقولوله ییظهر هنا والا هنا یدیرنا فی جرتیه سیب وبل ، والی عنده جمل والا عنده حصان ، « المبروک المنتصر » حمادی من حمادات سرط هذیم .

س . ومن معه یساعده ؟

ج . معهم یاسرین حتی هم معه واحد « عمار » یقولوله : زقلوط ، اواحد یقولوله « حامد » هذا من مارغنه ، یاسرین فیهم الی ما نعرفهمش الی موش من جلوتنا ( ناحیتنا ) مانعرفهمش .

س . هل معه اتراک ؟

ج . الاتراک قاعدین فی طرابلس ساعتها .

س . معکم . . ؟

ج . وین معنا شادین علی ارواحهم الاتراک ما یقدروش زی العرب ویزیدوا ونقصوا یمینه ویساره هنا وهنا فی اللیل ما یقدروش الاتراک منا اللداخل ( یقصد انهم انسحبوا ناحیه الجنوب فی السوانی والعزیزیه وغیرها ) .

س . بعد سوانی اللسانی این ذهبتم ؟

ج . بعدها جت دعة جنزور نهار معركة جنزور حتی هی معركة موحشة .

س . احکیلنا علیها بالتفصیل ؟

ج . لان معركة جنزور حتی هو ظاهرين لها بالقوة لكن العرب ، قاعدین ساعتها هم اجدد الطلیان . هی من تلف العرب کان العرب ، کان فی بعضها نزلت معهم عسکرية ونزلت معاهم کذا ، قبل وین ما ینوض فیهم البارود وتصیر المهاجاة والعیاط ، یطیحو منهم ثلاثة اربعة خمسة ، یاخذو وجوهم وتظل العرب تلحق فیهم وتضرب کان طاح حد تأخذ بندقیته وتفتشه کان عنده فلیسات وکان ما طاح حد هونیه یخشی الکردون وبعدها هونیه ظهرنا للجمیل مغرب .

س . لا قبل الجمیل نبوا تحکیلنا علی معركة بو عرقوب ؟

ج . الطلیان ظهوروا علی محطتین طهروا قدو بو عرقوب جزء وغریبة ، غریب بو عرقوب وبین الکردوه ظهر جزء ، لكن نهارها عتوا علی العرب .

س . كيف . . ؟

ج . عتوا زرونا في لول وهربت العرب وهربوا هم .

س . ما هو سلاحهم نهارها ؟

ج . الطليان سلاحهم بومشط .

س . عندهم مدافع ؟

ج . لا مدافع ، ما عندهم مدافع سيارة فيسع مديفعات في سيارة هديم مدافع الاولى ، مدفع قبل امنين خش الطليان قبل فيه مدفع في البرج في سيدى الشعاب يقولوا المدفع بوخرص ، وين ما يذهب منهم ببيور والا فرقاطة ايتلفه ، شوى قالوا الى باعوا البلاد ، البلاد يقولوا بايعها « بن المنتصر » مصراتى « ابن شعبان » هذا زوارى « وحسونه » هديم واخذين حقها على الخبر النفر بعشر بارات وانا نعرف العشر بارات الى هذا دارواله شاشيه حمرة باش يرفعوه للطليان هذا فلان هذا فلان ها هو باع حصته ، باش هذوكم عطوهم على الخبر بعشر بارات شنوا بعشر بارات خمس بارات وخمس بارات رقاق اشوى وعشر بارات بوعشرين هديم نحاس كان الفليس مهناش ، هوينه عاد عمل عليه يهودى قالوله قول انا طيب وكذا توه خلى نقصوا منه ، المدفع قاهم ها هو فيه طيب شرعى محسوب اليهودى السطى ويعدل المدفع باش يضرب قريب وين يى يضرب بعيد والاقريب قالوا قص منه شبرين من قدام بعدها بدأ يضرب ويطيح احذاه خذوا عاد اليهودى شدوه داروه في فم المدفع وحركوا عليه المدفع ، بعث للطليان وصل ، معادش مدفع ، هوينه خش البلاد وربى ياكبادى الله .

س . انت قلت الباره فلوس ؟

ج . الباره بلط يقولوها .

س . شن تحيب الباره ؟

ج . شن تحيب ما تحيب كان بلطتين يجبن خبزه خبزت بوعشرين زى الكومانية خير من خبزة خمس قروش تو كبيرة لكن الباره ميتة ساعتها ، ساعتها العنز العلالى باطناش فرنك والنعجه بعشرين فرنك الجدى ستة قروش خمس قروش سبع الى الاربعة قروش السعى مهناش الفلوس ، كان ما تقطع العرب في الحلفا الى عنده زائلة يرفع فيها في لول هذا قبل دخول الطليان ، ميتة الباره . . مافيش خدمه وربى يفرج .

س . بعد بوعرقوب اين ذهبتم ؟

ج . مشينا غربنا لسوف ، سوف هذا في الجميل والجميل بين زوارة والعجيلات ، بعدها قال سوف ، يابى المبروك فيه نجع بنقلوه لو كان نحصلوه نحاربوا به عامين نبوا السبيب والجمال ، قاله باهى شن بتقول ، سوف المحمودى هذا ، والله كان ساعتها اسحاق قعد هنا والجميل ساعتها فيه مريبعه واحدة زى المربعة مثلاً ،

يركب « سحاق باشا » وهاللى يسرب السبيب والجمال ، والجمل يمشوا عليه اثنين  
ثلاثة فى الركوب تلقى شلامتك تحت الحيط امنينك فايت يعطيك خمسة ستة امشاط  
فوشيك وتفوت ، تم عاد المسقاد ، اسقدنا بعد الظهر قعدنا نمشوا للصبح من  
غدويتها مالفينا كان اديار ، يا خشوا الداخلى يا جلوا القوق ، وين ضوى الضى  
علمت بنا فرقاطة فى البحر بنقلوا على معيطنات يقوهم العقريية هذين فى طريق  
تونس قدوزوارة ، اشوى انعزق فينا المدفع قال سوف ياكبادى هذا ياخذكم المدفع  
المدفع انزلوا لوطه قول عاد نزلنا لوطه المدفع بدأ يفوت لنا معادش يطق فينا قربنا  
فيه كردون قربناه صار بينا وبينهم البارود قلعوا من مطرحهم هم بعدها خشوا  
القدام وصلوا لوطه فى النخل قال سوف ياكبادى توه الداخلى معادش نخشوا توه  
يقرونوا عليكم اقرون ياخذوكم حتى بالطقطقات والرشاشات هوينه عاد الى انجرح  
من الكردون فى لول هوينه انجرح والى ما جرحش ما جرحش مات منا احنا انهارها  
حصان للزرقان وجرح صاحبه لكن صاحبه ماطرله شىء .

س . شن اسمه ؟

ج . صاحب الحصان « محمد بن بوزيد » الحصان ضرب على الدينار الجبهة ، هذا رقد  
فى مطرحه وفاتت الحصان وجرحته فى راسه لكن ما طرله شىء .

س . من معكم من القبائل الاخرى فى ذلك اليوم ؟

ج . متخلطه من كل مطراح من الزاوية من جنزور من كل بلاد محله ، محله شنو غير نفر  
والا عشرة والا عشرين .

س . انتم الى من تروهونكم ؟

ج . والله ما نقدر حسبهم الى معنا الكبار حامد وعمار الزقلوط . والمبروك المنتصر هو  
الرئيس والباقي مانقدر ، الى عمامى عائلتنا احنا امعاى سته المشيه الغرييه هادى .

س . ما اسماءهم ؟

ج . الى معى واحد يقولوله سعد بن نصر وسعد بن عبدالمولى ، والشارف بن صالح  
وحموده بن ميلاد وحموده الفقى ، النورى .

س . نورى من ؟

ج . نورى معنا حتى هو هذا جرح .

س . اين انجرح ؟

ج . انجرح فى لول فى الاكواش .

س . والى انجرح فيه الرجل ومات فيه الحصان اين ؟

ج . هذا بين زوارة .

س . هل تعرف المكان بالضبط فى العقريية فى بوعجيلة مثلا ؟

ج . لا العقريية مرتفعة اشوى فى السباح .

س . في اجناب بن نصيب ؟  
ج . العقربية هادي غير معاطن في الطريق ، طريق تونس هادي ، معيطانات هوينه نص  
تمشي ترد لهم وتجي هديم العقربية راهي ، والجميل هادي .  
( نهاية الوجه الاول عند اللغة 492 )

بداية الوجه الثاني :-

س . الا تعرف المكان بالضبط ؟  
ج . بعاد علينا احنا زي البرانية فيه الوطن ماتعرفوش زين ، وما نقدر انقول لك شن  
اسماه .

س . وصلنا معركة العقربية ، وفي المكان هذاك يقول انه زمان كان يجيكم الدقيق من  
تونس ؟

ج . الدقيق شنوا راهو غير مياره ، مش يفرقوا فيه على العرب والله كان ميره ( شراء )  
تمشي دير زائلتك او زائلتين او ثلاث ساعتها ولد الجاوص ما هو عنده حصه في  
الحكم في تونس صرحلنا الطريق تمشي انت تجيب ميركان عند باش تجيب وعندك  
زويلات تعبي زوائلك وتروح .

س . كان الناس يبيعوا ويشروا زمان ؟

ج . يبيعوا وين يبيعوها انت غير جيب لروحك ما تأكل انت واسرتك .

س . كان هناك تجار ويمشي لتونس يجيبوا في الدقيق او مافيش ؟

ج . ما هناش تجار يجيبوا فيه علاش الحكومة مرة تمشي تجيب قافلة جزء هوينه إنتظ  
تفرق فيها بالغارف غويرف طماطم هذا يعطوك في الوجبة اغويرف طماطم وكذا شن  
ايديرلك .

س . طماطم معجون ولا كيف ؟

ج . لا غويرف الطماطم الفارغ يعطولك الدقيق يكيل به في الدقيق .

س . طريق القوافل هل تعرفها ، وهل ذهبت لبن قردان ؟

ج . بن قردان مشيتله مرتين .

س . من أين تذهبوا ثاني ؟ الطريق الى تجيب فيكم ؟

ج . تجيب فينا نذهبوا على المعطينات هدم العقربية وشمشوا طول لبن قردان وشنو ساعتها

بن قردان البضائع الا عند اليهود راهو ، مافيش البضائع العرب يبيعوا ويشروا هوينه

تلقى اليهودي عنده البضائع قدام وكأنه اعلى من هادي الستايف واعلى من المربوعة

فيه الحمص والدقيق والفلول كلها عند اليهود .

س . بماذا تأتوا من غادي ؟

ج . انجيب الدقيق او الحمص الفول أو الرز الى بتجيبه جيبه .

س . الرجوع ايكون مع نفس الطريق ؟

ج . مع الطريق .

س . وعندما احتل الطليان جهة الشط هل غيرتم طريق قوافل التموين ؟ بعد ان احتل الطليان بوعجيلة والعقربية ؟

ج . بعدها ما عاد يمشى حد لتونس مع الطريق لوطه ، خلاص من يمشلها .  
س . هل اتخذتم طريق من عند الجبل ؟

ج . لا . لا ، احنا من هنا نمشوا نقعدوا (15) يوما وما نروحوش ، هاهو من هنا من ترهونة نقعدوا (15) يوما لكن انكرتنوا فيهم ثلث ايام غادي ، ايكرتنوا فينا لين الى قدامك يظهر وما تخشش اوطه من ثلاثة يخى في اول يكرتنوا في سبع ايام ، ياكبادى اهم الى ريناه انشاء الله ما تروه ياكبادى من الشر والشقى والسهر والله .  
س . احكيلنا على الكرنينة ؟

ج . التكرتين ، غير تقعد اهنى في مطر حك ما تخشش لين يظهر وا الى قدامك وين يظهر وا الى قدامك تخش انت ، ما تخشش واحد على واحد ، لين القافلة لوله تعبى ميرها وتطلع وبعد يجوك يقول لك خش ، ماحد يخش على حد بالقافلة ، اما غير نمشى طول هادى كيف . . لا ، لا . والماء من البحر ، ماء بن قردان والله كان من البحر ، فيه معطن يقولوه الزكره يبيعوا في القرية باربع قروش بس والباقي لا تقدر انت الابل تدق وتركه تنض شواربها وتسبيه ملح بحر .

س . باهى نرجع لمعاركنا قلنا آخر معركة هي العقربية ؟

ج . هذا من الخبطة هاذيك وبعد قالولنا بيظهروا ييوا غريان ، قلنا احنا جاى هوينه عاد شدنا في الزاوية قعدنا في الزاوية وقت لاهم ظهوروا لاصارت لنا معركة ، هذين المعارك الاولى ، الى في الوقت القديم لول وفي التالى عاد هوينه كل مره تصير بينا مطاقتة عسس ، وفي التالى هم يخذوا عاد من خبطة القرضابية وتعال جاى معاد يظهر وا لا عاد سكر وا بنوا سور على البلاد على حاشيه ، وفوق ما عاdash يظهر وا بكل شىء .

س . عمى الحاج انت قلت حاصر القرضابية احكيلنا عليها ؟

ج . القرضابية سنو ، القرضابية ساعتها حاكمين علينا الطليان ، هنا خذوها البلاد هادى ، وقعدت العرب واحد يفلق في واحد ، قعد «السويحلى» يرفعوا منهم الببل مصراة وزليطن فلاقة محسوب هوينه عاد مش بيحيبها منهم وكذا ، اشوى وين مشى لهم غادى قالوله ارفع يبلك قال لهم اماله الابل ابرايها خلى بنديروا باش نجيبوا باش نكسروا الطليان مرة وحده روح حرجان منهم الابل ما جابتهاش قال للطليان احنا معادش نبوا المعيشة ولا عمر بكل بنكلموا مرة وحده بنديروا لهم قوة من كل مطراح بناخذوهم مرة واحدة والا ياخذونا مرة وحده معاد خلوا علينا شىء هوينه عاد قالوله باهى اماله فرقوا على ترهونة الف ومئة (1100) والشرق (1100) وورفلة (1100) خلى عاد جندبهم عسكرنا احنا بوجليويل معهم خلى الحبش خلى عسكرهم بوريش والا بلا ريش زى التبن توه تعرف المحلة وين ادج زى من هنا وترهونة «يعنى من سيدى الصيد الى ترهونة» لا ارنب تريح ولا غزال يريح الى في اليد يشدوه وهو دار

خيانة ماباش يعلم العرب هاهى اللعبة ، هو لو كان علم العرب باهى «السويحلى» لكن دار خيانة ماباش يعلم العرب خايف بيعوه مثلا ، وتقدموا عليهم من النهار لول قالوا قال الكولونيل يقولوله «قرسيانى» (الكولونيل ميانى وليس قرسيانى) قال توه ليل هيا بنولوا (تقبلوا) عليهم باش غدوة نجوهم بكري ناخذوهم رجعوا قعدوا هذوكم فى مطرحهم ، قعد الا الكولونيل هذا قاله هادى ماديرش الجلوله انت «السويحلى» تمشى من مغرب هكى ترهونه تحى من مشرق ورفلة تحى فى الوسط وتقدموا هوينه على الشبح الى قدامهم ارجال دارولهم زويلات ودارولهم اجويديرات (خيول) زعمهم هربوا ولكن فيه هويده تمشى من هنا الى القصارى زى هل المربوعة لوطه من هنا وهنا ودارولهم فيها خط حرب ملوه ملى وهديم حسابوهم غير الا هربوا جوا يدفوا بره بره ، لين صبوا عليهم قريب مصباء بداء ينوض فيهم البارود من كل جهة توه احنا احتزنا ضمنهم بحريمهم هكى واحنا العرب شارقين منه الطليان معطانا ش فوشيك اربع امشاط اربع امشاط متعات بوضه مش حتى بومشط احنا فرغناهم فى دقيقة وجئت منهيلة عليهم محله الواحد من مغرب وبعض من ترهونه وورفلة فيه الى زرق هكى وفيه الى زرق اشلمنت راحت على شر مادار والى انكفوا علينا اوطه منهم هدول ردونا لسرت خذوا عسكر بوجليويل والحيش وبوريشه هذا يقولك بيده هكى فوت يالله قدامى ماهو احنا احتزنا بينهم وبين البحر هوينه الى وصل سرت شدوه خذوا منه البندقة والفوشيك بما فيها ياخذوا البندقة يقولك قعز حتى لين قطع خط الرجعة معاد حد انقطعت الطريق الى احتاز الفوق احتاز والى احتاز لوطه احتاز لوطه .

س . وين فوق ؟

ج . هو فوق فى المحله القرضابية الى احتاز فيها ماهو هديم قلعوا هذوك قعدوا الغالبين القرضابية عرب القرضابية المجاهدين الى احتاز غادى هذا قعد غادى والى احتاز بحريمهم جاى هذا ردوه الحيش وردوه بوجليويل وعسكرهم وغيرهم حتى مشائخ ياسرين روحوا للواحد الى عنده دقره حتى محسوب ضابط حتى لين مغرب المغرب ياخذوا السلاح منك ويقولك قعز .

س . فى اى مكان ياعمى الحاج ؟

ج . فى سرت فى قصر سرت وبعد وين مغرب المغرب ومعاد فيه حد جاء من فوق مرورها على الطريق شبردق من هنا وشبردق من هنا (اسلاك شائكة) ومن تالى (من الخلف) هم والى يلحقوه يمحضروه (يضر به) الى يلحقوه انجبطوه ، حتى لين خشت البحر مع هذاك السرب ، مغرب العاد المناقة الى فى جرتهم شنى الله من ياله العصاء من تالى لين خشت فى المياه ، توه اصابعك هكى تخشى هكى والا هكى العرب ييست على بعضها والعصاء من تالى والماء من قدام ، عطى عليها الرومى كومانده بارود قالوا فيها بالبارود هكى المانقة الى فى جرتها هادى الى قريب للبحر مش الداخلى .

س . ماتوا ؟

ج . الى مات . . العاتق هذا ظهر خذى الوسع وظهر والى مش عاتق صبح ميت ملوحوه



البحر زى الخفافة هنا ، هنا والى يموت فى البحر مايقعدش مملود كرعيه ركبیه فى  
جبهته هنا منصر همكى يلعب على الماء زى الخفاف الصبح جوا يدهوروا النصارى جاء  
حتى الكولونيل الكولونيل حتى هو مجروح لكن جاءته مش مأكنة .

س . ما اسمه الكولونيل ؟

ج . يقولوا الكولونيل قرسيانى .

س . لا . . ميانى ؟

ج . لا مجروح انهار حتى هو جرح .

س . انت ريته ؟

ج . ريته / ما هو جاء للمقتله على الشط داير له فاشه على راسه وقطن ورقبته هذا باش  
قلتلك مجروح نهارها حتى هو ، الكولونيل الى هاض اعطى القتل قال العرب خانتنى  
بنقتلها كلها خانتنى منطلقش منها حتى واحد والعقيد هذا الى قعد فى سرت قعد يخابر  
قله الحكومة ما تقتلش ، قاله لا انا خانتنى بنقتلها كلها مانخليش حتى نفر هذا قعد  
يخابر وهذا قعد يقتل بعد حين هوينه مع الضحى جاء العفو ماردوها المقتلة زى جاب  
الكاغط فيده وجاء يجرى العقيد الى فى سرت هو القائد الى فى سرت نزر عليهم هم  
رافعين خمسة كل مسلم فى جرتة رومى لين يوصله للواء والبندقية فى دماغه يوصل حاشيه  
الماء ويصب عليه يظهر غفته ودماغه جميع فى الجوردهم قالمهم جاء العفو قعدنا فى سرت  
خمسة ايام .

س . انت قلت مره عندما جاء العفو الطليانى الى يقتل مزق غطاء راسه ؟ من الغضب .

ج . هذا محسوب متغشش ما يبيش العفوى يى يكملها .

س . كيف دار ؟

ج . فى التالى الوقت بعيد اليوم مش (72) سنة خذا البرطيلة شركها (مزقها) قعدنا خمسة  
ايام بعد المقتلة فى سرت بعد ثلث ايام المشايخ الى عاطيه دقره هذا ما خلطوهش علينا  
مع الى رفعوهم للبحر هدم شدوه غادى بعد ثلاث جابوهم والله علينا زى البراريك  
هدوم (تبعد البراريك اكواخ من الصفيح علينا حوالى 30 متر) احداشا (11) نفرا بعد  
العصر ثلاث ايام وقتلوهم وبعدها عاد هوينه ركبونا .

س . قبل ان تركبوا للباخرة كم واحد مات من المجاهدين ؟

ج . من يقدر . الى مات فى الليل هوينه واحد قعد فى البحر وقدغه والى صبح ملّوح ،  
الفوشيك توه امنين المانقه هادى الى فى جرتنا ثمانية التفاحة هادى تمشى لين تمرق فى  
الآخر ، ما هو اشوى الوفات .

س . باهى انت وين كنت لما شدوك ؟

ج . غادى فى المقتلة هذه ومن البارود واحد طاح على واحد . واحد مجروح او احد ما بيه  
شئ ، او احد ميت .

س . انت كيف درت ؟ هل بركت ؟

ج . هى كلها بركت على بعضها وين ناض البارود هى زى التبن اندرزت على بعضها

طاحت في الوطى والسلام الى طق فيه فوشيك ، هم ثمانية انفار المانقة هذا هم ، هوينه الصبح عاد قعدت بعد زرقت الشمس مقدار قامة قامتين جاء الرومى الى قتللك داير فاشة معصينه على راسه ، وين عاد جاء وجاء العفو ، قعد عاد هوينه يدوروا فيها في الصبح ضومشوا هم مع البحر الى يلقوه مات في البحر يزيديدا يفرغوا فيه يقول بالك حى لكن على الخبر الى نتقوا مع البحر فوق من الستين تراس جرتهم من غدويك قالوا ، امنين ما فرغوش البارود هم يخلوا الاتريك زى النهار . قعدنا هوينه خمسة ايام جاء البابور .

س . هل تذكر احد من الذين استشهدوا ؟

ج . غادى وين نعرفهم انا فلان افلان وين نعرفهم .

س . فيش حد من ترهونة هرب غادى ؟

ج . وين ندرى على الى مات والا قعد مازلت اطق فيه انت ، الى قعد ملوح هذا يردموه والله مايكروا كان فيهم امنينا الخمسة ايام هديم كان زى مراديم التين يديروهم واحد على واحد واحد على واحد . ويردموهم بالرمله ويقعد .

س . الخمسة ايام الى بقيتوهم هناك كيف كانت معاملة الطليان ؟

ج . شنوا الى عنده حاجة ما ياكل ياكل وكان هذا هوينه من الضحى للضحى : يجيولك فريده خبزة تأكلها بالماء والا تقعمز على كيفك هدم الخمس ايام .

س . اين المبيت ؟

ج . وين اتبات في مطرحك .

س . بدون اغطاء او فراش ؟

ج . لاغطاء لافراش والله كان في مطرحك .

س . ماهو المطراح ساحة ، سجن اى شىء ؟

ج . على حاشية الشط بكل .

س . انتم في وسط الحبيلة ؟

ج . اى والله غير الحبيلة ، الحبيلة وهم يدوروا دوران علينا .

س . عليكم حراسة مشددة ؟

ج . اى والله .

س . الحرس حبش ؟

ج . حبش وعسكرهم بوريشه ، بوريش هو الكل .

س . كيف بوريش ؟

ج . براطيل دايرها الريش من هنا ومن هنا معبيات هكى يقولوا العسكر بوريش ، يقولوا هذا عسكر الملك .

س . كيف عرفتم ان المجاهدين انقلبوا على الايطاليين عند حدوث المعركة من خبركم ؟

.. بداية القبض عليه ..

ج . انقلبت هى كلها انقلبت على الطليان امنين هدوكم صار من غادى ناض البارود

ومايندريش امنين ناض البارود انت منك من هنا ومن هناك وهدوكم من قدام لكن وين هدوكم الى قدامنا وجاين غربينا وين انصرعوا علينا معاد عندنا شيء احنا الى عنده اربع امشاط هديم نموا فيسع .

س . اين فرغت الفوشيكات التي معك ؟

ج . في الطليان ، هي امال باش قتلوه .

س . كيف انتم تاسرتم ولم تستطع الانسحاب بسرعة ؟ مثل السويجلي وجماعته . .

ج . وين السويجلي هذا احتاز الخلا فوق هكدي خذوا البساط واحنا بينا وبين البحر .

س . انتم اصحاب النقلية ؟

ج . شن عندنا الكروانة .

س . الكروانة تركوها عند البحر او قرب البحر ؟

ج . الكروانة في الوطو على الوسع وين هذا انقلبت الى هناك حصل منهم حاجة وهرب

هذا البساط والى حازوه هذا قعد في مطرحة والسلام الى مازال وقت هاهو قعد يشاوخ

فيكم والله عمره تم هوينه قعد في اوستكا جبانته كبيره «اوستكا» جبانته اكبر من اش

مسلمين .

س . عمى الحاج وانتم في سرت ، الطليان مسك ناس كثيرين سوى من الاهالى او من

المجندين معه فهل مسك من الاهالى كثيرين ؟ مثل المار من الطريق وغيرها .

ج . ما طلقوش كان العسكر والباقي ما طلقوا حد ، عربى وكان .

س . صغير كبير ؟

ج . الى يحصلوه ايجيويه .

س . معاكم اصغار في السن واكبار ؟

ج . ياودى صغار بكل لا . .

س ، قداش اعمار الموجددين هذاك الوقت ؟

ج . فينا (15) و (20) قريب غير الى قاعدين في سرت وبعدها هي كلها بعد سرت هوينه

عاد بعد ثلاث ايام في الخمسة ايام هذين بعد قتل المشائخ الحداش (11) هديم جاء

البابور ياودى الى عطاءه ربي مات .

س . لماذا قتل المشائخ الاحدى عشر (11) ؟

ج . هديم ماهم عطيينهم ادقر ومولى الدقره هذا عندهم ضابط واحنا اعطينا بندق يقولوه

بوصره قالوا محصلين بابور الطليان ، والا ابصر امنين محصله مشي لهم ، بندق رزين

(ثقل) والله انظن قعده موجعته في ابندام ماتوفى بكل .

س . المشائخ اخذوهم من وسطكم وعدموهم ؟

ج . لا ما خلطهمش علينا بكل حتى امنين جابونا احنا للبحر شدوهم بره هم ، لنهار

بيقتلوهم جابوهم عاد يالنا هنا احدنا في ركننا من مشرق (11) احدى عشر شيخ

عادهم انا واياهم لين عيان .

س . ما سماءهم ؟

- ج . هاهو معالى من اولاد معرف يقولوله «بويكر النعاس» والاخر يقولوله «مرعى بوسنينه» هذا معرفى والحمادى واحد من الحميدات يقولوله «ابراهيم بن عمر» هذين نعرفهم عاد مانعرفهمش اسماءهم ، «بويكر النعاس» مسكنهم هنا فى ابار مجى .
- س . من المسئول عليكم اثناء وجودكم فى الاسلاك الشائكة ؟
- ج . المسئول علينا الدورية .
- س . الى يعطولكم الاكل طليان ؟
- ج . ماهناك . . اكل والله كان الشر .
- س . الجريح مايقوموش بمداواته ان وجد ؟
- ج . فى الخمسة ايام هديكن لا ، لا مجروح لاميت ما ينظرك حد ، هم قاعدين بيقتلوك .
- س . ما هو لباسكم ؟

### بداية الصعود الى السفينة

- ج . الى عنده هربودة قعد فيها ، الى هذا مشى فى عباته واللى هذا مشى فى حاله .
- س . هل ضربوكم فى الشبردى ؟
- ج . امينا امكدسين لا ، لا ، اما العصي المسة الكبيرة انهار ركبونا تركيب عدوك ياولدى الله لا تحببه لمؤمن ، انهار ركبونا معه واحد مسلم فى الكرابير مسلم وكرابير رومى ما هو يركبوا فينا عاد مع السقالة .
- س . الساعة كم بدوا يركبو فيكم ؟
- ج . والله ما نقدر توه .
- س . ليل نهار ؟
- ج . لا نهار .
- س . صباحا ام مساء ؟
- ج . مع الصبح .
- س . المكان بالضبط اين ؟
- ج . فى المرسى فى سرت .
- س . بعيد المرسى عن الاسلاك الشائكة او قريب ؟
- ج . لا . . قريب بكل ارقى من هنا وخش مع السقالة واركب ، ما هو كرابير مسلم وكرابير رومى يقولك ارمى البركان فيسع بالله .
- س . ما هو البركان ؟
- ج . جردك . ارمى جردك ترمى جردك ويفتشوك ؟
- حتى قب السورية يفتشوه قرص الطاقية «قبة غطاء الرأس» يفتشوه ما هو ويقولك هيا

بره ، كان انت دايرلك ربي السترة ومحسوب شي ربي معدبك ما يقولش جردك تخليكه ولا تعرفه طبس على جردك تأخذه ما يقولكش ابرايه لكن من اللط الى صاير ، انفجعت العرب من العصا حالة العدو لان مناش ايقولك بره مع الشارع هكي ما تعرفش العنبر الى بتخش فيه تمشي اوقات لغم العنبر وترجع لهما والعصا فيك من الصيبتين صبية هادي تضرب وهادي تضرب لا تعرف على راسك لاعلى بطنك وين تحيك لا تعرف سمعت النسكى يقعد المصارين يدرجنن يقعد يتكركب في الكياس واحد من عيلتنا احنا ما شديته كان مع كراعه لقيته ملوح ومشيت انكر لين خششته للعنبر .

س . من هو ؟

ج . علي بن ابراهيم .

س . العنبر في السفينة ؟

ج . العنبر في البابور ، البابور مش فيه اعنابر خيرك مش رايم .

س . سفينة كبيرة ؟

ج . كبيرة ياسر .

س . قداش نفر الى ركبتهم ؟

ج . ايج قداش تعدهم .

س . من معك من ترهونة ؟

ج . ترهونة كان عيلتنا الى نعرفهم هديم الباقي .

س . من هم الى تعرفهم ؟

ج . ترهونة ، علي بن ابراهيم بالحاج عبد الصمد ، وعلى بن علي بن محمد والفيتوري بن محمد بن عون ، ومصباح بن محمد من الحمدات المقرض - وسعيد الزيتوني بن محمد ومن الآخر .

س . انت الآخر ؟

ج . انا الآخر .

س . الثلاثة ما يحصلوش براندة في البابور والبابور يغردوا فيه ثلاثة ايام ، ثلاثة ايام ما فيش واحد اكل شيء والالقي كيف ينام ولا كيف ينهض والله ما يظل يشبش علينا العنبر من فوق من النفس ، كان زي الضباب من الحر ، وضربه ضربة وين يرقدوا شوره الكبار فيه منقب زي فم الماخن من فوق يحلوه يقولوا علينا هذاك الطوبو ماء هكي ، يصير العياط يسكروه ويهربوا .

س . امنين هديم ؟

ج . من النصارى .

س . الى يضربوا فيكم بالسكى والعصى ؟

ج . هذا كله طليان .

س . فيهم حبش ؟

ج . لا حبش في البابور مهناش البابور ما فيش حبش .

- س . ياسى الحاج اذن ارتفاع سقف العنابر منخفض ؟
- ج . العنبر كيف زى المربعة .
- س . البابور الى رفعكم من سرت كم فيه سرير ؟
- ج . والله السرير «نهاية الوجه الثانى اللفة (488) بداية الوجه الثانى من الشريط الثانى .
- ج . السرير قتللك والله البراندة فيها ثلاثة واربعة امقنبجين راقد على استاك قعدنا فيها ثلث ايام .
- س . ثلاثة ايام بدون اكل ولا شرب ؟
- ج . «بداية المعانة داخل السفينة» .
- ج . الثلاثة ايام هذيم حتى الى عنده ما ياكلش حتى الى يجيبوله حاجة ما ياكلهاش وهم ما يعطونا فى شىء .
- س . لماذا ما تكلش ؟
- ج . من الهم والبلاء الى صائبنا الواحد حتى بطنه طبقت ، وتانى بعد رونا جيبان مايجيولنا فى شىء كان الموت .
- س . ما عطوكم شىء فى البابور بكل ؟
- ج . والله انقولك ما عطونا فيه حتى خبزة .
- س . من يريد الصلاة ويريد ان يتوضا ؟
- ج . انت ساعتها ترعى لصلاة وين تصلى والا توضه ، هى توه .
- س . هل توجد دورة مياه ؟
- ج . العنبر هذا ما فيه شىء حتى البقعة الى تقضى الحاجة البشرية ، دايرين برميل فى جانب الدرج كان تريد قضا شىء أمشى له .
- س . قعدت ثلاث ايام فى الطريق البابور يمشى ليل نهار ؟
- ج . لا . لا ، بعد هذا رفعونا لطرابلس .
- س . قول يا حاج قلت بعد القرضابية قلت خمسة ايام قعدتهم فى سرت ، سادس يوم ركبتم انتم ؟
- ج . لا . . اركبنا نهار خامس يوم .
- س . خامس يوم ، الخمسة ايام الى قعدتهم بعد القرضابية ؟
- ج . اى بعد الخبطة هادى .
- س . قداس من يوم المعركة ليوم المشى ؟
- ج . خمسة ايام .
- س . الناس الموق كثيرين فى البابور قبل الوصول ؟
- ج . نعم .
- س . الناس الى معكم فى البابور فيهم حالات وفاة كثيرة ؟
- ج . ما نعلمش بيهم حتى الى يموت والله ما ندرى عليه .

- س . ماذا يعملوا بالموتى ؟
- شن الى يموت ما ندرى عليه كيف يديرو له . نرى فى الحجاج هوينه يرموا فى البحر ، وهذول الى يموت فى البابور يقولك ها هو مات ولا تشبحه .
- س . لعلك شفت حالة ؟
- ج . انت تمشى ولا تحى وين تتحرك من مطرحك كأنك مليح تصل للعتبة الى فيها البرميل لقضى الحاجة البشرية .
- س . وكان هذا يضربوك ضرب ؟
- ج . لا فيهم الطيب حتى النصرارى . حتى منين اتيسرنا فيهم اولاد البيوت وفيهم الى كى شوره ميتله حد والا كذا ، فيه توا حتى غادى فى ايطاليا فيه الى يحى فى العتبة بره ، مثلاً فى الفم البرانى ورديان هوينه يشد فى الفم لقضى الحاجة البشرية ، تهدرز على واحد بره وفيه الى يظل يدور مع هن قبول الفم فى الفم هكى يظل يدور بين هذا ويلقاك ترعى هكذاى يخشلك يظل يعفج (يضرب بشدة) يقولك ياكافى (الكلب) ليش ترعى ليش محسوب ياكلب ليش ترعى .
- «المرحلة من سرت الى طرابلس»
- س . الرحلة من طرابلس ، من سرت لطرابلس كم يوم ؟
- ج . والله ما نقدر انقولك عليها قداش ، احنا توه بعد طرابلس قعدنا (35) يوم فى طرابلس .
- س . احكى لنا عن المعناة والعذاب الى صار لكم فى الباخرة انت قلت كل يوم يضربوا فينا ؟
- ج . لا . . العذاب هذا غير الايام الاولى قبل ان نركب ونهار الركوب هذا ضرب ما فيش اموانا .
- س . هذا اول يوم ، لكن بعد ركوبكم فى الباخرة وانتم فى العنابر قلت بأن فى العنبر ناس كثيرين ؟ المجروح والمريض والصحيح كلهم مع بعضهم .
- ج . كلهم كدس واحد دحى ، كدس دحى .
- س . هناك المجروح وهناك حتى الميت ؟
- ج . لا الميت ما رينا حد احدنا فى البابور راهو .
- س . العنبر ما هو جوه بارد مظلم ؟
- ج . العنبر كان هو الضىء فتح الرواشن من بره العنبر فيه ارواشن من مشرق هوينه حتى وكان مسكر ديمة ، ديمة زى المغارة والسلام .
- س . ظلام ؟
- ج . لا مش ظلام ياسر لا . . ؟
- س . اتشوفوا فى بعضكم . . ؟
- ج . لا احنا كدس وين تمشى وتحي لمن تمشى وتحي ، معادش تنوض بكل من بتعفس على هذا وعلى هذا وين بتحط كراعتك على بنادم لا تمشى لا تحى والله كان بتقضى حاجة

بشرية كان فيك حاجة ، وانت لا تأكل ولا تشرب امنين بتقضى اذا مشيت هوينه كان مطر حرك فاضى ترجعله وكان ماحازاش واحد آخر ، غير هوينه امنين تخليه انت تنوض من مطر حرك يجيه واحد آخر يقعد فيه يقوله عربك الى بينك وبينهم توه ، زى هالحلقة المباركة الاله لا اطققكم فى وقت احرف يا ولدى ما يخلوهش يقولو له هذا صاحبة يقضى فى حاجة من وين يمشى بعدها .

س . معنى هذا فيه الى واقف ؟

ج . فيه الى امصى قداش امصى بطيح بطيح تبرك على هكى نبرك عليك هكى وتسند واحد على واحد والسلام ايام زقع .

س . قداش استمرت هادى العملية وانتم مكبوسين على بعضكم ؟

ج . هذا ما نقدرش اتقولك نهار ونصف غير من سرت لطرابلس ها تكوين هذا مش امنين رفعونا لاطاليا ، امنين رفعونا لاطاليا الى هذا بابراندته ترقد على طولك اما هذا غير وصلنا لطرابلس .

س . هذا قبل اطرابلس ، من سرت لعند طرابلس ؟

ج . والله ما ندرى عليها المسقاد اسقد لا نصف النهار لاعقاب نهار ، ومن غدويك الضحى نزلنا غادى فى طرابلس .

س . ثلاثة ايام تقريبا ؟

ج . لا .. فمثل بنفصل اليوم من الصبح من غدويكة فى طرابلس .

س . اثناء الرحلة قلت ان الطليان باتوا ويطلقوا فى الماء الفائرة ؟

ج . هذا فى البابور .

س . هذا وانتم فى الطريق لطرابلس ؟

ج . لا .. والبابور مرسى على سرت ، ما هوفيه فم من فوق فيه ماء فائر يقولوا هذاك الطوبو عليك هكذا ويهربوا ، يعيطوا المحابيس يهربوا ويمشوا ولكن بعد اسقد لا داروا ماء حامى لا شىء .

س . معاد جاءكم حد ؟

ج . لا جاءنا لا كلمنا حد الى الحبس فى طرابلس ...

«وصول الاسرى الى ميناء طرابلس»

س . وصلتم لطرابلس كيف صار فى طرابلس ؟

ج . طرابلس قعدنا فى الحبس .

س . كيف تمت عملية النزول ؟

ج . نزلونا فى الفلاتك .

س . قداش .. عشرة ، عشرة ، خمسة ، خمسة ؟



ج . في طرابلس المتبوت امتاع الهم ما يريح قعدنا خمسة وثلاثون يوما (35) في طرابلس في البرط وبعدها وبعدها ركبونا لايطاليا .

س . نزلتم من الباخرة الى ميناء في فلاتك صغار وضعوكم في الميناء كم ترفع نفر الفلوكة ؟

ج . والله الفلوكة ما تقدر انقلولك ، هوينه عاد نزلونا في البرط .

س . شن خيام ؟

ج . لا . لا بنى عنابر .

س . فيهم اسره شن فيهم على شكل حبس ؟

ج . لا . لا فيه اسرير لا شيء على استاك ولكن فيه افريشات .

س . كيف المعاملة ؟

ج . شن المعاملة يجيولنا خبزة وشربة محسوب في الوجبة عشاك وغداك ياجيبيولك معه ويجيبيولك معه ارويسات (بصل) والا بطاطة اديمة يامكرونة ، والا رز هكى يديروا يوم بيوم ، وكان بتكلها في هاذيك الساعة وكان بتترك منها لليل اترك ، لكن عاد هوينه الناس نزلت غادي ، في ايطاليا وشيء ؟

س . احكى على طرابلس قبل ؟

ج . هذا من طرابلس .

س . وياتوا اليكم بأكل في صحنون .

ج . لا وين اصوبينة امتاعات الطباطم هوينه مثقبينهم من هنا ومن هنا وادرين لمن تل يجيبيوا الطنجرة يحطوها في الفم غادي ويقولك هيا دور عليها باش تأخذ شربة ، فيه من نصارى يقولك باهى تسقد خوذ وروح وفيه من نصارى لا ما هو واحد يفرغ لواحد حطهن غادي وخش بالله يحطوهم غادي في الفم الى عنده اسطيل يحطه الى عنده اسطيل يحطه وبعد يرفعوا طنجرتهم الى هذا امر اسطيل امتاعه ، الى هذا ايجيب اسطيله ، لين تمن ايام طرابلس .

س . مازال ما تمنش خلينا في طرابلس ، لما حطوكم في العنابر ما جوكمش طليان لجنة هكى تفرز في الناس من الصحيح من المريض من المجروح ؟

ج . ما هو كل مره امنين امروحين مش امنين ماشيين .

س . لا في طرابلس ؟

ج . في (35) يوما هذين خشوا علينا .

س . ماذا يقولولكم ماذا يطلبو منكم ؟

ج . يخشوا علينا يعنى مريض صحيح ولا شيء يداووك ولا حاجة ، وكان فيك جرح يداووه ما هو .

س . المريض والمكسور الم يطلبوا منه ان يذهب او يتركوه يروح ؟

ج . اى يروح ، وين تروح لمن تروح ، هم يزيدوا ويكروا ولا يروحوا .

س . عطوكم الباس ؟

ج . لا . . لا الى عنده هرتيشه قعد لبسها ، اللبس هذا ما عطوناش اللبس الا في غادى في بلادهم هم في اوستيكا .

س . هذا بعدين ؟ في طرابلس ؟ 35 يوم المعاناة كيف ؟

ج . لا هذين غيروين الشيرة دارت اشوية وين جوا بيركبونا فيه الى حتى السورية ما عنداش راحت في البابور ، امنين جوا بيرفعوا لايطاليا الى عنده ، ما عنداش سورية ولا حاجة جابوله سورية ، والى راسه عريان جابوله معركة وفيه الى كاسيه ربى قعد بجرده بسوريته ما طق فيه شيء .

س . عطوكم ماء وصابون ؟

ج . الماء موجود في العنابر في البابور شيشيات .

س . هل فكرت في الهرب والا غيرك ؟

ج . هنا اللدون في طرابلس ابوه ياودى .

س . ما فيش كيف ؟

ج . كيف امشي امصبي صندليل (عسكري) في الفم زى هالفم ، شاد السنكى ديمة .

س . صار عليكم حرس ليل نهار ؟

ج . اى والله ليل نهار ، اما حياة فرج المرغنى ما هو في عينوه تاجر ماشي هنا في ترهونة .

س . من اين فرج المرغنى ؟

ج . من مراغنة ، يذير الطيب وين يخش لنا غادى يقول ياسنيور انا مش معاهم تاجر ماشي مع المحلة تاجر يقولوله ما فيش تاجر عربى ، عربى ، طرابلس طرابلس ، هوينه عاد .

س . معنى هذا المجاهد والتاجر اى حاجة لا بد يمشي ؟

ج . هو ماضبطاش لكن قاله مافيش ولا تاجر ولا غيره سواء . سواء .

س . هل زادوا عليكم ناس ثانية عندما كنتم في طرابلس من غير الى جاؤا من سرت ؟

ج . ايه هدوكم لحقوهمنا تلحيق في ايطاليا ، لحقونا مرتين غادى .

س . هنا في طرابلس مازدوكش مجموعة ثانية ؟

ج . لاما جابولنا حد .

س . سعدون السويحلى حتى هو أسر معكم ؟

ج . عييت ياودى مقعمر آنا وياه والله كان زى انا وياكم توه ، لان غادى في ايطاليا

ماريناش في الحرب الا دون .

س . في الباخرة ماريتاش معك ؟

ج . لاماريناهش اما ريته غادى .

س . في ايطاليا ؟

ج . اى في ايطاليا يابس مسكين لحم ماعدناش عظم على جلد .

س . احكيلنا كيف اركبتم من طرابلس الى عند ايطاليا ؟

- ج . ركبونا اركب ، اركب ، اركب لين تم الحبس .  
 س . لما اركبتم ياعمى الحاج هل سجلت اسماءكم ؟  
 ج . امال كيف .  
 س . هادى داروها فى سرت ؟  
 ج . لافى سرت والله مانقدر نقول لك فى سرت ياودى ماظنش .  
 س . عندما جيتم من سرت لطرابلس الناس من اى القبائل كلهم ؟  
 ج . العرب اللى حصلوه من سرت رفعوه جميع لكن بعدها هوينه وين جاءوا فى طرابلس .  
 س . فيه من جماعة ورفلة وترهونة ومصرانة ؟  
 ج . من كل مطراح .  
 س . عندما كنتم فى العنابر هل تعارفتم من اى القبائل ؟  
 ج . كان تعرف اللى تعرف الترهوني ولا الزليطنى كان تعرفه غادى ، وكان ماتعرفاش وين تعرفه .  
 س . ماهى احكايتكم لبعضكم ؟  
 ج . شن انقولوا ياولدى ماعدنا مانقولوا .  
 س . الحبس قفل منفوق والطلبيان فوق وانتم مع بعضكم شن حكايتكم ؟  
 ج . والله لاحكاية ولا بلاء علينا الى هذا فى بلاء وخلاص فى الباخرة .  
 س . باهى هذا فى الباخرة لكن (35) يوما الى فى طرابلس انتم مرتاحين شوى تحكوش على المعركة على كذا ، وهل تعرفتم على بعضكم ؟  
 ج . تعرف شنى انت الى تعرفه هنا وانت قبل تمشى تعرفه غادى ، واللى ماتعرفاش زى تو .  
 س . تعرفت عليه ؟  
 ج . وين تندرى عليه لا امين انت ولا امين هذا الى عنده مرقد بارك فيه وخلاص .  
 س . قداش عددكم فى العنبر متع طرابلس ؟  
 ج . والله مانقدرش نقول لك قداش الدار فيها هومش وحده .  
 س . لا الدار الوحدة اللى فيها انت ؟  
 ج . والله مانقدرنقولك بنكذب عليك ..  
 س . تقدير ؟  
 ج . مانقدرش انقولك .  
 س . دار كبيرة هى ؟  
 ج . اى امال شنوا مش مكديسين ترقد على طولك محصل مرقدك ، مش كبير ياسر معادش انجيب منهم ضويه من الكبر والصغر لان الوقت بعيد .  
 س . قداش دار ؟  
 ج . عاد ندرى عليهم انت هنا فى المطرح هذا واحد آخر فى الدار هاذيك .

- س . وين في طرابلس هذا الحبس ، في الميناء نفسه ؟  
 ج . في الميناء على الموجه .  
 س . هل خرجتم خارج الديار اثناء (35) يوما تلك ؟  
 ج . والله كان لقضا الحاجة البشرية او تشرب في اللائدة ماندرى الشيشمة بره .  
 س . هل اتاكم واحد من العرب المتسميين في ذلك الوقت ؟  
 ج . لا والله مانقدر نقولك مارينا حد نقول هذا فلان .  
 س . من المطينين من الناس المسؤولين ؟  
 ج . لا في لول مايخلوش من يمشى له .  
 س . في طرابلس ؟  
 ج . وفي التالى وين بيبدلونا وشيء .  
 س . في طرابلس ؟  
 ج . ياودى ماجانا حد .  
 س . الجو شن كان شتاء صيف ؟  
 ج . والله نجيبك منه ضويه توه ، توه ، لاصيف يمكن صيف نو حمو .  
 س . قلت ركبونا وسجلوا في اسمانا ؟  
 ج . هذا نهار بيركبونا من طرابلس .  
 س . تعرفش اى يوم أحد اثنين ؟ وانتم في الحبس هل احد يصلى ؟  
 ج . لاكان بتصلى من قاعدك ، وغادى حتى هو ماقدعك حد .  
 س . نحكيك في طرابلس غير ايطاليا ؟  
 ج . في طرابلس توضحاً في بيت الراحة وصلّى في منامك وين بتصلى عاد .  
 س . معكم امشاخ اواناس متعلمين ؟  
 ج . المشاخ اظن ماطلقوا حد قد من استلم دقره . وماشى شيخ من هنا هذا ماروحش . هدمم الى ريناهم هذول غير ترهونة ، الى قلتك (11) .

### « اجراءات بداية الركوب للمنا في الايطالية »

- هديم . هديم فلان ، فلان من ترهونة هديم الى قتلوه .  
 س . قلت اركبنا في الباخرة من طرابلس الى ايطاليا ؟  
 ج . البابور واقف في الصقاله هنا ماهو والبابور هنا والعسكر امتاع الريش من هنا حتى في البحر ، حتى في السماح امنين اظهرنا هكى شادين عليك حتى في البحر من هنا ومن هنا في الفلاتك باسلاحهم .  
 س . اثناء الركوب هل سجلت اسماءكم ؟  
 ج . امنين ظاهرين من الحبس تحي في العتبة ويكتبوك .  
 س . الكاتب ايطاليا او عربى ؟

- ج . فلان بن فلان والكاتب مانقدرش انقولك يمكن طلياني شن عربي ، عربي من يكتبك .
- س . اهنك ترجمان ؟
- ج . لا . لا عرب فيه الى يعرف بالطلياني وتاني الطلياني لاش يجيولك الكتابة يسجلوك شن اسمك .
- س . باي لغة يقوها لك بالطلياني او بالعربي ؟
- ج . احداك من العرب يقوله قول الى يعرف بالطلياني شن اسمك .
- س . فيه مترجم ؟
- ج . قوله شن اسمك يقول فلان . فلان بن زى توه فلان بن فلان ، جدك فلان .
- س . هل يسأل عن اسم الام ؟
- ج . لا امه ، لا مانظنش .
- س . العمر هل يقولك قداش عمرك ؟
- ج . حتى العمر يكتبو فيه .
- س . المحلة او القبيلة ؟
- ج . لا . لا فلان وبس .
- س . هذا عندما تكن ذاهب الى البابور ؟
- ج . في العتبة قبل لاتظهر .
- س . كل واحد يمر يطلب اسمه ؟
- ج . هذا الى ناتق منك هكي ومنك هكي بوليس الوردبان حتى وين تجي طالع الوردبان في ركنك بيندقة بسنكته يقولك شن اسمك تقوله فلان ، فلان بن فلان بن فلان بن فلان يكتبك وتخش طول .
- س . هل ايقولك اويسالك بانك كنت مجاهد ماهي وظيفتك فلان ، تاجر ؟
- ج . لا . لا لايقولك فلاح لاتاجر ؟
- س . ياسي الحاج هناك بعض الناس لاتدلي باسماءهم الصحيحة فهل هذا صحيح ؟
- ج . والله في البابور حتى هو يكتب فيها ومانقدر نقولك شن يقول .
- س . انت عندما سالوك قلت اسمك صحيح ؟
- ج . قتلهم فلان بن فلان .
- س . هل تعرف واحد من جماعتكم لم يقل اسمه الصحيح ؟
- ج . ياودي مانقدرش انقولك .
- س . فيه الى خايف ؟
- ج . في اي وقت تم الركوب ؟ من طرابلس ؟
- ج . والله مع الضحي وسط النهار والله مانقدرش نقول لك الشمس قاعدة فوق .
- س . في اي المكان وضعوكم عنابر والا اي شيء ؟
- ج . في البابور امال عاد فاش عنابر اكبار .

- س . انتم كلکم اصحاب وعددکم کبیر ؟
- ج . واللہ شن بنقول لك ماخذ ریتہ متغلب انا .
- س . الطابور الی ماشی للعنابر وراك ماتشوفش فیہم ؟
- ج . عرب یاسر یاولدی مانقدرش نقول لك عدد یاسر شوی .
- س . قداش قعدت اثناء فترة الركوب ؟
- ج . واللہ شن نقولك من الضحی لعقاب النهار .
- س . العصر بعد اشوی ؟
- ج . واللہ عاد تو شن بنقلوك ساعتها یاخوان غیر یقولوا الی ماراش الهم لین اضایق ، غیر یفسر فی الی يموت كلامه .
- احنا ساعتها واللہ قریب اندهیت شیرتنا حتی علی اللیل والنهار .
- س . لماذا قریب اندهیت شیرتك ؟
- ج . من الغشاش من الهم امال امنین اتكلم هکی یکفخوك ادير هکی والا هکی یکفخوك شن الطرب الی انت بتمشی به هو مابعد حتی قعدين نذكروا حتی الوقت .
- س . انتم متی بدیتم فی الركوب یا حاج ؟
- ج . من الصبح .
- س . بعد شروق الشمس ؟
- ج . الضحی والشمس فوق ، هوینه الی رایحة سوریتہ ومزقه ومعنداش جابوله سوریه والی راسه عریان جابوله معیرقة وتفتوت علیہم فی العتبة هوینه یکتبوك فلان بن فلان حتی جدك ما یطاردوش راهو ، شی بینا ماندرؤا علیہ رجل شورہ فی البحر فی اللیل حتی الضی قتلوه من البأبور . راجل یاغطاس ویجونا یقولونا معادش اتکلموا معادش تدؤوا معادش تدرؤوا ، خائفین حتی الضی طفیء ، لا بد فیہ رجل ، عدو ، شورها خائفین تشده یاترکیا یاغطاس لا بد ایجوك یقولوك توه حتی الدوه معادش تدؤوا حتی الدریز معادش تدرؤوا معادش تحرکوا بكل حتی الی عقاب اللیل قریب لین ضوء الضی وبعد هذا وصلنا .
- س . کم بقیتم فی البحر ؟
- ج . معادش نضبطهم لانهارین لا لیلة ونهار ؟
- س . قداش لیلة ممکن تعرفها باللیالی ؟
- ج . یاودی یاسنی الشیخ توه بنقول لك نعرفهم باللیالی اللیلین لیلین ، لیلة نتکلموا فیها ولیلة لا اوطنونا غادی الضحی ، مندره راس ، هنا فی هروس هاجبال هذین مانهناک رساین فی البلاد الی یقولها اوستیکا هادی راسین بس راس من هنا ورأس من هنا ورأس من هنا ثلاثة اووطنونا من هذاک السد حال اعدیک اللہ لاتجیبه لمؤمن ملال الارض ( حرار شدیدة ) مقابل الشمس وحاجز الرأس وهم فی حاشیة الماء ملال الی مقننج هکی ولا حاجة یظل یریش بایدیہ علی کرعیه الی عنده جرید ولا

حاجة يتقى بيه وفيه الى قليل الى عنده لاجرد ولا كبوس .

س . وفيه الى حفيان ؟

ج . ايه فيه حتى الى حفيان ، حفيان وين الشلاكة حصلتها مازال انت شاب حتى في الشلاكة هادى قعدت في المقتلة من النهار لول قعد في سرت هادى من النهار لول .

س . كيف نزلوكم بالضبط ؟

ج . هوينه نزلونا في الفلوكة من البابور غادى البابور ماعنداش قابية يظهر للواحد نزلونا في الفلوكة قعمز ، قعمز من اللبط هذا .

س . الطليان ياسرين ؟

ج . هل يقولوا في حاجة ؟

ج . لايقول مايقولوا في شيء ، الضرب حق فيه الى راكب على حيط والا حاجة يحدفك بحاجة .

س . بماذا يحدفك ؟

ج . عصا والا رشاده والا الى عنده ، يحدفك والباقي مايكلم فيك حد لوطه مايكلمك حد بوليس معك . بوليسييه يجروا مع الشارع الى حد الشارع من هنا والى حد الشارع من هنا خائفين من العصا مايبوش الضرب الحكومة ، والذرب يقولك احنا توه زى احنا ساعتها امنين يشدوا في الطليان مش يقول لك هذاك كافر وهذا كذا ، وبعدها الى تمشي انت واياه ترينه وتبى رفقته ماتجيش قدامه والا وراه حاديه محادة بركنك ماهو بيدبوا زوز او اربعة ولك مده بتمشي لمطرح كل حبس عنده نمرة قداس يرفع مش على ماولة بتمشي للحبس طول بنمره كل حبس باكتابه ، كذا ، نفر بنمره الى ياتحاديه ياولدى حاديه في ركنك باش تمشي انت واياه والا تقعد انت واياه ، انت تبى بن عمك وحاديت واحد آخر وراك انت تسمى في العدة الثانية وهوميشى في العدة الاولى بعدها .

س . انت جماعتك الستة الى من اولاد يوسف جاءوا معك في نفس الواحد ( العنبر ) ؟

ج . احنا الستة جميع هنا .

س . وغادى قعدت جميع ؟

ج . غادى لا في لول افترقنا ، افترقنا اجى اربعين يوما او فوق (40) يوما .

نهاية الوجه الاول من الشريط الثانى

اللغة - 492 -

محمود يوسف (اللويسى)

## بداية الوجه الثانى :

س . كيف قلت يا حاج ، انتم مجموعة وحدة كنتم لما انزلتم غادى ؟  
ج . ساعتها عددونا بالعداد ، باش قلتلك انا الى تبيه كون حاديه بكتفك باش تمشى  
انت واياه ، اما انت تجى وراى من هنا انا نجى فى العدة هادى فى عقابها وانت بعد  
العداد تجى فى العدة الاولى اما خوك والا حبيبك الى بتلايمه هذا تكون الكتف  
بالكتف ديمة ياتمشى انت وياه هكى يافى التالى يافى لول .  
س . كيف افترقت انت وجماعتك اولاد يوسف ؟ انت وين جئت وهم وين جوا .  
ج . انا وعلى الاطرش والله ماجينا الى فى راس القلوعة فى الراس من فوق بكل والباقي  
تفرقوا الفيتورى وعلى بن ابراهيم .

س . الفيتورى من ؟  
ج . الفيتورى بن محمد والباقي حتى هم تفرقوا حتى على اثنين والا ثلاثة وبعدها ايجى  
شهر ونصف بدلونا اللبس جابولنا كبايط ورفعونا للبحر كان عندك اهديرشات  
اغسلهن واللبس الكبايط وملايسك هناك فاكون كبير زى نصف المربعة هادى ،  
لوحهم فيه وفوق بيخروهم ويغسلوهم فيه الى قعد عشرة ايام معادش حصل  
اعقاب جرده والا سوريته لين تمشى تفتش ، هم يغسلوهم ويخروهم ويلوحهن فى  
هذا الجنان وبعد ثالث يوم او رابع يوم يجوك يقوللك بره جيب هراييدك اما تجيب  
هربوده مش ليك ويحى واحد يعرفها دبر راسك كيف ايصيرلك راهوا رقتك  
والخيط .

س . يا حاج لما نزلتم غادى هل سجلوكم مرة ثانية ؟  
ج . فى النزول لا ، لا سجلونا من هنا ونزلنا غادى التسجيل هذا وين نخش الحبس  
نخش الحبس ياخذوا اسمك وياخذوا رقمك ماهو امنين ننزلوا فى البحر لا لا . . . .  
س . كل واحد عاطينه رقم ؟  
ج . رقم غير رقم الحبس قداش يرفع .  
س . قداش رقمك انت ؟  
ج . والله ماندرى عليه .

س . عندما نادوا عليكم هل نادوا عليكم برقم ؟  
ج . لا ، باسم ، وشنوا كان نهار بيركبونا بيروحوا بينا جاى .  
س . هل تذكر على كم حبس قسمتم ؟ اى الاحباس الى غادى قداش واحد ؟  
س . عاد حبس ما تقدرش تقولك الى هذا فى حبس ماندرى عليه قداش حبس .  
س . هل بعدين عن بعضكم والا قراب ؟  
ج . بيه نو قننلت انا والله اس اعلى نقول احنا اعلى من خشم معروف ( جبل فى  
تره ) استاع الحميدات هذا فى احداثت راسه من فوق احتزت فيه انا .



- س . قداش فيه واحد الى انحزت فيه انت ؟  
 ج . فيه اجى اربعين والا مرده ،  
 س . ماهو عملكم داخل الحبس ؟  
 ج . شىء . شىء .  
 س . الاكل ماهو ؟  
 ج . شنوزى مانقول لك يوم مكرونة شربه محسوب ويوم رز ويوم فى مثل يدوروا فيها تدوير فالثلاثة هذين .  
 س . لا يوجد عمل عدا النوم ؟  
 ج . شن عندنا مانديروا الا عندنا جهد احنا .  
 س . ماقتم بعمل داخل السجن ؟ او هل طلب منكم الطليان عمل تقومون به ؟  
 ج . احنا الطليان عندنا عمل مازال الواحد يخدم وين الخدمة تقدرها ، بطلت مت .  
 س . عندما وزعتم عندما نزلتم فى جزيرة اوستيكا قلت قسمنا على الحباس ؟  
 ج . حتى الى . نهار روحنا جاي .  
 س . خلينا غادى فى الحبس لما قسمتم اين وضعت فى اى منطقة ؟  
 ج . هذه كلها الاسرى فى الجزيرة الى يقولها اوستيكا كلها فيها لامش منها هكى لاهكى حتى عرب بنغازى .  
 س . صار من بنغازى فيه مجموعة ؟  
 ج . اى ماهو نهار جنزور هوينه صار حرب قوية وغادى حرب قوية يسروا منهم حتى غادى لموهم كل الاسرى فى الجزيرة هادى .  
 س . قداش عددكم الى فى الحبس الى فيه انت ؟  
 ج . والله مانقدر نعدهم توه نقدر نقول لك (40) او (30) او (50) مانقدرش انعدهم .  
 س . كيف كانت المعاملة داخل الحبس ؟  
 ج . مافيش عمل العمل يجيبولك غذاك والى هو الفريدة والسطيل هذا هوينه تأكلهم وترقد على حالك وين بتمشى والا تجى والا تشاوخ فمن تشاوخ لمن تمشى ، شىء لاتمشى ولا تجى باب عليك مردود حديد وخلاص .  
 س . هل وضعت ناس فى احباس انفرادية ( زنزانه ) ؟  
 ج . هذا فى طرابلس هذا منين جينا بروحوا بيبدلونا .  
 س . باهى بعدين ؟ هناك ؟  
 ج . هناك منين جينا بروحوا قالو لنا غدوة بعد غدوة بتروحوا راكم .  
 س . نحن قعد فى معاملة الطليان لكم ؟ انتم تصلوا وتصيما ؟  
 ج . لانصيموا ، لان باش قبل الى يموت مايدىرو لاش كفن غادى تمسمر عليه صندوق ويقولك اردمه ، ولهذا فيه وحدين يقولو لهم عائلة الصغير ، مصراة قالوا احنا لا بد الى يموت نعمل له كذا وكذا .

س . ماذا يقصدوا ؟

ج . كفن محسوب ونصلى عليه ونردمه ونغسلوه ونكفونه ونردموه تقدرنا بديروا الكفن باهى ما هذا عطونا كيف نخابروا يدرولنا الكتان من غادى للميت باش نكفونه فيه بداوا يظهرنا فى الكفن الى يموت يكفونه ويصلوا عليه العيلة الى تمشى معه ويردموه ويروحوا الصندوق لابد منه حتى بالكفن ديمة فى الصندوق .

س . وين يدفونه ؟

ج . غادى فى البلاد هاذى .

س . كم واحد توفى وصليت عليه ؟

ج . والله ماتقدروهم ياسى الشيخ توه بنكذب عليك .

س . لا كثيرين قلة كل يوم يموت واحد فى الاسبوع ، يموت واحد ؟

ج . الموت ديمة ديمة بعد اسبوع ديمة فيه موت ديمة فيه كذا هوينه واحد غادى او واحد

غادى هوينه يقولوا فلان مات فلان مات الحيس الفلانى مات فيه افلان مات كذا

الجبانة اكبر من اش لكن الجبانة فيسع داروا عليها سور ماخلوهاش مفتوحة .

س . لماذا ؟

ج . داروا عليه سور .

س . جبانة كبيرة ؟

ج . جبانة وينها بكثرة شوره من وخم البحر مش فى وسط البحر شوره الوخم ياسر موت

ياسر .

س . من المرض ؟

ج . مرض . . عاد يقتلوا فينا بنكذب عليه حتى الطليان مانكذبش ، الكذب هذا حتى

رى بحسبك كذاب لاتزويد على رومى لايهودى لامسلم الى هو قوله هكى الى هو

هو .

س . انت تقول من البحر ومن الجو تغير عليكم ؟

ج . نقولوا هكذا .

س . طقس الوقت كيف برد ، حركيف ؟

ج . ماهو احنا شتينا غادى حتى الشتاء وبعثالى هم ديمة شتاء حتى ايام الصيف شتاء ،

والله حتى فى ايام الصيف الظل المطر رابطة والشعاب تهذل من كل صبية

ومايشربوش كان من السماء ماء ( عذب ) مافيهاش بكل . كان نرحن صفاحى

الراس هذين من هنا ومن هنا دايرين فيهم الماجن فى حاشية وين يقصر الراس كان

المطر ظننت اشوى وكذا يجبلهم البابور يفرغ فيهم .

س . هذا شاهدته بنفسك ؟

ج . بعيونى . عاد هذا حداى . .

س . تنزل انت من الحبس وتشوف هذا ؟

ج . هذين لا بعد ندهور حتى ندهوروا لين نعيوا .

- س . كيف تدهورا احكييلنا كيف ؟
- ج . نمشوا على كيفنا الى الليل .
- س . اين تنفسحوا هل هي مدينة ؟
- ج . تمشى مع الشارع تمشى مع الشط تمشى نخش البحر امنين يجمعوا الحوت حتى هو .
- س . اذن خدمتم ؟
- ج . تخدم كان بتمشى كان مش ماشى وهم بالسيف مايقولولك يقول لك بنملوا الحوت بتمشوا معنا لشبكة باش تحصل الحوت لان توه غادى هم البحر عندك فيه الى هذا بترابه زى ترابك انت هنا زى سانيتك السانية هادى ليك وهادى لهذا وهادى لهذا حتى البحر مقسم والى هذا عنده جلوه داير شبكة ، امتاعت تل امتاعت خفاف محسوب مقط ودابير لها قزدير امنوطه توه تمشى ابعد من الطريق الشبكة « تبعدا الطريق عن مكان الحديث، حوالى [50] متر » ويمشى ينبتها من غادى داير لها اشارة باش يربطها ومن غادى داير لها اشارة باش يربطها والوسط يدبرله اشارة حتى هو والطرف حتى هو وكل تركينة فيها اشارة يمشى مع عند الليل ايبتها فى البحر والصبح يجيبها افلائك ويحى الى ماعنداش عرب ياسره وكذا يعاونوا معه يقول بالك فيكم من صحيح يقدر يعاونوا ويأخذ الحوت .
- س . من يقول فيها الطليان ، ماهى صيفته ضابط ؟
- ج . لا ، لا عرب الفلائك عرب اشباك هنا .
- س . عسكرية هم ؟
- ج . لا مش عسكر هذيمه سكان السكان فيها سكان .
- س . انتم مع الايطاليين ؟
- ج . اى الحبس فى وسط الاهالى .
- س . الاهالى ماعادش ضربوكم معاش عذبوكم ؟
- ج . لا ياودى الطليان انا عندى خير من الانجليز ، باش خير من الانجليز توه الانجليز هنا الغارف الى يلوحه يشركه ( ينقبه ) ويردمه والطليان امنين هنا حتى بعد حاربناه وبعد كذا كان عنده حاجة زايدة يقول لك خوذوها والى جيغان مسكين اعرابى جيغان .
- س . كيف يتم التفاهم معهم ؟
- ج . ياسر تعرف اكلامهم .
- س . انت تعرفش لغتهم ؟
- ج . لا - لا والله كان ربى لهنى للصواب فيه واحد فرجاني من فرجان النواورة من الداوون جاى وانشاء الله مسكين اجره لله يقول ندبر عليكم اخطوكم من لعب الكارطة ( لعب الورق ) واخطوكم من الخريقة اما بنقريكم لوجه الله تعالى ، ديمة الى يحصل حتى باش يصلي يربحها خيرله لا لعبت الكارطة ، قعدت نقرا انا او وحدين معى يحى (15 - 20) يقرى فينا .

- س . تعرفش منهم حد الان الاسماء ؟
- ج . والله ماتقدر اتقول لكم وهو يقولوله الحاج محمد النوارى الى يقرى فينا .
- س . اين يقرى فيكم ؟
- ج . فى الحبس والا فى فمه البره .
- س . كيف يقرى فيكم من كتاب او من راسه ؟
- ج . لا . . من راسه .
- س . وانتم تحفظوا فى روسكم ؟
- ج . نفهموا لا الكتب ياسرات كان بتاخذ تكتب ياسرات .
- س . فيه ناس تكتب معكم ؟
- ج . تاخذهم انت كان عندك باش تشرهم .
- س . الفلوس امنين ؟
- ج . الفلوس فيه الى عنده محصلهم امدايهم فى قبة طاقيته وفيه الى منين يمشى مع الطليان هديم يحصل سبيلية . السبيلية هادى ست بو عشرين وغادى البوعشرين يقضى الحاجة ، اثنين يشدوا فى الحبل من هنا واثنين من هنا واثنين مع الوسط واثنين مع التركيبة هاذيك مع التركيبة هاذيك صبح ويظل ينهضوا وين ترزن تنتل عاد خترش البحر ماتعرف لاكلب بحر لافكرون لاقنفود لا احناش كل نص وين ادير شك يقول لك هات الفلوكة وين يجيبوا الفلوكة يقولها بهذاك العمود هكى الى دايبرينه مع الوسط هذا مادايبرين .
- س . كم المدة الى قضيتها فى التعليم داخل السجن ؟
- ج . والله راح الوقت ، ماندرها عليها لاعام لا اكثر لا دون ، راح الفكر هديكن الايام تنسى كل شىء .
- س . قلت انك تخدم عند الاهالى فى البحر ؟ اين المبيت ؟
- ج . فى الحبس والبحر فى فم الحبس هذا هو .
- س . بالنسبة «لمحمد النوارى» الى يعلم فيكم ، ما هو التعليم .
- ج . قرآن . .
- س . كيف الصلاة والصيام ؟
- ج . قراءة قرآن علم ،
- س . والقراءة على اللوح او تسميع ؟
- ج . اللوح بكثرة امنين تبي دير لوح .
- س . استعمل غادى ؟
- ج . نعم .
- س . شهر رمضان صمتهم هناك او طلب منكم بأن لا تصوموا كيف احكى لنا عليها ؟

ج . في لول جابوا الشربة قلنا لهم احنا ما نكلوش في النهار مسلمين الطرابلسية ماتاكلش في النهار .

س . من اللي قال لكم بأنه رمضان ،

ج . شن بيربح منا رمضان من شهور ،

س . تعدوا في الايام ؟

ج . كيف ما نعرفوش رجب من رمضان من العيد من العاشورة لا توبيعها لاميلاد كيف عاد هوينه جابوا الشربة قلنا لهم احنا في النهار ما ناكلش مشوا لريهم الكبير حاكم البلاد قالوا له العرب ما بتش تأكل بكل جاء هو وعياله ، كيف مورته كلكم تموتوا بالشر قالنا له احنا ديننا هكي وهكى قال توه نمشي نخابر طرابلس كان لقيتكم تكذبوا توه ننزل فيكم ضرب وكان لقيتكم تصيموا يديروا لكم شربة في المغرب خابر قالوا له جماعة الطرابلسية يصيموا عندهم شهر يصيموا عندهم فيه دينهم ما ياكلوش في النهار هوينه عاد بدوا يجيبو لن في صفر من عند المليل الى عند الليل عند الفطر .

س . ماأسم الري هذا ؟

ج . والله ما نقدر نقولك .

س . مسئول على المنطقة والا على السجن ؟

ج . حكومة المنطقة وعلى كل شيء .

س . بالنسبة للاكل هل هناك ؟ اضافة بمناسبة شهر رمضان ؟

ج . لا . لا بس هم يمشوا بالحق امين الزائدة ، لان هو واخذها واحد بركيزي (14) ألف هذيم واخذهم واحد بركيزي والا هو (1400) واخذهم واحد بركيزي في النفقة لكن في يوم من الايام ابصر وين ابيمشي قاله بنمشي غدوه ما نحضرش الغداء وغدوا المحابيس وكذا وبتغيب غدوة فيه بليدة نشبحوا فيها مشرق هكي عالية رأس على كبير بكل نشبحوا فيه قدوا التركيبة هكي قالوا النصاري هاذيك سيراكوزة يقولوها والباقي ماريناش ابلد اخرات غير البليدة هادي روح القى يفرقوا في الخبزة قال رجا ، مشى كسر الفردة الاولى لقاه مغشوشة مشى للاخري قال ماحد يأكل الخبزة الكل يرددها يمشي يرفعها للبحر ويغش العرب في غذاها في عشاءها وكذا وقعد يدور على الاكواش غرمة عاد في هاذيك الوجبة كم ثمنها اتلفها منه الكل ، الى غاش يمشوا ما هو يمشي يعلقوا له خيطين اخرات في رأسه وخيطين من هنا نقولوا رومي كافر شنى .

س . هل دارو لك وجبة في السحور اثناء رمضان ؟

ج . احنا اندوروا في سحور هوينه الخبزة الى يعطوا لنا فيها نلتما في مثال خمسة اربعة ستة ناكلوا جميع مش الى هذا يأكل في قاويطته الى قريب لك هوينه تعرفه ويعرفك ناكلوا جميع في الوجبة ، حتى لين احنا في رمضان وبعدها يرموا المأكلة زى قبل لكن الحمدلله ما يدوم حال .

س . فيه ناس خدّموهم في المصانع والمزارع ؟

ج . لا ما عندهم مزارع ، هو توه الصبح نجى يتقونا مع الفم واحد بس من مقبل

ويدوروا عليها تدوير ننتقوا من هنا واندوروا عليها هكى ونرجع للفم هذا من الصبح  
لوقوت الزوال هذا وسعها بس هادى البلاد .

س . كل يوم ادوروا عليها ؟

ج . لا بعد ايام حال التدهوير يبو العرب تطلق رجليها .

س . هل هناك حد حاول الهروب ؟

ج . وين يهرب غادى .

س . وهل غرق حد فى البحر ؟

ج . فيه الى غرق لان باش يغرق بمشى يلقط فى حاجة بيلقة حاجة على حاشية الماء  
يغرق لا هو واحد لا اثنين غرق لكن الى يغرق ما يظل الا ركبته فى جبهته هنا يظهر  
مكتف يلعب على الماء لكن هم لما يدهوروا فينا ويرفعوا فينا للبحر ايدروا فلاتك قدأما  
هكى هذا البحر من هنا وهادى الفلايك شىء يربط هكى وشىء يربط هكى ، كان  
غرق حد بيجه محسوب والعواويل اظرفين بكل صغار يديروا فى الخفاف من هنا  
وخفاف من هنا وخفاف من هنا ويرفعه بوه والا خوه معه العاتق هذا يغطسه معه ويظل  
يمشى هو واياه فى البحر هذاك هوينه عاتق وهذا رفعاته وشاد ايده ويدهورو ابيه ليس  
يتعب ويروح .

س . منين هديم ؟

ج . هم الطليان ..

س . فى الحبس الى معك هل فيهم صغار او كبار الاعمار من اى فئات ؟

ج . ياولدى اكبار .

س . كم اعمارهم ؟

ج . والله ما نقدر انقولك فوق العشرين انت الى عمره مش فوق العشرين الثلاثين  
يرفع بندقة البوصرة على ظهره ويمشى فى السماح لا فوق من الثلاثين .

س . نحكى على الى شدوهم فى سرت شدوا صغار وشدوا كبار ؟

ج . هذوكم الصغار كان العواويل امتاعين الوطن الى البلاد العسكرية الى غادى الى  
ساكنين فى سرت يمكن والباقي الى رافعه وماشى هذا فوق من العشرين خمسة  
وعشرين ، ثمانية وعشرين وكان هذا يمشى عسكري .

س . انت قلت سعدون شفته فى ايطاليا غادى ؟

ج . اى والله كان زيك توه انا وياك .

س . احكىنا عليه كيف ؟

ج . عاد شن نحكىلك عليه غير امنين يظهروا فينا بنظهر ندهور ولا البره عند الليل فى  
مثال والا الصبح بنظهر يعنى ندهور هكذا تلقاه هو وتلقا غيره ، وهنا ، وهنا .

س . ومن مع سعدون من القادة الآخرين من مصراته ؟

ج . ما نقولكش من معه هم قالوا سعدون هوينه حى خلوه لرمضان هنا نبوه يخابر

رمضان لصلح وكذا . وسعدون هويته رفعوه غادى باش يدير لهم شغله مشى شدوه معنا  
فى القرضابية .

س . كيف شدوه ؟

ج . شدوه فى لول هنا ، وين صار مصراتة ، وين صارت الكبة غادى فى سرت شدوه  
هو وحمد وحمد هو الكبير .

س . حمد رفعوه ؟

ج . والله حمد اللى سامعها انا قالوا شدوه هنا بيوه يخابر رمضان وهذاك رفعوه غادى  
باش يديرهم شغله حتى هو يخابر خوته فى ايطاليا .

س . باهى حمد هل اسر معاكم ؟

ج . لا ماريتاش .

س . هناك آخر يدعى «التهامى قليصة» ما سمعتش بيه من مصراتة ؟

ج . والله ما نقدر انقولك . . . هويته ابصر كيف نخرف عليها . . . قعدت انقول . .

تيسرت كيف اندبروا ياعينى

فى الوطن ما لقيتتش حبيب اجينى

فى اوستكا غير النكد عوينى

يقول : حين لاكننى حياة دونية

والناس تضحك خالين قضية

خذوا وطننا بالسيف هالدمية

جروا عليها الخيط والملكية

بعد التراب بيرفعوا الدرية

تمشى عساكر كلها جميلة

عسكر كما الدبيون موش اشوية

خمسين فى خمسين فوق المية

مالاه يالسلام ياصنوية

لا بى لا حاكم يرد لغيه

لا بى لا حاكم يرد عليها

ياخذ احقوق الناس وايهنيها

يقول : هذا حال الوقت الكى

بلا شهوة قدر ربي

اليوم انا تحت الدمى

قبطان دعى

يترجم ما فرزنا شىء

لا تعالى لا نوض مشى

زاد اترجم نت على

بايعت وجيئته نجرى  
 قتلته شن تبي يابى  
 هانى فى سرايا مصبى  
 من فجر لين طق الضى  
 بالباله نمشى وانجى  
 والطف ياسيدى ربى  
 شوف عملنا كيف اجى  
 محابيس وخدمة كرفى  
 يظل الكبران امصبى  
 كان ما بطح بنيشهم فى  
 يقول : وشن عجبكم فى الحال  
 اسنين احوال  
 عمل فاسد ما يفضى البال  
 بالسيف علينا فكوه  
 الوطن خذوه  
 المسلم فى زنده طبعوه  
 حال ايمخلل دار الروعة  
 مشين بوعة  
 خلاها الدنيا مفجوعة  
 بالحباب حيا طبعوه  
 حتى الموس اقصر رفوعه  
 غالب بنمشوا فى طوعه  
 بين الكرفى والصوار  
 الى عنده حديدة مختار  
 زاوح تمن قروش اكبار  
 كراه تقعمزة فى الدار  
 طحنا فى رومى مكار  
 خششنا والريق امرار  
 كتبها جملة فى النقلية  
 البلى دعيه  
 هلى حضرت هادمية  
 وق ليها شبكة وحوية  
 دير عوينك فوت عليا  
 كان بتخدم هدرية

كل شهر تحصل يوميه  
 والى زيه  
 خرطه بالقرباج قوية  
 ما حضروه الى صنوية  
 اسماح الجية  
 عرب الناقة والرينية  
 عرب النزلة الى مسمية  
 فيه الفارس يردع ميه  
 قبل خش اسباط خلية  
 مشية كفيه  
 واسباط امطيب كرعية  
 واسباط ايدير امدارات  
 روس عليات  
 ايبانن فى مثل النجمات  
 ادربه خطمن خرمات  
 ندى حشوة كيف الثوبات  
 بداء سيده سامر مابات  
 بعد الكلة وافراشات  
 ظارى فى اغرف عليات  
 اليوم صنقر بين رشدات  
 سريرشين ايدير امدارات  
 يكيده الهائج بوخزومات  
 سيد اللقحات  
 امنين وقل بين مازات  
 يكيده الطاير بوجنحان  
 سرير ازرق داير دخان  
 سرير ازرق دار عجاجات  
 عمل ظهيرات  
 ينفخ فى مثل الموجات  
 فرضه بالمرحول وفات  
 رده زمزم دار امبات  
 وطيموم دلال اللقحات  
 ومعطن بين الجبلات  
 بلا ماره احدها صنيحات



عطينا الببل مع الشاوية  
واكل قال الشيخ شوية  
فيسع ..... اليومية  
هجووا كان فيكم غيرية  
يامدعية  
تشوفوا بعد ايام الحية  
تظلوا كل عشرة في سورية  
والا في خيشة متنية  
والا تنزل في الفرقية  
تظل النجمة في الطاقية  
ادير السنكى والجلوال  
وتحفظ فيسع قول تعال  
اليوم كملت هل ام شمال  
بين مغرب بين اتلال  
وشنهو بيزهيه الببال  
بين الحبشى وبوجلوال  
والى يشد يقول تعال  
تمسح والا تكرر جوال  
والا توردد هالبغال  
وتمشى للطليلان هدية

نهاية الوجه الثانى من الشريط  
اللفة ( 492 )

وهنشير يدير مدارات  
نفز منه الباشا وفات  
ادلیم ما بين الخرمات  
وجاء الروضة تدير علامات  
قطع بن يدير امزازات  
فرواح والروس عليات  
وجوا جارف زين الحنيات  
بلاد الناقة والنعجات  
تجول بين قرارات  
تقول لريل دار جليبات  
امين جاه الحداي وفات  
تلفها هلكا فركى  
من قبل الطليان دعى  
من روحه ما خاسر شى  
كلمة من حنكة تجزىء  
يجينا بوقشطة يجرى  
يلعب فى السوط المنفى  
الى حصل كلمة بيجينا  
زابطية يفنص فى عينه  
ويقولك هيا ماشينه  
حق الشاهى بتعطينا  
دير عوينك فيسع فوت  
الكروانة خير من الموت  
قال محل الكروانة منعوت  
لا يرقى لا يطق فى خوت  
لا يفلق لا يجى لبيوت  
الله ترد الصقر القتال  
وسيع الببال  
يجى رحيله فوق ام شمال  
ايفرقهم على عشرة محال  
وانا ننده فى بن همال  
مشلغط مش فاضى الببال  
عطينا الببل وزدنا المال  
وكل ماجيناه فى بال

وطن الثلث وجيره كيه  
الناس دعيه  
تشوفوا حكم البركيزية  
كان خطيت بتعطى مئة  
برجلك ماهو بشاوية  
بتعطى الجمر ك وين تبات  
زهانا فات  
علينا ياخوط خوطات  
حال يشيب مايزهينا  
يخاف الحى يفوت جنيته  
عيني يا حبابي محتاره  
تغرد والدمعة قطارة  
نهار الوطن خذوه نصارى  
راح المسلم قعدت داره  
خلى مصاويقه واوكاره  
بعد البيت سميح مداره  
يفرح بعزم بخطاره  
ظاري بيته كيف القاره  
خوفى بينى غير اشكاره  
يمشى يلبد لهواره  
يرقى يعانى فى الجواره  
خلاله حياق مغبونة  
لانخلة لاهى زيتونة  
خذاه منه وطن الباشات  
فراوح والروس عليات  
حز ز ابيض دار عجاجات  
ويرمن لرياح قويات  
ريته حى الدنيا مات  
وعمره فات  
ولا قنصل تحت قرانات  
الوطن الى غمشوا وانجوه  
منه فكوه

حوايز بالغرس ييسقوه  
قعد غير حوايز وقطر  
المسلم من وطنه يظهر  
دايح فى الاوطان يكر  
يدعثر والوجه خضر  
الدمعة من عينه تظهر  
تقول مطر شبوب عاصف  
والسيل ايجر

اللفة « 28 » الوجه الاول -

هذه تمت :

س . عندما كنت هناك ومعك 40 او 50 نفر في الحبس هل تغيرت معاملة الطليان والا ثابتة ؟

ج . لا . الناس باهية في حركة العشر غادى بعد خذونا غادى لاعاد طق فينا خبط كان قليل واحد سكران امنين يفرق الشربة هادى يخطوا بالسوط والباقي ماعندك شيء لاتدهور لاتمشى لاتقعد .

س . العلاج هناك طبيب للمعاينة والفراش والغطاء ، باهى كيف ؟

ج . الاكل بالهون واللباس حتى هو بلهون اللبس في التالى وين شتا الشتاء مشوا لتونس عاد جابو لنا كشاشيب كل نفر بكشاشيبه وسوريته وسرواله وبلغة طرشة هذا وين خش الشتاء ، ماهو حصلوا عليهم الاسرى هنا شرقوا على اسراهم والله مابدوا يجيبولنا في الكواغط ويقولو لنا اكتبوا للمديرية امتاعكم واكتبوا لاهلكم باش يعرفوكم حين هم يدوروا علينا بالكواغط اكتب لايوك ولعمك ودير ولمديرك وشيخك باش يعرفوك قلعد حتى هم الى يجيبوا لنا في الكواغط .

س . وانتم كتبتهم ؟

ج . الجوابات ياوالله واحد من الصبح لليل اجره لله مسكين الله يرحمه .

س . ما اسمه ؟

ج . حمد بن دخيل واحد من العباسية ، توه كيف مات ساعتها كان مدير هنا ، من الصبح لليل وهو القلم يخط ولا عمر واحد قاله مانكتبلكش جواب والا كذا ، لاعطاء ربي وسعت البال من الصبح لليل وهو يخط على القلم .

س . انت بعثت الجوابات من غادى ؟

ج . كيف امالالا .

س . لمن بعثت ؟

ج . لأهلى ساعتها سيدى حتى .

س . هل الطليان قالولكم اكتبوا بانكم في حالة جيدة ؟

ج . جوا الكبير هذا هو وروميته كل مرة يدهور وابالك يضرب فيكم حد في الحبس بالك مغششكم شيء دايرنلكم نقولو له مادايرين لنا شيء كان الباهى الطليان باهى ، حتى الى يديروله البطال .

س . هادى . . متى صارت العملية بالضبط ؟ المعاملة لما بدأت كويسة هذا لما مسكوا المجاهدين اسرى ؟

ج . لا زين الاسرى ، ماهم قاعددين غادى ماهم هم عندهم اسرى هنا ، من حيث تيسروا الى حازتهم هوينه ترهونة انهار شقيقة هادى اكبر من القرضابية الى مش ثمانية الاف مانتقش منهم واحد كان ستة من الخيل يس لهيد والباقي لاطلقوا حبش .

س . احكيلنا على المراسيل الى تبعثوا فيها من اوستيكا لاهلكم ؟ هل كل يوم تكتبوا ؟

ج . لا . . . لا شن يومى بعد عشرة بعد خمسطاش واحيانا بعد شهر .

س . من يستلم هذه الرسائل ؟ وهل متأكدين بان الرسائل تصل ؟

ج . وصلن وردوا لنا اهلنا الجوابات غادى .

س . صار وصلنكم جوابات ؟

ج . اى والله زى ما يجن من غادى يمشن من هنا .

س . انت وصلك جواب غادى ؟

ج . اى من سيدى .

س . وكيف عرفت هل هناك علامة معينة عرفتھا ؟

ج . مانعرفش كلام سيدى وفلان يسلم عليك وفلان يسلم عليك هم وين يعرفوه ،

وترهونة حتى هم ماطلقوش الكولونيل الا فى التالى وترهونة ماطلقوش الا فى التالى فى

البدل .

س . اى وقت صار البدل ؟ وانتم غادى ؟

ج . لا . لا هذا نزلونا هنا والله مايطلقوا فينا كان درز بدرز درز من المسلمين ودرز من

النصارى لكن نصارى طبسوا يقتلوا فيهم شوى واحد هداه ربى واحد درهوى قال لا

ياى لا الحبش اقتلهم والنصارى ماتقتلهمش تقتلهم حتى عربنا الى ميسره كملوها

راهمى هذا باش بدلوها اوكان هذا يطلقونا معادش يطلقونا حتى الطلق شن يديروا بينا

طالقينا يذبحونا حتى الذبح ، هويته نهار خف الماء والملح روحنا والحمد لله .

س . قداس قعدت غادى ؟

ج . صمنا رمضان غادى رمضان ماتمناهاش غادى وصمنا رمضان تام غادى ورمضان

لحقنا عليه اشوى روحنا لطرابلس لكن بعد روحنا لطرابلس قالولنا غدوه وبعد غدوه

تنطلقوا بتروحوا لقونا مشايخ المسلمين والطلبيان فى البحر وقعد الكولونيل معه الترجمان

بس ملتمين ياسرين معه افندية قاعدين ، قال الحاصل حصر عليكم وعذبكم وعذب

العرب وقتل العرب الدولة وماطبتش وين طق فيها الحساب مثلاً قطعاته من الحكم

مرة واحدة وحتى التشنيق بتشتقه ماتخلش حتى الحكومة ماتديرش هكى وغدوة بعد

غدوة تروحوا نزلنا عاد فى طرابلس المساعدة هادى الكتاب الى صاير بين الطليان

والمسلمين فى البدل ، هذا قبل يقوله الساعدى واحد من المراغة خربت الكاوزه بينهم

ماعادش فى الكتابة امعاود ييوكتابه اخرى بعد هويته مات ، هادى هويته عاد الكتابة

رجعت للمرضى هويته داروا كتابه جديدة قعدنا اربع شهور ونصف محابيس فى

طرابلس امنين رجعتنا .

س . وين بالضبط ؟

ج . فى الكراكة وفى الحبس الجديد هذا ، فى المدينة لداخل الكراكة هادى الداخل .

س . اين بالضبط ؟

ج . بحرى السرايا .

س . داخل السرايا ؟

ج . عاد مانقدرش اندورلك المطرح وين حبس يقوله الكراكة وحبس الفار هذين

حبسين الى انا حصلهم ومارحنش منى والباقي كان فيه احباس اخرات منى ، اما توا انا الكراكه هادى باش قعدت فيها وهوينه بدلونا ومعادش علينا كذا قاللى واحد ورديانى (حرس) قاللى فيسع اكنس هالماء واكنس الحبس فيسع قلت له قولى مش واخدين وردانية تعطوا فيهم فى ستين باره فى اليوم ناديهم هم الى يمسخوه ، يمسخوا الكناسة والواحد مانمسخاش انا شن ايجييه لى قلت له توه انا مانمسخ شىء حتى المس يمشى يملخنى حشاك كف احداى المكسة انا انسوقه به خبطين على رقبته وراسه مشى شكا .

س . شن يكون عسكرى والا شنو؟

ج . هو زابطى ورديانى .

س . طليانى؟

ج . لا . لا والله الا عربى من ورفلة يقولوله الحاج «المبروك» .

س . المبروك من؟

ج . والله يقوله الحاج المبروك وماندرى عليه لمن وين رفعونى وين يدهوروا الصبح حطون فى ادويره ضويقة هكذا واللى يدهوروا فيه المحابيس الصبح شوى وين اسرحوا هدوكم وقالها جوا اثنين انصارى جوا للورديانى ليه تضربه هكى قلت لهم ماضربتاش انا كان تعارك هو وحد وضربه يبلى على انا قال لا ، لا انت تكذب بالله نشيله فيسع الزانزانه هادى فيها ثلاث ببيان ومهلوبة فى الدروج لوطه زى السرايا امنين ترقى لها لوطه الزانزانه هادى ومنوطه لبز ماعندك افراش شبح ماتشبح شىء ويديرولك برمىل فى التركينة لقضا الحاجة البشرية ويجيوا لك اسطيل ماء اديره فى ركنك ويعطوك فريدة خبزة يابسة لا هادى ولا هادى قعدت فيها ثلاثة ايام ليلتين بايتين معاى اثنين وليلة بتت بروحى فيها ، تظهر عاد جت الثلاث ايام حتى كبوطك والا حاجة كأنك دايره فى الكركم .

س . اثنين الى معك منين؟

ج . انصارى حتى هم .

س . محبوسين؟

ج . لا = واحد مدير حبس يعنى يدوروا عليك حتى فى الحبس .

س . انت قلت لى حبست مع اثنين؟

ج . اثنين هديم لقيتهم قدامى مسلمين من محابيسنا هديم الى بت معهم ليلتين .

س . امنين هما؟

ج . والله شن بنقولك ، واحد من اولاد حمد ترهونى والاخر مانقدرش نقول لك توه

بالك يقولوه «حمد الازرق» .

س . ماذا فاعلين؟

ج . والله ديرهما مانعلمه حاجة ساهلة تلقاه والا هو الى يدير المنكر يحبس فى الزنزانة

ماعنداش كفر اكفر من حبس الزنزانة وليلة هوينه بت فيها بروحى والسلام . لكن

الحمد الله هاهو كمل ومشى .

س . باهى بعدين قلت صار بدل ؟

ج . اى بعد سرحونا احنا سرحونا بدلونا فى وجه تاجوراء بجانب سيدى عبد الكريم بجانب بئر الاسطى ميلاد وأول مرة ترهونة داروها فى لول لان ترهونة بدلت ومسلاطة بدلت النواحي الطرابلسية والغرب كلها من مسلاطة وهكى هادى راهى بدلتها ترهونة وبديل ورفلة والسويحلى هذا بعدنا خليناهم غادى راهو ماندرى عليهم طولوا والا لا واما من مسلاطة وغرب فهادى كلها بدلتنا ترهونة .

س . كثيرين ؟

ج . اى هوينه نصيب هو كل وقت مش احداش الف اشبح من روح الفوق والا ماروحش .

س . - 1100 - إحداش مئة ؟ (مئة والف) ؟

ج . اى - 1100 -

س . عندما رفغتم الى الحبس فى ايطاليا هل صورتهم صور فردية ام جماعية ؟

ج . لا ، لا ماصورنا حد فى هذاك الوقت مارينهاش كان صورنى رايح منى فكرى ياودى ماصورناش لاشى يصوروا فينا غادى كتيبة سجلونا ، لا التصوير يمكن صار حق ليش صار انهار جابولنا الكباييط ورمينا الكباييط لولات كنا لابسين وبعدين هوينه لبسنا الكباييط العسكرية غادى يمكن صورونا انهارها حق غير الدهن بعيد المدة طائلة واليوم القرضاية ليها (72) عاما . . وين ياسيدى .

س . هل عندكم ارقام ؟

ج . والله حتى الارقام ماندرى عليهم كان عطوفى والله ماندرى عليهم وكان ماعطوناش ارقام ماعطوناش مانقدرش انقول لك .

س . اثناء وجودكم فى السجن هل سجلتم فى قوائم ، انت قلت بقينا عام واش ؟

ج . عامين غير أش .

س . هل كانوا يتمموا عليكم يوميا ؟

ج . اى عاد هذا بعد شهر اثنين بيرموا عليك لطة مريض حد مات حد منكم قداس واحد حتى الى يموت يجوك شن اسماء - هوينه عنده عرب تعرفه لايقول لهم مات لا مامات ساكت فى مربوطه والسلام عليكم .

س . انت ذكرتلنا فى البداية انه عندما يموت شخص يؤخذ من طرفهم ويضعوه فى صندوق ويردم ؟

ج . ايه هذا صاير وبعثالى هوينه وحدين مصراة يقولهم عيلة «الصغير» ناس حكام لقوهم يردموا فيهم بلاكفن ، اشكوا غادى قالوا لهم احنا مسلمين ندير هكذا فيه حتى الى يتكلم بالعربى باهى الطليان ، هوينه عاد ظهر الكفن بدآنا نكفن ونغسل ويرفع للجبانة .

س . ويردم وخلاص ؟

ج . لاكيف يردم قبره زى قبورنا . .

- س . بناء حتى هناك ؟
- ج . لآبناء مافيش ماهو صندوق يردموا على صندوق ويديروا نصيبه غادى ونصيبه (شواهد) هنا زى الى نديروا فيه هنا .
- س . هل يصلى عليه من طرفكم ؟
- ج . ايه وين يصير الميت واحد من العرب .
- س . ماكانش واحد معين متعلم ؟
- ج . لا الحاضر يتقدم الى يعرف فرض الصلاة الميت يتقدم .
- س . وهل جميع العرب عندما يسمعون ب وفاة واحد يمشون كلهم والا كيف ؟
- ج . كان بتجى ماردك حد وكان لاعلى كيفك .
- س . لكن من العادة الناس الى تسمع تحى ؟
- ج . هذا الى حداك توه يعنى فى مثال الله لايقدر حبس زى البراريك هذين وقدامك بقولوا فلان مات ويحيك هذا وهذا وتمشى مع الجنازة . اندوروا فى غدوه انشاء الله رب لايعدبنا .
- س . عند رفوع النعش هل تسبحون مثل الآن والا كيف ؟
- ج . لا . . . هادى مانقدرش انقول لك مانظنش لا رافعين جنازة وخلاص .
- س . عند قيام الصلاة فى اوستيكا هل تصلون جماعة .
- ج . الى هذا يصلى على حاله ويمشى الجماعة وين تلقاهم فيه فقى يصلى بيك .
- س . هل كان هناك مؤذن ؟
- ج . لا . . . لا .
- س . هل ممنوع ؟
- ج . شن بنكذب كذب لا اذان حتى لانقولك سمعت اذان ولا اذن حد وبطلوه والا حبسوه والا شىء .
- س . صف لنا السجن كبير = صغير كيف ؟
- ج . هو فى العلو اعلى من المربعة هادى لكن مربع تربيع داير له كمره فى وسط باش يقف عليها السقف هذا ، وهذا وهذا . من هنا ومن هنا فى النصف .
- س . باش امسقف ؟
- ج . كمر والا ياجور امعلق تعليق دايرين له عمود كبير بكل باش ايجيها السقف هذا ، وهذا ، وهذا .
- س . اديار . . . اديار ؟
- ج . لاشنا مش دار هنا ودار هنا لا هادى هنا وتفتح هكى دار اخرى امقابلتها تفتح هكى واوحده اخرى فى فمها من غادى يفتح هكى والاخرى امقابلتها تفتح هكى .
- س . قداس دار فى الحبس ؟
- ج . دارين وبينها السور دار وحده هى الى حايزه المحبوسين هذيم ، العشرين الثلاثين الى هذا بدارهم ولكل دار باب ونافذه . الباب حديد او خشب ؟

- ج . حديد .
- س . عندما تذهبوا لتنفس في المدينة وعند الرجوع يتم تفتيشكم عند الخروج والدخول للحبس ؟
- ج . لا ياودي مايفتشوش فينا ، لا ، لا
- س . هل تذكر عدد السفن التي نقلتكم من سرت الى طرابلس ؟
- ج . عرب الطليان عاد انا وين نعلمهم انا ساعتها ماني هنا وحتى كاني هذا مانعلمش قداس باخره .
- س . لا . لما مشيتوا من سرت لطرابلس ؟
- ج . من سرت لطرابلس نعلموا الباخرة التي خشينا فيها والباقي ماندري على شي .
- س . ومن طرابلس لعند ايطاليا كم باخرة ؟
- ج . حتى هي كان الباخرة التي فيها والباقي ماندري عليه كان فيه وحده اخره امين نزلونا مانزلوا معنا الا البابور هذا بس .
- س . وعند مارجعتم ؟
- ج . حتى امين ارجعنا امين نزلنا على الحبس .
- س . وهل وصلت مجموعة قبلكم ؟
- ج . لا . لا مالفينا حد قدامنا .
- س . والى بعدكم وصلوا بيوم او يومين ؟
- ج . مانعلمش ، الصبة الاولى بابور كبير لكن الناس خضها البحر ، الموج يرقى فوق من البابور لو كان مش شادت الصواره يتزل البابور .
- س . كيف ؟
- ج . من الماء والله يضرب في الصاري من فوق يشليخ فوق من الصاري وينزل من الشوارع لكن هوينه دايرنلهم عدادى يمشى الماء هنا وهنا ، لكن هوينه بعض الشي الى يجي الداخل اشويه لكن ماهو مسقف حتى هو ، حتى البابور مسقف ،
- س . لما رجعتوا من ايطاليا لطرابلس قلت بقينا اربع شهور تقريبا ؟
- ج . اربع شهور ونصف .
- س . في الحبس ؟
- ج . هذا هو الى حبس كي .
- س . واللباس هو هو ؟
- ج . هو هو .
- س . الكبايط ؟
- ج . الكبايط شن بيسلبوهم منا الى عنده .
- س . هل استبدل لكم اللباس عند الخروج بجديد ؟
- ج . لا ، لا ، لا ، كان الكشابية والى على ظهره الى عنده اعبيه قعد عنده شن بييدها غادي .



س . هل قاموا بتسجيلكم مرة ثانية عند وصولكم لطرابلس ؟  
ج . والله ما عاد نقدر نقولك توه ، والله مانى حاس يعنى وقفونا وكتبونا فى طرابلس .  
س . اثناء فترة الاسر كان عقب القرضابية فهل هذا بسبب الهزيمة فرجعوا اليكم واسروكم او كيف ؟

ج . اى اماله كيف مش موته قطيعه الوفات الى قعدت ملاويح فى لذباب مسلمين ونصارى وحش من كل مطراح حتى المسلمين حتى فى الساقية القدام الفوشيك يفوت لهذا وهذا والله ما قعدت بعض منها كان فى الساقية من يدرى عليها يطيح انت تبي هذاك المطرح طحت هنا من بيرفكك تقعد ملوح فى مطرحك والسلام .

س . صار رد فعل منهم هم ؟ نتيجة لهزيمتهم ؟  
ج . عسكرهم ماهو احنا جينا بحريمهم انكفوا علينا كفى وكان هذا لو كان صار هكى والا هكى معادش نرجع لسرت لكن احنا جينا قوم زى ام علوش «عجاجة او دوامة الغبار يصعد فى الجو يطلق عليها ام علوش» من اوطى هكى من هكى ماتشبح حد لا هكى لا هكى ماهو جندب زى التراب والله الغزال ما عنده وين يطير يتحير من هنا يشدوه هدوكم ، يتحير من غادى يشدوه هدوكم .

س . فيه من قال انه بعد هزيمة القرضابية اصبح الايطاليون معادش يميز بين الى حاضر المعركة من عدم الحضور ؟

ج . مسلم . مسلم سوى حاضر او مش حاضر ما فيش حتى نمسك عربى معادش يشاوخوك امين لا امين شىء عسكرهم هذا بوجليويل هادى مسلم ضموا علينا حتى عسكرية بكثرة مسلمين وهم فى لول على ما يشرحولنا غادى الطليان يقولوا انتم الطرابلسية قريب خديتوا ايطاليا وقبل ايطاليا بتروح لكن بنت الرى مابتش قالوا من مازال قالوا مازال الرومى الفلانى وبنت الرى والباقي استعدوا على المرواح بيقلعوا من طرابلس قال انا طرابلس هادى خدتني معادش نقدروها لا بهادى لا بهادى وين نادوا بنت الرى ونادوا الرومى هذا المبسوط ياسر قالوله احنا فلسنت بينا وكملتنا والبر معادش انطقوا فيه سور دايرين الله والعليم ما طنش ريتوه السور .

س . احكلينا عليه ؟

ج . ماهو السور طاقين على قرقارش من مغرب جايينا من جزور بره ، بره لبورطه بينيتو ويهلبوه على الشط لين فوتوه للجديده ودايرين معه توامج هكى سور بنى لا يظهروا هكى لا هكى انحصروا مليح اشوى قالوا قاتلهم بنت الرى بعدها انتم معادش انتم هادى عرب فلاقة مش اقران معادش تصيروا دولة بكل مدة العمر زرتكم فلاقة باش معادش تصيروا دولة ، كيف والرجل هذاك شوره غنى ياسر قالهم توه انزلبحوهم بالفلوس انزلوهم عسكرية ويطبسوا فى بعضهم صك لين يكملوا بعضهم واللى عندى انا الكل بنعطيه للحكومة كله هوينه تبتهم هاذيك بعدما نزلت اباند ونزلت عسكرية العسكرية ياخذ فى اربع قروش ، نزلت اباند هي ليبيا مش تحارب فى بعضها .

س . ماهو السبب الى نزلوا اباند ؟

ج . حكم عليها الرومي وبدأ يعطى فيها فى الفلوس ومن خذاها الدنيا ، الا خريش دون  
الرومي الى يقولوله خريش هذا جبالى هذا الى خذاها توه تعرف نهار ظهوروا لورفله  
يحكولنا بعنالى الرومي امنين ظهوروا هم قعدوا حاكمين يقولهم فرافيط هوينهم امقبل قعدوا  
فيها شهرين الطليان ، قال انهار يتقدموا لورفلة قال لخرييشه الى يلاقيك راحل جاى راك  
اتكلمه والا تسلبه والا تأخذ منه حاجة وخرييش قال لقومه الى يلاقيكم اسلبوه ما تطلقوا  
حتى شىء حتى امرأة اسلبوها الى جت على طريق الطليان الى مات مات وما سلبه حد  
والى جاء فى طريق قوم خرييش هادى والله على الخبر ما خلولة حتى جرده ، هى المسلمين  
لو كان قعدت شاده ايدين بعضها ، وافتككت من انت عاديته انا عاديتهك ماهر  
ماياخدوهاش الطليان لين ، حتى يملكوا طرابلس ماعادش يظهرها لكن انت عاديته  
رافعت غنمى رفعت ابل اتلقمى عباتى باهيه تسلبها تلقى السورية تلقاها جديده انت توه  
عند الطليان توه تحصل سورية ياخذوها منك عادت بعضها العرب بدأت نصك فى بعضها  
لو كان مشت على لول راهورحل منها وسيبها ياودى .

نهاية الوجه الاول من الشريط 492 الثالث

## بداية الوجه الثاني

. . امنين الناس تكسر في الحلفاء .

س . كنت طبيب والا كيف تعلمت الطب الشعبي ؟

ج . من الحيوان .

س . الطب الشعبي حيوان وانسان ؟

ج . هو هذا حتى الى توه الى ينوشه عرق الجسد نكويه يشفيه ربي وهم يمشوا لطيبه ويمشوا لكل بلاد وما يبراش هم يضربوا الابرّة ويعطيك احبوب وهو مايبي الا الكوى هذا هو خطه في حكة المخروقة وشلطين على الساق فوق من الكعبة هذا عرق الجسد كله ومشوا ياسرين وما صارش منهم ايون هسلطه هادي يبرى ، والحيوان نعرفوا انقولوله هادي الشوايه هذا فكك هذا كسر هوينه انديروله جباثر هاهوتوه في وقت الايطالى هذا الى ينكسر له حاجة مسلم هنا في العرب الى جبرناه الى جبرته انا مظهرش عنده عود وقيد (يقصد انه سليم مئة بالمئة) 100٪ والى داروله الجبس بعض منها ظهر عافن ايده والى كراعه ولكنى احنا مايقعد شىء ، لان هوينه في مثال بتأخذ ايده والا كراعه والا الى هي تردھا زين وديرله حلبه وديرله دحي وصوف وبعدها اديرله على طول هكذا ديرله هكذا ديرله على طولها سيقا من هنا وسيقا من هنا جريده والا لوحه والا حاجة بعدها امنين بتعصبه التجيب الخيوط الى بتعصبهم به دير هكذا واسعة واسعة وتجيّب اقطع قصبة وتجيّب عود امسقم زى الغرس محسوب مسقم غير قعد مرض الرباط هذا تقول هاذيك الوحده في وسط الخيط هكى واطل تلوى فيها حتى لين معادش ادور بكل ، وتقول فيها العود هكى يشدها واحد اخرى هكى الاخرى هكى لين معادش ادرن بحد جهدك مايدرنش وسقط معه المغزل ، المغزل هذا مقسم ، المغزل هذا ماعاد يتتح تقعد ايده ممدوده هكى والا كرعيه لاعاد ادير هكى لا هكى ام الواحد هذا (يقصد الجبس) اتجى ايدك والا كرعيك منفوخه الجبس وين يفتش شوى يلعب .

س . عندنا حديث على الجهاد والمعارك نريدك تحكيلنا على الصراع الذى حدث بين عبدالنبي بالخير ورمضان السويحلى ؟

ج . عبدالنبي بالخير توه امنين بنسمعوا الحديث ناجدوا رمضان هو الظالم باش هو الظالم لان توه ، هما قبل كانا اصحاب «عبدالنبي» و«رمضان» ، هديم قبل ايجاربوا فينا احنا ترهونه جميع هم ، قعدنا فوق من العام ونصف وهم في مسلاته واحنا في الخبط هذا لاهم رقاو قدو الرأس لا احنا خشينا لمسلاته قوة لين صارت طيبة سوانى بن يادم جت قد ما هنالك من الجادور قالوا لازم يحضروهم خيانه يشدوا رمضان النصارى يعرفوه يشدوه يحاسبوه بيتخيل هوينه يقولوا من سوق الجمعة جادورين جميع جادورين جميع ، جادورين جميع لين ظهوروا مع قرقارش من سوق الجمعة مانقطع السيب خط وواحد ، ماشدوش السويحلى قعدت عندهم على الخبر الاذاعة مسكره عندهم السياسة اربع شهور معادش فتحت الى كيف ابلغوا فيه بلاغة وبى ماشديتوهش ماعرفتوهش ماعرفتوهش فى أى درز فى لول والا فى

الاخير ، بعدها وين ظهروا في سواني بن يادم وليلتها بعد جابوا الطليان عليق وماكله وكذا وشيء بمعنى انه صلح وصار الصلح في سواني بن يادم ، عبد النبي عنده ضنا سيده يقولهم ضراري او ذاراري بن عامر متعادي هو وياهم ورمضان السويحلي متعادي هو والمناصره قال ، عبد النبي قال ياي رمضان نبوك اطايب عبد القادر واطايب فلان وفلان ونبو انديروا بينكم حق وباطل وكذا قاله ما نطاييش هديم لا انت طايب ضراري رمضان وين اطايب ضراري رمضان ، انا انطايب بعدها هذوكم تنازلوا بالكلام من هنا من هنا قاله حق ياولدي انت مش فارقين ورفله اتقولوا نرفعوا في البقر من الاجار وفي المسادي المرقم من المسده ولكن ماتدومش لكم نهضا حراجه من هديك الساعة غير هذا قاله انظلم جاييك انجبد عليك وهذا قاله على الخبر على مايعاودوا نهضا متخرجين من هاديك الساعة .

س . ماذا قاله ؟ قال نجبد عليك ؟

ج . ما هو على الخبر السويحلي قالوا قال لعبد النبي كاني حي انظلم نجبد عليك في المجرزي البقره وهذاك مش عارف شن قاله هاديك من الليلة تخاربوا على كلام العرب انا ماني معاهم غير كلام زي هالكلام ، لو كان مش ظالم يجيب عرب في عيد الاسلام رمضان وتجبردهم افاتير ومن كل مطراح ويهجم على العرب انهار العيد هي لو كان مش ناداته الدعوه من ربي لو كان هذا خذا اللي دهمه ودهم القصير غير ياخذهم رمضان باش ياخذهم واحد ين ورفله معه الكل على الخبر معه لكن هم رقتهم شعبة يقولها كرشنه في المردوم او طي من البلاد وظهروا يمشوا الظهره هاديك وهو جاي قداش مرة لبلادهم بروحه ما هو قبل فيه وقت حرب السيد ساعتها وكذا صحبة كبيرة هو وعبد النبي يمشوا يقبلوا ياخذوا الخلاء ويقبلوا قطعوا وادي يقولوله غيين ، بعدها جوا لوادى يقولوله ميمون بعدها ضوى الضيء ، وين ضوى الضي لقوا ارواحهم في الواحد الي علق عينه لقي روحه تحت القلعة قال الله ، الله يا والله انهار ازقح ، وهو انهارها حشاك قريب حتى جردك الى عليك تنتش فيه النار من الحر . هوينهم برموا وين برموا للخلف حتى الماء الى عندهم راح لاعاد ينشرب عطشوا ويخذوا والله على الخبر مره واحده بقره ماء حصلت منهم عشره بنادق الى تعطيها غارف ماء يشرب وتأخذ بندقيته من ورفله هوينه عاد يتخذ مساكين لكن ظلم والله قالوا قال واحد فيتوري والله تمشي انت ونمشوا احنا لاروحت انت لاروحتنا احنا رفعوا والله دعوه اقباله هاديك عاد اما لو كان مشوا طول هكي ياخذوهم يحكولنا ورفله كانوا معهم ، ما هو الى كاتبه ربي يبي يصير .

س . سمعت على موسوليني لما زار طرابلس .

ج . موسوليني هذاك مش شاد الكوره فيده في «الفيره» الفيره هذه يقولوها نبي وهو داير تصوره زي الغول يقولوها الفيره امدابير فوق منها قدام مع الحيط هكي سلايم راقى فيهم زي العنكبوت ، وشاد الكره هادي في يده هكي وامفحج كراع في الغرب وكراع في الشرق ، امفحج هكي هادي في الغرب وهادي الشرق هوينه هiale بياخذها كلها اشوي في التالي على الخبر والله ماكروه كان بخيل قتلوه .

س . لما جاء موسوليني لطرابلس - 1938 م . هل جمعت ناس ورفعوهم لطرابلس ؟

ج . لا ماهو هو ظهر جاي ، هو جاء لترهونة وماندري عليه فات حتى مشرق زليطن  
ولسلاته .

س . ريته يا حاج ؟

ج . غير صورته غير امين مصبي في الفيره والباقي ماندريش على دعوته

س . هناك من جنس بالجنسية الايطالية فهل تعرف احد منهم ؟

ج . ايه ، ايه هذيك هم قالوا الى ما يكتبش جنسية ايطالية هذا ماعادش عنده حصه هذا  
يمشي لواو حريه هاذيك بلاد العرب هادي تقعد مدينة كلها الى الراس كلها تقعد زراعة  
لطليلان واما الى يكتب جنسية كان شيخ يقعد كان مدير يقعد عرب ياسره حتى مشائخ .  
بطلت مابتش تكتب لكن فلق ربي الطاغى هالك هو هiale بياكلها كلها هتفحيجه الى مد  
اكراع في الغرب واكراع في الشرق هادي الغرب بيحكم عليها وهادي عالشرق بيحكم  
عليها ، هو لو كان افتك موسوليني مايتقدمش على مصر والله ليبيا ماعاد تفك منه .

س . ماهي المعارك الى حضرها هنا بعد رجوعك من المنفى ؟

ج . حاضر نهار بو عرقوب وحاضر نهار جنزور وحاضر لول في غوط الرمان وفي الجديد  
هادي قبل النفي ، وبعدها في الزاوية حتى هو ملطم والا اثنين ماندري عليها التراب  
مانعرفاش هوينه لين طقينا في قصر السوسة الى بينا وبين تونس هناك نجع «محمد سوف»  
هوينه وين قال للمشائخ قاهم فيه نجع لو كان تحصلوه غنام ياسره وابل انحاربوا بها عام  
واحنا ناكل وقعد ساعتها اسحاق باشا هنا الترك واما هو قعد والى يقولوا طلين التوتة في  
سوق الزاوية يشنق فيها . وفيه قطعة في جنزور حتى هي جرتها محبوزه حيز مساكين والله  
ماشدينها شد وداير فيها كيف مادايرين للقرضابية واحد على واحد والتراب امصح اشوي  
ماردمينهاش مليح وين نتفخت وكذا واحد يدرهب هكي او احد هكي قعدنا نشبحوا فيها  
والضرب شنوا ، والله كان عالدمع كله ، كله الى لقيناها متكركب كله ضربه عالدماع الى  
عالدماع هذا كله محبوز «اسير» شنوا والله ماشادتها ليهم العرب الا على السوط .

س . هذا بعد رجوعك من الحبس ؟

ج . ايه بعد الرجوع .

س . خذيتوا السلاح مرة ثانية وحاربتم ؟

ج . عاد السلاح فيه الى قعد عنده حتى هذا ماسلموهش ساعتها فيه الى ماسلمش وقعدوا  
الى حايز في طرابلس الهوشة هادي حصل ياسر بندق واحد حصل ثلاث واحد حصل  
اربعة واخر اثنين لكن فيه الى مات من الرفس قعد صندوق اكبر من علو المربعة ستائف  
ستائف تقول لهذا هكي ينصرم عليك الستيفه هادي تحي عليك تقتلك مش حديد .

س . الطليلان عندما احتل ترهونة اخذ مزارعكم ؟

ج . التراب هذا كان واخذه ، وقتلتك يقول انخليكم الثلث باش قتللك بكري بقوا الثلث  
وجيره كيه .

هذا قلته لكم توا هذا التراب لنا خذوه الطليلان ساعتها وين ماغرس لاشي ، سباح لاحت  
وسعى شنوا قبل الا الابل تمد والبق والغنم يمد (ترعى)

س . لماذا اخذهاا الطليان؟ وين ذهب اصحاب الارض ؟  
ج . ذهبوا لورفلة وانهار انفلقت ورفلة انهار صبحنا هنا ، رجعنا لترابنا  
س . اين بقيتم في ترهونة ؟  
ج . في بلادنا  
س . سوانيكم خذاهم الطليان ؟ وانتم ذهبتموا لكان اخر؟  
ج . لاجينا بحرية في الوعر هذا وبعدها الطليان حازوا المراكز .  
س . هل فتشوكم على السلاح ؟  
ج . صار التنبيه الى عنده سلاح جيبه الى مايجيش الحكومة تعاتبه .  
س . عن طريق المشائخ؟  
ج . ايه الشيخ خذوه السلاح كله قليل .  
س . من هو شيخكم ؟  
ج . ساعتها مات هو يقولوله «سعد بن جبران» .  
س . عندما تذهبون للجهاد كيف بتطوع او بتكليف والا كيف ؟  
ج . الجهاد الى عنده بندقة مايقعدش صاحب البندقة ، كان انت قعدت شهر وعندك اخ  
او ولد كبير انت تروح وهو يرفعها اما البندقة تقعد هنا في الوطن وانت راقد ماتقعدش .  
س . صار فيه بدل ؟  
ج . اماله كيف البندقة تحبها هنا والحرب في زارة لو كان ظهوروا لزارة شن تدير بها هنا .  
س . النساء والشبابين ماهو عملهم ؟ يحرقوا ويزرعوا او كيف ؟  
ج . وعاد شنو هادي مؤنة العرب كان شعير وطعام هو لولا الشعير والطعام والله منين  
مشينا للنزلة هادي وين البى سوف يعنى نلقوا باش نحاربوا طحنا في مطمور شعير غار فيه  
عرب السبيب واحد في مخلته واخر في شملته وحصلنا درواشة رحي مانرحوا في الشعير كان  
بنخالته ودشيشة ونطبخوا وناكلوا وهات نتحصل عليه ، وحال مايعجبش .  
س . الدخيرة من اين تتحصلوا عليها ؟  
ج . هو حق ربى لان السويحلى يواطى عليه الغطاس حتى لعقاب التالى يجيب الغطاس في  
السلاح ويواطى عليه ، يجبروا فينا مصراتة الى معه في الجيش ، يرفع فرعه من الحبش  
يجفروا داموس في عبدالرؤوف ويملاه السلاح ويردم والى يجفروه يقتلهم قعد لالاخير  
وبعدها بدأ الترك يخابر والضباط الى يخابر فيهم معادش خابروه انقطع الخبر عليه السلاح  
وغير السلاح عند السويحلى بكثرة والاخرين لا من وين يتحصلوا عليه .  
وفيه مرابط حتى هو مصراتى او امنين يقولوله الضو الاسود قالوا لرمضان في وقته  
وقال يابى رمضان بتعطيني الحصان قاله انا كيف ندير قاله كيفك اما الحصان نبيه قاله هوينه  
ارفعه رمضان قبل حصانه واحد من هنا وواحد من هنا وهونك يشدوه ، المرابط هناك وين  
اعطاه الشكيمة وكذا لوا الشكيمة عليه وفات المرابط يمشى والحصان يتبع فيه في السوق وفي  
كل مطراح لاشكيمة لاشى قالوله قاله عندك حكم ستة سنين ماتمشى الستة سنين لين رقد

هذا يخبروا فينا عليه مصراته . اما سعدون على الخبر عليه النورالى «الآن الى مشاهدين قبره في السدادة» .

س . لما صار التجنيد الايطالى لليبيين ورفعوهم للحبشة ؟ احكيلنا عليهم ؟  
ج . نعلمهم وين يرفعوهم الى مات غادى مات والى روح ، روح ومن بيتنا نعرف واحد بس يقولوله ميلاد لانعرف اسم بوه وهذا الوحيد والباقي ماماشى حد لبر «الحيش منا احنا والحرب الاخرى يعاودوا عليه في اعواد بالطيف ، قالوا فيه حتى صيد يقوله مرفعين الى يستخلى به بروحه في الخلاء من ليد ايجيبه يجرى يمد مده «ياكله» .

س . احكيلنا عن معاملة الطليان لكم عقب احتلاله وعند رجوعكم كيف المعاملة ؟  
ج . مانكذب عليه التراب خذاه هذا انت معاد انجيه .

س . والتجارة كيف ؟

ج . هم يقولوا ساعتها عطانا حق الطليان لكن حق الجابية يقولوا اربع قروش ، قداش حقها الجابية ترمى مرطتين ونصف شعير يقول اعطانا حقه .

س . هادى ضريبة ؟

ج . لا هذا حق التراب مش خذا التراب وملكه ، كيلو عليك قداش جابية الطليان زعمة هونيه عطاء حقه لاهله .

س . الطليان حكم ترهونة وزرع الخضراء زيتون ؟

ج . اى هادى بعد ارتاح ، مارتاحش هو مارتاح لين مات عمر المختار .

س . الاشجار زرعها الطليان ؟ والا العرب ؟

ج . الطليان خذاه وغرسه .

س . بالعرب اى العرب هم الى زرعوا الاشجار ؟

ج . كان بالفلوس باليومية واليومية ياسرة شوى مانقولكش . .

س . هل خدمت انت ؟

ج . والله ماطقيت فيه طقة .

س . اين كنت في تلك الفترة ؟

ج . ساعتها قاعد نخصد في الحلفاء من الجبل والرؤوس ونبيع فيها ساعتها الطليان يأخذوا في الحلفاء في طرابلس والانجليز كذلك

س . السجن الايطالى في اوستيكا هل كانت بيه تدفئة او اناارة ؟

ج . الضى فيه ضى .

س . في الشتاء انت قلت برد شديد هناك ؟

ج . غادى الصيف شتاء والله كان خيار العنب والشعاب تجلب في المياه .

س . هل عندكم اغطية كثيرة ؟

ج . شن الغطاء اكثر من البطانية .

س . هل هناك دفاية ؟

ج . لالا . يدورولك حتى نار تدفيك .

س . بطانية وحدة تكفى لدقء ؟

ج . الى اديره فيك عاطيه ربى .

س . هل هناك من توفي من البرد ؟

ج . ماسمعتش واحد قالوا مات من البرد والله انا من فضل الله نتقت بجردى هونيه هم امنين تجي في رأس السلوم يقولك ارمى البرقان هولول الجرد من ليد ترمبه لكن من الخرط الى تشبح في الشارع الى يمشى للبابور في وسط البابور الصيبة هادى تضرب وهادى تضرب لين تحش العمبر والله فيه الى يمشى الى فمه ويرجع لهنا فيه الى مايعرفش فمه وين هوينه دارلى ربى ، وعرب ياسرة فيه الى رفع وزرته وفيه الى سيبها في مطرحها .

س . فيه من قال ان البابور الى ذهبوا فيه الناس من هنا لايطاليا ليس للادميين ، بل للحيوانات ؟

ج . البابور ، اوبالك عاد ماندرى ، والبابور كان من عنبر العنبر الى روحنا فيه البابور الى روحنا فيه من ايطاليا هادى حمل عليها بالتبن لقينا التبن فيه ياسر من العذاف والدواخ الى هذا يقىء لولا التبن لاتجد وين تقف بارجلك والباقي بنقولك للسسى لو كان مشى لا رسى تلقى فيه التبن انت .

س . نقولك على بعض الاسماء الى تم نفيهم ؟ عقيلة بن سالم الشتيوى ؟ عارفه معك ؟

ج . اى والله ياودى

س . محمد بن على بن محمد ؟

ج . نعرفه .

س . صالح بن ابراهيم ؟

ج . نعرفه هنا وغادى .

س . كريم بن مسعود ؟

ج . نعرفه هنا وغادى .

س . جاءوا معاك ؟

ج . ياودى المرواح .

س . مسعود ؟

ج . يقولوله مسعود المنتقار .

س . الشيبانى بن عمر ؟

ج . مانعرفاش .

س . ابورتيمة بن محمد ؟

ج . بوضيا بن محمد

س . عبد الله بن عمر ؟

ج . فيه .

س . محمد بن محمد من الدراهيبي ؟

ج . فيه



- س . جمعة بن عبد الله؟  
 ج . جمعة حتى هو فيه جمعة .  
 س . محمد الدالي؟  
 ج . فيه  
 س . علي بن سالم؟  
 ج . مانقدرش نقولك . . فيه الي مانعرفاش .  
 س . سالم بن عمر من الدراهيپ؟  
 س . سعد بن مسعود من الدراهيپ؟  
 ج . الي مانعرفاش مانشهد بها ياولدى .  
 س . عندك اولاد يوسف - مصباح بن محمد؟  
 ج . اى هذا بن عمى .  
 س . محمد عبدالسلام؟  
 ج . انا  
 س . علي بن ابراهيم؟  
 ج . بن عمى  
 س . سعيد بن محمد؟  
 ج . صار .  
 س . محمد الفيتورى بن عون؟  
 ج . صار .  
 س . علي بن علي؟  
 ج . صار  
 س . هذيم الستة . . . . .

## ملخص مقابلة « محمد عبدالسلام اليوسفى »

بدأ الغزو الايطالى لليبيا فى شهر التمور ( اكتوبر ) سنة 1911 م واعلنت حالة الحرب والاستعداد للمقاومة المسلحة ، وكان الراوية « محمد عبدالسلام اليوسفى من بين الذين جاءوا لمواجهة الغزاة الطليان ، مع محلة ترهونة التى يقودها الشيخ « المبروك بـ المتصر الترهونى » واتخذت الاكواش جنوب تاجوراء مكانا لتمرركزها .

وبدأت المعارك وكانت الهانى ميدانا لها ، بعد ان جاء اللييون يحملون سلاحهم البدائى من ابوصوانة وفؤوس وعصى ومناجل كما ذكر الراوية وبعد ان تم فتح مخازن السلاح التركية بفعل إرادة المجاهدين واستطاع كل واحد ان يأخذ البندقية التى وقعت عليها يده مثل الموزر ذو العشرة طلقات أو الكاباك ذو الطلقة الواحدة والبوصرة وغيرها واستطاع المجاهدون وبكل اصرار على مواجهة جيوش ايطاليا وغنم بنادق ايطالية حديثة وتسليح المجاهدون بأسلحة ايطالية وبدء الكفاح سجالاً .

يقول الراوية ، لقد حضرت عدة معارك منها الاكواش وسوانى اللمسانى قرب قرقارش والقرضابية وجنزور وابوعرقوب ومعارك العجيلات سنة 1917 م وغيرها من المعارك الاخرى وتحديث عن التموين بقوله كان تموين المجاهدين من بيوتهم وهو عبارة عن سوق ودقيق شعير وشرايح طماطم ويذكر بأنه هناك قوافل ذهبت الى بن قردان لتبتاع البطاعة من هناك ، وتبقى القافلة فى الطريق خمسة عشر يوماً ذهاباً وإياباً منهم ثلاثة ايام ( كرائتينه ) ويقصد بها عدم السماح للقافلة القادمة ان تدخل على القافلة التى قبلها حتى تخرج لتنظيم عملية الدخول والخروج .

### الطب الشعبى :-

تحدث الراوية المنفى عن الطب الشعبى بقوله « لقد استخدم المجاهدين العديد من الادوية الشعبية لعلاج جرحى المعارك وتجبير المكسورين وقد اشتهر من بينهم « رمضان العمارى » .

يقول بعد هزيمة معركة القرضابية التى تكبدها الطليان قام الايطاليين بالانتقام من العرب الليبيين من المجندين معهم أو غير المجندين ( يقصد - سكان سرت ) حيث

اعدموا عدادا كبيرة منهم ونقلوا آخرين على انهم اسرى حرب وقبل مباشرة النقل بخمسة ايام بقينا داخل الاسلاك الشائكة وبين الحين والآخر يتم نقل مجموعة وتعدم رمياً بالرصاص وقد نقل الايطاليون على شاطئ البحر احدى عشر شيخا نعرف بعضهم وهم مشائخ من ترهونة وقتلوهم جميعا وهم من المشائخ الذين ذهبوا معهم الى القرضابية على رأس باندات ، وبعد الخمسة ايام نقلت البقية الباقية على ظهر باخرة الى طرابلس وقد تعرضنا الى اشبح صنوف القهر اثناء الركوب في الباخرة وبقينا في البحر بين سرت وطرابلس يومين تقريبا ، وصلنا الى ميناء طرابلس وبقينا به ثلاثة وثلاثين يوما بعد هذه المدة نقلنا الى جزيرة اوستيكا ووزعنا على عدة سجون وكان معنا سعدون اخو رمضان السويحلي ، وقد طلب منه الايطاليون بأن يرسل الى اخيه يطلب منه المصالحة لكي تتم عملية تبادل الاسرى كما طلبوا من السجنا مراسلة ذويهم وابلاغهم على انهم مازالوا على قيد الحياة ، وقد هدف الطليان من هذا العمل لكي يحسن الليبيون معاملة السجناء الطليان لديهم وبعد سنتين في اوستيكا رجعنا الى ارض الوطن وبقينا اربعة اشهر في سجن الكراكي في طرابلس بعدها تم تبادل السجناء ، ورجعنا الى اهلنا وواصلت الجهاد فاشتركت في معارك العجيلات سنة 1917 م .

ويذكر الراوى بأنه هناك بعض الليبيين الذين باعوا وطنهم منهم « حسونة باشا » و « سلطان بن شعبان والمناصرة وخريش وغيرهم .

## مشروع تجميع الجهاد

منطقة البحث رقم 14 رقم الشريط او الاشرطة 395/14  
تاريخ المقابلة \_\_\_\_ / \_\_\_\_ / \_\_\_\_ م \_\_\_\_ / \_\_\_\_ / \_\_\_\_

الاسم ثلاثيا : رزق الله عبدالله عاشور عوض العوامي

تاريخ ومكان الميلاد : \_\_\_\_\_

محلة القبة قبيلة عوامي

اسم الام : عائشة بنت عبدالعالي

محلة القبة قبيلة \_\_\_\_\_

الوظيفة : \_\_\_\_\_

علاقته بالطرق وجمعيات المجاهدين : \_\_\_\_\_

وظائفه المدنية : العسكرية السابقة : يروي عن المنفى (سويل الجازوى)

الحالة التعليمية : \_\_\_\_\_

اللغات التى يتكلمها : \_\_\_\_\_

الجهات التى سكن بها سابقا : \_\_\_\_\_

الرحلات الطويلة التى قام بها بما لها رحلة الحج : \_\_\_\_\_

هل سبق ان اجريت معه مقابلة : \_\_\_\_\_

بواسطة من : \_\_\_\_\_

اين : \_\_\_\_\_ متى : \_\_\_\_\_

ملاحظات : حول المقابلة :

---

---

---

---

---

---

---

---

اسم الباحث الذى اجرى المقابلة : مصطفى حسن بوشيجة

- س . اسمك بالكامل يا حاج ؟  
 ج . رزق الله عبدالله عاشور عوض العوامي  
 س . عمرك ؟  
 ج . عمري في الوقت لول مافيش توريخ ، لكن ديمة خمسة وستين سنة ( 65 ) سنة .  
 س . المهنة ؟  
 ج . عاجز .  
 س . الاقامة طبعا في القبة ؟  
 س . اسم الوالدة ؟  
 ج . عائشة بنت عبدالعالى .  
 س . لمن هية ؟  
 ج . جعارية .  
 س . عندك لغات تتكلمها غير العربية ؟  
 ج . فات شوى طلياني ماعنديش لغة .  
 س . مالكشى علاقة بالطرق الصوفية ؟  
 ج . لا والله .  
 س . مكان الولادة ؟  
 ج . مكان الميلاد القبة .  
 س . مكان اقامة الوالد والوالدة ؟  
 ج . محلة القبة .  
 س . حتى ايام الطليان كانوا مقيمين في القبة ؟  
 ج . ايوه من قبل مقيمين في الذبة .  
 من بداية اللفة ( 275 ) من الوجه الثانى لشريط ( 395/14 ) ، يسأل الباحث  
 الراوية ، عن حوادث النفى ، فيجيب الراوى بالآتى :  
 س . مافيش واحد بن المجاهدين وقع في اسر الطليان ياسى الحاج ؟  
 ج . الطليان اسروا واجد .  
 س . باهى شن كانت المعاملة ؟  
 ج . اسروا واجد . . . . . والمعاملة غايي فيها انت ؟  
 س . اسروه وين في المعركة والا وين ؟  
 ج . اسروه ، هو في الحرب ، او مسكوه .  
 س . شن اسمه ؟  
 ج . واحد جازوي ، ايقوله ( سويل الجازوى ) .  
 س . مسكوه في المعركة والا من غير معركة ؟

- ج . مانقدرش انقولك ، كيف ماسكينة ، المهم هو ابندقته ، وهو راقد .  
 س . شن داروله ؟  
 ج . هذا خذوه لبر الطليان ، هذا انوريك قصته فيه ، انسيب له ، عنده بنت سيده  
 واخذها واحد ضابطيه ، وهذا مع الطليان اودلهم عليه ، اوقاله ، قول لفلان  
 ادزلى ، سكر ودخان .  
 س . ( سويل ) ؟ دز لنسييه ( ارسل له ) ؟  
 ج . ايوه دز لهذاك ، شن صار في هذاك .  
 س . دز لنسييه ؟  
 ج . هذاك يمشی إبليغ عليه الطليان ، وهذاك ( سويل ) يرجى في السكر والدخان ،  
 ورقد وهذاك لف عليه بالحكومة ومسكوه ، اوجابوه لدرة اول ماحسنوا ( حلقوا )  
 لحيته وبعدين حلقو ( فردة ) نصف من شنية .  
 س . نفوه لايطاليا ؟  
 ج . ايوه نفوه لايطاليا . . . وقال قصيدة ، تبي انجيلك القصيدة .  
 س . ايوه ارويا لنا هذه مطلوبة ؟  
 ج . هذا رأس بيت ايقول : هذول انساي . عاد بونسب الى سبيله في المسكة .

اللفة ( 208 ) هذول<sup>(1)</sup> انساي الى حسلخوا<sup>(2)</sup>

لشنابي	اوجوا	لحي	من	دنة	نص	نهار
اسقد <sup>(3)</sup>						
صقر <sup>(4)</sup>			العصر	علي	سوسة	خطم
			فيها	ماحتي	حار	
			اوعدده	في	الجيش	انخطم
الشمس			تعلت	في	المظهار	
			بناقوس		الصارخ	علم
طلق			عيطاته	جن	غيار	
			فلايك <sup>(5)</sup>	في	مرساه	عزم
غرس			دولابه		وتنار	
			وحمل	نين	الساس	سكم

1 - هؤلاء

2 - حلقوا

3 - انطلق وهنا يقصد السفينة انطلقت بهم .

4 - وقف

5 - قوارب : لنقل السجناء للباخرة .

لَقِينَا	عاد	كرابنير <sup>(1)</sup>	اعزم
نزلنا	بنين	هاف	لبيت
ظهرنا	الواحد	كلاب	اكبار
خذاديمة	ع	الشارع	ليसार
توضيت	لقت	الكراريس <sup>(4)</sup>	اعزم <sup>(5)</sup>
لقطني	عمى	داروا	شوشات
ركبنا	وجردى <sup>(7)</sup>	فمه	ميت <sup>(6)</sup>
نداوى <sup>(9)</sup>	الى	ع	النار
انت يا عين	موقصى	كان	ميسق
وقفله	مع	يلوى	اخبار
انطل	فى	بابور <sup>(8)</sup>	النار
عل	طشيش	بلا	عياط
	خارم	عقب	نهار
	محر	راعه	الصيد
	زهاك منين	بعد	بابين
	وروشن <sup>(11)</sup>	قابل	شين
	بالرومى	مديور	
	وردانيه <sup>(12)</sup>	شين	
	على	ونا	غافل
	انى	نحلف	ماعاد
	يورزم	ويسكرم <sup>(13)</sup>	
	يشوط	فى	تقول
			كبيش

محمد يوسف الدويش

1 - الشرطة الايطالية

2 - ينظر بحقد

3 - يلطم ويوبخ

4 - هربات لنقل الاسرى

5 - جاهزة

6 - مائة

7 - عيائه

8 - الباخرة

9 - من الصقور

10 - ابتعد

11 - نافلة

12 - حرمن السجن

13 - يوبخ ويؤنب

انظر سوريتي <sup>(1)</sup> x ونظر سروالى المرقع  
 ونظر هالى فى طاقيتي <sup>(2)</sup> x منها شايب راسى بقع  
 ونظر هالى على تاقى لين توقع  
 زول المسلم عنى عالم  
 ماعاد نعزم وجهى صقع <sup>(3)</sup>

س . اشرح لهم ؟  
 ج . حطوه فى الحبس وضعوا عليه واحد سولدات ، قال ، قصير ، عطيب ، لكن  
 يسوط فى ، قال

يريدنى نغسل وجهى فيه قال انا بيدى نتوضأ ، فى هذاك المحيس ، قال ادخلت  
 عليه يارا قال ماعرف لاعربى ولاخباره ، الى يقول ( ماعاد نعزم وجهى صقع ) هذا على  
 الهزايب ، قال فيه نساوين يشوفن فى الروشن قلت ، هذين يدابرن على قال دخلت عليه  
 يارا خطانى قالى ماعرف ولاخباره الى جاب عليه البيت قال ( الى ماعاد نعزم وجهى  
 صقع ) خذا الهزايب ، وقال فيه عجائز كبار يشاهدوا فى ويتغلن على ، قال دارونى قرد  
 قال ، الدار مانقدر نصبى فيها ولانقدر نام متكى طول النهار وخلاص ومعبأ المحبوس  
 فيها :

نطلب من صاحب لدهان <sup>(4)</sup> مشقت بوشقاق  
 تشيل

وهى بالسنقى <sup>(5)</sup> والساطور  
 ظهر الله الصلايين ايجولسياد تقول طيور

اينوضوا سكتة مايرجوه  
 اغربه <sup>(6)</sup> هاجم طير نكور

عساكر من خاطن ايطيحن  
 لديان طابور بطابور

(1) - ثيمى

(2) - غطاء الراس

(3) - تعود على التويخ والتأنيب .

(4) - يطلب من الله ان يزيل نصف العدو الايطالى

(5) - الحربة

(6) - جمع حراب



عشرة آلاف الميت من غير المكسور  
وعشرة آلاف الى مكسور

وعشر الاف غنيمة لسيد المنصور  
وفيه الميت والداليتور<sup>(1)</sup>

نهار يبرى شيب الزين  
الى محقوق ماهر مكسور

الداليتور هذا كيفما تقول الجنرال  
الحاكم مش تريبونار<sup>(2)</sup>

الحاكم مولاي العالم  
الى خالق للحوت طعموم

الى خالق للجثة روح  
الى خالق ربح تشلفط<sup>(3)</sup>

وموج جبال تجى عفوه دون الميجال<sup>(4)</sup>  
يسرحنا سيدى لهلل

هذه القصة :

يقول :

غلبنى دمع العين بكيت  
بعد صبيت نريد جيلنا<sup>(5)</sup> ماراعيت

بجاه الى يطوفوا ع البيت  
تجيه ارسال يطلقنا والى مازال

(1) قائد المجموعة

(2) المحكمة

(3) الرياح العاتية

(4) الزمن المحدد

(5) الجبل الاخضر

غلبني دمع العين سكب وناض يكب زواعب في ديره مغرب

غلبني دمع العين وسال قوى شتال بعد فات المرسى باميال

نعيط ياسوال البابور ظلام القور<sup>(1)</sup> خطر زادن لنظار سمور

لو كان موج وجاني في بر انجيش نوشه حزن الموح

منوض جادونا عوضنا ع الى بحر خالق نوح

نوح هو ولده (ابنه) قال : هو يزن تقول حوار

س . وهي<sup>(2)</sup> وين تصبي (تقف) ؟  
ج . وين تصبي تختار

زمان مو عام

بلغ وهي يزن تقول حوار  
البندق وتعلم

س . هذه قالها (سويل) من هو ؟  
ج . (سويل الجازوى) رفعوه لايطاليا وكان محكوم هو مؤبد لكن اسرح بعدها ( انتهى  
الحديث عن اللفه « 337 » )  
حول مسألة نفى (سويل الجازوى).....

1 - جمع قارة وهي ما ارتفع من الارض .  
2 - زوجته .

## ملخص روايه

395/14

رزق الله عبدالله عاشور عوض العوامى

يروى احداث نفى المجاهد سويل الجازوى الى ايطاليا وكانت البداية كالآتى : حيث قبضت عليه السلطات الايطالية مسلحا . ونقل الى درنة حيث خلقت لحيته ونصف شاربته ثم نفى الى سجون ايطاليا وكانت المعاملة قاسية وقد حكمت عليه المحكمة الايطالية بالتأييد ولكن أستبدل الحكم فيما بعد واطلق سراحه . وقد قال المنفى "سويل الجازوى" قصائد فى المنفى تصور ماوقع هناك من احداث وسر معاملته .

عبدالله عاشور

متاح للتحميل ضمن مجموعة كبيرة من المطبوعات من صفحة

مكتبتي الخاصة

على موقع ارشيف الانترنت

الرابط

[https://archive.org/details/@hassan\\_ibrahem](https://archive.org/details/@hassan_ibrahem)

## مشروع تجميع الجهاد

منطقة البحث رقم 1 رقم الشريط او الاشرطة 19/1  
تاريخ المقابلة \_\_\_\_\_ / \_\_\_\_\_ / \_\_\_\_\_ هـ / 1978/4/29 م  
الاسم ثلاثيا : محمد بن سعيد الهريشي  
تاريخ ومكان الميلاد : 1891 م صبراته  
محلة \_\_\_\_\_ قبيلة زواغه  
اسم الام مهدية بنت علي بن شهبون  
محلة \_\_\_\_\_ قبيلة الخطاطبة  
الوظيفة : عاجز  
علاقته بالطرق الصوفية وجمعيات المجاهدين : عروسي  
وظلمته المدنية : العسكرية السابقة : مجاهد  
الحالة التعليمية : متوسط  
اللغات التي يتكلمها : بعض المفردات باللغة الايطالية  
الجهات التي سكن بها سابقا : صبراته  
الرحلات الطويلة التي قام بها رحلة الحج : نفى الى ايطاليا  
هل سبق ان اجريت معه مقابلة : اللقاء الاول بتاريخ 1978/4/29 م  
بواسطة من : الباحث مصطفى حامد ارحومه ، واللقاء الثاني من طرف : الباحث عياد  
ساسى بتاريخ : 1981/12/21 م  
ملاحظات حول المقابلة

اسم الباحث الذي اجرى المقابلة :  
مصطفى حامد ارحومه

- الشريط 19/1 من الملف 95  
 من مدينة صراته نلتقى / بالمجاهد محمد بن سعيد الهريشي  
 بتاريخ 1978/4/29 م
- س . اسم الوالده ؟  
 ج . مهدية بنت علي بن شهبون  
 س . عمرك ؟  
 ج . عمري سبعة وثمانين عام  
 س . اقامتك هنا طبعاً  
 ج . ايوه . . الهريشي هذا دكانهم مافيش في العلالقة الا انا ( يعنى من الهريشات )  
 س . عايش في المنطقة منذ القدم ؟  
 ج . في المنطقة هذه  
 س . لحمتك<sup>(1)</sup> ؟  
 ج . لحمتي من اولاد الفقى ؟  
 س . زواغة طبعاً ؟  
 ج . قبل من زواغه ، وتوه<sup>(2)</sup> تبع الشيخ محمد الحريزي ( محلة السوق )  
 س . الحريزي في السوق ؟ الاقامة شن اسمها المنطقة هذه ؟  
 ج . سوق العلالقة . .  
 س . شمال سوق العلالقة يا حاج . . انت قلت شاركت في معارك ؟  
 ج . شاركت في بوكماش . . .  
 س . خلينا في بوكماش . . . طبعاً الايطاليون نزلوا في اربعطاش أبريل من سنة 1912  
 في ابى كماش  
 س . مامشيتش<sup>(3)</sup> للهانى مشرق ؟  
 ج . للهانى مشى سيدى مشيت له لكن كهبت<sup>(4)</sup> عليه تكهيب نهار الهجمة الكبيرة موش  
 معاهم في الحرب ، مانكذبش لا اما سيدى فيها ( يعنى شارك في معارك الهانى ) مشيت  
 وين قالولى : مات : ولقيته في سوانى بن يادم هو وسى محمد بوقرين او عندك ( حمد بن  
 منصور ) ايجى سته علالقة ، كهبت عليهم لقيتهم قعدين وحالهم باهى رجعت . . بعد  
 ماقعدت عندهم ثلاث ايام

س . مجموعه وحده

ج . مجموعة وحده ولقيتهم في قيطون<sup>(٥)</sup> واحد

س . ساعتها<sup>(٦)</sup> قداش<sup>(٧)</sup> عمرك هكي ؟

ج . ياولدى مانحكراش<sup>(٨)</sup> .

س . امنين امشوا غادى ، ماتعرفش كويس طريقة مشيتهم للهانى ؟

ج . وين مشوا للهانى ، كنت صائم .

س . باهى كيف مشوا الى سمعته انهم لمدوا اوداروا مجموعات ، من العلالقة ؟

ج . المرة لوله هدوا من «زواره» وجايين المهاجات ودايه ناس وطبل ، وعبيد يعنى افزع

اوبالك الى عنده مسواق ومسحاة وبومكحله ، بوصوانه ، وبومقرون مشت والتمت

غادى وهجمت على الهانى ، زواره ، رقدت الكل تمشى عليهم الكربة .

س . كيف ماتوا ؟

ج . هذوا ثلاثمة وخسون رقدوا مرة واحدة ، من زواره ومصراته اوبعض من العلالقة .

س . من مات من العلالقة هذاك اليوم ؟

ج . والله معاش نعرفهم ، ولاعاد نذكرهم ساعتها صغير .

س . باهى توه وين مشوا ، ماهو ساروا فى مجموعات وتحت رايات ؟

ج . مشوا فزعات ، لاتقلبه ولاشئ .

س . سمعت انهم داروا لكل مجموعة قائد معين .

ج . غادى ماندريش عليهم ، مانكذبلکش انقولك فلان بن فلان ، واما فى الاول فزعت

من هنا كلها ، وهجموا هجمة وحده ، رقد الى رقد وبعثالى هربت الناس وركبوا

فيهم بالمدافع من البروالبحر ، بالطياير . . وخشت فى سوانى بن يادم .

س . هو الشيخ (مصطفى) يحكيك على الرايس من ؟

ج . الرايس وين نعرفه .

س . باهى واصل اكويس ، الى تعرفه قوله وخلاص ؟

ج . بعد سوانى بن يادم جواللرأس الاحمر ، النصارى بينزلوا على الرأس الاحمر فى الزاوية

قالوا : العلالقة اهل الغرب يمشوا امغرب ، من الزاوية وصرمان وعلالقة ، وبعض

من العجيلات ، وبعض من هنا والناس فزعت كلها .

وقالوا ، راهو العدو نزل امغرب ، امشوا للزاوية ، بعد صارت الهجمة الكبيرة قعدوا

ياسر ، وبعثالى صار فيها الموت بكثرة ، شئ ياسر مات ، وبعدين جاء سيدى هنا من

غادى بعد مامشيت انا وجيت ، بعدها بايام فى هية خمسطاش او عشرين يوم جوا للرأس

الاحمر ، هذا امتع الزاوية ، كان تعرفه .

س . نعرفه .

ج . شدوا عليه معاش زدودوا النصارى صارت هجمه وصار فيها موت ياسر ، وعرب الزاوية هذوا ارجال يعنى فزاعه ، وعندهم حتى السلاح ، يعنى قعدوا فيه ياخس طاش ياعشرين يوم ، نقز جاء فى بوكماش اشبح من هنا جابوه من الرأس الاحمر نقز جاء فى بوكماش . فزعت انا وسيدى ، سيدى قعدتم للمجاريح هو طيب يعنى يلقى فوشيكه ساكنه يقص عليها .

س . سيدك ؟

ج . ابوه مدايرله «سوف» قيطون واللى اداوى فيه واعالج فيه ، وأنا قعدت فى الحرب ، وسيدى فى القيطون ، انا هاجمة نحضر معاهم ، رديناهم وين ماطهروا من بوكماش ، رديناهم عليها ، ركبوا فى البحر مشوا ، سكتنا فى المتاريز امتعهم ما هم دايرين قيطون .

س . فورتيات (استحكات) ؟

ج . فورتي (استحكام) قعدنا فيه ، عطش وجيعانين ظهرنا منه فى الليل روحنا «لسوف» داير قياطين اواناس ، حرب يعنى ، احنى احتزنا لقدام ، ماين الابل الى جايه الماء ، واحنى عطشنا هلبه حصلنا سبعين تراس فى الداخلى ، قعدنا فى الفوسى (الاستحكام) فيه الى الليل طاحوا مننا ، لانهم خذوا علينا النيشان (رموا علينا) من بحرا ، خذوا عليهم طيحوا سبعة رقدوا ، من السبعين قعدنا ثلاثة وستين . . . طاح الليل نتقنا جينا لسوسه ، للفرنسيين عطشانين ، مشينا من الفوسى طول ، طول ظهرنا لسوسه (بتونس) جينا للشاوش (العجيل) قال ، شنى يا اولاد بوى ، قلناله ، احنى بنموتوا عطش وجوع ، قال ، التزله بعيده والله غالب من غير ماء الماخن ، ما عندى ما نعطيكم بدأ يعطى فينا فى الماء من هذاك الماخن المهم قنعنا اشوى احنا فى سوارى اويسلا حنا ، قعدنا اشوى وقال ، كيف انديرو قلناله احنى جيعانين نبوك ادبرلنا ، ياتوصلنا لمحلتنا ، قال باهى حاضر اهلاً وسهلاً ، انى والله داير المرأ ونتبع فيكم امين ردوكم النصارى .

س . العجيل قلت ؟

ج . نقولوله (محمد العجيل) .

دوزى ابقوله (محمد العجيل) اودارلنا زوز مخازنيه ، تو (سوف) يندب اقول ناس كفر ، حتى لين جابونا المخازنيه ، ونعتونا المحلات احنا اوصلناهم وصار المهاجاة . . . وين روحنا قال ، كلكم الثلاثة وستين ما فيكمش واحد مازال انشد فى الليل شهر قعدنا مرتاحين . . ظهوروا النصارى ، نهار ثالث يوم ظهوروا عليهم النصارى ، فزعنا للملاحه جانا احنا مانعقلوا فى متاريز ، واحنا ناس اغشم قول جرحوا منا واحد وسبعين وماتوا منا سبعة .

ثانى هذا توه احنا حصلنا راحه .

- س . هذوا من الثلاثة وستين انجرحوا سبعة ثانی ؟
- ج . ایوه روحنا وفزعنا من نهار ثالث یوم .
- س . قعدت مجموع مع بعضکم انتم الثلاثة اوستین هذوا ؟
- ج . أه (کیف) .
- س . قعدت جمیع دیمه ؟
- ج . ماهی المحله کلها .
- س . هذوا الثلاثة اوستین من العلالقة ؟
- ج . هم ثلاثمة وخمسين علاقى ، ملتمين من کل ناحية یعنی ثلاثمة وخمسين بالعدد توه  
طلع هناردیناه من الملاحه ، خش بوكماش ، مترزوا فی بوكماش ، دار علیه مدافع ،  
ومن غدوه ظهر علینا الجيش الطلیانی . . . ردیناهم لبوکماش ، وقعدنا شادین ثم  
(هناک) وبعثالی واحد من الزاویه ، واحد من الصیعان ، باعوا المحله .
- س . من هذا الی من الزاویه ؟
- ج . واحد زاوی طویل .
- س . ماتعرفاش بالاسم ؟
- ج . المهم شدیناه وقتلوه یعنی هذا شاشید ، شکاره بعد باعونا . . . قال (سوف) حولنا فی  
بونومه من طویله غزاله حولنا فی بونومه تعرف ظهره کبیره جینا تحتها من قبلا . . . هذوا  
الی باعونا خذوا المیزانیة ثالث یوم طلعا علینا ابقوه بمدافعها کالونات ینتقوا علینا جوا  
غربینا ، سرقوا ، مدیفع ، استعداد طول ، مایرقدوش ، استاقظ (سوف) لهد ، دار  
سرجه ولهد ، علالقة العدو ظهر ، الخیل جت من غربا ، واحنا جینا من شرقا احنا  
وزواره .
- س . سوف هذا قائد الجماعة الكل ، والاغیر مجموعة العلالقة ؟
- ج . تمام من کل بر ، زواره سعفات ، عجیلات .
- س . تقصد (سوف) یقود فیها الكل ؟
- ج . علیها الكل .
- س . هو الأمر الکبیر ؟
- ج . کلها هو والبارونی والبارونی یمشی علینا ویجی بین طرابلس وهنا بین المحال (جمع محلة)  
اما سوف تمام مافیش کلام هو ومبروکه العلالقیة .
- س . توه هذه شارکت غادی فی الحرب ، بالمناسبة (مبروکه راجل ، صار کانت موجوده  
مع (سوف) ؟
- ج . معانا جت .
- س . بس فیہ ناس ماقالولیش علیها ، فانت لازم تحکی لنا علیها حکایة تامة ؟
- ج . (مبروکه) هذه عندها جادور ومکحله ، وین ما یحط (سوف) اتخط هی ، تضرب علی  
الحصان ، انشد علیها العلالقة الكل .
- س . یاودی مافیش واحد قالی علیها من قبل ؟



- ج . فيه كانت معانا . . . مشهورة ولكن هي في الحرب لول راهو .
- س . في الحرب لول وان كان سألت عليها واحد وقال ماعنديش عليها فكرة ؟
- ج . زمان عندها حصان ازرق ومعانا بمكحلتها وتضرب ، ابحولها ابسروالها ، تلهد في وين ما يلهد (سوف) هي قدامه وتعتبر ضرابه مليح ، وماتوليش ، وهي علاقية من امتاعين بن يونس . .
- س . هي من جماعة اولاد مسعود والا لا ؟
- ج . هي من جماعة الوحيشين ، خوها ايقوله «خويلدى» توه كيف ماحكيتلك في لول وقتلك باعوننا وماتوا منا سبعة ، والنصارى هذا الدم يجرى هكى وحصلنا الفوشيك ، وجينا لقينا مرأه ميته مرأه منهم ميته يا اولاد الفوشيك ماعندناش جو هنا حازوها طبقوها كلها واما الدمايات ، والبشكوط والفوشيك غير لد . . . لكن ماعندناش مكحلتهم ساعته عندنا كان «موزر» يعنى هنا ماحصلناش المكاحل نهار واحد حصلنا سبع مكاحل (بنادق) من نهار هذا ما حصلنا شيء كان البشكوط ، والفوشيك البشكوط طايح امكدس وكذلك الفوشيك ، والدم يجرى منهم ، البارونى جاء هنا لزواره ، دز (سوف) جواب قاله قول للعلاقة اجونى لزلطن علاقة تمام اجوا لزلطن قالو سوف لسيدى ماتمشيش الكل يرحلوا . . على ظهورنا ارحلوا اجى اوسيدى خمسطاش يوم . . توه حولنا لزواره ، (البارونى) دايريله قياطين ، احنا اوصلنا في القايله (وقت الظهيرة) جينا لنخيلات (جمع نخلة) طاحت الناس امعبيه ، والنصاره ركبوا في هذيك القياطين يطلقوا فيها النار ، الى حصل في القيطون جرده مشى وهو هرب بالصحة واحنا الى تحت النخلات قعدنا ، رعينا النار تقدر . . خشينا الخلا هربنا . . بره . . بره جينا للجنان ، ازواره خشوا الطليان .
- س . ازواره خشوا للطليان ، هكى فيسع ، فيسع ؟
- ج . هلبه فترات .
- س . توه انت انتهت من الملاحه قالولكم ، تعالوا لزلطن والا لا ؟
- ج . جينا لزلطن ، من زلطن طلقوا فينا النار حولنا للجنان ، من الجنان ظهوروا علينا من زواره هربنا قعدنا ليلتين ، اوليلة هربنا جينا في حسى البقر ، ظهوروا علينا ثانى في جهة حسى البقر ، رديناهم .
- تقريباً عامين والاعامين ونصف ، معانا الكوماندو (سوف) (والبارونى) يمشى وإجى ، (سوف) معانا رسمى .
- س . باهى جيت لحسى البقر وبعدها وين اتجهت ؟
- ج . من حسى البقر قعدنا وماك غاب رحلنا وين جينا اهنا للعيال مالقيناهمش في الفطناسه .
- س . الفطناسه هكى ؟
- ج . خذينا جاى وغادى ولمدت العلاقة كلها وروحت من شرقا ومن غربا ، درنه محله في بثر الكرمه . . .

- س . لاياحاج انت خلطت ، باهى بعدها هاجرت بعدما انتهت من حرب بوكماش ؟  
 ج . راجى توه آنى انوصلك (سوف نقول لك الصحيح) .  
 س . باهى وصلنى ايوة ؟ (قولى باهى) .  
 ج . توه موش جلينا وعيالنا وصلوا آهنا ودرنا محلة ومات نصر الفار .  
 س . لا . لا مزال هذا رآس الفار . . اجى عشر سنوات عليه ؟  
 ج . ماك فى التالى بكل ، آحنا جايين على مرتين .  
 س . أنا عارف المرة الاولى بعد مانتته من حرب ابوكماش ؟  
 ج . بعد ماجينا من حرب بوكماش ، ارحلنا الفوق منها رقيننا للحوض ، ومن الحوض مشينا لبوشول وطلعنا للغرب .  
 س . مشيت جهة تونس ؟  
 ج . ايوة مشينا لتونس .  
 س . ماتعرفش سنة قداش ؟ يعنى بعد حرب بوكماش بكم سنة ؟  
 ج . تقريبا بعد بوكماش بثلاث آسنين . ولكن مانقدرش نضبط المدة .  
 س . باهى مشيت لتونس ، الى اين مشيت الاماكن وين قعدت فى تونس ؟  
 ج . قعدت فى تطاويين ، كيف اغمروا بمطراح ايقولوله الحرة .  
 س . معاك من الجماعة الوطنيين ، جماعة . . . ؟  
 ج . معاى سيدى ، ومعاى خالى بابا هذا .  
 س . هى العلالقة الكل هاجرت غادى ؟  
 ج . ومعاى ولد خالى .  
 س . مراحل مختلفة ؟  
 ج . قعدنا مدة عامين . ولا ثلاثة . . مانقولك لا عام لا اثنين .  
 س . كلكم قعدت غادى والا العلالقة روجت لول؟ لول؟  
 ج . منها الى قعد ، اورجع بالريش فارغ . اوفيه الى قطع الغرب أونه مشى للهجرة ، أحنى مشينا لبن قردان . واحتزنا ، والبعض احتاز لوطه واحتزنا فى الكرانتية ، بدوا لمدوا فيها المخازنية داروها كرانتية ، بسعيها كلها . . وخذت ايام مشومة ومانكش غابى فى الحال . . . وبدت الناس تشكى . . الى عنده زايلة باعها والى ماعنداش .  
 مشى لقابس . من قابس ، فيه الى ركبوا لسطنبول ، احنا قعدنا فى المينا (المنجم) حولنا جيت لبنقردان . . لقيت فيه خوالى تم قعدت معاهم يحى ستة او سبعة شهور ، وقالوا الدنيا هدت رحلنا ولينا احنا ، بعدها بايام ايام جاء «سوف» من أسطنبول .  
 س . بديت الحرب ثانى . . قلت لى بدرى تيسرت اين ؟  
 ج . ايوة . . غير خلى . . جانا «سوف» فى الليل . صار الحرب ، صار الجلاء . رحلنا الفوق للجهازية ، وبعثالى مشينا الفوق لسانية لكليوبعد سانية لكليو غربت غير بصحتى موش بعيالى جيت لزواره احنا قطعتم سنة علاقة ، اوباقى التمينافى عيون الذبان ، التمينافى ثلاثمئة أو ثلاثين . . . .

- س . في عيون الذبان . . ؟  
 ج . هذه في حاشية لحداده .  
 س . وين من العسة اعيون الذبان هذه ؟  
 ج . ريتش الوطنية غريبها . ايقولها ، اطوال القوم .  
 س . ثلاثمئة وثلاثون راجل علاقي ؟  
 ج . هذوم بيحبوا السلعة موش يحاربوا ، يجيبولنا التوازن في السلعة نشروا فيها منهم هجموا علينا النصارى .  
 س . الطليان . . ؟  
 ج . وحيدة ، وحيدة ، الثلاثمئة قعد منهم يحى مئة واثنين وعشرين .  
 س . العلالقة الكل ؟  
 ج . علالقة ، ومصراة وزاوية ، وصرمان ، وصيعان ، وجبل ، املمدين من كل مطراح ، قعد منهم اجى مئة واثنين او عشرين راجل . ، وهذوا خشينا في وسطهم وقعدنا نهاجروا امعاهم ، وانعانداو معاهم وبعتالى خلشنا بالواحد . بالواحد . حصلونا وخطونا في الحبس ، من الحبس نقلونا لمدين او بعتالى جابونا لقابس .  
 س . شدوكم الفرنسيس ؟  
 ج . ايوه فرنسيسس وطليان ، مشولنا مايناش نركبوا معاهم قد ماعافروا فينا قلنا هذيم بيقتلونا ويرمونا في البحر ، ستين شدوهم قبلنا قبلنا قطعنا من هنا ، او من تونس جابونا لبزرت قعدنا فيها ستة اشهر او عشرة ايام وبعتالى ركبونا لفرنسا . . قعدنا في فرنسا ستة اشهر .  
 س . وين قعدت ؟  
 ج . في فرنسا .  
 س . واى بلاد ؟ في ليون والا وين ؟  
 ج . في العاصمة متاعهم هذه .  
 س . باريس ؟  
 ج . ايوه في باريس ، نخدموا . . وفرقونا مع الجرمان بعتالى بعد ستة اشهور رفعونا لايطاليا ، ايطاليا قعدنا فيها شهر ، وبعد شهر جابونا لطرابلس قعدنا فيها اربعة اشهر وردونا لايطاليا قعدنا فيها اطناش شهر .  
 س . اطناش شهر ؟  
 ج . اطناش شهر .  
 س . وين قعدت في ايطاليا المدة لولة ؟  
 ج . في ابريشا .  
 س . والمرة الثانية وين قعدت ؟  
 ج . المرة الاولى في العاصمة .

س . في روما؟

ج . ايوه في روما ، وبعثالى قعدنا في « ابريشا » نخدموا .

س . صار مشيت خدامة المرة الثانية؟

ج . من هنا رفعونا بالسيف من الحبس - من الكراكة قعدنا غادى موش اكل .

س . هذا بعد ما استمرت الامور مرة وحدة والا كيف؟

ج . توه لبلاد .

س . انت خليتني في المهجرة؟

ج . غير خلى . توه الى انقولك عليه ساعته طرابلس مسكرة . واحنا قعدنا في طرابلس ،

في الكراكة اربعة اشهر ، بيقتلونا ماصارش ، بيبدل بينا « السويحلى » ماصارش

الحاصل صارت فينا حالة . . ردونا هنا وازوا ( اختاروا ) التريس الصحيح .

الصحيح . .

س . من الجماعة الى معاكم ورفعوهم من هنا؟

ج . معاى ( محمد بن حمد ) لاولاد سلطان .

س . قاعد حى هذا لتوه .

ج . لا . ومعاى « على بن سبير وخالى « سعد » وعندك « التايب » وبوبكر الوصيف «

وبابا الابيض هذا .

س . وحتى الوحيشى والا لا .

ج . والمتحدث . كلا من خالى « سعد » قتلوه في طرابلس . . انت « سعد بن شهبون »

انت ضابطى وهارب بمكحلة من الحكومة قتلوه . او واحد ارحيى قتلوه خلدوا

ظهروهم من الحبس او دفنوهم ، احنا الاربعة العالقة ولينا .

نهاية الوجه الاول

متاح للتحميل ضمن مجموعة كبيرة من المطبوعات من صفحة

مكتبتي الخاصة

على موقع ارشيف الانترنت

الرابط

[https://archive.org/details/@hassan\\_ibrahem](https://archive.org/details/@hassan_ibrahem)

## الوجه الثانى (ب) من اللفة العاشرة

- روحنا هنا ولقينا الدنيا مسكره .  
س . وين ميشت ؟  
ج . روحنا .  
س . باهى وين لقيت جماعتكم ؟  
ج . روحنا هنا لقيت اهلى فى عقار ، لقيت امى روحنا وخلص ...  
س . توه بعد ماروحت هنا ، انت بعد الهجرة الناس روحنا وانت مشيت لفرنسا ؟  
ج . انا امنين مشيت المهاجرة ... من الهجرة لولة . مشوا .  
س . مش الى مشوا بكل ، الى روحوا ، ناس رجعت ؟  
ج . اكثرها روحنا ، الى مشى ، مشى والباقي روح ...  
س . وقت لروحنا هنا بديت فى الحرب ثانى ؟  
ج . بعدها بايام . . مدة طلعلنا « سوف » من غادى وقام الحرب ثانى .  
س . هذه عيون الذبان قبل الفترة هذه والا بعد ؟  
ج . عيون الذبان هذه التالية « ومنها جانا » سوف » وهذه الى حصلت انا فيها .  
س . عيون الذبان هذه الهجمة التالية ؟  
ج . عيون الذبان بأحذا اطول الصوف .  
س . انى عارفها أحدا اطوال الصوف هى عيون الذبان . والا عيون الذبان ؟  
ج . عيون الذبان فى حاشية الحدادة .  
س . هذه قبل معارك الجميل ، وبونواره والا بعد ؟  
ج . هذه بعدها انا حصلت معاش نندرى ، بعد القرضابية .  
س . صار معارك العجيلات هذه التالية مانعرفش عليها ؟  
ج . هذه الهجمة التالية الى ظهر فيها ( سوف ) الى غريان .  
س . المعارك امتع سنة السبعطاش ، والشمطاش ، الى صار منها قصر تليل  
« والدورانية » والجديدة ، والجميل ، وبشر الحلو ، هذه المعارك  
ماحضرتهاش ....  
ج . هذه الى نقولك عليها المنطقة هذه .  
س . هذه ما حاربتش فيها ؟  
ج . هذه حاربت فيها انا .  
س . بكرى قلت حاربت فيها ؟  
ج . هى هذه الى حاربت فيها .  
س . انت حاربت فى بوكماش مش هذه الى حاربت فيها ؟

ج . هذا هو منبوكماش ظهر جاي . شن بنكذيلك بالكذب .  
س . لا ماتكذبش .. انت كلامك صادق ولكنك خالفت فيها .. سامحني ..؟  
ج . انا حاربت في بوكماش . وفي المرة لولة حاربت في طويلة الصنور .

س . وين طويلة السنور هذه ؟

ج . اوينها من بوكماش قبلا .

س . طبعا محارب غادي ؟

ج . من هذه قال « سوف » حولوا . حولنا لبونومة بعد لبونومة .

س . ايه ذكرت هذا واني متيقن وانتهى الحرب ومشيت لتونس .

ج . غير خلى .

س . ماميش .. انت ذكرتهم بكري ؟

ج . مامشيتش لتونس .

س . امالة وين مشيت بعدين ؟

ج . من الحرب هذاك .. من طويلة الصنور .. لبونومة ، منه جينا لسيدى سعيد .

من سيدى سعيد جينا للجنان والجميل . هذا خاطمين . والجنان صارتلنا فيه

هجمة وماتوا منها ثلاثة . وبعثالي قعدنا ايام وتنتقنا وجينا لحسى البقر « نشربوا منه

عطشانين ، وقعدنا فيه هجموا علينا . معانا « صالح بن ابراهيم » والخييل كلها

معانا وصارت هجمة وردينا هم من هذيك طاح الليل وهربنا تاني جينا لتليل ، من

التليل ماصارش فيه حرب ، بيش انقولك روحنا وين جينا لقينا الناس ترحل شيء

ماشي لزواره وشي خش لخلاء .. جينا هنا مالقينا حد . من المحلة رحلنا وين

مشوا ؟ فاتوا . مشوا لفطناسه ، بدينا انفشقشوا ماشيين انشدوا ، لقينا عيالنا ،

قعدنا معاهم . بعثالي قالوا الجماعة معاش يصلح بيكم هنا وانتقوا حولوا من عقار

وبره فوق ومحلة اتقل لبثر الكرومة . لمينا العيال الفوق . وحدرنا درنسا محلة بثر

الكرمة في وين سيدى المهدي توه ، قعدنا ثم لين طلع علينا واحد ايقوله البقرة

ومعاه الكرابير .

س . لا . لا معليش ....

ج . ومات مننا ... ومحلطنا من الجهانية الى عقار الناس حنا من عقار وجينا في الجهانية

ومحلة اهنا في بثر الكرمة ... ظهر جانا البقرة هذا وواحد كرابير ... المحلة

ياسره بيضربوهم معانا حتى « الدريبي » قال الى هو كومانده منكم اجي يبيه

الكومانده بيعطيع فلوس .. وانا انقولك كان الى صار صار .

س . اكلامك اكويس ؟

ج . طلعنا « سوف » من اسطنبول ودارلنا حرب ومشينا من هنا للجبل ، انا بمكحلقى

قال عندكم « ساسى خزام » جانا من فوق وظهرنا ومشينا لتاغمة هذية وغريان ظهرنا

غادي وخدنا فساطو وجادو . والبيعة كلها وذهكم رديناهم . وراحوا هنايا ...

قعدنا ستة اشهور وروحنا جينا هنى لقينا البيعة الله لا يروحك والنسوان في المحال

متيسر هربت للغرب .. و« مصباح بن كريدغ » داير علة . وهذا الى من الخطاطبة .

س . الوحيشى بن صقر ؟

ج . الوحيشى بن صقر يعنى دايرين علة وحده ، والكوماندو زوز ، تعاركوا فى بعضهم ، هذا طلع هكى وهذا طلع هكى كل واحد منهم يبي ايتبع الثانى . جينا لمحلتين هذوا جو مشرق واحنا مشينا مغرب ومشينا لسانية سى ( عبد الله « احنا ومصباح بن كريدغ » مشينا لسانية سى ( عبد الله انا ومعاه « الحرارى ) من العلالقة هجمنا على العجيلات قالوا الحبش فى العجيلات هجمنا عليهم .. أسقدنا المغرب جينا للعجيلات ضربنا منها سبعة ضرارى « عمر بن بارى » منهم زوز « اثنين » وكانت هجمتنا على قصر العجيلات فى وسط القصر . صار فيها المناداة الى مات . مات بعد « نصر الفار . وبعد البيعة كلها .

س . كيف بعد نصر الفار ؟

ج . منها روحنا الى مات ومات ورجعنا لسانية سى عبد الله وبعدها تفلقت البيعة هربت للغرب فى ليلة . بعالي ، انا وامى بكل قطعت للغرب قعدنا فى الزرع غادى .. ايجى حول ( عام ) وحولنا لبن قردان . بعد بن قردان تهنت الدنيا جيت انا كهبت يعنى جيت لمنطقة الجميل لقيت اختى فى الجميل ، قالت الدنيا متهنية ياولد باباى بره هات امك وتعالى ، وليت لبن قردان رحلت امى اوجيت هنأى ... حطينا هنا .. جانا « سوف » تقربعت على جلوتين راهو ..

س . هذا بعد مامات « سيد بن عامر » ؟

ج . بعد مامشيت للغرب اوجيت ، بعثالى رحلت انا الفوق وشدونى .

س . شدوك فى الغرب والا فى الشرق ؟

ج . شدونى هنا فى الى قتلك عليها فى الاول .

س . الحملة امتعت بن شعبان وقتله فى منطقة الوادى هذيك قبل مايموت « بن عامر »

والا بعد ؟

ج . منين « بن عامر » هذه قبلها ، ومنين سلطان بن شعبان « انا فى ايطاليا .. منين

مات فى الوادى ، قالوا تكى على الجناح . طاح فى السانية هذاك جانا خبره نهار الى

مات الجرنال ( الجريدة ) جانا فى ايطاليا قالوا : عندكم واحد من هنا قلت لهم انا

مانعرفاش والحقيقة انا نعرفه خائف منهم .

س . ولدك قال : قتلت طليانى والا كيف ؟

ج . هذا فى ايطاليا .

س . كيف اقتلته ؟

ج . كان هو جايب سنقى بيقتلونى ، طيحته فى فوسى رقد واخلاص .

س . غادى فى ايطاليا اثناء الخدمة ؟

ج . نعم .

- س . ماقعد ولكش وثائق او اوراق من ايام ايطاليا ؟
- ج . اعطوني كواغط شوق ( كثير ) خلياتهن عند سعيد بن كروده . . راحوا وليتلهن بعد مامشوا بشهر ابشهرين . .
- س . معاش لقيتهم ؟
- ج . هو توفي وقعدوا عند ولده .
- س . سعيد بن كريدغ ؟
- ج . سعيد جلاغم ، ساكن في طرابلس كان تسمع بيه ، ولده ايقولوه الحاج وليتله قلت له اعطوني الدفاتر ، قال لي الدفاتر راحوا .
- س . تلفهم ؟
- ج . قال تلفتهم ماندريش عليه .
- س . اشبح الناس كانت خائفة شوى من الحاجات هذه ؟
- ج . المهم انا معاش تبعتهن لاعاد دورتهن شنو بنكذبلك .
- س . المساعدات الى كانت تحي للمجاهدين منين كنت في بوكماش ، امنين تحيكم ؟
- ج . اتجينا من الزاوص
- س . من الزاوص هذا ؟
- ج . الزاوص هذا في الغرب .
- س . الطليان بمجرد ما نزلوا على ابوكماش جوا لزواره على طول ؟
- ج . لاجو لبوكماش هو لول .
- س . وبعدين ؟
- ج . و بعد مدة جوا « لسيدى سعيد » مانكش غاي خبره الناس .
- س . يقال ان الطليان من بوكماش مشوا لطرابلس والا لا ؟
- ج . هو ( ذيل ) البعض ) في طرابلس وذيل في بنغازي وذيل في بوكماش ، يظهر من كل جهة ايحي حتى للمرسى ورديناه وجي لتليل الهجمة التالية بكل ، ورديناه . هي غير عام اويس .
- س . انا عارف كلها ؟
- ج . هي عشرين سنة والا خمسة وعشرين سنة ؟
- س . وقت الى احتلت ايطاليا وهاجرت لتونس ؟
- ج . حوشى قتلك بعد حرب ابوكماش ماقعدناش حتى حول وطلينت زواره ، وسعفات .
- حتى زواره خشوا الطليان .
- وخويلد وكافة لحداده ، قليل الى ظهر معانا من الرقابية وبالذات المحال .
- س . المدة الاخيرة وقت شدان " الدريدى " كنت هنا والا لا ؟
- ج . الدريدى .
- س . امنين شدوه وحبسوه انت هنا ساعتها والا لا ؟



ج . حبسوه اهنأ وشنقوه فى الزاوية .  
س . انت اهنى ساعتها ؟  
ج . امنين جونا هنا  
س . ساعتها فى ايطاليا وقت شدوا "الدريدى وشنقوه ؟  
ج . هوو "عبيده"  
س . ساعتها انت محبوس ؟  
ج . امقيق من معاه علقوهم فى الزاوية .  
س . ساعتها محبوس انت فى ايطاليا ؟  
ج . المحابيس ، كان "الدريدى ونصر الفار" هذا انا فى المحلة . . الى جا هم البقرة وارفعهم قاللهم هيا بنعطوا "للعجيلات" لفلوس . . وين جوا صار البارود . . سمعناه فزعنا يچى سبعة من الخيل . . . لقوه ضربوه طاح بحصانه فى مكايه الكيش . فى الكوشة ناحية المعطن . اوينه جينا ارفعناه على عمد . عطانا هذا شن اسماه العجيلى ؟ "عامر المعكف" لقيناه قداه جيناه وارفعناه للجھانية وادفناه بالمعاود . . .  
س . ماتعرفش احوادث اخرى صارت معاك اهنأ فى منطقة العلالقة ؟ يعنى احوادث واضحة يمكن تحكيلنا عليها ؟  
ج . حوادث معنى كيف .  
س . يعنى مقتل اءء الناس ، جى اثناء الحكم الايطالى ومساوى الحكم الايطالى ؟  
ج . المحلة امتعت زواره الشيبانى القوه غير اهنأ . . . اهى ليمة "على بن خليفة" تحتها روز . خير بن حميدة او اءء شيبانى ثانى قتلوه المحلة منين جت طالعة وقت مات "بن شعبان" محلته هذه من النخل الى البحر ، هذا رفعوها كلها الى جوه يطلقوا فيه النار ، حتى النخل طلقوا فيه النار .  
س . هذه حملة الكارطة بيانكو ؟  
ج . هذه فرقت الخريف .  
س . تتكلم ايطالى اكويس والا لا ؟  
ج . شوى .  
س . تقرأ وتكتب والا لا ؟  
ج . لا انا مانشبحش وهاك ترائ فى مانشبح فيك الاشوية .  
س . اكويس انت قاعد فى كامل عقلك او صحتك ممتازة رغم انك كبير فى السن ؟  
ج . تعرف انا اليوم هذا حول او نصف وانا نجرى على عيونى . . . مشيت لطرابلس ثلاث خطرات ومابوش يركبونى لاسبانيا . . .

من	قصر	بوكماش	للملاحة
ظهروا	الموزر	على	الطليان
	قدا		الملاحة
			دار
			مناحة

بدت قومنا في قومهم طياحة  
 المسلم على السكوم مدّ اسلحه  
 وذرزه للاستحكام درن عينه  
 ظهر الحيش اكله  
 وبحساب بيركب علينا الدله  
 احنى امسلمين نعاركوا على المله  
 اوقد من عرك على ملته رب يعينه  
 ظهورا قدا بونومه  
 اوجت المحلة جاملة متمومة  
 اوفيههم "محمد سوف" جده غومة  
 هو اركان الحرب بنواشينه  
 اوتحتة ضليلة ظايلة مكرومة  
 كمش فج الطليان جاء غربيانا  
 اوقلت ؛  
 له وقت اوهر احارب  
 اودلال مافتش حرم ايقالب  
 يبغى الثنية بيسكنوا في الشارب  
 يبغى الجبل ادير فيه المينا  
 اوجوه الضراري معرضين شوارب  
 في وين شن الحرب في ترينه  
 قلت له :  
 سيدى سعيد اخباره  
 ضربوا روضته ماباش يفدى ثاره  
 فيه المحلة ساكنة في زواره  
 اوفيه المحلة زاوية وعلالقة وزوارة  
 اولطلين ذل ماهو لينا  
 يالبومبة والفوشيك يصدغ فينا  
 على الفجر ربى ساعه احن علينا

\*\*\*\*\*

اوتوه انقولك على حبستى مئة واثنين تحفظهم .  
 من اللفة ( 220 ) من الوجه ( ب )

فتناه      وطن      طرابلس      يا حصرة  
محابس      باليه      مشينا      يسره  
الميه      مع      العشرينة  
وفي الحبس بالجملة وزيد شنيئة  
وفتناه      بر      العز      وتقاصينا  
ويأتوا الخواطر حايه منكره  
ريم      حازنا      ياطفل      حوزة      شينا  
نهار سبت مامنناش غايب نصره  
يدفق      كالعمية<sup>(1)</sup> ...  
ظهر رايه محروق ماشين نصه  
وعيط      قطع      تونس      وقبل      بيه  
وبينا نزل في بر موحش قصره  
قصر      شين      امجوب<sup>(2)</sup>  
لاتعرف الستصاع من الى مشوب  
بايت      علينا      سولدجي      <sup>(3)</sup>      نوب  
عجم يعبدوا في صليبهم بالكثرة  
وصابح      ترابه      جاع      فيه      يذوب  
نزلوه      في      كسوه      عطانا      حسره  
نزلوه      في      الجندرمة  
نسينا      جميع      اصغارنا      وبلدنا  
وهانا      في      حال      الكدر      ياناشدنا  
من الفحم      بتنا      حايرين      في      غصه  
وسود      ايامه      كيف      ماسودنا  
من البحر      ياتية      الكريم      بكسره  
ولنظار      قصر      شبحهم      خيرلك  
في وين تبى      حبسهم      حبسهم  
وكان      جاك      مولاك      الفرج      واجلك  
يقعد      غشش      القلب      في      محوسهم  
لاساعدوا      في      القودة  
ولايجبه      بنادم      ولا مجهوده

(1) من انواع النخيل .

(2) موحش .

(3) اصل الكلمة ايطالية ، تعنى عسكرى ايطالى .

اوتبدا العساكر واقفة ميجموده  
 وقداش وقداش فيوا خزنة السلطان  
 وقداش متخنزر ومخالف دينه  
 وقداش المسلم مع الطليان  
 عديت ميه واربعين مدينة  
 وقداش منهم تولد الرومية  
 مكاتيب من ربي وارد عليه  
 في اول اشبابي محددات ايدييه  
 مكتوب ربي راده . . وفي الحى مانحساب يطرأ هذا  
 والحيس يتحدد وليه احداه  
 وتوفى الخبزة ونرجعوا بالجية  
 ونبدا ارادع في سبتي واسلاحي  
 ونسقط عالكفار في سورية  
 ياشيخ في راس الكاف يابوماضي<sup>(4)</sup>  
 اندهت الاله اتردى لبلادي  
 ياشيخ رد الغربة  
 وان شاء الله مكتوب ماهي تربة  
 انروح ونبدا في وسط خوتي صربة<sup>(5)</sup>  
 انحدروا طاسات في البرادي  
 استاحشت بن يادم ورملة زاره  
 فيكم رقي الموزر عمل كباره  
 استاحشت ليلة بدوه  
 اوزدوه وراء زدوه وراها زدوه  
 اوبارود ماصبت عليه الندوه  
 على الى معادي دينا واسراره  
 كلي الكف بعد الكف يأكل دافر  
 بحساب اهل طرابلس خوباره  
 عمري ما نحساب ينقاموا لفتان  
 الطليان من جيش

( 4 ) يقصد بها زاوية ابي ماضي التي يقال انه اسسها عبد المولى الصنهاجي في القرن السابع الهجري ( الثالث عشر الميلادي )  
 وهي تقع بأرض اولاد عبد المولى ، احدى قبائل ككلة قرب جبل يدعى « ابو ماضي » وتنسب اليه لغربا منه . . لمزيد من  
 الفائدة راجع مقالة عبد الحميد الهرامة ، حول الحياة العلمية بالجبل الغربي في النصف الاخير من القرن التاسع عشر واول  
 القرن العشرين العدد الاول من مجلة البحوث التاريخية السنة السادسة 1984 م منشورات مركز الجهاد الليبي طرابلس

1984 ص 107

( 5 ) صر به : مجموعة

يعرف غير الماصة وبني السيسان  
يعرف غير الماصة وبني الشرشور  
يظل في الجو يدور مدة عمره  
على الحجر يبدأ منشور  
مدة عمره على الحجر يبدأ في الميناء  
ويكركر في قينة ... يتبع في الكياس وثنيه الماشينة  
يتبع في الكياس وثنبه الكريطة  
ومحلاها في الفيغة  
في المتلوى جاملة .. عملولة عيطة  
وفي المتلوى جاملة وقطعوا جداره  
منين حدر يتهارى  
وقت وصل التونسي شعلوا الكباره  
وقت وصل التونسي شعلوا الشامية  
وضربوا العصملية  
وقال الزاوس قيهر ياطليانية  
قال الزاوس قيهر طالب لفتان  
من جيش الطليان  
ادالة تكمل طالبا ذكور ونسوان  
قال انكمل طالبا انائى وذكور  
وما لم البيبور وحشدو للسلطان ودقدقهم بالكور  
حشد للسلطان دقدقهم دقديق  
طاحونة ودقيق تلاقوا زى الماصة  
وقلال ابريق  
تلاقوا زى الماصة وقلال قزاز  
في ايدين اللزاز  
صوف النعجة العارقة في نهار الزاز  
صوف النعجة العارقة واتوها اجلام  
وضرارى صيام .. وقت ادخول ابريل والرعد التتمام  
وقت ادخول ابريل وطيباب الزروعات  
فيهم خوذ وهات  
هافوا اولاد مسروله بالمنقوشات  
هافوا اولاد مسروله طلبوا الاحمال

قبرة : اصل الكلمة ابطالى : وتعنى الحرب .

والمدفع زلزال ، خلف ضرارى طرابلس مهناش ارجال  
 خلف ضرارى طرابلس (ومحمد سوف)  
 نقال المردوف تحلف برنى على المحلة جاء محدوف

\* \* \*

تحلف برنى فى المحلة رماه غليل  
 وايشتل فى الخيل سرز بشته والقفا يضح بجليل  
 سرز بشته والقفا يضح باولاد  
 جلالت لنكاد توه هافوا يارسول الله جهاد  
 توه انهافوا يارسول الله نبينا  
 مجاهد عن دينه منين يشرع طابقة موالاه يعينه  
 منين ايشرع طابقة يزيد اللقدام  
 ينحزوا الاسلام

\* \* \*

بارك الله فيك ..

س . طبعاً أيام الحرب وما بين الحربين الحرب الاولى والثانية من كان يحكم فى المنطقة  
 هذه ، وكيف اتحلوا فى مشاكلكم .

ج . المنطقة هذه امتعت العلالقة «الدريدى» ومفتاح بن عامر «ونصر الفار» هذوا الى  
 هناك ، وبتعالى وين ارقينا الفوق قدا «مصباح بن كريدغ» ، قدا الوحيشى بن صقر  
 واكثر من هذيم راهوا ما تكلم حد ، وما عداه كله سترى ويكذبوا على بعضهم . . . او  
 كان جانا واحد من غير سليمان البارونى «وسوف كذب عليك .

س . اسحاق باشا والجرم ؟

ج . الجرم هذا جاء فى التالى امنين أنا فى الحبس ، ما نندريش عليه ما نعلمش بيه .

س . صار الجرم ما حضرتاش ؟

ج . ما حضرتاش .

س . التعليم كيف كان ؟

ج . تعليم شنو .

س . أيام الحرب هذيك والا ما كانش فيه تعليم ؟

ج . لا فيه تعليم ولا فيه شىء ، دير عصاتك ، والا لقاحتك .

س . وقت الاتراك ما أدربتش ؟

ج . لافيه فرقية ولا فيه شىء عندك ، الا وين امشينا للجبل داروا علينا فرقية ما هو

مشيت للجليل قعدت ثلاثة شهور ، مشينا «لساسي خزام» وروحنا مشينا لتاغمة لسوف  
قتلنا الشر ناكلو غير في الدقيق .. خلى الدنيا سايرة ..  
س . بالنسبة للتجنيد هذا كان تطوع وخلص ، الانسان يتطوع بدون ما يقولوه تعال  
انت ؟

ج . لصار المهاجرة الناس تفزع اتخليه بقرها في المجر وتطلع .

س . صار مايقولوش تعالي أدرب ؟

ج . لا .. (ياخذ بندقيته ويسقد) (تدخل احد الحاضرين اثناء اللقاء)

س . أيام تركيا ما عطتكش سلاح او دربتكم ؟

ج . لا .

س . ما هو الترك هم الى قادوا الحرب أول مرة ؟

ج . لا حاربوا لا شيء .

س . في لحداش واللشناش هم الى حاربوا الاتراك . في الهاني كانوا معاكم الاتراك ؟

ج . الهاني ، انا ما مشيتلاش .

س . على كل حال هذا رأيك ؟

تدخل : (الترك جابلهم الطليان بابور اوروچ بيهم لاسطنبول)

ج . الترك من نهار وعيت هنا يحكموا ، ماريتهمش في الحرب ما ننديرش عليهم ، ما  
نكذبش .

س . طبعاً في وقت الحرب يقسموا فيكم تقسيم كل مجموعة تمشي فترة معينة ، فيه القادة

قاموا بالتقسيم ، امتع الجيش ؟

ج . توه أسمع انا بنقولك ، أهنا قالوا الطليان نزل في طرابلس ، وبعدها في بنغازي ،

لافيه فرقية ولا شيخ ولا امام ، يصير المهاجرة ، دير عصاتك والا مكحلتك ، وافزع .

س . صار ما فيش تنظيم ؟

ج . مكحلتك في ايديك واسقد .

س . التركيبة الى فاضيه شدها وخلص ؟

ج . بمشي طول مثلاً خمسين ، ستين ، ميتين تراس ادف امعاهم اوبره .

س . حتى امنين مشيت امغرب ما قسموكش ، امنين قالوا لكم السبعين ، ما هو

اختاروكم اختيار ؟

ج . امتعين بوكماش ، في التالي ، دارونا فرقيات على المشايخ ، داروا ثلاثين ،

اربعين ، على كل شيخ مئة أو ميتين ...

س . من شيخكم ساعتها ؟

ج . ساعتها شيخنا «على بن زايد» وقت الحرب «على بن زايد» .

س . مشوا الكل ساعتها ، الزايدية ، واجدايرية ، وغيرهم والحاج الشيباني ؟

ج . عندك امعانا «الحاج الشيباني» ، «وسالم بن زايد» ، «وسعد بن زايد» ، ونصر بن


زايد .

- س . و «سالم بن عبدالله ورحومة؟
- ج . عندك «سالم بن عبدالله» ، «الحاج الشيباني» انجرح ، «الجليدي» .
- س . رحومة بن عبدالله مشى حتى هو؟
- ج . رحومة بن عبدالله معانا ، تقريبا غير جهة زوارة ساعتها . . في الخمسة وسبعين والامئة الى مشينا وسيدى .
- س . هذه الفرقية داروها كل شيخ؟
- ج . الفرقية خمسين ، مثلا . . . مئة ، مئتين ، عشرين عشرة .
- س . ومن القائد امتعكم؟
- ج . القائد «جمعة سوف» .
- س . ما هو جماعة زواغة هذوا عليهم واحد؟
- ج . اولاد «سوف» ما هناك الا سيدى مختار وبعثالى جانا البى «سوف» «ايحى للدريدى» يعطيه معلومات ، ايحى «لمفتاح» يعطيه معلومات «مامشاش معانا غير «على بن خليفة» «الحاج خليفة بن شهبون» . . هذا على بن خليفة منين ضرباته كورة غادى .
- س . السوق (البيع والشراء) قبل وقت المحلات تحرك مع المحلة وين تمشى المحلة يتبعها؟
- ج . أين؟
- س . البيع والشرى؟
- ج . وينه البيع والشرى من غير طرابلس ، ماهناك بيع وشرى .
- تدخل «وقت المحلة غادى؟»
- ج . غادى وقت امشينا للحوض درنا فيه سوق اوفيه لحم . وبطاطة ، وتمر الى رفعاته الناس من هنا . . درنا سوق فى الحوض بس من غيره ما فيش سوق بعتالى شىء الى عنده حاجة . . . . .
- س . ما فيش لا بيع ولا شرى؟
- ج . عندك حويجة كل منها او كان هذا أرقد ، ما هى الحرب قائمة .
- الله ايبارك فيك



## مشروع تجمع الجهاد

منظمة البحث رقم 1 رقم الشريط او الاشرطة 302 / 1  
تاريخ المقابلة \_\_\_\_\_ / \_\_\_\_\_ / \_\_\_\_\_ هـ / 21 / 12 / 1981 م  
الاسم ثلاثيا : محمد بن سعيد نصر الهريشي  
تاريخ ومكان الميلاد : عمره 90 عام  
محلة السوق قبيلة زواغه  
اسم الام مهدية علي شهبون  
محلة السوق قبيلة الخطاطبة  
الوظيفة : عاطل  
علاقته بالطرق الصوفية وجمعيات المجاهدين : عروسي  
وظيفته المدينة : العسكرية السابقة : مجاهد  
الحالة التعليمية : متعلم  
اللغات التي يتكلمها : العربية  
الجهات التي سكن بها سابقا : /  
الرحلات الطويلة التي قام بها بما لها رحلة الحج : الحج ، هاجر الى تونس ونفى لابطاليا  
هل سبق ان اجريت معه مقابلة : نعم /  
بواسطة من : مصطفى حامد  
اين : في صبراتة متى : 1978  
اسم الباحثين اللذين اجريا المقابلة : عياد محمد ساسي ، وعبد الرحمن البريكي .



بسم الله الرحمن الرحيم والصلاة والسلام على اشرف المرسلين ، نجرى هذه المقابلة من مدينة صبراتة بمحلة السوق بتاريخ : 21 / 12 / 1981م الحاج :

س . أسمك يا حاج ؟

ج . الحاج محمد بن سعد بن نصر الهريشي عمرى فى 90 سنة .

س . انت قلت حضرت الهانى ؟

ج . انا ماحضرتش لكن سيدى حضرها قال ساعتها سليمان البارونى جايب سلاح مش عارف من اسطنبول لكن سيدى دهم على مصراة وخذوا منه السلاح بعدين حضر فى لول هو وبو قرين واربعة حصلوا اربعة موزر قعدوا شادين بينهم حتى صارت الهجمة الكبيرة قالوله كملت كلها مشيت من هنا مرتين فى السوانى غادى لقيناهم فى سوانى بنيادم اشبحت لقيت الحالة باهية سيدى ما طرالا شىء هو وخالى بو قرين بت قداهم ليلة وروحت ، بعد مدة حولوا للراس الاحمر قعدوا فيه 15 يوم وبعثالى روحنا هنا قالولنا اهم جو من غربا مشيت انا واياه قاله «سوف» سيدى طيب انت قعد طيب فى القيطون المكحلة سلمها قاله مانسلمهاش ابدا المكحلة مسلمها لى البارونى قاله ولدى يقعد بيها وانا نعانى المجاريح قعدت انا شاد المكحلة وهو قعد فى القيطون متاع سوف هذا الى صار .

س . كيف صار لكم فى ابى كماش ؟

ج . فى المرة الاولى فى طويلة غزالة وهم نزلوا فى ابى كماش هجمنا عليهم هربوا نخلين فيه مدفع فلسنا منعرفوش كيف نخلوه نصرفوا فيه بالبارود .

س . من يقود فيكم فى ابى كماش ؟

ج . يقود فينا محمد سوف .

س . قداش عدد المجاهدين ؟

ج . الخيل اكثر من (550) من الصيعان من زوارة من صرمان من علاقة من عجيات

من سعفات من رقايقه من كل بر .

س . من كان معك من المجاهدين ؟

ج . قبيلة زواغة :

1 - عمر الجديدى مات

2 - رحومة بن على بن زائد

3 - نصر بن زائد

4 - سالم بن زائد

5 - سعيد بن زائد

6 - محمد . . . .

الحاصل احنا 12 فى القيطون زواغه .

وكذلك - بلقاسم صقر - مسعود

- امبارك . هذا كله موتوا كلهم ليا مدة عليهم ماتوا .

س . في ابي كماش من يخطط للمعركة ومن يساعده ؟

ج . سليمان الباروني ويساعده سوف سليمان يجينا مرة ولكن سوف دائها معنا .

س . امتي هجتم عليهم في الصباح والا في العشية ؟

ج . في النهار لول هجتمنا عليهم في ضحية الصباح وهربوا وبعد خمسة ايام تجمعوا بقوة

من الجيش وجاءوا الينا تحولنا من طويلة غزالة الى ابي نومة وبعدها عليهم جاءنا الطيار

وبدا يرمى علينا واحنا لانعرفه وبعدين هجموا علينا جو ظاهرين لقيناهم هم وزريناهم

الى البحر ومات منا بعض المجاهدين ومات منهم كذلك ، وبعد ثالث يوم هجموا علينا

مرة اخرى ظهرنا لهم ورديناهم نحن من كل بر من جنزور وغرب الى الحراقة هؤلاء

كلهم فازعين وبعد ذلك بخمسة عشرة يوم هجم علينا مرة اخرى وعند هجومهم لم

يعرفوا المكان صرفوا مدافع فزعنا لهم قطعناهم منهم من هرب الى الغرب ومنهم من

هرب الى البحر ومنهم من مات لم يبق منهم أحد حتى نحن مات منا عشرون وانجرح

سبعون .

س . من هو الى انجرح في هذا اليوم ؟

ج . محمد الفاندى .

- عبد القادر الكوربو .

- عبد الله الهلاك ، توفي ضرباته الكورة .

س . من استشهد في هذا اليوم ؟

ج . على بن خليفه ، واربعة من اولاد عون وكذلك مرسال وانا انجرح في حسي البقر

في رأسي .

س . ماهو سلاحكم في معركة ابي كماش ؟

ج . فرنساسيه ، كباك ، موزر ، ابو صوانه ، المقرون ، القرايله ، وكذلك المسحة .

س . من اين تحصلتم على هذا السلاح ؟

ج . المقارين وابو صوانه هذين قدم لانعرف اساسهم اما المكحلة الفرنسية شريناها من

الغرب والموزر من سليمان الباروني .

س . الجبخانه هل كانت متوفرة ؟

ج . شويه شويه الموزر ترفع في عشرة يعطى فينا فيه سوف والباروني .

س . الطليان ماهو نوع سلاحهم ؟

ج . ابو مشط وطقطاقه ومدافع وعندهم جوز طيارات واحد ضربناه طاح في البحر

والاخر بقى ثلاثة شهور وهو يرمى فينا .

س . من كان يقود في الطليان ؟

ج . . منعرفاش لا ياودى .

س . من يقوم بتصليح الاسلحة ؟

- ج . لأحد في كل معركة نحصلوا على كمية كبيرة من الاسلحة .  
 س . كيف تقسموا الغنيمة ؟  
 ج . نأخذوها ونعطوها الى سوف والى معنداش يعطيه وكذلك الى عنده نوع قديم يغير له .  
 س . في ابي كماش انتم الى هجتم ؟  
 ج . المرة الاولى لما جاءوا الى القصر في الليل داروا فيه مدفع الى استيقضوا في النهار نحن مدايرين دوريه نحسوا بيهم قال سوف اهجتموا عليهم مدام هم اقله هجتمنا عليهم هربوا الى البحر لما جئنا الى القصر لم نلقى احد لم نجد سوى المدفع وبشكوت وفوشيك بدأنا نضرب الى أن استنفدت كمية الفوشيك لعدم معرفتنا استعماله وبعد ايام هجتمنا جئنا الى ابو نومة كل مرة يظهروا علينا نردوهم قعدنا مدة ولما قل الفوشيك والمعاش والدقيق الناس لعبت في بعضها .  
 س . هل عندكم شوافه ؟  
 ج . نعم . نديروا في تراسه فيه ناس معينين وفالحين .  
 س . الناس الى جندتهم ايطاليا هل قاموا بمساعدتكم ؟  
 ج . لا . . انما هم يقيموا بقتلنا .  
 س . هل هناك ناس من بينكم يساعدون الطليان ؟  
 ج . من ناسنا نحن لم يكن هناك واحد متعاون معهم .  
 س . قبل ماتبدأ المعركة هل قاموا بتقسيمكم الى مجموعات . مجموعات ؟  
 ج . كل قبيلة وحدها كل قبيلة مدايرين قباطين وساكنين بروحهم ؟ عجيلات برواحهم علافة برواحهم ؟  
 س . انت مع من كنت ساكن ؟  
 ج . مع العلافة ويقودنا سوف .  
 س . ماهو الوقت الذي حدثوه للهجوم ؟  
 ج . النهار الاول الضحى والنهار الثاني ظهروا علينا الساعة العاشرة بالمدافع والحباش والبغول والنهار الثالث هجتموا علينا .  
 س . في أى وقت انتهت المعركة ؟  
 ج . قعدت ثلاثة شهور .  
 س . هل اتت لكم بنجدات ؟  
 ج . ماجانا حد .  
 س . في النهاية لمن كانت الغلبة ؟ انتم الى انتصرتم والا هما ؟  
 ج . احنا منصورين . . الى يظهر يقولوله سلام عليكم .  
 س . كيف كانت خسارة العدو ؟  
 ج . الدم يجري لما نأتو الى اماكنهم نجدوا الدم والبسكوت والسلاح والفوشيك يعبى شكاره .

- س . هل اسرتم احد ؟
- ج . كان امراه .
- س . هل هم اسروا منكم ؟
- ج . لا احد .
- س . هل تقوم بعملية تبادل الاسرى ؟
- ج . الى نحصلوه في التالى بوكل يقوم سوف بيعته الى الجميل حيث يقوم بشنقه يحى ثلاثة او اربعة شنقوهم .
- س . اين اتجهتم بعد ابى كماش ؟
- ج . قعدنا في ابى كاش الى قعدناه بعثالى الدوه لعبت فيه شى في زوارة الى طلين وفيه الى رحل الى برقات الحنانشه وبعثالى العلالقة روحنا للعجيلات وزوارة وخويلد ونوايل كلهم غير الصيعان والعلالقة وبعثالى روحنا لقيناهاهم هربوا الفوق خشينا الخلاء .
- س . بعدها هجيتوا ؟
- ج . هجيننا وصلنا تحت الجبل .
- س . ماصارش معارك ثانية في الجبل ؟
- ج . بعد ماتنا الطليان على الغرب وبدا يدور من شرقى على مصراة وعلى فزان وجاءنا من فوق وين جانا من فوق هربنا الى الغرب شىء في الهجره في تونس .
- س . نزلت في العسكرية ؟
- ج . ..... لا ..
- س . المجاهدين شنو كان يسموكم ؟
- ج . مجاهد بجردونا لكن لما نمشوا الى الحرب بسوارى حزامك على بطنك .
- س . هل هجم الطليان على تلليل ؟
- ج . في تلليل هجموا ظهر بوريشة يبي ابو عجيله شوى ردوه ماتوا فيه جماعة لانعرفهم وردوهم الى البحر وبعدها خشوا الى العجيلات . جثنا من فوق من سانية سيدى عبد الله هجمنا عليهم ومات منا كثير تقريبا سبعة وهم لانعلموا عليهم هونى سوف بعثالى معادش غرب دار في ناسنا مصباح بن كريدغ والوحيشى بن صقر «داروه مولى الاحمال في الحول والنصير ماحضرتاش في الجديد والطويلة حضر فيها النصير .
- س . في الجميل هل حضرت معركة ؟
- ج . معركة في الجنان احنا العلالقة مروحين العلالقة كل مروحين والجماعة هوك معادش مروحين من ابى كماش جاى وقت الى جانا هنا لمينا رقدنا في المنشيه ونوضنا الفجر جثنا الى جنان بن نصيب نبوا انديروا فيه شاهى ظهوروا لنا النصارى وعرب جاؤنا بيقطعوننا نحن العلالقة فقط معنا سبعة زاوية ومعنا سبعة رقايقية بس لما ريناهاهم قمنا لهم وبداءنا نعطوا فيهم النار هربوا رجعوا الى زوارة .
- درا قنية وهربنا جينا الى حسى البقر بتنا فيه الى انجرحنا فيه انا وعند الفجر وجدناهم ظاهرين من مليته كيف الديون بيقطعوننا نحن يحى خمسون تراس خفنا ان

ينظرون ارقوا الى الرأس بحريهم الظهاري عاليات طيحوا فيهم راكم ميتين ميتين طحنا فيها المرة قالوا مانضربوش خلى ياسروننا ياجماعة خلى يؤسروننا نحن ميتين ميتين صرخو وجه اعطوهم بتارية او اثنين وجاءنا الطيار يرمى علينا في الطقطقة فيه الى انجرح وفيه حتى مات وانا انجرح كذلك ولو علينا الى مليته درنا احنا قنينا وهربنا مروحين لما جئنا هنا لقينا البلاد تغرد كان قطاطس درنا واخذنا المكر وبدانا ماشيين انا وين جيت في بئر الكرمة طحت راسي انتفخ ورفعوننا وروحت منها قعد سيدى سمع بينا في الجفارة قعدت المكحلة عنده وبعد مدة جانا (سوف) من الهجرة جاء الى غريان قال نبى من جنزور الى العلالقة الى عنده مكحلة ياتى الى درت انا مكحلة وجئت ومشيت اليه وحدناه فى تاغمه وبعدها جانا «ساسى خزام» «جايب مكحلة كبيرة من فوق لما لقينا نحن السبب جاء من شرقى ونحن رمونا فى وادى كبير وقالوا لنا مانضربوش الى ان يوصلوكم يمشى ويجينا سوف ويقول مانضربوش شويه الخيل شوره رعوهم شدين الخيل دار عليهم دوران من فوق احنا ماحضرناهمش الرمي فزعوهم سبعة من الخيل من القدام واحد مدايرين اعلام و(ساسى خزام) على حصان اسود المهم عندما راوهم لهدت عليهم الخيل يجي خمسمائة وخمسين لهدوا عليهم وقلفطوهم كلهم هرب هو الخيل هرب سرب وعندما لحق بهم الخيل مسكوا منهم ثلاثة جوادير واربعة هربوا الخاطر شدوه كله اخذوا مكاحله وطلقوه وجابوه (لسوف) قال لهم هاتوا المكاحل وفركسوا الى عندهم قعدت خمسة عشر يوم وبعثالى روح وروحنا هنا وقالوا لنا هجموا على العجيلات الحاصل الناس جياعانه هجمنا على ابو عجيله ماتوا منا قطعه وروحنا ومنها مشينا الى الغرب قعدت شهر او اثنين وروحنا الى ان جانا الطليان هنا .

س . كيف هجم عليكم الطليان فى العجيلات ؟

ج . لانحن الى هجمنا عليهم نحن قاعدين فى الجفارة وهم موجودين فى القصر قصر العجيلات قالوا الجماعة بنهجموا عليهم معانا (مصباح بن كادير) ومعانا (الوحيشى بن صقر) هم قسموا على علتين هم تعاركوا فى بعضهم الاثنين (المجلس) قال علاش هيا ديرو تسريب الى يربح يربح (مصباح بن كادير) تبعناه وحصل ثلاثمائة والوحيشى حصل على مائتان وخمسين وبعد ذلك رحلنا نحن ومصباح الى مليته بعد ذلك قال لنا نحن نريد ان نهجم على بوعجيلة مدام الوحيشى لايريد الهجوم هجمنا على بوعجيلة ماتوا منا اثنين عمر بالقاضى وبعدها روحنا .

س . من هم الذين استشهدوا من هم الى انجرحوا ؟

ج . انا نعرف الى ماتوا .

1 . المبروك بن عمر بالقاضى

2 . عبدالله بن عمر بالقاضى .

س . من هم الذين شاركوا معك

ج . مئة وخمسين من العلالقة فقط .

س . هل كسرتم الطليان ؟

- ج . هم الى ضيعونا .
- س . هل حاربوكم بالطائرات ؟
- ج . حاربونا بالطقطة والبارود ولم يحاربونا بالطائرات .
- س . من كان معك من القادة الكبار (الكوماندو الكبار)
- ج . سعيد بن عبد الرحمن . - احمد الدريسي - ضوبالحاج - هذولا اهل المجلس احنا نقولوا مجلس الى يقودوا في المحلة . .
- س . اين اتجهتم بعد معركة العجيلات ؟
- ج . دخلنا الى الغرب الى تونس عاملونا الفرنسيين معاملات قاسية . .
- س . هل ذهبت الى تونس ؟
- ج . الى بن قردان فقط
- س . كم بقيتم هناك ؟
- س . مدة شهر .
- س . هل اخذو منكم السلاح في البوابة ؟
- ج . اخذوا منا كل ما نملك حتى الماشية ، الجادور يأخذوا فيه بخمس ليرات والبقرة بليرة والمكحلة اخذوها بكل .
- س . هل كل من هاجر جمع الى ارض الوطن ؟
- ج . البعض منهم ارجع .
- س . عندما رجعتم هل وجدتم كل املاككم موجودة ؟
- ج . الطليان لم يأخذ منا اراضى سوى دفع ضريبة بسيطة .
- س . هل يقوموا بحرق منازل عند قدومهم ؟
- ج . لا اما عندما جاءت زوارة فقد قامت بحرق المنازل وقتل كبار السن .
- س . متى هجمت عليكم الباندة ؟
- ج . عندما مات سلطان بن شعبان .
- س . ماهو السبب الذي ترك سلطان بن شعبان ان يسلم زوارة ؟
- ج . لانعلم عليه قال باعها هو واحسونة باشا .
- في التالى مدايرين محلة جاءنا واحد يقول لله البقرة جاءنا هو واثنان من الكرباناليه احنا عاملين محله في بشر الكورمة والعجيلات عاملين محلة في غوط الديس نحن موجودين للعسة فقط وليس لنحارب نحن ثلاثائة عند الساعة العاشرة عندما نفرناهم نريد ان نضربهم لكن الدريبي ونصر الفار ومفتاح بن عامر رفضوا الضرب وقالوا يأتى الينا واحد منهم مشى اليهم ارحومة بن على قالوا هل يوجد الدريبي نعم موجود وقالوا له نصر الفار ومفتاح بن عامر موجود قال لهم موجودين قال لهم لا بد ان يأتوا لان الحكومة تريد ان تعطيهام معاشهم في العجيلات منهم من رفض الذهاب وهرب وذهب نصر الفار ومفتاح بن عامر حيث رفعوهم الى المشنقة في قصر العجيلات وقتلوهم بالمسدس ثم وصلنا خبر موتهم على اثره هربنا .

س . يا عمى الحاج انت قلت انهم اسرونى فما هى قصة اسرك ؟  
ج . عندما هجمنا على الوطية ب 350 تراس حيث قالوا لنا ان الوطية ليس بها احد سوى بعض النصارى والعسكر جهزنا امورنا وذهبنا والحقيقة التى وجدناها هى ان بها عسكر كثير وعند وصولنا سألنا شخص صومعى حيث قال ان المحلة كبيرة ولا تستطيعوا التغلب عليها نحن جئنا ولا نريد الرجوع فعلينا بالهجوم حيث هجمنا عليهم قتلنا منهم ثلاثة وبقينا فى مكان ليس ببعيد حيث قام الطليان بالاتصال باعوانهم حيث قدم من الجبالية ومن زوارة ومن خويلد وسعقات ومن الريانية حيث بلغ مجموعهم 15 الف حيث هجموا علينا بسرعة ولم نستطع المقاومة فاسلمنا اسلحتنا ومات منا حوالى مئة مجاهد وخمسون هربوا والباقي اسرونا منهم من اتوبه الى زوارة عملوا اشارة ستون واحنا هربنا حيث نزلنا فى حفرة وهربنا الى الفرنسيس طلبنا العفو من الفرنسيس فقال لنا الفرنسيس لا بد من الاتصال بالاطالين فاتصلوا بهم وطلبوا منهم ان يأتوا بنا الى بن قردان فرفعونا الى بنقردان حوالى مئة واثنان وعشرون رجل حيث قاموا بسلبنا من جميع ماملك ورفعونا الى قابس حيث بقينا فيها اربعة عشر يوما وبعد ذلك رفعونا الى تونس ومنها الى بنزرت بقينا فيها ستة اشهر وعشر ايام نخدم الكردون حتى قتلنا الشر رغبنا فى الاشتكاء الى احد ولكن لا يوجد احد نشتكى اليه فكنا محاصرين بالاسلاك الشائكة .

س . بالاضافة الى حبس هل كنتم تشتغلوا ؟

ج . الكردون خمسة وعشرون كيلوا نشتغلوا فيها من الضى الى الضى اربعة عشر نفرا فى خبزة كيلوا بقينا فيه مئة يوم بعد المئة يوم ينقلوننا الى فرنسا حيث خدعونا قالوا لنا ان البابور سينقلكم الى اهلكم فى طرابلس لو كنا نعلموا بالخدعة لرفضنا ذلك حتى ولو ادى ذلك الى قتلنا والى خدعونا هم اناس عرب بنزرت من تونس ، ركبونا واقفلوا ابواب البابور وبعد ثلاثة وجبات غذائية نزلنا فى فرنسا وذهبوا بنا الى العاصمة واستغرب العسكر الفرنسى امرنا فاستفسروا منا فقلنا لهم اننا نبحث عن عمل وقادمين من طرابلس ، فاذا قلنا لهم اننا حثنا لنحارب لقاموا بقتلنا ، بقينا مدة ثلاثة شهور نشتغل فى «بار» شرب وكان معنا بعض من الجerman ، بقينا ستة اشهر فى فرنسا وبعدها تحولنا الى روما عن طريق الطائرة ومن ميلانو اتينا الى نابلى ومنها طرابلس قعدنا اربعة شهور ، قالوا لنا ان السويحلى عنده عسكر يريد ان يبدلهم بنا ، فقال السويحلى انا لا ابدل باهل الشط لان اهل الشط مطلين اما من غريان ومصراته وترهونة وما فوق ابدل به ، نحن وجدنا اخوة السويحلى وقد قام بتبديلهم اما نحن اهل الشط فرفض التبديل بنا بقينا فى السجن اربعة اشهر ثم قال لنا اريد ان اقتلكم فاخروجننا من السجن اثنان اثنان فاحد المسؤولين الكبار قال له ان قتلت احد فسوف اقتل السبعمئة الموجودين عندى فتراجع عن عملية القتل فكانت هذه العملية سببا فى ذهاب عقول كثير من المجاهدين نتيجة الصدمة وبعد ذلك اختار منا مجموعة وكنت من بين مجموعة 75 خمسة وسبعون وكذلك قام بصرف لنا ملابس تتكون من (بوجلولا ، وفاشة ورقم) وبقينا فى ابريشة مدة اثنا عشر شهر نشتغلوا بثلاثة قروش فى اليوم وبعد مدة رجعنا الى طرابلس وجدناه مقفلة بقينا فيها (8) ايام ورجعنا الى الصمعة الحمراء اعطوا لنا



تصريح بعد اقتناعهم بظروفنا وعند رجوعنا وجدنا اهلنا خارج فوجدت امي في غريان ،  
فقد كانت معاملة الفرنسيين اصعب من الطليان والحمد لله في عهد الثورة نسيناه .

المجاهد المذكور احد الليبيين الذين ابعدتهم السلطات الايطالية عن ديارهم في  
1917 .

وقد تحدث في بداية روايته عن قضايا تتعلق بالمعارك الاولى مثل الهاني ، وابي كماش ،  
وغيرها من المعارك الاخرى . . بالاضافة الى الهجرة الى تونس وعودته فيما بعد الى ارض  
الوطن . . وانضمامه الى صفوف المجاهدين ، كما يشير ايضا الى عودة كل من الشيخ «محمد  
سوف» وسليمان الباروني من اسطنبول في سنة 1916 م . .

ويوضح كذلك انه هاجر ثانية الى تونس وبقي فيها مدة عامين او ثلاثة وعاد ليستأنف  
الجهاد مع الشيخ «محمد سوف» .

ثم هاجر الى تونس للمرة الثالثة وهناك قبض عليه واودع السجن ومنها نقل الى فرنسا  
للعمل لمدة ستة اشهر ، ومن فرنسا نقل الى ايطاليا حيث بقي فيها مدة شهر ، واعيد الى  
طرابلس ليوضع بسجن الكراكة ، وبعد ذلك نفى ثانية الى ايطاليا وبقي في كل من روما  
وبريشيا وعلاوة على اخباره هذه يذكر اسمااء بعض ممن تم نفيهم معه . .  
ويروي عدة قصائد منها القصصية التي مطلعها .

فتناه وطن طرابلس يا حسارة

محابس بالمية مشينا يسره

## مشروع تجميع الجهاد

منطقة البحث رقم 2 رقم الشريط او الاشرطة : مقابلة غير مصنفة (شريطان)  
اريخ المقابلة \_\_\_\_\_ / \_\_\_\_\_ / \_\_\_\_\_ هـ 6 / 8 / 1988م

الاسم ثلاثيا : سالم بن منصور الصابري  
تاريخ ومكان الميلاد : 1908م / القواسم / غريان  
محلة قبيلة القواسم  
اسم الام : كافيه الحاج المبروك بن سليمان  
محلة قبيلة قيزان

\_\_\_\_\_ : الوظيفة :

علاقته بالطرق الصوفية وجمعيات المجاهدين :  
وظيفته المدنية او العسكرية السابقة : أسر ، ونفى الى ايطاليا ثم جند اجباريا ضمن  
الجمالة

الحالة التعليمية :

اللغات التي يتكلمها : يتكلم بعض المفردات باللغة الايطالية  
الجهات التي سكن بها سابقا : غريان / جتزرور / طرابلس  
الرحلات الطويلة التي قام بها بما فيها رحلة الحج :  
هل سبق ان اجريت معه مقابلة : لا

بواسطة من :

اين : متى :

ملاحظات : حول المقابلة :

أسر ونفى الى ايطاليا في 1917م ، وبعد عودته جند اجباريا ضمن الجمالة (مايعرف  
بالكبروانه)

اسم الباحث الذي اجرى المقابلة : محمد بن عبد النبي

- في مساء يوم السبت 6/8/1988 م بمدينة طرابلس ، منطقة الفلاح نلتقى بالحاج .
- س . ما اسمك ياسى الحاج ؟
- ج . سالم بن منصور الصابري .
- س . تاريخ ميلادك ، انت من مواليد سنة كم ؟
- ج . عمري يحىء قريب ميه توه ، عام الغطاس انا نعرف ، عام الشر .
- س . قداش عمرك عام الشر ؟
- ج . عمري والله مش امسجل مانعرفاش غير بالتهمة ؟ ( بالتقريب ) ؟
- س . امين خش الطليان قداش عمرك ؟
- ج . عمري ايجىء ثلاث اسنين او اربعة .
- س . من مواليد 1908 ؟
- ج . ايه هكى . . . . .
- س . مكان الميلاد وين ؟
- ج . غريان .
- س . ما اسم الوالده ؟
- ج . مستالده في غريان .
- س . قبيلتك امين ؟
- ج . البحرية ، القواسم .
- س . اسم الوالده ؟
- ج . كفايه الحاج المبروك بن سليمان .
- س . نفس القبيلة ؟
- ج . ايه من نفس القبيلة .



س . من القواسم حتى هي ؟

ج . من قبيلة اخرى مش قبيلتنا من قيزان .

س . هل سبق وان قابلك احد من قبل ؟

ج . لا ...

س . ماهي وظيفتك وقت الجهاد ؟

ج . وقت الجهاد انا صغير امنين خش الطليان هنا وعمرى يجي ثلاث سنين او اربعة ومشيت للصمعة الحمراء هذى الترك داير فيها السلاح والشيء .

س . مشيت وانت صغير عمرك اربع سنوات ؟

ج . ايه مشيت قلت بالكش نحصل حتى انا سلاح ، وانا صغير « دنقوز » هكى نعرف شوى شوى وين جيت الدنيا يقلبوا فى الصندوق على بعضهم والله ثلاث ارقاب الى توفوا هذاك الكابنيون هذاك يقلبوا فى الصندوق على بعضهم وتسلمت عرب ، والترك مشى لغريان بعدما جاء الطليان ، وحازت العرب هذاك السلاح والرومى توه قاعد على ظهر البحر فى الفراقيط ، ضربوا منه الترك ثلاث فراقيط والا اربعة وغلبوا قبضوا مشوا لغريان والناس كلها فى الخزنة هدى امتاعت الترك هدون تسلمت من مزرقتها لمغيها كلها الى يرفع سته سبعة بنادق يغيروا عليه فى الطريق يفكوهم منه يعطوه وحده وتبدد عليها السلاح هذا وخلاص .

س . انت ومن جيت من غادى ؟

ج . انا هنا فى طرابلس هذاك الوقت عندنا سعى فى الظهرة قاعدين معاه .

س . هل حضرت يوم معركة الهانى ، يوم الاثنين ؟

ج . يوم الهانى انا فى الظهرة .

س . وامنين شدوا الناس فى المنشية وقتلوهم ؟

ج . شوق ماشدوا .

س . هل تعرف حد شدوه ؟

ج . وين نعرفها الى شدوهم ، احنا صغار وين جينا فى سانية الميلوقى فى الظهرة توه بدوا يشدوا فى الناس ويقتلوا فيها ، قلنا احنا توه شنى .

س . اين يقتلوا فيهم ؟

ج . فى الشوارع فى كل بقعه توه ظهرنا من السانية فيه نخل هكى درنه طبيقات رطب زعميته باش يوصلونا للمدينة ، زعميته باش مايقتلوناش ، درنه هذاك الرطب ومشينا وين جينا فى المدينة شدونا دارونا فى مكتب الصنايع الى يشدوه لايهود لانساوين الكل داروهم فى مكتب الصنايع لمدونا فيها نساوين وعواويل صغار .

س . هل ضربوكم الطليان ؟

ج . نعم شنه ضرب كل مره يدخلوا اربعة خمسة يقتلوهم قدامنا على الدروج ، فيه دروج يرقوهم فوق من الدروج يجيبوهم مسلسلين ويقولولهم بتاريه هكى ، والى الفوق ( على سور المدرسة ) يتبولوا علينا .

- س . هل تعرف من الذين استشهدوا هذول ؟
- ج . هاللى استشهدوا مانعرف منهم حد جابوهم من بره وقتلوهم ، سبعة جابوهم مسلسلين وقتلوهم فوق هذيك الركابة طلقوا عليهم باتاريه .
- س . قداش يوم قعدتوا فى مكتب الصنايع ؟
- ج . قعدنا فيه اجىء خمسة ايام والاسة ، بعدها وازوا هاللى يسروهم ورفعوهم لايطاليا عندى عمى ( الميلوقى ) هذا يسروه .
- س . مااسمه ؟
- ج . ( سالم الميلوقى بن الصابرى ) من القواسم هذا مشى لايطاليا .
- س . قداش قعد غادى ؟
- ج . قعد اشبح مانيش عارف قداش قعد ، وبعدها طلقوهم روحوا .
- س . وانتم ؟
- ج . واحنا ياسيدى هذاك طلقوا اليهود والنساوين والاطفال واحنا صغار طلقونا .
- س . عطوكمش حاجه تاكلوها ؟
- ج . شن يعطوا فينا اهواء والله يبولوا علينا بول .
- س . مايضربوش فيكم ؟
- ج . يضربوا ، فيه اللى يقتلوا فيه غير . . ماتكلمش بس واللى يكلمهم والا جاجة يقتلوه .
- س . معكم نساء ؟
- ج . ايه نساوين وتريس وعواويل واكل .
- س . هل تقدر عددهم قداش ؟
- ج . فندق ، مكتب الصنايع هذا ميرط فيه ايجى اربع الاف والا خمس دايرينهم فوق مننا يتبولوا علينا .
- س . الى رفعوهم لايطاليا ياسرين والا شوى ؟
- ج . الى رفعوهم لايطاليا ييجى شباين هذوم رفعوهم هذا هكى انا توه مشيتى لايطاليا مازالت ، قعدنا بعدها ظهورنا من مكتب الصنايع ، قعدنا مانيش قداش ظهورنا قعدنا عاد ولينا لسانية الميلوقى قعدنا فيها . بره ، بره ، بره لين تقوى الطليان وقالها دف القدام ، مشى لغريان ، توه احنا وين بنمشوا قلنا هيا نمشوا حتى احنا نروحوا غادى .
- س . رقيتوا لغريان ؟
- ج . رقينا لغريان .
- س . بعد وصول الطليان اليها والا قبل ؟
- ج . بعدما وصلها .
- س . ماكلموكمش الطليان ؟

جـ - ماكلموناش جينا لبوغيلان عندى انا اختى اعطيناها لواحد قدبرى شنباشى مع الطليان واخذ لاجيه فى بوغيلان دايرين لنا هكى تبقيش نبيعوا ونشروا قعدنا توه يذبح

هذاك الثور يقول ويأخذ في الشحم امتاعه والدواره وهكى يديرلى فيها على بهيم نرقى  
انبيع فيها ، للعرب الى في القواسم فوق ، ماهى الدواره لحم وافواح واحد الى هذا  
يشريها نجبيله حقها ونجى جاءه الامر هو شنباشى ، جاء الامر قالوا له بتمشى  
للحرب .

س - اى حرب ؟

ج - حرب مصراته . . . مات في مصراته قعدت اختي بطنها مليانه قعدت لين زادت  
ولد قعدنا نعانوا فيه حتى لين دار حوش هنا (نصر) يقولوله نصر القديرى بعدها مشينا  
عرفنا به عنده ملك سانية وعرفنا به واستعرف بعياله وجاء لعياله في الزاوية قاعد لتوا ،  
توه بعدها عاد احنا ، الطليان زروه من فزان لطرابلس اكل دفوه روح شوره صاير له  
حرب في الدواخل عبو القوه امتاعه كلها رفعها .

س - وانتم هذاك الوقت في غريان ؟

ج - احنا في غريان ، توه بعدها مشى الطليان احنا حارثين في قطيس والزرع صابه جوه  
هذوك لمحال ، الى جئت من فزان لكل بقعة يجيب فيها طريق السكه يجى مقدار يجى  
عشرين نادر زرع هذيك الصابه الى بديال السكه طلقوا فيها النار الطليان هارين الى  
نابت الكل رحوه قعد شعير صافي قعد غير التبن .

س . هل سمعت بمعركة القرضابية ؟

ج . القرضابية هذه صار فيها حرب ومات من الطليان هلبه قوة كبيرة فنيث

س . معركة مرسيت ، فروتن ؟

ج . ماعرفتهش ، ماغديش بيهم معرفه كان هذا نسينا هذا قالولنا مات وخلاص .

س . وين مات ؟

ج . مات في مصراته هذا الشنباشى .

س . عندما جى الطليان من غريان وبقي هنا في طرابلس انت وين ؟

ج . هذاك التاو ياسيدى قعدنا ايام يجى عامين والا ثلاث وبعدها قلنا هيا بنمشوا  
ندبروا البلح ، في جنزور بعد الطليان ، ومدينة طرابلس متكسره ، الطليان ماظهرش  
بره من الحبيله وفي زواره حتى هى وفي بنغازى هذا الكل حايزه الطليان والى بره عرب  
جايه تى تدبر بلح ، وفي جنزور جايين شويها وبهم صحراوى جايين عليه  
الدبش .

س . الكل جيتوا ؟ حتى بوك وامك ؟

ج . امى واخوت وخلاص وبوى ميت بكرى قبل الطليان جينا عاد درنا البلح .

س . في اى مكان بالطبط في جنزور ؟

ج . في جنزور في نفس السوق ، وماهو العرب هوينه هجموا على الجباليه وصار ماصار  
وخشوا تحت الطليان يقروا في صغارهم وقعدوا توه واتا فيهم العرب قال (بن شعبان ،  
والقريتلى) هذوم العرب واتا فيهم جايين للبلح كلهم من زواره لجنزور ، الشط كله  
مليان بالعرب جايه من بره يدير البلح عام شر ، جت كلها جمله من زواره الى جنزور

وقالها داروا قوة من هنا من طرابلس ودار قوة (بن شعبان) من زواره وطبقوا عليها  
هاخلق كلها قتل وسلب وحيوان وابل وجروود وماخلوهاش ، الحيوان هذا من الوجه  
لاحد النخل من بره هذا يحوشوا فيه الكل دخلوه لطرابلس وقعدنا توه هذاك البهيم  
رفعوه حتى هم يحى اربع نعاج .

س . لذك سلاح فى تلك الفترة ؟

ج . لا ، عمرى عشر سنين فى هذاك الوقت ، قول ياسيدى عاد قعدنا بره وين خش  
الطليان وتمركز (القرىتىلى) فى جنزور (وبن شعبان) هذا جاء من زواره . . . العرب كلها  
هذيك يزيد على العشرين الف والا خمسين الف بنادم الى قتلوه والجروود هذوم شبك  
معبيينهم بالجروود ، كيف ماتعبنى التبن معبيينهم على البل فوتوهم لطرابلس  
س . من هم الاعيان والمشائخ للذين معكم فى جنزور ؟ او كباركم ؟  
ج . ماعندناش / كبير كان الله .

س . هل سمعتم بسوف ؟

ج . جاين بنديرو البلح .

ج . (سوف المحمودى) او (خليفة بن عسكر) ؟

ج . مغلطه من كل بقعه ، ومن ورشفانه ، من النواحي ، من قدما هناك فى الشط كلها  
جايها البلح ، قعدنا نحوسوا توه (القرىتىلى) هذا جاءه الامر قعد ثلاث ايام فى جنزور  
وقالوا له اظهر للحرب فى بن يادم .

س . وانتم قعدين فى جنزور ماتحكتوش ؟

ج . احنا قاعدين فى جنزور .

س . ماكلموكمش هم ؟

ج . لاشنى كملونا ، القتل والسلب هذا سلبونا واللى حى قعد واللى مات مات بنادم  
هذا ياكلوا فيه الكلاب قدامنا زى الحيوان مافيش حاجه ، وين صبح الصبح نضنا لقينا  
الدنيا فاضيه المحلات ، المحله كلها ظهرت مشت لبنيامم وقالها ، ظهرنا الناس جيعانه  
تاكل طيش فى البلح وسكنت فى الحياش هذوم امتاعت جنزور وتجييب فى البلح وتنشر  
الى قاعد حى واللى مات مات توه وين صار لهم الحرب فى بنيادم

س . فى سدره القرىتىلى ؟

ج . فى سدره القرىتىلى (رمضان القرىتىلى) والكلونيل امتاع الطليان الاثنين جاين فى  
السدره معلقين .

س . رمضان والا "حسين" ؟

ج . (حسين) و (رمضان) المعركة الى مات فيها حسين ورمضان ظلل يقتل فينا احنا  
وين مات خوه حسين وين خوه مات فى بنيادم ظل فى جنزور قتل وازى متنا ، جاء  
بعضاء سيدى عبدالجليل هذاك الخلق يحى اربعة الاف او خسه متكدرين على بعضنا ،  
جاب طابور حبش وبدوا يوازوا فى التريس ، وازوا خمسين هذوم ورفعوهم قبالة هكى  
قدمنا بحرى الحبيله طلقوا عليهم بتاريه قتلوهم بحرى سيدى عبدالجليل .

س . هل تعرف اسماء بعض منهم الخمسين نفر ؟  
ج . مانعرف منهم حد ، خلق لا يحصى ولا يعد ، شن تعرف ملاين الى امكده على بعضها نسون وتريس وشيايين وكلها جيعانه وجايه للبلح قالها تفل يوازي جيت فيهم انا وخوى .

س . الخمسين الدفعه الثانيه ؟  
ج . ايه ، توه عندنا عجوز خليناها تطير قريب تكلب وقالها رفعونا مشينا مشوار لقانا واحد شنباشي معاهم .  
س . مااسمه ؟

ج . (بركه الشليب) من جنزور ، يعرف جنزور بالواحد يعرفهم عياله وين شبح لقاء فيهم ييجي عشرة من جنزور والا خسپاش قالها شنى هذوم يارمضان جبتهم قاله نسحقوهم ، قاله شنى فلاقه ، شنى انتم حكومه والا جايه حكومه بتأخذ البريلا ماليه كيف هذوم مايوتوش نمشى نامر عليهم يمشوا يسرى والا محابيس هذوم فيهم عشره والا خسپاش ضرارى خوى وابناء عمامى .

س . وانت عمرك عشر سنين مختارينك معاهم ؟ والا كلكم كبار ؟  
ج . مخلطين كبار وصغار ، والنساوين هالى عمره من عشره فوق والا رجل كبير جابوه توه وين مشى هناك الشنباشي فيه كامبوا هكى قدامنا فيه كولونيل مشى يلهد قاله شنو (رمضان القريتلى) يعنى خوه مات فى بنيادم يبي يكمل الخلق قالم بره ارفعوهم دخلوهم طرابلس يمشوا يسرى .

س . الخمسين والا زادوا ضموا عليكم اخرين ؟  
ج . لاغير الخمسين .

س . هل تعرف اسماء البعض منهم ؟

ج . ما نعرفش منهم حد .

س . مانعرفش حد ؟

ج . فيه نعرف البعض واحد يقولوله (حركات الجنزورى) وواحد يقولوله (محمد بودابر) (والفاندى) الحاصل هلبه ..

س . من اسرتك ما معك حد ؟

ج . معى خوى (حمد بن منصور الصابرى)

س . ذهب لايطاليا ؟

ج . نعم .

س . توه ضموكم الخمسين ورفعوكم لطرابلس ؟

ج . رفعونا لطرابلس هذوك الحبش (ورمضان القريتلى) معاهم مسلحون كراينير ضربوا التليفون لطرابلس .

س . وين سلموكم ؟



ج . سلمونا في قرقارش ، جو هذوك الستة كرابنير على خيلهم تلاقينا احنواياهم في قرقارش قريب الشمس تطيح عقاب النهار ، فيه غار هكى غارق لوطه جايين في ركنه احننا من المغرب وصقع والناس زقاطيط (مجرده من الملابس) كلها ساليينها المليح عنده حزامية .

س . الطليان سلبوكم ؟

ج . ايه سلبونه قول ياسيدى وين جينا جونا هذوك الكرابنير قالنا لهم شنى احننا زعمه كيف بنموتوا والا كيف قالولنا نبشركم انتم بتمشوا ، الموت ما تموتوش وبتمشوا لايطاليا بتقعدوا حين الى يكتب وبتروحوا قلنا باهى فرحنا .

س . باهى وين سلموكم المكان ، توه قعدين في قرقارش ؟

ج . بتنا ليلتها في هذيك البقعة هكى بلا غطاء لافراش وهذوك الكرابنير عندهم بطانيتين مفرشينهم للجوادير وقالولنا يالا كدسوا على بعضكم هنا باش نبوا نغطوكم بالبطاطين وبتنوضوا بكري جابولنا قبل لانرقدوا صندوق صناديق بشباط كسروهم وعطونا بشباطة وعطونا اليه سربنا وكدسنا على بعضنا غطونا وقعدوا يعسوا علينا لين صبح الصبح الفجر قالوا لهذوك البطاطين هكى جيبوهم الحال حال صقع الواحد هكى سنونه يقطعقوا من الصقع عاد داروا سروجهم ودارونا اربعة ستة دايرين ديل من هنا وديل من هنا وديل من تالى واحنا اربعة .

س . مشيتوا اربعة اربعة ؟

ج . نظام عسكري وجابونا للبورط هذا (المينا) .

س . هلى قاموا بتسجيل اسماءكم لما جابوكم ؟

ج . لا ماخذوش مننا اسماء او وين جينا في البورت لقينا فيه خدامه ثلاثائة من طرابلس وثلاث مائة من بنغازى وهذول رافعينهم برغبتهم ييوا يخدموا في ايطاليا دفونا معهم جينا في دار هكى خربه هذا في طرابلس في البورت . . . فيها كان الستاك لاغطاء لافراش كدسنا على بعضنا ورقدنا .

س . كم يوم بقيتم في البورط ؟

ج . قعدنا يجي شهر بعد شوى كملنا الشر ، يعطوا فينا في نصف خبزة وحكيكتين سلاطة والسلاطة قارصة (حامضة) وعطونا كسوه امتاعت بلديه صفره وقاويطه وغلى والقاويطه هذه متاعت المأكلة وكاشيك وهذوك السليطه قاعده في المخالى ، قعدنا هذوك الخدامه درايبك يجييوها في البلح الوقت رطب ويجييوها في الكسكى .

س . وانتم لا ؟

ج . واحنا من يجييلنا .

س . انتم بارواحكم فاصليكم ؟

ج . ايه .

س . هلى هناك مرحاض بالسجن ؟

ج . لا لا سجن لافيه باب لافيه شيء غير قاعدين في دار وخلاص ، وفيه مرحاض وين نظيروا في الماء .

س . الغطاء والفراش ؟

ج . لا غطاء ولا فراش ، شي نجوا نكدسوا على بعضنا في الليل ونرقدوا عطونا كسيوه هكي متاعت البلدية هذيك المخربشة والمخل والقايطة ويعطوا فينا في نصف خبزة كل يوم ، قعدنا ثلاثين يوم بعدها ركبونا وفي الركوب قالولنا الليلة الساعة اربعة في الليل تركبوا .

س . في اي وقت خريف شتاء زمن الركوب ؟

ج . الوقت اللي وصلنا فيه غادي ليطاليا عام الغطاس الناس بعدنا هجت مشت لتونس وكملت بالشر وبالواحد وماتت في الطريق واحنا انحزنا في بر الطليان .

س . عندما جاءوا بيركبوا هلي سجلت أسماؤكم ؟

ج . سجلونا ايه ونبهوا علينا قالولنا راهو الغطاس في البحر وتلبسوا الكبابيس هذوم ماتلبسوه مش ورووسكم اظهروا عرايا للبراهو الفوق وراهو كان جاء الغطاس وضرب البابور راهو تكرشوا في الكراهب راهو الكراهب فيهم الرياس عندهم وراور وعندهم يقتلوكم اقعدها على ظهر البحر لين تحيكم الحربية تنهضكم وعطونا الخفاف لبسناه وقعدنا لاجانا غطاس ولا جانا شيء .

س . الجنبر اللي في البابور فيه اسرة ؟

ج . اي فيه مكانات .

س . قداش قعدتوا يوم ؟

ج . قعدنا ثلاث ايام .

س . ذهبتم الى ايطاليا مباشرة والا مررتم على تونس ؟

ج . لامشينا طول ، مشينا جينا لنابولي .

س . متى كان الركوب بالضبط ؟

ج . ساعة اربعة في الليل ونزلنا في نابولي الصبح .

س . صبح اليوم الثالث ؟

ج . ايه اليوم الثالث .

س . هل عطوكم اكل داخل البابور ؟

ج . توه وين نزلنا في البابور عطونا مونه .

انتهى الوجه الاول من المقابلة

اللفه رقم ( 492 )

## الوجه الثانى من الشريط الاول من مقابلة ( سالم منصور الصابرى )

- س . قداش قلت اقعدتوا ؟  
ج . اقعدنا فى البحر ثلاث ايام .  
س . ثلاث ايام . والماكله الى عطوهملكم ، عطوكم مونه ثلاث ايام ؟  
ج . مونه ثلاث ايام بشساط ، بشباطه وحده فى الوجهه نكسروا فيها بالقاويطه تنتفخ  
ونديروها رويحه ملح وناكلوا فيها وهذا هو ، وتعدوا الحكيكات السلاطه قارصه  
بنلوحهم شوى قعدوا .  
س . وصلتوا غادى لايطاليا ؟  
ج . توا وين جينا فى الطريق جونا فروخ الطليان ياعمى ، بتشرى خبزه فى الطرق .  
س . وين وصلتوا لايطاليا ونزلتوا ما سجلوش اسماءكم ؟  
ج . لا سجلونا غادى وين وصلنا ميلانو ؟  
س . توا انتم وصلتوا ميناء ميلانو ؟  
ج . لا قاعدين فى الطريق .  
س . نزلتوا وين ، وين نزلتوا ؟  
ج . فى ميلانو .  
س . نزلوكم الستميه وقعدتوا مع بعضكم والا قسموكم ؟  
ج . الستميه ودابيرين لكل ميه براكه واتيه وسور لود اللابيد ورفعوا معانا طباخ وستيه  
كراينير وترجمان من القره مانليه وقاضى مانندريش عليه شن سماه ، تو طالت  
المدة ايحى عشرين عام قداش انا وين مانعرفاش .  
س . باهى قلت امعاكم قاضى ثانى ؟  
ج . ايه ، تواقعدنا فى هادوك البراريك كل من دارها فى براكه ، نمرتك هنا ونمرتك هنا  
فى الحيط .  
س . دايرين لكم اسره والا على الارض تناموا ؟  
ج . توازير هكى وفوق منه بطانيه والنمره من فوق ومتحادين هكى ، صفه من هنا  
وصفه من غادى . . قعدنا عاد بعدها ظهورنا عاد للخدمة .  
س . اقعدتوا قبل لا بديتوا تخدموا ، قداش وإلا قعدتوا فى البراريك هادون ؟  
ج . ما قعدناش ايحى نهارين والا شنو وقالولنا هيا بتظهوروا للفابريكه بتخدموا .  
س . الفابريكه بعيدة والا قريبه ؟  
ج . لامش بعيدة ايحى زوز كيلو متر ونمشوا على رجلينا ، والماكله القايله يلحقولنا  
كارطون ماكله فى الفابريكه ودايرين لنا محل هكى وين نجملوا الى هذا ايحيب

قاويطات واحد يديرهم في حطبه والا حاجة وبعد مانتغدوا فنوضوا للخدمة ،  
نخدموا .

س . متى تبدوا الصبح في الخدمة بالضبط ؟

ج . نبدوا الصبح وما نيش عارف قداش الوقت ونقعدوا لساعة اطناش نصف النهار .

س . تفتطروا قبل والا تبدوا في الخدمة . يعطوا فيكم في فطور ؟

ج . في الصبح لا قبل نظهروا يمشى دايريلنا واحد كبران علينا .

س . شن سماه ؟

ج . وين نعرفه اسماه توا ، يمشى يجييلنا القهوة ويجييلنا الخبز يفرقها علينا نفطروا  
ونتسقدوا نظهروا .

س . يرفعوكم اجمعين والاكل واحد بروحه ؟

ج . لا اجمعين اربعة اربعة ، بالنظام ودائريلنا شنباشى ودائريلنا كابو قروب اصغير  
وكبران .

س . كل ميه ابروحها ؟

ج . ايه كل ميه بروحها ونمشوا بالنظام عسكر نخشوا الفابريكه ، يسكروا البيان تو  
الفابريكه هاذيك اربعة الاف يخشوا ، واربعة الاف يظهرها من الخلق الى لامينه في  
هذيك الفابريكه .

س . لبيين والا حتى الطليان ؟

ج . طليان شنو لبيين غادى ، كان احنا الى رافعيننا من هنا والباقي كلها من بلادهم  
غادى يلما فيها نسوان تريس الكل بالسيف ، ايحي يخدم اطناش الفابريك فيها  
ميلانو ، الفابريكه الى نخدموا فيها احنا هاذي يقولوها البريقي ، ماكني ذا البريقي  
هادي الى قعدنا فيها احنا .

س . شن تصنع ؟

ج . نصنعوا مع الصناعات ، نلما في الحديد ، ونستفوا ، ونقربوا الى يقولولنا ديروه  
انديروه .

س . شن الى تصنع فيه هيه الفابريكه ، سلاح ، تصنع في السلاح ، تصنع في كور ؟

ج . سلاح ، كور ، ايه كور وحديد ويذوبوا في الحديد ، هذا دونه كبرها زى هالمربوعه  
ينفضوها تلقى هذا الماء ، اميه يطرق وهيه حديد ، ويجييه للقوالب يصبوه  
والونش في قلب السماء يخطف هذاك البرميل يحلوا هادوك الوحدات كلهم ،  
يملوهم يتعدوا ثلاث ايام ، الناس تتسخن عليهم ، بعد ثلاث ايام ينفضوا  
الونش يضربها بالمصاصه تسقط هكي علوها على الوط امريعه تربيع وطولها ايحي  
ميتر واش حديدته تقعد ثلاث ايام والناس تتسخن عليها وما تبرش من  
الحرارة ، بعدين يرفعوها لماكينه اخرى في البابور يواطيهها بالونش ويقرضها كيف

ما تقرض الدلاع ويحييها لما كينة اخرى حتى هي تظل تضرب فيها تخليها زي  
المهراس ، يحييها عاد للصناع هونه دايرينها وحده تبرم هكي ووحدته تنجر  
يديها في هذيك هكي ويظل ينجر فيها ويلولب فيها ويلولب فيها وينجر فيها  
لين تظهر كوره ما تبي غير غطاها وخلاص والقبصونه .

س . ولكور الى يصنعوا فيه شني كور مدفع ؟

ج . كور مدافع ايه ، ويستفوا فيه ويقعد بعد يرفعوا فيه .

س . يستفوا فيه في صناديق والا هكي ؟

ج . لاهيك في الوطا ، بعدها يرفعوه لمكان اخر يديروله الكوره امتاعه ويديروله  
القبصونه ويعمره بالدلامنت واللى ينوض فيه البارود ويحطوها عاد تامه هادي تامه  
ويركبوها وتمشي للمخزن يستفوا فيه ستايف وخلاص وهادي خدمتنا حنى .

س . باهي هادي قعدنا نخدموا في الكور ؟

ج . المده هادي قعدنا نخدموا في الكور .

س . العشي ماتولوش ؟

ج . لا . لا نوبه نظهروا من الصبح ونروحوا في الليل .

س . تروحوا الساعة قداش في الليل ؟

ج . نروحوا عقاب النهار ، نترحوا ، يطلقونا نروحوا .

س . انت توا ، صغار انتم والا . لا ؟

ج . صغار ايه .

س . قداش عمرك امين رفعوك ؟

ج . رفعوني عمرى ايجي عشر اسنين وخوى عمر ايجي اطناش العام .

س . ومنو معاك ثاني هكي ما تعرفش ، كلهم اعمارهم اصغار هكي معاك ؟

ج . مخططين صغار وكبار فيه الشيايين .

س . تو الصلاة والصيام كيف تديروا فيه ؟

ج . شنوا الصلاة والصيام ، والصلاة والله ما نصلوا ، لانصلوا لا صمنا ، قالوا لنا شن

تصيموا هنا والنار توقد وتخدموا هاكم ماتسقموش تصيموا .

س . باهي الى يموت الى يتوفى تغسلوا فيه وتدفنوا فيه ؟

ج . ايه يغسلوا فيه هذاكه في جبانه دايرينها للمسلمين يرفعوها يغسلوا ويصلوا عليه

ويدفنوه فيها .

س . يصلى عليه القاضى الى معاكم هذا ؟

ج . ايه دايرينه قاضى ، واللحم هذا من الاحد للاحد حتى يمشوا لمكان معلوم يلتما

فيه العرب الى جايه من غادى والعرب الى من هنا يذبخوا ثور والا حاجه يحيبولنا

حصتنا ويروحوا .

- س . العرب امنين من الجزر الثانية فيه ناس امعاكم .
- ج . فيه ناس عشرين الف رفعوا من هنا من طرابلس امفرقينهم في المدن وفي الخدمة .
- س . هذا كله في عام الغطاس .
- ج . ايه .
- س . توا قداش مشت من هنا سفينه عام الغطاس ؟
- ج . هاوينه .
- س . انتم مشيتوا في وحده فيها ستميه .
- ج . مانندريش عليها .
- س . تو القاضي الى مشى معاكم شن ايدير غادى ؟ يخدم والا قاعد هكى .
- ج . قاعد ، لا يخدم لا يقدم ، والكرابنير شادين الفم .
- س . كرابنير عرب والا طليان ؟
- ج . عرب .
- س . ما تعرف منهم حد ؟
- ج . لا . نعرف منهم واحد من نشقنا احنا ولد عمتى يقولوله « سالم البيدى » من ورشفانه هو امظهرينه إمعانا وتعرفه وقال انا ولد عمتكم وعرفناه غادى احنا واياه هذا نعرفوه .
- س . يساعد فيكم .
- ج . صلح بينا ، وجاى في البراكه الى فيها احنا ويساعد فينا وين جينا هنا في طرابلس توفى .
- س . توه في الليل يتمموا عليكم . خائفين حد يهرب ؟
- ج . لا سور لوذ اللايد وين يهرب وين ييمشى في طاليا الدورية الى بره تشده عندك نهار نجوا ، ودرناهم ثورة .
- س . كيف ثورة علاش ، هاذى علاش ؟
- ج . هادى ما هى العرب كل مدينه ، يجيينا الجنرال يقولوا المدينه الفولانيه اليوم روحوا . نفرحوا ونقولوا حتى احنى توا بنروحوا ، برا برا كل مرة يجي يقولوا الفولانيين روحوا الفلانيين روحوا . قعدنا التالين ، قعدنا نخش للفيشو ( المكتب ) اطبع طبعنا . اطبع اطبع مانندروش شن الطبيعه وين ظهرنا الشنباشيه الى معانا هالكراطونات الى علينا علينا قالولنا فيرمتوا في ست شهور ثانياات فيه الليزه متكسره في الحرب هما والمانيا يوكم تقعدوا تخدموا فيها . قلنا لهم وين هالدوه هادى معاش فيه دوه . خلاص معادش تظهروا كارتته بيانكه ماعاش فيه ظهور بكل يا تروحوا بينا ، يانديروا ثورة للساء ، قعدنا جوا الفجر الفجر جابوا هاذوك الكبرانات جابوا القهوة وجابوا الخبزه حزنها وجاء الرومى انديامو انديامو . قلنا له ما فيش احنا نبوا

تريبولى ماعاش نمشوا هيا نوضوا اخدموا قلنا له مافيش خدمه بيع برا الى وراك جيبه قدامك . ضرب التلفون فيه الكولونيل هذا فى المدينة مش بعيد عليه فى ميلانو واحنا فى ( سيستاسجنى ) يقولوها هاذى الى فيها البراريك ، قعدنا غادى وين جاء الكبران هيا اندياموا لا اورارى قلنا له مافيش لاورارى ، ماعاش فيه ضرب التلفون للكولونيل لاونه جاى على الموطو الصغيرة وقفوا الستميه . . شنوا تبوا قالواله احنا فيه ناس تزغرت فرحانه بعيالها الى روحوا وفيه ناس تبكى تندب احنا على كل حال ماعاش نخدموا حتى ولو كان تكملنا هنا وتقتلنا .

س . هما عاد ماهم ماشيين بارادتهم . . هما ماشيين يبوا الخدمة هادونه الى معاكم ؟  
ج . ماشيين بارادتهم هما لكن احنا جينا فى قطرهم هكى وخلاص قول ياسيدى قالوا لهم اظهروا للخدمة قالوله لا . قاللهم غدوه نوريكم شن يصير ، ( دومانى بدارى كومافارى ) ، غدوه تشبحوا شن انديرلكم من غدويتها الى ناضر فى الفجر حل عيونيه فى البراريك من تالا الفم لقاهم اربعة ستنق فى روس البنادق من السور للسور . فى روس البراريك الى يظهر يا والله نهار صفته حله اليوم راهو تحارفت النقه ، اليوم لاعاد فيه اسوام لا فيه حاجه كان ضرب فزعت توهاديك الناس والمطبخ فيها اعمد حطب ومنها جاى حتى هى شيشمه امكرسنه بالشروشور امتاع الوديان وبدأت عبث بهذاك الرشاد وبهذاك العمد وبرمت هاذاك الفيشوا الى بحدانا كله رقداته المرش كله كسروه وين جوا خاشين البراكة لوله من امغرب قالوا نبهنا على بعضنا قلنا البراكة الى يخشوها اضربوا ماعاش فيه

س . شن سماء مانعرفاش سماء ؟  
ج . مانعرفاش من القرمانيلى ، قالها ياسيدى تظهروا للخدمة تخدموا ثلث ايام يعنى تقعدوا ثلث تحسروا الحكومة فى الليكالى والشراب وفى ، اخدموا قلق وبعدها .

س . ثلث ايام بدون شىء بلا فلوس ، انتم تخدموا بلا فلوس غادى ؟  
ج . شن الفلوس الى نخدموا بيهم لا ، لايعطوا فينا فى قرش وستين باره هكى شوره لك هى وللقهوة ونشروا بيهم حشيش وسكر وشاهى والباقي شىء .

س . توه ماتعرفش من الى نجرحوا ؟

ج . انجرحوا وين نعرفهم .

س . مامات حد ؟

ج . وين دورة ، عشرين عام والا خمسة وعشرين عام مازالت تعرف منهم من عاش تعرف .

س . مامات منكم حد ؟

ج . لا . . مامات منا حد .

س . قرايه ماقروكمش ، قريتوش غادى تعلمتوش ؟

ج . لا يعلموا فينا هكى وين نروحوا نهار الاحد يديرونا اربعة اربعة ويعلموا فينا بالطلليان ، ( ..... ) (كلمات ايطاليا ) من غادى من هنا يعلموا فينا تعليم العسكر ، يقولوا بالك نلتزموا بيهم الحرب نعطوهم السلاح ونحاربوا .

س . مادربوكمش على السلاح ؟

ج . لا ، السلاح . لا . . بعد ثلث ايام ، اعطينا ثلث ايام قال اخدموا خدمنا ثلث ايام وروحنا ، قعدنا خلاص ماعاش فيه ظهور ولا خشوش ماعاش كلمونا خلاص ، توه بعد ثلث ايام جاء جابلنا طرفى بهبور ، ركبنا وروحوا بينا توه وين ولينا للفابريكة قالولنا الاهالى لو كان قلتوا لنا درنا ثورة مع بعضنا نخلوا الدنيا كلها .

س . الاهالى الطليان ؟

ج . ايه قلنا لهم احنا درنا ثورة وانجحنا وانتم انشاء الله تنطلق فيكم النار انتم وعيالكم .

س . توه من تعرف من الطليان الى يخدموا معاكم ؟

ج . لا . . وين نعرف .

س . ماتعرفش لبيين قعدوا غادى ؟ ماروحوش ؟

ج . لا . هاذوكه قعدوا ثلث شهور ولحقوهملنا منهم واحد ولد « زنقور » والله انسييت اسمه توه . . ايجيب فى المجاريح امحادينى قعدنا بعدها روحوا بيه لحقوه بعد ثلث شهور .

س . ماقعدش حد من الليبين غادى ؟ ولا تزوج ودار صغار ؟

ج . لا ماقعد حد . لاشئ .

س . باهى توه جابوكم للبابور . اعطوكمش ملابس . اعطوكمش حاجة وانتم مروحين ؟

ج . شن ملابس كان عطيتنا لبس غادى نلبسوا فيه قاعد عندنا جبناه .

س . شن اللبس الى عاطينولكم ؟

ج . هادوم السوارى ووحدات وكبايط .

س . يعطوا فيكم فى كل ستة شهور بدلة ؟

ج . ايه يعطوا فينا كل ، الكسوه ماخصصونا فى شئ .

س . والضوء فيه ضوء فى البراريك ؟

ج . ايه فيه ياتريك .

س . وغطاء فيه الغطاء ؟

ج . الغطاء بطانية وتازير واوساده هادوم كلهم دايرينهم .

س . ماصبتوش غادى بامراض ؟

ج . حتى الجوع عام الشر احنا فى بر الطليان غادى . عام الشر احنا غادى .



- س . قداش قعدت غادى انت ؟  
 ج . سطاش شهر . وبعدها جينا عاد روحنا .  
 س . شن يعطوا فيكم ؟  
 ج . شن يعطونا فى الخبز هاذى الكوماليه كيلو كل واحد فى النهار ، والمأكلة شبعانين فى غاية الغاية واما فى المعاش .  
 س . والعلاج واحد يمرض والا كذا فيه مستشفى ؟  
 ج . فيه وفيه يرفعوا فينا للسبتار ويديروا فيه .  
 س . وفيه مدرسة ؟  
 ج . فيه .  
 س . فيه حتى مدرسة داخل المعسكر هذا الى انتم قعدتوا فيه ؟  
 ج . الى ، فيه احنى . . لامافيش .  
 س . مش قلت يقرأوا فينا يوم الاحد ؟  
 ج . لا . هاذاك نهار الاحد يعلموا فينا تعليم .  
 س . عسكرية ؟  
 ج . يعلموا فينا تعليم عسكرى .  
 س . باهى رجعتوا بعثالى . اى وقت رجعتوا ؟  
 ج . رجعنا بعد سطاش شهر . رجعنا ونزلنا هنا فى طرابلس لقينا المدينة مسكره جينا لفندق يقولوله فندق جباره كرنا فيه دار ، انا واخى ودبشنا .  
 س . كل . الستميه جيتوا مع بعضكم ؟  
 ج . جينا الستميه مع بعضنا ، هادوم الى ماشين بجودتهم الى عنده حد روحله واحنا الى شدونا يسرى هادوم قعدنا كارنتينا هنيا لين تسرحت الدوة وظهرنا .  
 س . لما انتم ليقتوا ارضكم قاعدة واسركم وعيالكم فرحوا بيبكم والا كيف ؟  
 ج . لا وين امنين جينا سار ، سوق بنيادم ، هذا سقدت خوى دار برميستو « تصریح » وظهر نشد . انشد قال بلادكم فيها اربع تراسه قاعدين والباقي كلها امشت لتونس شر . . عام الشر . واحنا داروا فريضتنا والملكية خدوها لين نهار جينا وين ولينا عندنا اخت غادى ( . . . . . قطع فى التسجيل )  
 س . باهى لما رجعتوا ، شنقلت خدوها الارض ؟  
 ج . ايه ، دارولنا الفريضة وخدوها الارض وعندنا اخت .  
 س . لانكم انتم جليتوا ، نفوكم لايطاليا ؟  
 ج . احنا قالوا ماتوا هما الاثنين ماتوا فى جزور ، ضربوا تليفونات لكل بقعة لتونس بكل بقعة قالوا مهناش هادوم هنا هادوم .  
 س . يحسابوكم متوا مع الخمسين الى يقتلوا فيهم ؟  
 ج . ايه ، انعم ، خدوا الملكية وعندنا اخت باباها من قبيلة اخرى جاية معنا قالوها خوتك هادوم بايعين معاش عندهم ملك هنا هادوم باعوه قبل لايمشوا ووخذينا

وضربوا الفريضة وخلص مافيش ، روجت هاذيك اختي روجت لعيالها لين نهار  
جينا من بر الطليان ، وين جينا من بر الطليان لقينا هذا الى دابر الفريضة وخذا  
ملكنا لقيناه يرعى في البقر في ركن الكياس قال : اوقاعدين حين قلناله قاعدين  
حين امالا شنو قال احنا درنا فريضتكم وكملتوا قتلهم اختي وين ؟ قالوا لنا اختك  
مشت هونه عند عيالها خوي قعد في البلاد وانا مشيت لقبيلة اخرى . . لاختي قلت  
لها روجي خوتك راهم جو ، جتنا من غدوها لادنها عديله فيها مرطه سويقه ودقيق  
وغراف زيت ولا ردي لابسه عقاب جريد ، جتنا عاد فرحت جبدينا لها ردي لبساته  
وقعدت تعاند فينا ، وتنفق فينا .

س . قعدت تنفق فيكم ، باهي انتم بعدتالي ، بعد لارجعت من ايطاليا رجعت  
لللجهاد ؟

ج . بعدها وين وصلنا غادي ، في لول جهاد حطوني فيه انا .

س . باهي من الى حطك ؟

ج . الشيخ على بن غومه وقعدت خمسين يوم في خط الحرب في بنيادم ماصارلناش  
حرب ، وروجت دير مرطه سويقه وغراف زيت عوينك وتمشي لين تكمل اجلتك .  
س . شن سلاحك ؟

ج . شن السلاح ، عاطييني البندقية امتاعت الشيخ قالوا هاذي بومشطه طويلة ، ايه  
الشيخ هو الى هاذي بندقته قاللهم انا مانستامن بحد نعطيهها له كان لفولان هذا ،  
عطاهاالي قعدت خمسين يوم وروجت .

س . سار ماحضرتش معارك ؟

ج . ماحضرتش ، بعدها حطونا في مركز بوغيلان حتى هو .

س . حطوك الطليان والا العرب ؟

س . العرب ، خافين من الطليان يظهر ، قاعدين محله في بوغيلان قعدنا فيها حتى هي  
ايحي عشرين يوم ، عندنا الرايس امتعنا من السواعديه يقولوا له الشيخ « محمد  
اقيديبيه » هو الرايس قعدنا فيها لين تمينا وبعدها صار الحرب مابين الحبالية  
وامغرب هكي فزع تامسكت منها من غريان ورفعونا اختي هالي في بوغيلان جينا  
في رشاده شفيط ، لقينا الحرب غريينا ترحي في بعضها ، ديل يبي الطليان وذيل  
مايبيش في رشاده شفيط واخني في الكريدينات الى بدياه امكردنيين قعدنا معاه لين  
تم الحرب هذاكه وروحنا .

س . المجاهدين الى معاكم في قصبه شفيط من هنا ، من اي القبائل ؟

ج . المخلطة ، المخلطة من كل بقعة ، ومن القواسم .

س . عسكر عبد العاطي الجرم امعاكم ؟

ج . امعانا ، عسكر الجرم ايه ، هو معانا تامسكت هذا .

س . عبد الله تامسكت ؟

ج . ايه والي معانا .

س . سوف المحمودى ؟ « وحمد السنى » ؟

ح . ايه .

س . امحاكم ؟

ج . امعانا اكل ، اكل امنزها عسكر اكل عنده عسكرية طابور عسكر .

س . قداش واحد انتم الى مع عبد الله تامسكت ؟

ج . احنا ، المحلة من بوغيلان جابونا من قطيس هاذى لين جينا لرشاده شفيط ، المحلة ايجى ميه وخمسين نفر ، قعدنا فى هذيك الكرادين .

س . على خيل والا على كرعيكم ؟

ج . على كرعيانا جينا ، وعندنا جماله ، جايب جمل معانا من بوغيلان جاييلنا عويننا وجينا واياه . . لين وصلنا .

س . وبعد تالى ، بعد لاغلبتو ؟

ج . بعد لافضى الحرب روحنا .

س . غلبوا الطليان والا المجاهدين ؟

ج . لا ، لا العرب غلبت ، انغلبت .

نهاية الشريط الاول :-

بداية الوجه الاول من الشريط الثانى / من مقابلة الحاج سالم منصور الصابرى

س . الحاج سالم منصور الصابرى قلت انت حضرت شفيط والا لا معركة شفيط ؟

ج . ايه ، حاضرها .

س . مع من انت قاعد ؟

ج . مع عبد الله تامسكت .

س . عبد الله تامسكت مينن هذا ؟

ج . امنين هاذى ، شرقاوى ، واخذ مراء من غريان من تغسات ماندريش عليه ماعقبش صغار .

س . شن سماها ؟

ج . والله انا وين ندرى عليه سماه توه من هذاك الوقت ندرى عليها .

س . صار من تغسات هلى متزوجها ؟

ج . ايه واخذ مراء من تغسات تامسكت هاذوم انسابته تغسات .

س . توه بعد انتم بعد صفيت كيف انسحبتم ؟

ج . روحنا للبلاد ، غريان .

س . امعاكم حتى تامسكت ؟

ج . ايه ، وغريان لقيناها متخيلة حتى هى .

س . كيف متغلبة ، تره احكيلنا كيف ، وكيف مقسومة واصير فيها هونيه الحرب ؟

ج . هذا دايرين هاوين صناديق ماين هذا عبدالمجيد كعبار وماين الشيخ التوفيق القاسمي هذا من القواسم داروا صناديق كل حد يرمى لصناديق .  
س . زى الانتخاب ؟

ج . ايه . احنا القواسم كلها عطيناها للشيخ توفيق شوي وين جوا في الطريق بدلوها صبوها في مكان آخر وقعد الشيخ التوفيق ، قعد يخاصم فيه لين طيحه من الحكومة .

س . هذا توفيق طيح كعبار ؟

ج . ايه لين طيحه . . يعني خذا صناديق وناسه كلها صبهم في صندوقه هو ، كعبار وقعدوا يتخاصموا وخلاص ، ايه صار فيها الدنيا شوق ما يتحدد شيء .

س . بعدتالي متى جاء قراسياني ؟ ووصل الغريان ؟

ج . هذا جاء في التالي عاد .

س . من الى استقبل قراسياني ؟

ج . من استقبله ؟ استقبله

س . في غريان مش مشولة مجموعة من غريان واستقبلوه اللقدام وقاله راهو البلاد مسلمة باش ماياخدش كارطة بيانكي فيها ؟

ج . احنا القواسم جاين في جرت توفيق ، والقرسياني دار محله من فوق ومحله من لوطا وقرن عليها احنا قاعدين مع الشيخ توفيق حتى لالنهاية . جاء السبب يتلاهدوا من فوق ومن لوطة واحنا مكردنيين في الروس ونضربوا .

س . قاعد معاكم تامسكت ؟

ج . لا . . مش معنا توة . مانندريش عليه وين مشي . قعدنا عندنا واحد يقولوله الشاعر شن سباه هو ؟ هذا قعد في القواسم . هذا قعد يضرب لين هجموا علينا ، وين ناض فينا البارود ، نوضنا البارود في الراس ناض فينا القواسم كلها كارطة بيانكة ، داروا فيها كارطة بيانكة القواسم ماتوا ايجوا مائة والامية وخمسين نفر .

س . منين الى ماتوا ماتعرفش منهم حد ؟

ج . من كل . . وين نعرفهم الشيخ الفيتوري هذا من بلادنا هذا .

س . الفيتوري من ؟

ج . انسيت اسباه . لين قالوله سلم روحك . سلم روحك . ماباش يسلم روحه ، قضاوا السقيفة من فوق وخشوله الطقطقة داروها بدت تجلول في قعور الديار وظهره هو وضراريه الشيخ الفيتوري هذا وقتلوه .

س . كل منهم . . هو واصغاره ؟

ج . هو وضراريه قعد عنده ولد عويل قعد لقاها واحد شمباشي ركبته وراه فكه من الموت .

س . حتى زوجته مشت ؟

ج . ايه وكل عياله اوكل . هذا في القواسم .

- س . وانتم وين مشيتوا ؟  
 ج . احنا وين مشينا ، جينا للطلليان وقعدنا والى عنده بندقة دسها والا سلمها وخلاص .
- س . ماكلموكمش الطليان ؟  
 ج . لا . لا . صار فيها الموت وتفيى . كل شيء صار فيه التفيى .  
 س . توة مِن من الكعابرة اللى شنقوه الطليان ؟  
 ج . من الكعابرة الهادى بى ، شنقوه الطليان لقوه زعميته وين الناس هاوينه خش الطليان بتظهر هو عنده ملك فى فزان بتظهر فى جرتة قال انا ماعاش بنقعد هاخليقة جت متعلقة امعاى ، تموت فى السرير بالعطش نبيع راسى على خاطرها بنقعد يعنى على خاطرها باش تريض البلاد . قعد قبل بيسافر بيمشى لفزان بطل . على هذا قالوا له انت خالفت امر ايطاليا وحكموه بالشنق وشنقوه .
- س . حتى ولده قتلوه ؟  
 ج . ولده حتى هو فى محلة الرابطة هادى .  
 س . شن اسماه ولده اللى مات ؟  
 ج . ولده هو شوشان واخذ امه شوشانة . انسيت توة .  
 س . باهى مداير محلة فى الرابطة ؟  
 ج . ايه ووين طاح الطيار حرقه . على هذا بعدين قتلوه هو وولده وكلهم قتلوهم الطليان .
- س . توه انت بعد لاختش الطليان غريان وين مشيت ، قعدت فى غريان ؟  
 ج . قعدت فى غريان .  
 س . ما امشيتش فى الكراونة ؟  
 ج . لا الكراونة شدوى بالسيف امشيت فى الكراونة .
- س . وين مشيت ؟  
 ج . مشينا رفعنا . قعدنا نكروا من العزيزية لترهونة سبع خطرات احنا اربعمية جمل ، نرفعوا فى الدقيق والمكرونه وفى البشيط وفى الخبزة على الببل والزيت وين نجوا فى فم ملغة نكسروا هذاك البشيط وهذاك الواحد ناخذوا منه ناكلوا منه ونردوه زى قبل ونمشوا اربعمية ناكلوا على ظهور الببل .
- س . وتوصلوا لترهونة وتولوا ؟  
 ج . نوصلوا ونولوا نرفعوا ثانى هذا ديدانا . اربعة خطرات مشينا .  
 س . كلكم من غريان ؟  
 ج . غريان ومخلطة من كل بقعة .  
 س . مامشيتوش لتاقرفت والا ؟  
 ج . مشينا حتى لمصراته وزليطن كله مابوش يطلقونا لين وصلنا قعدنا نكروا فى التمر من زليطن للبحر حتى هو على الببل .

- س . وهذاك الوقت الطليان يحارب ؟
- ج . ايه يحارب امالا شنى . واحنا رافعيننا بالسيف امعاه كيروانة .
- س . باهى ما ساعدتوش ناس - اعطيتوهمش فوشيك والا سلاح ؟
- ج . لا ...
- س . توه هذاك الوقت قداش البندقة تساوى ؟
- ج . تساوى هلبه ، والبندقة مايلحقها كان المبسوطة هو الى يسقم ياخذها كان الى عنده مالية كبيرة .
- س . ومشط الفوشيك قداش يساوى ؟
- ج . المشط حتى هو يبيعوا فيه بيع .
- س . بعد لادرت الكيراونة ؟
- ج . تمينا الكيراونة روحنا . عاد طلقونا روحنا بعد ثلث شهور .
- س . ايه قداش تاخذوا فى فلوس امنين يرفعوك فى الكيراونة ؟
- ج . يعطونا فى معاش مانعرفاش توه . على الجمل والبنادم . واجره الجمل مهناش غير سبلة . والبنادم كله فى جرة البل ، معذبينا فى جرة البل وخلاص الى عنده جمل لو كان يلقاء بيدبحه .
- س . ماكش حافظ شعر ؟
- ج . شعر مانيش حافظ انا فيه الناس الى حافظه هادى . انا وين نعرفه الشعر نسيته .
- س . توه ياسيدى فى الختام بارك الله فيك . .

انتهت المقابلة من مقابلة « سالم منصور الصابرى »  
مقابلة غير مصنفة على شريطين .

## ملخص المقابلة

يتحدث الراوى سالم منصور الصابري عند بداية الغزو سنة 1911 م وكان عمره آنذاك ثلاثة سنوات وكان متواجدا بمدينة طرابلس حيث شاهد اندفاع الاهالى نحو مخازن الاسلحة بسانية الباشا ، وعند نزول العدو الايطالى الى البر تم القبض عليه ووضع بمكتب الفنون والصنائع وشاهد عن قرب مقتل بعض المواطنين ونفى بعضهم الآخر الى ايطاليا .

وفي سنة 1917 حدثت المجاعة او مايعرف « بعام الشر » وكانت المعارك سجلا بين المجاهدين والاطليان ومن بين تلك المعارك معركة السدرة التي قتل فيها قائد الفرقة المجندة القريتلى ، وكان الراوى بجنزور وعقب هزيمة العدو وكعادته ليأخذ بثأره من العزل مثل الاطفال والنساء والشيخوخ قام بجمعهم قرب سيدى عبدالجليل ، وكان رمضان القريتلى يقوم بتنفيذ حكم الاعدام رميا بالرصاص حتى يشفى غليله من قتلة أخيه فيمن يقع عليه اختياره من تلك المجموعة ومن كتبت له الحياة نفى الى ايطاليا ومن بينهم الراوى الذى بقى بأحد المصانع الايطالية لمدة ستة عشر شهرا .

ثم تحدث الراوى عن رجوعه الى ارض الوطن واحداث الجهاد فيها بعد .

## مشروع تجميع الجهاد

منطقة البحث رقم \_\_\_\_\_ رقم الشريط او الاشرطة 661/165/164/163/1  
تاريخ المقابلة \_\_\_\_\_ / \_\_\_\_\_ / \_\_\_\_\_ هـ \_\_\_\_\_ / \_\_\_\_\_ / \_\_\_\_\_ م

الاسم ثلاثيا : ابوراوى عبدالحميد  
تاريخ ومكان الميلاد : 1893

محلة \_\_\_\_\_ قبيلة \_\_\_\_\_  
اسم الام : \_\_\_\_\_  
محلة \_\_\_\_\_ قبيلة \_\_\_\_\_

الوظيفة : \_\_\_\_\_  
علاقته بالطرق الصوفية وجمعيات المجاهدين : \_\_\_\_\_  
ظيفته المدنية او العسكرية السابقة : \_\_\_\_\_  
الحالة التعليمية : \_\_\_\_\_  
اللغات التى يتكلمها : \_\_\_\_\_  
الجهات التى سكن بها سابقا : \_\_\_\_\_  
الرحلات الطويلة التى قام بها بما فيها رحلة الحج : \_\_\_\_\_  
هل سبق ان اجريت معه مقابلة : \_\_\_\_\_  
بواسطة من : \_\_\_\_\_  
اين : \_\_\_\_\_ متى : \_\_\_\_\_

ملاحظات : حول المقابلة :

---

---

---

---

---

---

---

---

اسم الباحث الذى اجرى المقابلة : صالح محمد صالح



- س . يا عمى الحاج توا احنا نبوا انديروا معاك لقاء بسيط حول الجهاد والمعارك زمان .  
نبوك تحكيلنا عليها بالشوى .  
ج . هما جوني مرتين الجماعة .
- س . توه انت يا حاج ابوراوى بتحكيلنا على اهم المعارك الى انت حضرتها فى ايام الجهاد ؟  
ج . ايه . . خلاص باهى على اول امنين صار معنى التركية ساعتها موجودة فى طرابلس  
مش هكى ومدابيرين مدفع بوخرص يضرب معنى لين يفوت مالطا وين ايفوت مالطا  
دايرينه على حسب معنى الاجانب الى معنى قول جاء الخبر قالوا الطليان جاي لطرابلس  
لكن مانزلش صارت المهجاء فزعنا مشينا لسوانى بن يادم هاذى اول خطره كل من هو مشى  
لسوانى بنيادم مشى ، وبعدين قعدنا ساعتها صائم انا معنى قاعد مع السعى بالحول معنى  
عنده ناقة رفعنا نلموله فى الواحد من الى يمشى قال يمشوا بوراوى بن عبد الحميد عنده ناقة  
مشينا قافلة نجيبوا فى السلاح من سانية الباشا يسلملنا فيه الزباط التركية ونسلموا فيه  
لشلاى ساعتها قائم مقام معنى شلاى هو الكوماندو مشينا ليلتين توه الفراقيط جوا على  
قرقارش وين داروا الاتريك شبحوا الليلة لوله القافلة كبيرة معنى منعنا ربي وصرخوا فيها  
الفرقاطة مرتين والا ثلاثة لكن نفوت الفرقاطة نفوت للقافلة هاذيك ، عاد جنبنا السلاح  
مرتين يعبولنا هذا التركية الزباط الى غادى . نسلموا فيها لشلاى هنا فى الجامع ، فى السوق  
هنا باهى وقت معنى انا وجدت من غادى وجبت السلاح مع البل هاذيك جت كرهبة اية  
وجبت موزر وقعد فى ايدي .
- س . توه قوللى تقدرش تحدد هكى المعارك الى حضرتها بالزبط ، قوللى حضرت المعركة  
الفولانية . . وحضرت المعركة الفولانية ؟  
ج . اول معركة نزل الطليان على قرقارش مانزلش على طرابلس اول معركة وظهروا حتى  
عرب التركيا ظهورا لسوانى بنيادم اول معركة من جهة قرقارش  
س . شن اسماءها .
- ج . اسمها هذه هجمة امتاعت سوانى بنيادم والحبش من قرقارش هوريت معنى فزعنا  
معنى السلاح الى عندهم سلاح فزعوا للترك الزباط الترك . . حد ماشبحوا  
الاتريك . يقولوا قاويل ياسر قاويل الزاف معنى الحبش بالزاف قاويل بالزاف . . احنا قعدنا  
معنى مع التريس الى هما الليبيين نحاربوا حتى ردينا الحبش هاذى اول هجمة متاع سوانى  
بنيادم .
- باهى بعدين صارت هجمة مصراتة جواء مصراتة فى نهار الهانى جوا الهانى . . حاضرها  
الهانى . . وفيه سدره يقولوها سدره بوغمجة استشهدوا فيها اربعة مصراتة وانا حاضرم  
مع مسعود تحت هذيك السدره ونضربوا اربعة الى استشهدوا هاذاك النهار بعدين قعدنا  
ردوا الى مات مات والى اسلم اسلم مامات والله من ناس . . هذى لوله وثانية ، بعدين

- يقولونها امتاعت السكوم من هنا .  
 س . قوللى الهانى احضرتها انت معركة الهانى احضرتها؟  
 ج . اينعم .  
 س . حاربت معاهم ؟  
 ج . اينعم ساعتها . .  
 س . تعرفش من كان القائد الى من جانب الليبيين . . من كان قائد المجاهدين فى المعركة هاذى .  
 ج . المعركة متاع قرقارش  
 س . لا . . لا . . معركة الهانى؟  
 ج . امتعت الهانى من قائدها توه ساعتها توه رمضان السويحلى . . لما جوا مصراتة من غادى متقدمها رمضان السويحلى .  
 س . من الطليان من جانب الطليان تعرفاش من كان القائد الايطالى ماتفكرش بعض القادة الطليان ؟  
 ج . الطليان من جهة الطليان نعرفهم فلان فلان واحد منهم . . هذا العمارى حتى نهار المشنقة امين دار الطليان المشنقة هنا فى الزاوية حاضرها هذاك النهار هو ان شاء الله ربى نهار السكوم افزعنا خاطر  
 س . السكوم هادى معركة ؟  
 ج . معركة ماهو الطليان ساعتها الزوارى ترك الطليان بدء يحارب حتى امعاه هذا يوم السكوم .  
 س . معركة اسمها معركة السكوم . . وين السكوم هذا ؟  
 ج . امغرب .  
 س . وين فى الزاوية هنا ؟  
 ج . لا من العجيلات غادى .  
 س . من العجيلات غادى اسمها معركة السكوم اسمها معركة السكوم والا . لا ؟  
 ج . معركة السكوم مات فيها نعرفه انا فازع امعاه «شنكيرى» شنكيرى ولد الاعيور توفى هذاك الوقت وماشى انا وحياة الهندورى» هذا الشيخ الطاهر . . بابا «الهندورى» توه . .  
 س . بابا الشيخ محمد توا  
 ج . سيدى محمد هذا مشيت انا واياه امعنا سلاحنا ولكن نهارها جيش كبير .  
 س . معركة كبيرة هيه نهار السكوم .  
 ج . معركة كبيرة متاع السكوم .  
 س . تقدرش تقوللى القادة الليبيين ، من كانوا القادة الليبيين فى معركة السكوم ؟  
 ج . ساعتها من غير . . لا ساعتها الشيخ «محمد المقطوف» هو الى معنى يسقد فى الخاطر «وشلاي» .  
 س . محمد شلاي يعنى ؟

- ج . محمد شلابي .
- س . ومحمد فرحات امعاء والا . . لا ؟
- ج . فرحات من الكواراغليه .
- س . والله تقريبا . . يعني مانعرفاش ماكانش مشترك امعاهم في . . . ؟
- ج . ساعتها امنين . يصير البريج في السوق يقول الجهاد يارسلو الله كل حد يفزع راهو حتى كانه فيه ببندقة عربية واكثرنا عندنا .
- س . لكن لا بد كانوا فيه ناس ينظموا للمعركة هاذي . . في ناس تنظيم للمعركة لا بد يكون فيه تنظيم . وكان فيه ناس ممكن تعطي في الاوامر يعني .
- ج . ايه توالى يعطي في الاوامر ساعتها .
- س . ساعتها في تلك الفترة .
- ج . ساعتها الله والرسول يعلم واحد من اللي انشلق هو ببعدين الله . . الشيخ «محمد المقطوف» وشلابي ولا اله الا الله محمد رسول الله ، هذا اللي من جهتنا احنا توه الرحمة معنى اللي يامرونا «شلابي» و «الشيخ محمد المقطوف» معنى يمضوا يقول الجهاد يارسلو الله يدير ناسه اولاد صقر هادون والقبيلة الرحمة هاذي حتى هي جهة البلاعة معنى الاشاره من غير امر هو هاذك الوقت .
- س . قوللى ماتقدرش . . كيف كان المجاهدون زمان . . ينظموا في ارواحهم قبل المعركة ؟
- ج . ينظموا لا بد فيهم واحد امر معنى يمترزوا ويقعدوا ويضربوا حتى لين يردوا الكافر، توه وقت الى الطليان نزل «سلطان بن شعبان» الزواري هذا وصارت وجاب القلعة . ساعتها تاغمة عرب .
- س . تاغمة في بئر الغنم والا وين تاغمة . . تاغمة وين ؟
- ج . تاغمة في يفرن . . قبيلة اسمها . . تاغمة . . وساعتها مشيلها زى ماتقول الشيخ هذا الى يقول :
- خليت مايغني طمش فقاري . . لمسى وطابوني ونخل بكراري  
هذا محمودى من هنا
- كل مايجيرنى ماحيرتنى الا شاردة مضموني الى شدوها صغار كيف صغاري
- عنده بنت قعدت هنا مامشتش . . ماهجتش فوق للواحد يقول الواحد . وبعدين زوارة القلعة خابروهم زوارة وقالوهم بنحاربوا تاغمة وانحاربوا العرب حاربوا عنده ولد اخته هذا توفي هاذك النهار وحضرته انا وعمك «مصباح» رحمة الله عليه وعلى سائر المسلمين «مصباح الفيتورى» .
- س . مصباح الفيتورى قوللى في معركة السكوم الى في المنطقة الغربية في زوارة هيه مش في جهة زوارة والا لا . . قداس كان عدد الليبيين او المجاهدين . . عددهم قداس .
- ج . عددهم الى هما من هنا .

س . لا . الكل الناس الى شاركت في المعركة كلهم ؟  
 ج . الى شاركت في المعركة هذا متاعث السكوم . . هاذى فيها فوق (180)  
 ج . من كل قبيلة هذا هو شيخ الرحمة احنا ماهو حوشين والا ثلاثة مشينا الشيخ «الطاهر» والمتحدث .  
 س . عبد القادر هذا معاكم والا . . . لا . . .  
 ج . ايهم متحدث ثالث «عبد القادر مزنز عبد القادر مزنز» هذا حضر الجهاد وحضر حتى . . .  
 يوم السكوم لكن من جهة الاسلاق ساعتها كومانده حتى الاسلاق عندهم معنى امير الى يسقد والى يبي يخليه والدنيا اخرتها معنى قعدنا عام طرابلس تصكرت وبن قردان مفتوح معنى تمشى ونجى اخرتها معنى قعدنا الله الله معنى ماتلبس الخليفة الا فى كاتتين وحزازيم . . من قلة اللباس درنا نبوا نغشوا لبن قردان . . لمينا معنى يجي 150 والا 160 بندقة وخاطر هلبة . . وقالوبوا بن قردان بنجيوا اللباس وبنجيوا مايلبسوا صغارنا والمتعة درنة وامشينا جينا على حدود الناطور فوق من . . تحت الصيعان من لوطه تحت الصيعان هاذى اساءها زوارة والطلبان والحيش والواحد سمعوا . . هما يقولوا فلاة ساعتها الفلاحة هم فى المحل الفولانى طلق بعدين يحدث فينا خو المنزل هذا فى المهيرستا .  
 س . الى فى الكرابير والا شنى . . وين هذا فى المهيرستا خو خليفة يعرفه خوه المنزل هذا انشد محمد مع الطليان . .

س . قاعد مع الطليان يشتغل مفاهم ؟  
 ج . نازل .  
 س . نازل امعاهم فى المهيرستا مطلين يعنى ؟  
 ج . لا . . من قبل معنى الواحد نازل شدوه ساعتها حصل فى الواحد ونزلوله بسيف فى طرابلس .  
 س . جندوه بالسيف ؟  
 ج . اى هذا هو . . قول ياسيدى لا اله الا الله محمد رسول الله صلى الله عليه وسلم . . هذا مشينا معنى تحت الجوش من غادى وجينا فى الناطور ودبل معنا حدروا امالى السلاح قاعدين الى عندهم سلاح معنى قعدوا فى . . . بحداء الواحد توه هاذاك الوقت معنى الشيخ «على اشكال» هو الكومانده على الرحمة ويسقد فينا .  
 س . «على اشكال» شيخ قبيلة ؟  
 ج . شيخ قبيلة الرحمة ابواه . . . قول رفعت منه انا جمل ورفعت منه بارات معنى نبوا نجبيوا محسوب بيهم البضاعة هوينه وفكرنا الطليان معنى الفرنسيس والطلبان لما جينا فى الناطور معادش يطبنا الفرنسيس طلق البراح «بن شعبان» لا واحد معنى فى ماله يسده على رقبته ولا رقبته تسده على ماله الى ماتمشوا للفلاحة الكل . . . قعدنا ثلث ايام نمتزوا نحاربوا امعانا «عيسى سمهود» ساعتها رحمة الله عليه حتى هو فى المحله هاذيك «وعبد الرحمن الشريف» بابا الشريف عبد الرحمن يعرفه خليفة هذا . . .

س . عبد الرحمن الى توفي ؟  
 ج . توفي بابا الضراري هاذون قول قعدنا . عندنا السلاح ساعتها محصلين السلاح من «شلاي» هذا حتى الى ماحصلش من غادي من سانيه الباشا بندقه عطاءه شلاي ساعتها هنا يفرق في السلاح والفوشيك . قول قعدنا معنى نحاربوا ثلث ايام نهار ثالث يوم احنا واياهم امالي السلاح امتريز في الناطور بارواهم وهما في علو . . كمالث ثالث ليله قالوا هاذي فلاقة هليه رجعوا معنى داروا قوه اخرى ودينا احنا اول الليل «عيسى سمهود» وواحد صوبيعى امعاء من يمشي من يمشي ؟ قال عيسى سمهود انا نمشي والصوبيعى قال انا نمشي امنين يشبحوا معنى المحله هذه الى تحارب فينا موجوده والا مهناش داروا وامشوا لهاذوك الرؤس مالمقوا غير الدم الى صار فيهم الموت ولقوا معنا المتاريز فارغات جونا قالوا معنى مالمقينا حد المحل الى هما فيه حتى الموق معنى رفعوهم مالمقينا حد جوا عطونا صار المهجاء والواحد في المحله من غدويكه الصبح مانعلموا الى ناض لول لقاءها مسحبه زى الجراد من اول الليل للصبح ايه عاد مات الى مات والى حصل حصل حصلنا 29 - تراس شدونا في حاشية السطيل من فوق .

س . السطيل . . . وين يجي هذا ؟  
 ج . السطيل هذا في الحكومة السطيل هذا فوق من تونس السطيل هذا للفرنسيس . .  
 س . منطقة اساءها والا شنوا ؟  
 ج . لا . . معنى السطيل .

س . معركة ؟  
 ج . لا السطيل هذا معنى ناس فيه ساكنه فيه وفي العرب الفوق معنى  
 س . منطقة اساءها السطيل يعنى .  
 ج . ايه . . السطيل يعرفوه قول ياسيدي ردونا من غادي تسعه وعشرين تراس دارولنا محاكمه ، قعدنا عشرة ايام محبوسين وانهار حداس دارولنا محاكمه . . . حكم علينا التسعة والعشرين التراس بالاعدام . .  
 س . باهى ؟

ج . تو مهناش الاولده الى قاعدين «بن شعبان» هذا شنو يقولوله الى موجود توه سمع لاله الا الله محمد رسول الله . سمع بالعرب الفلاقة هذوم حكم عليهم بالاعدام كلهم التسعة والعشرين التراس دار كرهته . توه دايرين علينا احنا في حشد حكمونا حاشيه العسه حاشيه بحداء معنى هو شتاء هو الوقت شتاء والحمرايه محادية هذا الى . . . ينزلوا منه يحاربوا منها ويديروا منها الواحد = . قول ياسيدي دايرين لنا غير لوحات مقعمرين عليهم ومحاكموا فيهم سمع ولد «بن شعبان» المبرود . . .  
 بزواره ، بعرب الراوية حكم لطلبان بالاعدام دار . . . من غادي . . .

مع سي .  
 س . شعبان . . . وس شعبان ؟  
 ج . ولده .

س . ولد شعبان ؟

ج . ولد «بن شعبان» هو نسيتيه هو انا اسماء مش ابراهيم ابراهيم بقولى .  
س . شن كان هذا ؟

ج . كان ساعتها مع سيده يحارب وهاذى «بن شعبان» .

س . صار مجاهد حتى هو من المجاهدين .

ج . هو . . لأمع الكفار مع الطليان لكن سمع وين سمع حكموا علينا الواحد دار وجاء قابله شق هاذوك الى لا يذبن علينا وجاء من هنا غريينا زى مانشيخ نزل بجانب كرهبته وقال ناض الترجمان قاله خيره فلان الفلانى قال يا حضرة الترجمان بندوى معاك ثلاث كلمات بس قال له باهى قاله خيره قاله نبى ندوى امعاء ثلاث كلمات توازى من الجماعة ، نسمعوا فيه عاد جاء فى جنبنا ونزل من كرهبته قاله قوله يتكلم قاله البارح الفرقاطه وين مراسيه والله مانحكيلكم الا الى سمعته من ودنى هدى .

س . الفرقاطه . . . شن الفرقاطه ؟

ج . وشن جاييه .

س . شن الفرقاطه سفينه ؟

ج . الفرقاطه للطليان قاله شن جاييه للزاوية . . . قاله جاييه المعاشات عندهم سبعطاش التراس اعيان قاعدين يأخذو من المعاش جابتلهم المعاش والله ورحمة باباى قال باهى باهى لما السبعطاش من الزاوية معنى سبعطاش من اعيانهم قاعدين يأخذوا من . . . الطليان ويأخذوا فى المعاش معنى لما معنى عام مصكر كانت يمشوا ويمجوا على زوارة ، زوارة يجييلهم فى اللباس وفى الواحد لما الزواري صكر احنا صكرنا عليهم قعدوا عام يعلم الله بحالهم ومشوا لدولة اخرى بييجيوا مقات أفروخهم هذا البس افروخهم لما عندهم سبعطاش التراس قاعده كلمتهم مع الطليان امين معنى خاطرهم يحكموا عليهم بالاعداد توه الترجمان يدوى للواحد نسمعوا فبه معنى قدامنا وواقف الترجمان يدوى فى الى قاهوله وولد بن شعبان هذا . . يقول سى . . باهى بعد ماتم عاودولنا المحاكمة توه بلغونا بالاعداد .

س . ينفذوا ييوا ينفذوه ؟

ج . ليه بلغونا توه طيس رد المحاكمة طيس يقول فلان بن فلان نو ، فلان بن فلان .  
نو . . . . . فلان بن فلان . . . نو الزاوية ثلاثة وعشرين تراس منعوا من الاعداد اثنين من تاغمه الى حكموا عليهم .

س . من هما ؟

ج . هذا الى من تاغمه واحد يقولوله من جهه لا اله الا الله محمد رسول الله ، انا نعرفهم عاد فلان زى ماتوا خليفة الى كان امعاك .

س . اى ماتتفكرهمش ؟

ج . اى من تاغمه مانفكرهمش .

س . تذكرش الاسماء امتاعهم ؟

ج . اسماءهم والله اما اثنين من قصر الجفارة اشبح الحكمة .

س . امين ؟

ج . قصر الجفارة هكى .

س . من جهة الجفارة من هنا والا لا ؟

ج . لا .

س . قطيس ؟

ج . لا من شرقه .

س . شرقه ؟

من جهة من قصر يقولوه قصر الجفارة من العرب من فوق جاين اثنين حتى هما . . من جهة البضاعة كان هذا نعدموها هاذاك النهار . . واحد من اولاد صقر وواحد ، سته عدموا منهم سته وثلاثة وعشرين حكموا علينا مؤيدين ردونا لزواره قعدنا نهارها ومن غدويكه ركبونا لطرابلس قعدنا عشر ايام وانهار احداش ركبونا الى فانيانا لقينا قدامنا شعبان هذا اخوا السويحلي هذا ، خو رمضان وعمه حتى هما ميسرين في البلاد هاللى يقولوها فانيانا . . حتى الى بيعدموه يجيبوه لها ذيك الدزيره في وسط الجبل . . والميه تجرى ومن حيث تخش تلبس لبسك معادش تلوحه ترقد بيه وتدير بيه هذا هو .

س . قوللى توه انت قلتلى حضرت معركة في الهان ومعرکه السكوم في زوارة ؟

ج . نعم .

س . مافيش معارك ثانية احضرتها غير المعارك هاذى ؟

ج . باهى معركة قرقارش انهار هذا امتاعت قرقارش يوم سوانى بن يادم .

س . امتاع سوانى بن يادم ؟

ج . هادى اول معركة مع الطليان .

س . يعنى كيف كان المجاهدون ينظموا في ارواحهم ياعمى الحاج ؟

ج . اصبر الى ينظموا شنو ، واحد عنده بندقيه معنى فيها حتى الواحد يعدوه . . معنى مش عندك بندقيه يشبحوا العمارة متاعها قداش ويسقدوك وطبسوا يوازوا يقولوا سقدوا فلان فلان للمعركة معنى كومانده هادوله واللى معنى ماعنداش كاباك كان السلاح الكاباك لول بوحده .

س . تقدرش تقوللى كيف كانت حالت المجاهدين قبل ماتبدأ المعركة هكى كيف كانت ؟

ج . شنى كانت ، حالتهم شنى حالتهم والله كان كل يوم معنى المهجاء .

س . المهجاء والاستعداد ؟

ج . والاستعداد والمهجاء يعنى والجهاد يارسول الله .

س . الدعوة للجهاد ؟

ج . الجهاد يارسول الله وفيها ناس تحارب معنا تحكى وتقول :

• شعبان : اعتقد انه سعدون اخو رمضان السويحلي وليس شعبان ، ( الباحث )

«ياريت خوتى ثلاثين واولاد عمى بزاید

ولا ياكلوا لقمة الدين ولا يلبسوا جرد باید»

تنوض هاذيك المحلة كلها كان فيها ميه والا خمسين

نشوشوا عاجلهاد هذه المهجاء هكى .

س . توه ياعمى الحاج تنذكرش اول اجتماع ليهم وماتذكرش اول اجتماع داروه قبل

ماتبدأ المعارك هاذى الى قلتنا عليها؟

ج . اجتماع شنو هو .

س . يعنى يجتمعوا ايجو القادة ويقولوا هيا نبوا نجتمعوا وكيف نبى اندير فى الحرب يعنى

كيف بنمشى وكيف بنوزع وكيف ماتتذكرش اول اجتماع كان لهم متى ووين كان ؟

ج . اجتماع هادونه الى

س . ايه المعارك زى معركة السكوم الى قلتنا عليها، مش داروا لكم اجتماع قبل لاتمشوا

تحاربوا قالولكم غدوة بتمشوا اليوم يعنى ؟

ج . ايه، ايه هادى امر من الطليان من «شلابى» والمقطوف» هما الى ساعتها هما

الكوماندو .

س . تنفكرش يعنى اول اجتماع ليهم . . وين كان قبل لايجوكم انتم ويقولولكم يعنى انتم

راكم بتمشوا اليوم فيه معركة فى الجهة الفولانية تبوتمشوها .

ج . ايه . . اجتماع فى ايم محلة .

س . وين تالا من ؟

ج . تلا وين على اول مايحيبوا معنى المشائخ الشيخ «على اشكال» مثلا يرموا عليه فلان

وفلان يجيبهم ويدخلهم لشلابى الواحد هذا «المقطوف» كذلك يجيبوهم يتفقدوا فيهم فلان

فلان من الرمجة معنى اثنين ثلاثة من اولاد صقر اربعة خمسة والمقطوف معنى امر ويتفقدوا

فلان فلان يديروهم قدام القصر هذا .

س . معركة بثر الغنم ماحضرتهاش يا حاج ؟

ج . بثر الغنم . . ساعتها احنا فى تاغمة وفزعنا من تاغمة وفزعنا من بثر الغنم واحضرتها

ونزلت من تاغمة مع واحد يقولوله الشيخ ، هذا تاغمى نزلنا هو ساعتها دايرين حتى فى

المحلة هادى مشينا حتى فى الهجمة لا إله الا الله .

س . وين غريان ؟

ج . لامش غريان للوادى هذا امتاع .

س . وين هكى امقبل ؟

س . فوق امقبل هذا .

س . وادى الاثل ؟

ج . آه لافوق .

س . فوق من الموت ؟



ج . فوق من الموت هادونه الى ساعتها معنى هجيناً فيها حتى «رمضان غادى ونسقدوا لا اله الا الله محمد رسول الله هو ان شاء الله ربى يوصلنا سالين، هذا الى قالك عمره انا توة ستة وثمانين عمرى قاله .

س . ربى يكمل على خير ،

ج . هادون الى حمد مسعود يحجم فيهم غادى هوينه حمد مسعود . هذا معنى كانك لحقت عليه وسمعت عليه .

س . صار يعنى هاذى المعارك الى احضرتها، معركة الهانى ومعركة قرقارش ؟

ج . الهانى والسكوم سوانى بنيادم هى البريمة وامتاعت هادى الساعة امتاعت الناطور قعدنا احنا واياهم نحاربوا حتى يسرونا .

س . مافيش معارك ثانية حضرتها غير هادى المعارك ؟

ج . بعدين فى التالى صارت معارك امين انحكمت انا .

س . صارت معارك زى شن ؟

ج . المعارك بين الطليان وبين العرب ساعتها باش الى معنى يدز الكومانده الى علينا فى الحبس هذا فافنيا، يقولوله يجي لسعدون خو السويحلى وعمه دايرينهم فى دار بارواهم وظهرونا من لاريه معنى دائرين شبك حديد هكى مصكر ويدخلوا فينا بالعدد ويظهروا فينا للحبس بالعدد يجي المدير هذا الى على الواحد يقول لسعدون يقوله اكتب لحوك جواب توه ساعتها الطليان اليسرى الى هنا تجيهم فى كل خسطاش يوم كل شهر تجيهم الفرقاطة تجييلهم فى المتعة حضرتها قول يجي عاد المدير لسعدون وعمه يقوله اكتبوا لحوك يطلقوا اليسرى الى عنده لحوك وانتم تروحوا ونطلقوا الى عندنا يقوله مابوش ماباش سعدون وعمه قاله محكومين مع ناس ميات ونذروا للسويحلى احنا معنى تسير ندير صلح انت والطليان قول انهار من النهارات شوره رفعوهم قعدوا اطناش اليوم ويأكلوا فى نصف خبز بيناتهم يابس كل واحد فى دار ويقسموا عليهم هاداك يشعقوا فيهم على السويحلى على سعدون وعمه بعدين طلقوهم شوره الى رفع المتعة لليسرى الى ميسيرين يعنى الطليان قاله والله اليوم ، خوك كتبوله ورقة لسويحلى وعمك ونصف خبزة بيناتهم يقول لهم المدير الكومانده يقولوهم ابعثوا لحوك شنى كتب السويحلى زى ماسمعت كتب قال اليوم عندكم هما قبلنا بعام اليوم عندكم خمسة سنوات اربع سنوات احنا قعدنا وحده وثلاثين شهر فى الواحد، عشر شهر هنا فى طرابلس عندكم اربع سنوات محكومين والمسموع ميات معاكم فيه الى مايسوا عشرة منكم من المسلمين من غرب طرابلس وتوا خلاص واليوم اربع سنوات فم الحوش الى تحشوا منه وتحش منه ونظهر انا ماغفستاش العتبة ماغفستش فيها هذا الى كتبيلهم وين جاء الجواب قروه ظهورنا للاربية جاء الجواب متاع السويحلى لحوه وعمه .

توه نزل المدير هاداك دائر علوهكى فوق من الاربية هاذى الى يظهرنا فينا هو مكهين من الروشن همت عليه واحد قال انزل لوطه اهو الجواب امتاع السويحلى امتاع سعدون وعمه جاي طبس يقرأ فيه وواحد ترجمان معا وواحد يقرأ فى الجواب من الداخل من

الحديد الداخلى احنا الى فى الارية قال سعدون رد الجواب لخواه وعمه قال اربع سنوات الحوش الى العتبة هما يخشوا منها للحوش ماعفستهاش او على المسموع امعاكم ميات الواحد يردع منكم مية من اليسرى آه وبارك الله فيكم الى يعتولى تبوا اليسرى نطلقهم الى هما تحتى وانتم تروحوا توه من الحديد البره الشباك الى دايرينه على الارية نزل هو وعيلته عيلته على اليمين على يساره والمدير هاذاك الى هويدز ويساعد فى سعدون ورماهم اطناش اليوم فى الواحد على يمينه توه يقرأ فى الورقة الى ردلهم فيها رمضان والترجمان يدوى للمدير والترجمان بعد اخر تاليه دفلت عليه سنيورته زى هما امقابلينا هكى على الحديد شبك دفلت عليه وضرباته هكى بايدها وروحت من غدويك ردلهم للحبس قعدنا بجى شهر والا اثنين محبوسين وبعدين هوينه صار الصلح وروحت الى تحت الطليان والى تحت السويحلى طلق هاذوم وهما طلقوا وروحوا وهادى الدنيا .

س . هى هادى المعارك الى انت حضرتها بس قيرشباب ما حضرتهاش معركة قيرشباب ؟  
ج . قيرشباب ساعتها احنا من هنا فى يفرن فى الوادى متاع الواحد ونحدروا بالعسة هاذيك بالعسة ونحدروا نشدوا امتاعت سوانى بنيادم امتاعت الواحد صارت حتى معركة فى قطيس . .

س . هادى معركة اسمها القنة بثر الغنم ؟

ج . معركة بثر الغنم حدددها تاغمة .

س . القنة معركة القنة ؟

ج . معركة القنة هاذيك . . . القنة يتزلوا . . . تمشى عسه عسه .

س . حاضرها المعركة هادى . . امتاع القنة ؟

ج . امتاعت القنة مامشيتش فيها معنى نعس فى الليل ونتسقدوا من العشية للعشية نشد

فى القنة وكان هما شبحو او شىء يعطوا الامر .

س . مش هى معركة بثر الغنم والا لا ؟

ج . لا ، القنة اوطا من بثر الغنم .

س . اوطا ؟

ج . ايه ، اوطا من بثر الغنم القنة هانى زى . . . معنى يعسو فيها كان شبحو . . . . .

من العشية يمشوها كان شبحو الطليان فيه بانندات معنى راقية وبتحارب يعطو خبر

وتشد المحلة معنى المعركة هذا ماصارش فيها الا يوم الى صار فى بثر الغنم

هادى . . . . . و . . . . . وصارت فى بثر الغنم معركة كبيرة . . . . . وصار

فيها حتى المجاهدين موى هلبه .

ج . وين هاجرت .

س . هاجروا فيه الى هاجر بره من البلاد مره وحده وفيه الى مشى لتونس وبره لاوروبا

الناس الى هاجروا ؟

ج . الناس الى هاجروا ماهو الشيخ « على » هو لول مشى لتونس .

س . قوللى الهجرة هادى حصلت يعنى كانت فيه ناس هاجرت ؟

- ج . فيه ناس هاجرت مشى متنا احنا « خليفة » .
- س . كيف كانت الهجرة هاذى ، الهجرة هاذى الناس الى هاجرت وجلت كيف ماتقولوا كيف كانت جماعات تمشى والاكل مره واحد والا بالشويه بالشوى والا كيف الهجرة ؟
- ج . كل من هو معنى لأن الطليان جاء حكمه وجاء للزاوية جاء ملك البلدان فيه الى هاجر امشى لتونس .
- س . توه زمان انت فى الفترة الى كنت فيها يعنى الهجرة كانت هلبه الناس تهاجر هكى مع بعضها تمشى قبائل ومشائخ كلها والا يمشوا بالواحد بالاثنين بالثلاثة ؟
- ج . كل قبيلة احنا مشى متنا الشيخ على اشكال وضراريه اوامشى الا فى حاله يعلمها كان الله مشى لتونس وبعدها قعد مدة وروح ، وهاجرت الناس مشت لتونس ناس ياسره .
- س . ومصر امشت حتى لمصر والا لا ؟
- ج . مصر ساعتها .
- س . والنيجر والتشاد والسودان ... ؟
- ج . مصر مشتلها ناس ياسره وقت هذا رحمة الله عليه الله الله .
- س . قوللى علاش كانوا يهاجروا الناس ؟
- ج . يهاجروا من الطليان .
- س . لامش عارف حالهم يعنى يهاجروا علاش على رجيلهم والا علاش ؟
- ج . لافيه بل وفيه خيل .
- س . صار يهاجروا على البل والخييل ؟
- ج . ايه فيه الى على بل وعلى الخييل .
- س . باهى كيف كانوا مدايرين فى الماكلة والشراب امتاعهم ؟
- ج . الماكلة والشراب امنين اقعدت عام معنى ماوجدناش الواحد باش امشينا بنجيبيوا من الفرنسيس المتعة ولباس صغارنا ولباسنا هونه حتى دارونا قوه والطليان تاريتيه وهذا الانقليز والفرنسيس كلمه وحده توا احنا الى حصلنا فى الناطور وشدونا حصلونا وفيه تراس شده الفرنسيس وسلمه للطليان حتى هو .
- س . قوللى الهجرة كانت منظمة الهجرة والاكل واحد يهاجر على زى راسه والا كيف ؟
- ج . الهجرة الى ميبش معنى فيه الى حى يقولوله فلان معنى فلان هذا يبي الحرب ومايبش الطليان ويبعوا فيه .. البائد زى ماكان تحكم على الكراسى الله اكبر ، حاصل توه ان شاء الله ماهنالك الا النصر بقدرة الله .
- س . ان شاء الله ... قتللى كيف امدائرين فى الطعام والشراب امتاعهم ؟
- ج . ليهم رب كريم .
- س . يعنى كيف كانوا امدائرين فيها الناس ... طبعا انت ماهاجرتش والا ... ؟

- ج . ماهاجرتش لا ماهاجرت حدنى معنى هذا بثر الغنم وهذا قعدنا فيه ساعتها .  
 س . ماطلعش من ليبيا ؟  
 ج . ليبيا . . الى يفرن مشيت لتاغمه . . تاغمه مشيتها ساعتها .  
 س . قوللى الناس المواطنين الى هاجروا لتونس والا للسودان ومصر هذا من كان يساعد  
 فيهم فى عملية هجرتهم ؟  
 ج . يساعد فيهم غادى .  
 س . ايه من كان يساعدهم وكيف استطاعوا انهم يدخلوا لتونس ؟  
 ج . يدخلوا لتونس . . . ومصر والسودان معنى مهاجر . معنى من حكومة الطليان  
 مايبيش يقابل الطليان وخلاص تونس تقبل . تونس كل من هو مشى منها من ليبيا  
 معنى ماترداش تونس والسودان ساعتها .  
 س . كانوا متعاونين معاهم الناس والا كيف ؟  
 ج . حرب هذا التزائر صار فيها حرب اشويه التزائر ماقعدش فى جبل تحارب سبع  
 سنوات اه ويعلم الله بحالهم امنين انصرها السميع العليم انتصرت .  
 س . صار ماتعرفش من يساعد فى المجاهدين فى الهجرة ؟  
 ج . من يساعد فيها . . . . . هاجرت .  
 س . ايه بره من البلاد ايه لابد فيه من يساعد فيهم لما تمشى مجموعة قبيلة او عائلة تهاجر  
 بره لابد فيه يعنى من يساعدهم ؟  
 ج . هاداك الوقت كل من هو .  
 س . ماكانش فيه يعنى اتصال ما بين المجاهدين وما بين النظام الى كان موجود فى تونس  
 ومصر والسودان ماكانوش يساعدوا فيهم الناس هذا والا لا ؟  
 ج . كيف ماساعدوش . . . السودان ومصر وقت الى جمال .  
 س . لانهكى قبل شويه هكى ؟  
 ج . قبل فى حرب 23 .  
 س . يا حاج هادون الى طلوعوا ومشوا لمصر البره من هناك واحد يعنى عانهم مثلا  
 وزودهم بالاكل وزودهم بكدا او خلاهم يطلعوا بره وكل شىء هناك ناس  
 ساعدتهم فى الحاجات زى هادى ؟  
 ج . كيف ماساعدتهمش هو ماشى معنى فى حاله يعلمها غير الله وهارب من الكفر  
 واهله وكيف ماساعدتنى وفيه حتى الى مشى معنى عريان ولبس وقعد هو يوكلوا فيه  
 معنى بالسبيرة .  
 س . قوللى الناس الى انت تعرف ناس امشت هاجرت والا لا تعرف فيه بعض الناس  
 هاجرت وولت بعداين ؟  
 ج . من هنا معنى مانعرفش الا الشيخ على اشكال .  
 س . طبعا فيه الى وولت بعدما هاجرت والا لا ؟  
 ج . ولت لما صار الصلح .

س . وعلاش ولوا ؟  
ج . ماهو صار الصلح والطليلان معنى طلق اليسرى الى عنده والسويحلى طلق اليسرى الى عنده صار معنى محسوب الواحد كان ساعتها الى هما يدهم فى الطليلان يديروا ماييوا .

س . قوللى الناس الى هاجرت هادى لما هاجرت طبعاً كان عندها املاك والا لا فيه الى هاجر وترك املاكه يعنى هرب وسيبها ؟  
ج . لما الشيخ عون المحمودى يقول :-

خليت مايغنى حوش فقارى  
لمسى وطابونى ونخل بكرارى  
كل ماحيرنى ماحيرتنى الاشارده  
مضنونى الى شدوها اصغار كيف اصغارى

معنى قعدت هنا ويعلمنا شئ شئوصار فيها بعده . هذا هو يغنى .  
س . لا . الناس الى قلنا فيه الى مثنى لتونسى والسودان وبعدين رجع قولى هل الاملاك هادى الى سيبها لقهاها زى ماهيه قاعدة والا كيف ؟  
ج . كل شئ خداه حكامه الكراسى . . . . . الطليلان .

س . من حكمة الكراسى ؟  
ج . هو انقولك انا ورحمة باباى واحد يقولوله زليكة من اولاد اعماره ماشهد على الى عدموهم هذا فى المشنقة واحد مطردى هو هذاك النهار جابوه معنى مكليش وقاللهم وطبسوا قبل مايديروا الخيط فى رقبته وقاللهم انت امشيتوا للمحل الفولانى ودرتوا .  
ودرتوا . . . قاللهم درت كل ماقلوله انت مشيت يقوللهم درت . واليوم اشهدوا لا اله الا الله واشهد ان محمد رسول الله كل ماسالوا عليه يقوله درته . قالوله هكى عدموه .

س . صار فيه بعض من الناس قلنا بعد ماولت من الهجرة لقت املاكها اخدوها ناس ثانيين ؟

ج . اخدها طبسوا معنى يشوشدوا فيها ناس اخرين واصار الاعدام هذا معنى المقطوف ماهوحكموا عليه مؤيد حتى هو الشيخ محمد المقطوف .

س . مات فى السجن هو والا لا ؟

ج . باهى الناس الى ماجوش شن داروا معاهم ؟

ج . الى ماجوش قعدوا حرين .

س . شن داروا معاهم . . شئ ؟

ج . شن بيديروا معاهم الطليلان من غير وقت الى معنى الطليلان وزوارة ساعتها الزوارى هذا قعد الفرنضيص فى بن قردان الفرنضيص وهو الطليلان كلمة وحده والى حصله غادى يسره قعد اسير تحته .

س . قولى زمان لما جاء الطليان طبعاً وسيطر على اغلبيه البلاد كلها يعنى فيه ناس رفضت العمل مع الطليان والا فيه ناس تعاونت امعاه ؟

ج . عمل شنى ؟

س . يعملوا خدموا مع الطليان ؟ هل الناس قبل رفضت تخدم مع الطليان ؟

ج . وين معنى ناس تخدم مع الطليان محسوب تحتهم ناس .

س . ايوه تحتهم ناس فى المكاتب معاهم ؟

ج . ايه ماهو قتلك .

س . فيه ناس طبعاً نزلوا مع الطليان وعينوهم رؤساء ؟

ج . هادون الى نقولوا احنا امالى الكراسى هدون اسمع .

س . قداس تقدر اتقوللى النسبة امتاعهم نسبتهم قداس . . الناس الى عملوا مع الطليان ؟

ج . اسمع . . نحكيك على سعدون خو السويحلى اه الى شيخ مكر الطليان فى الحبس وفى الواحد ماشى طلع وين تلقاء هو وعمله معنى دوريه من الطليان بسلاحه معنى بروحه مترز وقعد يحارب لين خدا غرضه فى هاذك الى لقوه وهو توفى هاذى سامع عليها انا وجانى خبرها معنى سعدون الى شايع مكر الطليان هذا هو وبرا .

س . قولى زمان طبعاً الطليان قبل كان فارض ضرائب هلبة يدير فى الضرائب على الناس . . . ضرائب يأخذ فيها فلوس زى نقولوا احنا قرامات الى يأخذ فيها من الناس فيه ناس رفضت ان تدفع الضرائب هاذى والا . . لا . ؟

ج . هذا نفضت . . الضرائب هو شنو فيه الى عنده معنى خذوه منه مرة وحدة بيده هذا هو . وفيه الى خذوه منه قعد هكى .

س . فيه ناس مابتش تعطى الضرائب والا . . لا . . وفيه ناس مابتش تذهب لما حكموا عليها للمحكمة امتاعهم يعنى مابوش ؟

ج . وقت الطليان لما قعدت الناس تؤمر زى هلى عدموهم هادوله فلان هاجر وفلان كذا وهارب النهار الفلانى ويشهدوا على بعضهم امالى الكراسى الى نحكيك معنى واحد لا اله الا الله محمد رسول الله فيه الى ظهر برة مشى على وجهه وما قعدش يقابل فى الطليان خايف منه حتى حكموا على ، علي شلاي وحكموا الى هما قاعدين يتأمروا « المقطوف » هذا حكموا عليه بالاعدام . والمطردي هذا عدموه كل ماقالوله انت حاربت النهار الفولانى حاربت كذا وكذا وقتلت ، نهار عدموا ييجي اثنين والا ثلاثة هما بالمشقة هاذى وبعض حكموا عليهم مؤبدين لين ماتوا فى الحبس زى « المقطوف » وزى « شلاي » وبرة .

س . قولى فيه ناس طبعاً طلينت والا . لا . . لاشك انه فيه ناس طلينت زمان وجت مع الطليان وخدمت امعاه ؟

ج . بعدين بعد ماوالت . . . هاذونه يقلولهم العقد البايذ . .

س . قولى شن كان المجاهدين موقفهم منهم شن كان مدايرينلهم ؟

- ج . الى طليئنا الى روجت كانت غائبة وروحت .  
 س . لا . لا الناس الى خدموا في الطليان وقعدوا يخدموا معاهم . . وجوا ضدكم انتم  
 الناس الليبيين الى خدموا مع الطليان وجؤ ضدكم انتم شن كتتم اديروهم انتم  
 هاذاك الوقت ؟
- ج . شن نديروهم توة والا ساعتها . . ساعتها شنو كان بنقول يا عبدى قول يا ربى . . .  
 المولى والله فيه الى معنى يعلم الله بحالى .  
 س . صار كانوا يعاملوا فيكم معاملة مش كويسة ؟  
 ج . اه والله فيه معنى قال واحد زمان ايبات وجبه وثنين ثلاثة بلاش ويقول الحمد لله الى  
 معنى ما نشوشد في خوى المسلم .  
 س . لكن فيه ناس كانوا ايديروهم المجاهدين ماتسقمش نقول شنو كانوا ايديروهم  
 القادة . . .
- ج . في التالى المجاهدين في الطليان والا امعاهم . .  
 س . لا . لا . لا جاهدوا الطليان .  
 ج . الى جاهدوا في الطليان في لول ماهو طبسوا واحد لاقدرا نا نشوشد في خليفة وخليفة  
 يشوشد في واحد آخر ويلقطو .  
 س . ايه لكن لا بد لما الواحد هذا يشوشد في هذا . . وهذا يشوشد في هذا احنا  
 كالمجاهدين لا على الاقل نبى اندير امعاه شىء لا بد الشخص الى يبي يشوشد  
 ويطلين والى بيتعاون مع الطليان لا بد احنا على الاقل يعنى اندير حاجة اندير  
 حاجة .
- ج . مسيينهم الطليان والا العرب .  
 س . انتم شن كتتم تديروهم الى يشوشدوا ؟  
 ج . يديروهم .  
 س . يهددوا فيهم ويشدوا ويقولوهم معادش نشوشدوا  
 ج . لا . لا . لا ما . . . هو او كان تمشى غير تقوله مش من شانك يا فلان يمشى يشوشد  
 فيك .
- س . صار ماتقدروش تكلموهم المجاهدين مايقدروش يكلموكم ؟  
 ج . هو هذا والله كان فيه معنى الى هارب على نفسه والنهار الى يفوت على هاذوا نحمدوا  
 عليه المولى ويفرج وخلص لان شاء الله المقبول بيد اخيه .  
 س . تعرفش الناس الى كانوا القادة يعنى اهم القادة الى زمان في حرب الجهاد تعرفش  
 بعض القادة الى كانوا يقودوا في المعارك في ايام الجهاد ؟  
 ج . يخوضوا . . .

انتهى الجزء الثانى  
 شريط رقم 163/1

- س . القادة الى كانوا زمان يقودوا في الجهاد الناس الكوماندو في الجهاد زمان ؟
- ج . مش قتلك ساعتها مع « المقطوف » واحد . . . « المطردى » هذا شنقوه واحد . . . هادونه مع ناس الى هما معنى في كل معنى جيش يلموه ويلقطوا القبيلة الفلانية اربعة القبيلة الفلانية عشرة الى عندهم سلاح ويسير معاهم « المقطوف » هذا و « المطردى » هذا معنى الكوماندو كان يبوا محل الى ييقابلوا فيه ويقولوا معنى جاين بيحاربوا يكونوا هما الكوماندو على الامر ويقولهم .
- س . هذا ماتعرف انت غير المطردى والمقطوف ؟
- ج . هذا هو .
- س . في المعارك الى احضرتها انت وفي ايام الجهاد الى حضرتها انت ؟
- ج . المعارك الى حضرتها انا كل من هو ماشى على الدين المحمدية يمشى براسه من غير امر .
- س . ايواه صار كان . . . قوللى ماكتتش تعرف بعض ناس الطرق الصوفية الناس المشايخ زمان امتاع الدين ؟
- ج . معنى محسوب شاده الدين المحمدى . . . كيف هذا .
- س . يعنى ماتعرفش بعض المشايخ . . . اهم المشايخ الى تعرفهم ؟
- ج . والى شادين معنى الدين المحمدى ويقولوا الجهاد يا رسول الله واللى والنهار السعيد تفتك من كيد الطليان . . . يقولوا الله اكبر .
- س . ماتعرفش اسماء منهم تعرفش بعض منهم الاسماء الى مشهورين كانوا في الدين يعنى شيوخ وتجيهم حتى الناس تسال فيهم وكذا في حاجات زى هاذى من المنطقة هاذى ؟
- ج . كيف مانعرف حد والله إلا نعرفهم لكن يا ولدى بالله انا اليوم ( 8 ) سنوات انا على هالفراش حتى جنبى الايسر مارقدتش عليه وان شاء الله الاخير خير يوصلنى الله . . .
- الله غالب يا ولدى توباش نعرفهم انسيهم ناس واحضرت امعاهم ونعرفهم معنى الى دايرين الجهاد يا رسول معنى يؤيدوا . . . في المسلمين . . . فلان فلان نقصر عليهم . . .
- س . طبعا احنا امس تكلمنا . . على القادة طبعا الى أنت تعرفهم قادة الى حضروا الجهاد والى كانوا يقودوا في الجهاد توة فيه حتى ناس زمان يعنى مايمشوش ماكانوش يعنى يقاتلوا مايمشوش للجهاد والا لا فيه ناس طبعا الى هما . .
- ج . انقولك انا منوا . . هادونه عندك « الفرجانى » وخوه من اولاد جربوع هادوم من الناس المطلينة وهذا البلاد عليه .
- س . فيه اسماء ابراهيم الشاوش هكى . . . ؟
- ج . شاوش هذا من . . هما ماهو ولد الآخر منين جاء هويته حكموا علينا بالاعدام امنين جاء قال الزاوية قاعد منها ( سبعة انفار هما انا قلت سبعطاش سبع انفار قاعدين



ياخذوا في المعاش من الحكومة وكلمتهم معنى قابلتها الحكومة الواه الزاوية معنى امشت معنى ماشية لبن قردان بتجيب . . طرابلس مصكرة الطليان ماهوش . . . الدولة آخر بيحبوا لباس اصغارهم وماكله اصغارهم مشى . . . لهم الطليان محلة زوارة معنى ناخذوا الكلام الطليان وتمشوا مشى ثلث ايام في الحدود من . . . الناظور عاد جاب الكلام هذا . . . والا هوينه حكموا علينا مؤيدين .

س . قوللى الناس الى ما تمشى للجهد شن كانوا يديروا ؟

ج . الى كانت ماتمشيش . . شن يدير وامن غير معنى من نجاله وغدا ينالوا .

س . ماتعرفش بالزبط شن كانوا يعملوا ؟

ج . لا ماكانوا يعملوا مانعرفهمش لكن نسمع زى ماقالوا « احمد الفرجاني الجربوعى » هذا وخوه وجماعة باصكة والى هذا القبلى هذا الآخر الى من اولاد البلاء عليه الى سميت هولك امس هذا وجماعة وواحد يقولوا الشريف زى ماقلت انت باصكة يسموا فيهم لما يقعمزوا الناس الى هيه كذا يقول فلان معنى مخادع هذا الى نسمع فيه وباقى هو قال واحد زمان ولد المسوط حميدة ، وولد الزوالى هاذى كلمة عقبها « على بن صالح » رحمه الله اليتيم هذا الى ما عنداش ديمه هو معنى .

س . توه بالزبط يعنى الناس مثلاً لما تصير المعارك الى حكيلى عليها فيه ناس تمشى والا لا . . . وفيه ناس تقعد نبى الناس الى تقعد هذى شن كانت تعمل ؟ ج . شن يعملوا فى شىء والله كان بخل وكفر ونفاق معنى لا هو ساعتها فيه الى معنى زى المقطوف .

س . صار ما عندهم شىء يديروا فيه ؟

ج . اسمع توازى «المقطوف» معنى من قبيلة اولاد صقر تماماً كلمته ماشيه فيهم لما يقولوا الجهاد . . . يقولوا الميات ما هم لحم القبيلة هاذى .

س . عشائر وغيرها ؟

ج . ايه اليوم يمشوا فلان . . . فلان من القبيلة الفلانية باهى معنى حرب اخر .

س . فيه ناس ما تمشيش والا . . . لا . ؟

ج . ايه فيه ناس . . . لا الى هما توه كلمتهم انت حتى فيه الى يمشى ما يفزعش زى الى قدامه ما يدي . توه معنى والله حرب هذا متاع السكوم هو ساعتها زواره والطليان حرب السكوم الغربى هذا ثار فى القبيلة فى الحرب الى مشى مجاهد صار فيه قارونه الحق هى الحق .

س . باهى قوللى النساء لما كانت التريس تحارب وتجاهد شن كانوا ايديروا هما .

ج . الوليه . . . لا الوليه كان فى فانت معنا المحلة ماشيه بتحارب وصار المهجاء . . ويشقوا فى الناس الوليه الى يجو يفوتوا عليها تزغرت .

س . لا بد ما تمشى التريس يعنى مثلاً تمشى تحارب والا لا لما يقعدوا فى البيت

يعنى . . . شنى الحاجات الى كانوا يديروا فيها . ؟

ج . الوليه شن يديروا الولايا ساعتها ما كانتش . . . . . الحرب لا حتى القرابة امتاعت توا المدارس ما كانتش .

س . قوللى من ناحية التنظيم زمان طبعاً يعنى قيادة المجاهدين الى كانوا يسموا فيها الحركة امتاع المجاهدين قيادة المجاهدين كيف كانوا يصلوا الى التنظيم ، هل كانوا فعلاً قادرين ينظموا ما بين الطبقات امتاع الناس يعنى الشعب والا كيف كانت مساواه ما بين المجاهدين والا لا ؟

ج . الا فى شنو توزيع الى عنده ناس لما توازى اولاد صقر قبائل هلبه يسقدوا عشره خمسطاش «المقطوف» يدير عليهم واحد كومانده معنى كومانده فلان الفولانى عليكم الى يقوللكم أوقفوا عليه هذا هو وين يشاوركم .

س . كانوا يعنى متأثرين بالنظام التركى ببعض الانظمة التركية الى كانت موجوده ؟

ج . لا الترك ساعتها خاينين . . . . . طرابلس منوباعها . . . . . باعوها الترك . . . . . اية امالاً ، لا الترك ساعتها اشبح باش قتللك اول حرب معنى مازالوا زباط اول مره داروا المعروف ولمدت «شلاي» دار كروانات إبل تمشى تحجب فى السلاح الى فى تحت الترك فى سانية الباشا فاهم تحت الترك ساعتها الموزر هذا والسلاح صندوق ، معنى هوينه خطرتين نمشوا العبد لله عندى ناقة للسعى نمشى عليها ونجبوا عليها سقدونا فى الواحد ساعتها .

س . باهى مرة قتللى بالسنة توه المجاهدين قيادة المجاهدين زمان كانت فيها بعضا رئيس ونائب رئيس وحاجات هاذى والا مافيهاش الحكاية هذى .

ج . فيها رئيس . . . . . امين الصندوق ساعتها كان شلاي هو لول ساعتها قائمقام وكل شىء يروحله وكل شىء كذا والباقي شنوا امين الصندوق فيه معاشات والا فيه .

س . قوللى كانت فيه اتصالات ما بين المجاهدين طبعاً هنا طبعاً فى ارض ليبيا العربية كانت فيه اتصالات ما بين المجاهدين الى هو . . . . . فى الشرق من شرقه ومن بحره وقبله كان فيه اتصال ما بيناتهم والا . . . . . لا .

ج . معنى فتنه ما بيناتهم .

س . معنى لما تصير الحرب كان فيه تعاون ما بيناتهم . . . . . قصدى بنقولك تعاون كان فيه ما بين المجاهدين الى هما طبعاً فى المناطق الشرقية والمناطق الغربية ؟

ج . باهى . . . . . هو . . . . . كيف لا هو توه . . . . . فيه ايه تعاون باهى السويحلى وقت حارب فى كل محله فى كل وين يقولوا الطليان ظاهر بيحارب يكون الحرب امتاعه هولول توه حرب هذا البلاد عليه الى قتللكم تحت سدره بوغمجه هاذى الى عاقلين . تحتها سبع والا ثمانية غير من مصراته . وهذا يوم بوغره حرب بوغره فزعوا نهارها مصراته احسن من أهل الزاوية .

س . لا . . . . . قصدى فى التعاون . . . . . يعنى فيه تعاون ما بين المجاهدين كاه سلا لما ناخذوا مثلاً معركة السكوم لما حصلت يعنى فيه مجاهدين جوا من الزاوية وجوا طبعاً من طرابلس وفيه الى جوا من غريان وفيه الى طبعاً من مناطق الجميل ؟

- ج . الحرب أمتاع السكوم ... كيف ما يتعاونوش .
- س . وفيه طبعاً معركة الهانى حتى هى يعنى يتعاونوا فيها ؟
- ج . الهانى هذا اشبح رمضان السويحلى جاء من مصراته للهانى لطرابلس يوم الهانى هذا وسقد ناس مجاهديه الى معنى على كلمته هو يضرب يموتوا الى قلتلك انهارها .
- س . قوللى الاتصال كيف كان ما بيناتهم المجاهدين عن طريق شنى مثلاً توا . زي الزاوية ؟
- كان شلابى وكان المقطوف وكان هذا واللى كانوا هناء وكذلك فى طرابلس وفى مصراته .... كيف اتصلوا مع بعضهم . وكيف يتعاونوا مع بعضهم عن طريق شنوا بيعثوا رسل يمضوا ؟
- س . اسمع الطليان هذا مش يدير فى احزاب معنى يظهر اليوم بيظهر على الزاوية باهى يدير حزب اخر الطليان بيبى يظهر مثلاً على مصراته وقت الى يحارب وطرابلس ما جاهاش الا بعد ما ظهر منها الترك ، ظهر بره الترك الى قاعدين فى سانية الباشا ويحكموا الترك لما ظهوروا هاذاك وين ترك طرابلس ساعتها .
- س . باهى واحنا نبو الاتصال بينهم بين المجاهدين يعنى زمان المجاهدين والا لا مش كان فيه قيادات وكانت فيه الحاجات هاذى كلها كيف كانوا يتصلوا ببعضهم ؟
- ج . من كل محله ... الاتصال ... باهى لما الواحد يسقد زى ما تقول «المقطوف» يسقد عشره خمسطاش من قبيلة يقوللهم الحرب راهو الطليان فى الوقت الفولانى فى المحل الفولانى وقد امكم ناس مجاهديه استاصلوا معاهم وشدوهم صار كان بيعث فى ناس ويكتب فى رسائل والا لا .
- ج . كيف لا .... بيعث فيها ويسقد واحد كومانده عليهم لابد يرفعهم للمحل الى تبعته .
- س . صار كانت عن طريق ناس بيعثوا امعاهم فى رسائل ويبعثهم باش يكلموا الجماعه الثانين باش يستعدوا ؟
- ج . باش يستعدوا فى الحرب ويشدوا مع بعضهم ما تقول باهى قبيلة الرحه ماشين منها ثلاثة ... اولاد صقر ماشين منها عشرة مثلاً اولاد اسلاق ماشين منهم ثلاثة حتى هيه طريقه هذا ترهونه كذا من كل محل يمضى الواحد ولكن الحرب يقولوا الحرب اليوم فى المحل الفولانى الطليان يقولوا بيظهروا على الزاوية ويشدوا على الزاوية على المرسى .
- س . المجاهدين يعنى كانوا يجمعوا فى المعلومات على العدو كيف يعرفوا ان العدو بيبى يجى من هنا وبينزل من هنا ؟
- ج . فيه ناس تنبى فيهم ... الى معنى الطليان راهو اليوم بيظهروا على الزاوية بقوه يسميها باقى قداش عددها ؟
- س . صار امدابيرين ناس طبعاً يراقبوا فى العدو ؟
- ج . ايه ... امنين يطلع وامنين كذا وشنوا ... قوته الى هى ظاهر بكذا مدفع ؟

س . قوللى هذا توه الطليان حتى هم كيف كانوا ياخذوا فى المعلومات عن المجاهدين ؟

ج . ايه ياخذوا فى المعلومات الطليان «حمد الفرجاني» وهذا البلاء عليه الى سميته امس من اولاد عماره هذا . . . باصكه الحاصل يمشوا فيه تسافر فى الليل تحبى معنى اليوم تمشى تبي الواحد يقوللهم اليوم جت قوه كبيرة من الجبل مثلا من يفرن ولا من غير ومن جت للزاوية فى المحل القولاني وقوه كبيره معنى ينبوها معنى زى « حمد الفرجاني » هذا وخوه ويبعث غير فى خوه ساعتها ويكتبه فى رسالة ويرفع فيهم .  
س . السبعه من الناس الى جابتهم تاخذ فى معاشهم كامله الثلاثين يحبى لهم مراسيه على الواحده .

س . صار كان فيه جواسيس مدائرتهم ايطاليا يعنى والا . . . . لا ؟  
ج . هيه تنظم الى دائرته لما سكنت زواره . . . . دائرين ناس ياخذوا الخبر يحوا معنى لا قدر الله زى الحرارى اليوم الحاج ابوراوى وساله شن فيه وشن ما فيش .  
س . قوللى طبعا فيه جواسيس من الليبيين كانوا يخدموا لصالح ايطاليا طبعا موجودين ؟

ج . لا عاد حتى بعدين الطليان لما استمروا ونزل حتى الى كان يعطى فيهم المعاش حكم عليهم توه «المقطوف» هذا مش كان واحد من الجماعة الى كذا وبعدين حكم عليه لا المقطوف حكم عليه بالواحد والمطردي هذا الى كان يحارب ، المطرد كله تحته كلمته وهو وين يقول ما هو الى انشلق هنا فى سوق الزاوية .  
س . قوللى شن كان يديروا يعنى للجواسيس الى يتعاونوا مع الايطاليين شن كانوا موقف المجاهدين منهم .

ج . باهى هوانت اليوم لا قدر الله تسمع الحاج بوراوى ما هوش على حيله وكذا ما تامراش للحرب توه «الفرجاني» هذا ساعتها هو شيخهم وامتعهم توه خوه الفرجاني ولحمته كله ما نجبيها شئ للحرب محسوب معنى مخادع مطلين .  
س . توه شن كانوا يديروهم . . . هادون فى مصالح لطاليا والى يلقوه ساعتها فيها ناس عندها ناس توه باهى زى الطليان هذا يحكم فى اولاد جربوع تماما اللحمه كلها وكلمته ماشيه الى يقوله تحبى والا تمشى والا كذا والا ما تمشيش تحارب تمشى كلامه ويمشى . . . الجهاد يا رسول الله من هذا خو احمد لما نظر السميع العليم هو الى صار ساعتها فى ليبيا هادى يعلم الله بحالها معنى وصار فيها لما الله سبحانه انظر ثلاث دول ملكوها الطليان هذا يحكم فى اولاد جربوع تماما اللحمه كلها وكلمته ماشيه معنى كنا ، شئ الى يقوله تحبى معنى والا تمشى والا كذا والا ما تمشيش تحارب تمشى مخلى كلامه ويمشى . . . الجهاد يا رسول الله من هذا هو «احمد» معنى لما نظر السميع العليم هو الى صار ساعتها فى ليبيا هادى يعلم الله بحالها معنى وصار فيها لما الله سبحانه انظر ثلاث دول معنى ملكوها الطليان وهذا لامريكا والبلاء عليه هذا الى دار الواحد فى طرابلس فى سوق الجمعة هذا فى معنى ثلاث دول لما نظر الله سبحانه ظهوروا معنى فى

ساعه وحده امر السميع العليم النصر لليبي .

س / قوللى ... الناس زمان فى ايام الجهاد ... كانوا طبعا فيه الى تطوع تطوع والا لا ...

ج / فيه الى تطوع .

س / الناس كيف كانت تطوع . عملية التطوع كيف كانت اول مرة فى ايام الجهاد زمان ؟

ج / فى ايام الجهاد الليبي ... تطوع معنى ضميره صافى ومعنى يشوش فى الناس ويدورله فى الواحد واللى كان امعاه عشرة خمسطاش يخليهم على كلمة وحدة .. كان صار قابله شى من الطليان يدير جهده هذا التطوع واللى امانه صافى .

س / قوللى الناس زمان كانوا يتدربوا على السلاح والا لا يعنى طول هكى .

ج / لا .. لا تدربوا .

س / كان فيه تدريب والا .... لا

ج / تدريب شنوا من غير يقول ما عنديش عماره لما تحى عليه الفرعة والا تحىء عليه الواحد يمشى يحارب تحى " لشلابى " ما هو السلاح والواحد الى الصندوق يحى لشلابى ويقول انا عنديش .. عندى بندقه موزر والكاباك ... الكاباك الكعبة وحده والموزر يعطيه باش يسقده الى يحى عليه الامر ويمشى يحارب المحل الفلانى .

س / ماكانوش يدربوا فيكم على السلاح متعلمين جيتوا .

ج / التدريب حكاية الى قال مشينا بتجيبوا سعى لكن مشينا ليفرن مالقيناش فيه سعى قدام العيد الكبير المتحدث وعلى بن صالح .

معلومات شخصية .. لا تهم المقابلة

س / صار زمان بالنسبة للتدريب كنتوش تتدربوا عليه ؟  
 ج / لا ... لا تتدربوا كانش الى هو واحد امين كان عندى السلاح العربى فى صيد الحمام هاذى صيده الحمام يظل يظهر الى عنده سلاح معنى عربى يظهر للجفارة .  
 س / ما تقولوش نوع السلاح الى كانوا يستخدموا فيه المجاهدين شن نوعه ؟  
 ج / النوع لول العربى .. بوضره والموزر فى لول بكل السلاح العربى مقرون وبندقه عربية وخلاص بالعمارة بالرصاص بالبارود ويديروله معنى الرصاص .  
 س / باهى امين كانوا يحصلوا عليه المجاهدين السلاح ؟  
 ج / هذا من التركية زعميتها لولين .  
 س / كانوا يحصلوا من تركيا زمان فى السلاح .  
 ج / ايه اسطنبول مش كان العرب كلها هذا هو .  
 س / من كان يدرب فى المجاهدين ؟  
 ج / يدرب ما فيش .. كل حد .. ومعرفته وخلاص .  
 س / صار ما فيش تدريب على السلاح بكل امالا كيف يعرفوا فيه الناس ؟  
 ج / وشن عاد السلاح الى يعرفوه .  
 س / مش لابد فيه واحد دريهم عليه والا ... لا .... ؟  
 ج / الى دريهم عليه ياخذوا فى البارود والرش .  
 س / ما كانش فيه ضباط ترك ياخذوا فيهم يدربوا فى المجاهدين والا .. ؟

ج / الترك ماكانوش ترك الا وقت الى معنى باعوا طرابلس وخانوها ليبيا طرابلس ... قعدوا بعض مشى ركب ما قعدوا الا بعض زعميته يحاربوا ما ييوش يخلوا البلاد وحافظين السلاح فى سانية الباشا ممكن الترك هاذى فى طرابلس يقولوه سانية الباشا بنيان وواحد هو الى يروح ليها السلاح ... معنى مدارين زعميته هونه دارت الزاوية قوافل وسلموها لشلاي هنا وسلموا لشلاي هنا .  
 س / ماكانش فيه اسلحة ثقيلة زى المدافع زى مدفع بوخرص .  
 ج / لا ... لا .. كان اصبر كان طرابلس كلها فيها مدفع واحد يقوله مدفع بوخرص والمرسى امتاع طرابلس ما يتزل عليها واحد قاصد ليبيا كان هو دايرينه فى وين ييى يضرب حتى لين داروله واسطة قصوا منه هكى على المسموع قصوا منه من قدام شوية قعد يضرب اللدون .

س / صار ما كانش فيه مدافع يعنى ؟  
 ج / لا .. لا .. كانش هذا مدفع بوخرص هذا الى داره العصملى على ليبيا على طرابلس على المرسى امتاع طرابلس هذا هو .

س / صار هو هذا بس .. قوللى كانت فيه نساء ترافق المجاهدين يعنى يمشوا معاهم والا لا كان فيه نساوين مع المجاهدين والا ... لا ؟

ج / لا .. ما كانش النساوين يمشوا .

س / امالا من الى كان لما الناس تنجرح فى المعارك .. يعنى ما كانش فيه نساوين امعاهم يعالجوا المرضى هاذى يسعفوا فيهم ؟

ج / لا .. لا لما واحد ينجرح رفاقته ما فيش نساوين كان قليل معنى وين تلقا محله يسقدوا معاهم خادم من جهة الزغاريت تزغرت وين يصير البارود والا يصير الواحد تزغرت تشوش هاذك الحرب الى هو مقابل الكفار هذا هو وياخى امين اتجى المحله ما تقول جاية من محل اخر وتنفوت على شارع هذا امتاع الزاوية امتاع الرمح هذا وعلى عمر ابونعجة .. ماشية امغرب للحرب زى مثل حرب السكوم هذا الى نفوت عليها تظهر من حوشها وتزغرت وتقول ..

س / ما فيش نساوين طلعت مع المجاهدين ؟

ج / لا ... وقت الحرب الى معنى حاربت ايطاليا ما فيش حتى مرا تمشى تحارب .

س / غير زمان احنا نسمع فيه نساوين ماتوا حتى فى الجهاد وخاصة فى مناطق الزاوية ،

هنا موجود بكثرة فيه هلبة نساوين ماتت فى بعض المعارك غير انا مش زابط المعارك ؟

ج / لا من . ما فيش معركة لوله معركة امتاعت سوانى بنيادم اول معركة والمعركة

امتاعت فندق معركة السوانى هيه لوله نزل الطليان على قرقارش ما هو ما نزلش على

طرابلس ساعتها ، ما هو المدفع قاعد الترك قاعد ما نزلش على طرابلس والمدفع ما

سلموش المدفع امتاع بوخرص الى على مرمى متاع طرابلس نزل على قرقارش بقوته

وقصد الحرب الجيش والواحد يظهروا من قرقارش وعندهم خبر الى مجاهدين ليبيا فى

سوانى بنيادم لت من كل محل وجت لسوانى بنيادم شادين يظهروا من قرقارش اشبح الى

نهار يوم مشنيا معنى الى عنده سلاح كله سقد .

س / ما كانوش فيه نساوين يستخدموا فيهم جواسيس والا حاجة سواء كان المجاهدين

يستخدموا فيهم او الطليان ؟

ج / ... لا لا ما كانش باش مدايرين نساوين هذا ويمجاهدوا والا معنى دايرين معنى

س / ماكانوش فيه ناس يستخدموا فيها دواسيس على الطليان ... ؟

ج / من الوليه ... لامافيش مانعرفش باش انقولك فيه فلان والا فلتان والا كذا ما

نعرفش .

س / قوللى الاسلحة امتاع زمان هاذيك مش كانوا ينظفوا فيها والا .. لا ؟

ج / ايه .

س / التجهيزات الاسلحة هاذى امتاع الى عندكم العربية والمدافع يعنى كانوا يعتنوا

بيها والا .. لا ينظفوا فيه تنظيف ؟

ج / كيف معنى ؟ ... كل من هو عنده شيء معنى يبي يقيمه كان قصدى واللى كذا  
والا خاصة شيء معنى كان بوصوانه هذا بوصوانه هذا عمارة بالبارود ويديروا فيه كان  
تبى تصطاد الحمام رش مع عمارة البارود وكان فى محل اخر معنى الرصاص تظهر للواحد  
تبى تنوض ارنب .

س / قوللى ماكانوش زمان الاسرى الطليان ... اسرى من طليان حصلوهم  
خدوهم المجاهدين والا ... لا ؟

ج / كان واحد طليانى دار هنا فى الحارة هاذى داير طبرنة من جد جده قاعد .. وطلع  
شنوا اسماء هاذوله كل طليان ودايرين هنا فى طرابلس وفى الزاوية ودايرين محلات شراب

س / لاقتلك الاسرى .. اليسرى الى متاع الطليان الى خدوهم المجاهدين من  
الطليان ؟

ج / ايه يسرى شنوا ..

س / المجاهدين مش يسروا مجموعة من الطليان والا ... لا ؟

ج / والسويحلى قداش ... الى حاربه رمضان السويحلى والطليان الى يسرهم معنى  
تحتة يعلم الله بحالهم .

س / قوللى كانوا هاذوا يخدموا فيهم والا لا اليسرى الطليان ؟

ج / لا ... المجاهدين يخدموا فى الطليان ... فى اليسرى يخدموا فيهم .

س / ايه قتللك ماكانوش يخدموا فيهم والا كيف ؟

ج / لا . لا والله كان تحت المفتاح ايه خلاص ..

س / ما يعطوش فيهم ينظفوا فى السلاح والا حاجة هكى .

ج / لا ، لا هو العدو قربه لمصلحتك انت .

س / باهى ما هو شاعتها تخليه مسجون ماعنداش سلاح ممكن تخليه يخدم حاجة .

ج / شن يخدم ... ماخدموش اليسرى ... كل ماتيسر .. تيسر فى الحرب قابل هذا  
من غير المفتاح .

س / قوللى كانوا يتبادلوا طبعا فيه حتى الطليان يسروا مجموعة من الليبين المجاهدين  
والا ... لا ؟

ج / الطليان ... وحمد وسعدون خو حمد السويحلى وليبيا الى امنين احنا التلطاش  
التراس حكموا علينا بالاعدام وبعدين فى الحرب امتاع الناطور هذا الغربى شدونا  
الطليان وزواره وحكموا علينا بالاعدام فى زواره وبعدين هوينه وبعدين جاء ولدبن  
شعبان هذا قال الى من الزاوية كلهم فلان فلان من هكى هوينه وبعدين امنين قال جيت  
لما هو دزه لما هو ودزه واحد الكوماندى امتاع الطليان الى تحتة زواره .

س . قوللى كان فيه تبادل للاسرى ... بكرى قتللك فيه مجموعة من الطليان يعنى  
شدوا مش شدوا مجموعة من الليبين اسروهم لما جاء الطليان مش اسروا مجموعة من



الليبيين المجاهدين والا . . . لا والمجاهدين حتى هما اسروا مجموعة من الطليان زى ما قتلتي انت بكرى .

ج . ايه . . ايه شدوا من الليبيين وقت الى صار الصلح . . . تبادلوا كل ما . . .  
س . كيف التبادل ؟

ج . اسمع تبادل حيث صار هاوניה توه بعددين العبد لله انا وليت من البلاء عليه . . .  
مشينا ليفرن من الوادى مشينا لام الجواي ومن ام الجواي امشينا للواحد شنوا عندى  
عجوز توه على اشكال الى غرب امين غرب وهو الطاهر ولده عبد السلام مشى غرب  
لتونس خلا وحده اخقى معنى داير الشلل .

س . يعنى كان فيه تبادل وين يتبادلوا الاسرى تبادلوهم فى طرابلس والا وين فى اى  
مكان ؟

ج . الى فى طرابلس يجوا . الى من الزاوية يروح للزاوية . والى من يفرون ومحل  
اخر . . . الاسير الى ياخذوه ، ياخذوا اسمه من اى محل الطليان والا ليبيا والا العرب  
. . . هذا هو .

س . قوللى زمان المجاهدين كيف كانوا يحصلوا على الطعام امتاعهم والمأكلة  
والشراب والحاجات هاذى امين كانوا ياخذوا فيها ؟

ج . كيف يتحصلوا عليها ماكانش شن تحارب كلها ماهى دايره مزارع ودايره

س . الملابس والمأكلة والشراب والحاجات هاذى ؟

ج . ايه هذا هو الزرع والمأكلة والشراب .

ج . الاسلحة الى عنده حاجة فى ايده وخلاص والى مش موجود

س . صار امين كانوا يحصلوا عليها من نفس البلاد من هنا ياخذوا فيها من داخل  
البلاد ؟

ج . العرب الى كانت شنوا راس مالها من غير ابيار تجيد وعماره بشنه كانت البشنة  
هاذى . . . يقعدوا من الحول للحول يحصلوا منها بالعشرين بالثلثين بالاربعين مرطه  
بشنة والسبول هو كذلك والى يفلح فى العرب الحرت الطعام والشعير هاذى العرب  
معاملتها عملها الى تستفاد منه هذا الاخر امتاعها ايه هذا هو وباقى امين كانت  
طرابلس مفتوحة ويجى من الدواخل قبل مايصير الحرب يجى من البلدان من الداخل  
السبزه وسكر وشاهى ودقيق .

س . الدقيق والحاجات هاذى كلها من هنا من البلاد من داخل البلاد ؟

ج . لاكان ييجوا من الاجانب

س . من الدول من البره والا لا من خارج البلاد ؟

ج . ايه من بره . . .

س . كانت فيه مساعدة من بره تحبى والا . . . لا ؟

ج . كان فى لول وقت الى صار الحرب كل شىء وقف . كان الى بيدهم والى  
يجركوا هنا من ارضهم

س . صار كانت الدول العربية الى بره كانت تساعد في المجاهدين والا لا- تعطى  
فيهم مساعدات والا . لا ؟

ج . مساعدات شنى ؟

س . لايعنى من فلوس وطعام وماكله ولباس وشراب وسلاح وحاجات زى هاذى  
كان فيه والا ... لا ؟

ج . باهى مش مسقدين عشره من الزاوية من اولاد صقر يديرهم سببهم من قبيلة  
تماما هذا ويسقدهم من الرحه كذلك ماشيين ثلاثة يديرولهم الكوماندو امتاعهم مانقولوا  
... الشيخ « على اشكال » والا فلان والا واحد هذا ويديرولهم سببهم على القبيلة كذا  
وكذا ويلهم ويرفعوا عوينهم امعاهم

س . اكويس هذا هنا فى الداخل لكن المساعدات الى تحيىء من الخارج يعنى ؟

ج . من الخارج ؟

س . من الدول العربية الاخرى ؟

ج . لا . لا بعدين طرابلس لما صار الحرب نزل

س . قبل كانت فيه مساعدات والا لا ؟

ج . كانت فيه

س . مساعدات زى شنى المساعدات الى كانت ؟

ج . مساعدات يحى الدقيق بيع وشراء يجيبوا الدقيق . السكر والا الشاهى  
والاحاجة بالمالية ماتقول مساعدات نرفعلك شىء وتجب شىء

س . من كان يدفع فى حقها الحاجات هاذى ؟

ج . الى لازمه حاجة ياخذها

س . من الى يخلص فيها ؟

ج . تجار الى لازمة حاجة تاجر ياخذ الى ينزل عليه شىء من الدواخل ياخذ ويضل  
يصرف فيه .

- س . صار يعنى حكومة المجاهدين زمان يعنى اوقياده زمان ماكانتش هيه الى تشرف  
على الحاجات هاذى والا كيف .

ج . المجاهدين تشرف على الشى

س . قياده المجاهدين زمان الحاجات هاذى هى الى تشرى فيها والا يشروا فيها  
الناس على حسابهم والا كيف لما زى ماقلت انت بكرى فيه الدقيق والواحد هذا كله من  
بره ؟

ج . من وقت الى جاء الطليان لطرابلس معادش جاء حتى بابور ... والا حتى  
شىء

س . اما لا الناس كيف امدايه ... منين تأكل وتشرب ؟

ج . فيه عام الشر تسمعش بيه انت ... اما لا يعلم الله بالحال

س . قوللى الغنائم الى كان يتحصل عليها المجاهدون ؟

ج . الى يحصل شيء معنى . . . لا اسمع مش فيه صف الى هما غنموا شئ الفلانية  
الصف الى هو يغنم حاجة يفرقها على المجاهدين قد اش نفرض المجاهدين الى غنموا .  
س . راجى شويه صار قتلنا كيف الغنائم . قتلنا توزيع الغنائم هاذى الى كان  
يحصل عليها ؟

ج . الى يحصل شيء يتقاسموه على الحسب .

س . صار يعنى يوزعوه ما بين الناس ؟

ج . لا . . . لا القاعدين

س . امالا كيف ؟

ج . الى يحصل شيء لا الحرب الى هو جاء بيده وغنمه من الطليان

س . صار الناس الى حاربت هما الى طبعاً ؟

ج . اول بادی الى حصله الى حصلوه فى الصف الى ماشى مع بعضه

س . من الى كان يشرف على العملية هاذى ؟

آنتهى الوجه الثانى

شريط رقم 1/164

ج . قرية اربعة خمس بنادق والا كذا وبندقتين او ثلاثة يدبروهم بيع وشراء  
وياخذهم واحد بثمان ويتقاسموهم الصف كانهم عشرة خمس طاش عشرين الغنيمه الى  
يحصلوها معنى يتقاسموها وكأنه مشى غنيمه واحدة تروح للصندوق  
س . ايه صار تروح للصندوق يعنى فيه حاجات طبعاً حتى الصندوق مخصصه يعنى  
نسبه والا ... لا ؟

ج . كيف ... لا  
س . من مدايرينه مخصصه شويه يخلوا امتاع الجهاد والا لا . هما القيادة المجاهدين  
هما الى كانوا يشرفوا على عملية توزيع الغنائم هاذى ؟  
ج . ايه ... ايه ....

س . وكانوا مدايرين صندوق للجهاد ؟  
ج . هذا الى هما معنى فلان وفلان محسوب هذا هما الكوماندو الى معنى مخصصين  
بالبر بهذا ويمصالحه .

س . والطلبيان فى 1914 م خسر اموال هلبه لابس بها والمجاهدين تحصلوا على  
الاموال هاذى ... عملية المكافاة هاذى .... قوللى كانوا يعطوا فيها للناس الى  
حاربت بس ولا كانت لكل الناس ؟  
ج . هاذى يحصلوا فيها من الطليان  
س . ايه يحصلوا غنائم هلبه طبعاً اسلحة ؟

ج . غنيمه والغنيمه هاذى معنى هيه اصلها للصندوق والصندوق للمستحق  
س . والصندوق ... بعدين الصندوق ينفقوا منه على الحرب وعلى الحاجات  
هاذى ؟

ج . كيف لامعنى منها على لزوم الى هو مخصصين فيه شى وبعدين صار شى معنى فى  
التالى ، صار عام الشر هذا يعلم الله بحالها المسلمين .  
س . ايه صح قوللى انت مش بكرى قتللى فيه حاجات تحبى من بره وحاجات  
والناس ..... وبعض القيادات هنا يعنى كان فيه تعاون ما بيناتهم وما بين البره والا لا  
بعض من الدول العربيه يعنى مش كان فيه تعاون ما بينهم ؟

ج . وين معنى العرب فى بعضهم .. ورمضان السويحلى من جهة معنى طرابلس  
س . لابره خارج من البلاد .. خارج من ليبيا مرة وحدة ؟  
ج . لامنهاش .

س . ماكانتش فيه مساعدات تحبى من بره .. من خارج ليبيا ؟  
ج . ماكانش مساعدات من خارج ليبيا الا امنين كان .  
س . ماكانتش تعرف انت فيه والا مافيش ؟

ج . لا ماكانش الى يروح لتركيا امنيتها قاعده في طرابلس قبل مايصير الحرب قبل مايجي  
الطليان بيحارب وينزل على طرابلس تحي مساعدات من العصالي لكن تحي يعوض  
الزباط والكوماندو الى من الترك هنا زى السلاح الموزر هذا ما هو جاء من الدواخل  
جاي لطرابلس وهذا هو .

س . صار كانت حكومة المجاهدين اوقياة المجاهدين ماكانتش . . تتعاون مع بعض  
الدول الى البره والا لا الدول العربية

ج . لا .

س . لا عن طريق الحكومة امتاع الترك زمان والا حاجة قبل يعني ؟

ج . كل بر شاد على بره وخلاص هذا هو وين نعرف

س . صار انت ماتعرفش حاجات هاذي ماعندكش بها علم مزبوط ؟

س . وين علم عندي بيها علم وقت الى معنى صار الحرب هذا ونزل الطليان يمكن  
عمرى في الاربعطاش صائم . وقت الى جاء الطليان بيحارب معنى وصار المهجاء في  
سوق الزاوية هنا وصار في كل محل ومشت ليه الناس وين مايلزم لسواني بنيادم تجمل  
الناس روحها في سواني بنيادم الى يجي من فوق من الاجبال ومن العرب . ومن هنا كله  
يمشي لسواني بن يادم وقعدت شاده حتى لين معنى قدر الله سبحانه وتعالى هاوينه ظهرت  
جت ليله مباركه انتقلوا ثلاث دول من ليبيا والحمد لله الى قاعده توه هي معنى  
المسلمين .

س . قوللى يا حاج بالنسبة للمجاهدين الى زمان لما يستشهد المجاهد يستشهد شن كانوا  
الحاجات امتاعه شن كانوا يديروها ؟

ج . ما هو فيه الملزوم هي كلها . . المجاهد مش عنده صغار . . الى يعقبه ليه هو  
وكان هو معنى الحكومة بيدها شى تزيد توزع على هادوك الصغار

س . صار توه اذا كان عنده صغار وعنده كذا يمكن يخلوه . باهى السلاح متاعه ياخذوها  
المجاهدين ؟

ج . الاسلحة لما الكوماندو بيده الصندوق . . ويعطوه للملزوم الى ماعنداش اما  
الشيء الى يده وعليه وكأنه زوجته والا معنى امه والا باباه والا كذا قاعدين موجودين هما  
الشيء الى بين ايديهم هو ليهم

س . قوللى كان فيه ضرائب يديروا فيها المجاهدون لصالح صندوق الجهاد والا . .  
لا ؟

ج . ضرائب هاذوله الى على ناس دون ناس ، واحد يعرفوا عنده ماله ويخشفه دخل  
هلبه يرموا عليه شيء معين ويحي للملزوم للصندوق هذا الضرائب بطيبة خاطر ياخي  
س . قوللى المدن الى محتلتها ايطاليا كان فيه ضرائب يديروا فيها المجاهدين والا كيف ،  
ماهو توه المدن الى هي . . جايه على الساحل هاذي ؟

ج . توه الطليان هنا . والذائر تحارب ساعتها في الفرنضيص في راس الجبل توه فيه  
شيء دايرينه احنا من الناس الى حيه وين تسمع بالحرب وتسمع بالمجاهدين امتاعين

هاذوله في حالة يعلمها غير الله دائرين من جماعة اولاد صقر هاذوله ناس تمشي تسافر للذائر غادى للجلب الى فيه الحرب يحاربوا منه المجاهدين  
س . يبقى فيه تعاون ما بين المجاهدين والا ... لا ؟

ج . فيه معاونة وتبعث تسقد في شيء لباس .. وشيء هكي شيء يمشلوها ناس تمشي في الليل وترفع فيه توصل فيه .. وفيه توه ليبي ورحمة باباي إلا الطليان هنا داروا فيه ناس بواسطة الاهل الى هاذيه السميع العليم وصارتلها .. وتعطي في شيء وتسقد في ناس لين يوصلوه غادى وقعد عليه كل مامشوا هاذوك الناس الى دايرينهم والله كان « المقطوف الصقري » هذا وواحد يقولوه ضراري « سالم بن اللافي » وعليه « سالم بن اللافي » معنى ناس أغنياء .

س . مانتفكرش الحاجات الى كانت زمان يبادلوا فيها المجاهدين ما بين الاقطار العربية ؟

ج . الذائر معنى الى قدرت عليه طرابلس والطليلان موجود .. شن قدره من غير اللباس والميكول هذا الى ترفع فيه .. هذا الى يسقدوا قاعدين عليه .. باقي الشعب الى هو انتقل وشد الجبل هذا بيحارب الطليان الانكليز هذا الفرنسيس شاد بالعمل امتاعه وبعدين حتى فيه العماره اختصت شيء الى هو مخصصين فيه من غادى من السلاح الى عندهم فيه ناس ترفع فيه حتى هو لازمهم غادى  
س . صار فيه حتى سلاح طبعا ؟

ج . الا اللزوم الى يحاربوا به معنى كانت بندقه كذا كذا وفيه كان ساعتها الطليان هذا حرب الذائر كان السلاح مش موزر ، بومشطة يقولوه بست عمارات ( دخيره ) هناك هنا عماره يسقدوا فيها هناك بومشطة وماعدناش سلاحه

س . صار قتل بالنسبة توه زمان كانت فيه ضرائب يفرضوا فيها طبعا على الناس المجاهدين طبعا بالنسبة للمدن الى كانت طبعا الداخلى زى الزاوية وطرابلس وحاجات يعنى كان المجاهدين فارضين ضرائب على الاهالى الموجودين في هذه المدن يعطوا في ضرائب الى يفرضوها المجاهدين والا ... لا ؟

ج . ضرائب الى معنى هما حرين في ارواحهم .  
س . كانوا يعطوا في ضرائب هاذي لصالح صندوق الجهاد والا لا جماعة المدن ؟  
ج . باهى هيه المدن بعضها مثل الزاوية مانقول محل السوق هذا بيدها شيء كيف ماتعرضش البلاد المستحقة . تسقد ليها ضرائب الى موجوده عنده شيء وملزوم بيه اخيه البلاد المحل الفلاني يسقدوله بعض المصالحه

س . يسقدوله على شان يجمع يجيب منه الضرائب والا ... لا ؟  
ج . ايه يجيب منه ... ايه يجمع منه الضرائب للبلاد المستحقة للجهة المستحقة ويسلموها للكوماندو متاعها والكوماندو يفرقها على معرفته  
س . قوللى زمان كانت فيه تجاره طبعا والا ... لا ؟  
ج . تجاره للداخل والا .

س . ايه الداخل والخارج .  
ج . لا الداخل معادش لما صكر البحر معادش فيه  
س . صار بعد ماجى الطليان وصار فيه الحرب توقفت معادش فيه تجاره  
ج . ايه = والامريكا هونه شد الشرق حتى هو وقعد المالىه توه الى بيد الفاتح هذا بيد  
ليبيا المالىه . . . من كان الكوماندو عليها تعرفه الشريف . . زمان وقت الى لما الطليان  
هنا والفرنصيص هنا والامريكا جت للشرق حتى هيه وشدت الشئ هذا متاع البترول  
الى معنى مالىه .  
س . قوللى زمان طبعا الجرحى الناس لما تنجرح يعنى شن كانوا يديروها يعنى هل كان  
فعلا امعاكم دكاتره وممرضين والاماكانش ؟  
ج . فيه كان ناس تركيه وحتى العرب فيه الى خاش شئ المعالجة الى يصلح  
بالمجروح .  
س . نبى مع المجاهدين يعنى كان فيه مجموعة مع المجاهدين والا لا كانت فيه ناس مع  
المجاهدين والا . لا ؟  
ج . يمشوا مع المجاهدين . . . وقت الحرب كان فيه واحد مجروح يعالجوه معرفة الشئ  
الى هو يلزمه .  
س . صار يعنى الى يعتنوا بالجرحى هما ناس ممرضين موجودين امعاكم هما الى يعتنوا  
بالجرحى والا . لا .  
ج . انعم هم يكونوا معنى . . من الناس الى زى ماتقول « الحرارى » هذا معنى يدير  
جهده مع المجروح .  
س . يعطوا للواحد للمرض باش يعالجه والا . . . لا ؟  
ج . يوظفوه يقربوا شئ للمجروح من غير معرفة لكن عنده معرفة وعنده شفاقه باش  
يصلح المجروح هذا شنوا يصلح بيه هو الى يقدموه ويحطوه فى محل هذا الى يجيبو له  
المجروح الى ييوا يعاملوه فيه .  
س . وكان فيه . . . هلبه ناس تموت من الجرح لما ينجرح والا لا ؟  
ج . فيه الى معنى مجاهد فى وقته الروح تطلع . . يدفنوه فيه الى اندفن فى امكانه يعنى  
المحل الى فيه المجاهدين يدفنوه مايحيوشى .  
س . ومن الى يدفن فى موق المجاهدين ؟  
ج . بعضهم المجاهدين . لما يستشهدوا ماشيين خمسين - ميه - ميه وخمسين استشهدوا  
منهم اربعة - عشرة - خمسطاش  
س . قوللى يعنى زمان كانوا طبعا الناس يسجلوا فيهم يديروا فيهم فى قوائم والا . لا ؟  
ج . يسجلوا فيهم فى الموق ، لا ماكانش فيه قوائم لا . لا  
س . خلاص يموتوا هكى ويقولوا لأهله يخبروهم ان فلان وفلان استشهدوا وخلاص  
ج . هذا هو معلوم .  
س . قوللى الدواء الى كان يستخدموا المجاهدين زمان الدواء محلى عادى والا فيه دواء

يجبوا فيه من بره زى الادوية هاذى الى نشوف فيها احنا توه هاذى الدواء الى كانوا يداووا بيه زمان

ج . الدواء الى كانوا يديروا فيه زمان فى المستشفى الى زى السيترات توه معنى الى يلزمه حاجة الطبه يديروهله .

س . كانت فيه اوبئه زمان والا لاعارف الامراض الاوبئه ؟

ج . امراض الأوبئه . . . مانعرفهاش شنوا الأوبئه هاذى

س . يعنى الامراض زى الى ماعندنا احنا اللهم احفظنا الى هيه مرض الطاعون وحاجات زى هاذى الامراض الى هيه السارية الى هيه تنتشر وتقتل فى الناس هلبه هاذى

ج . فى لول هذا ماكان يجيء

س . فيش امراض زمان هكى انتشرت وحاجات

ج . يجى امراض قبل الحرب . . يقولوا معنى زى الطاعون معنى محسوب يجى

س . احضرته انت هذا ؟

ج . لاماحضرتاش توه باباى الطاعون هذا يخبروا فينا ناس الى زى مانت تسال يقولوا معنا جاء محله شى من ريج زى الريح هو الطاعون هذا يجى للبر ، أوقات يضع ناس ياسره ويحكونا عليه لولين .

س . كان فيه طبعا لاياام الى حصلت فيها الحرب هاذيك فيه ناس ماتوا وخاصة اطفال وحاجات والا . لا ؟

ج . هيه طرابلس ؟

س . صار ماتوا هلبه ؟

ج . مسجلين عند السميع . المجاهد هذا يقولوا مات هو روحه قاعده ليوم القيامة بقدره الله ثبتنا على الامان ووصلنا سالمين لدار السلام

س . الطليان زمان كانوا يقتلوا فى الاطفال خصوصيا والا على ماوى هكى يجوء .

ج . شن هما . . وقت الى صار الحرب الى جادنا احنا لبييا المسلمين دائره جهدها والكفار دائره جهدها ، وقت صار الصلح بيناتهم وروحت يسرى والاجانب ولات . واليسرى المسلمين واحد الى مات مات والى ضاع والى قعد قعد هذا هو .

س . قوللى الناس زمان لما يكونوا الرجال الشباب الى هما كانوا طبعا قادرين على الحرب وعلى الجهاد وعلى كذا لما هما يكونوا البره كيف وضع الناس بالزبط ووضع السكان الكل ؟

ج . السكان . . توه الطليان من وادى يفرن من بثر الغنم . . تدير فيه مقعد للجيش ومحارب وينزل .

س . لاقصدى الاعمال هادى لما يكونوا طبعا انتم كنتم زمان تحاربوا كذا ولهن بالطليان تحاربوا فيه طبعا مكانكم بيقعد فارغ من الى يبي يزرع ومن الى بيرعى بالحيوانات والحاجات هاذى من الى يدير فيها .

ج . وين الحيوانات ؟ فيه ناس ترعى .



س . والزرع عملية الزرع قتلتي انت بكرى فيه ناس تحرث ؟  
ج . ايه فيه . . اسمع لما شاد العمل امتاعك ولما يجي عليك الوقت القرعه تمشى للجهاد  
سيب الى عندك لضرايك ولخوتك ولشركاك وتمشى تحارب هذا القانون الى معنى دائرينه  
معنى ماجاش عليك الطريق والا القرعه معنى للحرب شاد العمل امتاعك .  
س . صار فى اثناء الحرب لما يكون فيه حرب مافيش لازراعة ولا حاجة الناس الى هيه قادره  
على الحرب كلها يستدعوها ويجبدوها للحرب .  
ج . ايه . ايه فيه الى حتى معنى شيباني زيني انا والا بصير شن ييمشى للحرب فيه ناس  
معنى تمشى .

س . قوللى انت ما حضر تش المعتقلات والا لا . زى مثلا معتقل العقيلة ؟  
ج . العقيلة . . . . اليسرى معنى .  
س . الطليان يسروا مجموعة من المجاهدين واسروا .  
ج . الطليان معنى الطليان لما شادين ماتقول زواره  
س . لا انت مافهمتنش يا حاج قتلتك المعتقل توه .  
ج . ظهر الطليان وسكن زواره وقعد يحارب امعاه لما يشدوا زى ما قعدنا احنا مشوا وجابونا  
معنى يسرى . . هما يقولوا الفلاقة وحكموا علينا بالاعدام يجيوا بيرحوا الكل يجيبوه لحل  
وانظروا الفلاق . الفلاقة كيف يصير ليهم يوروا توه لزواره ولغيره باهى سكنوا الزاوية  
الزاوية الطليان صار الحرب الفوق فى بثر الغنم وجاهدوا الطليان يسروا يجيبوهم قدام يسوا  
يوروا الى واخذينهم باش معاش يحاربوا اشبحوا معنى الفلاقة كيف ويظلو يعدموهم  
قدامهم قدام الناس .  
س . . . . زمان الطليان كان يجيب الناس هكى ويرميها فى معسكر يجمعها فى المعسكر  
ويخليها ؟

ج . ايه . . . . ايه هو هذا المعسكر هو هذا  
س . هو هذا الى نحكيك عليه هو هذا المعتقل الى يسماو فيه معتقل يسروهم .  
س . يديروهم فى معسكر هكى ويخلوهم ويقتلوا منهم من يقتلوا ويقعد اذا كان ناس فيه  
الى يعفوا عليه وفيه الى كذا ياخى احيانا يقتلوهم كلهم .  
ج . باهى توه زى «الفرجاني» هذا كانوا يجيبوا ناس هوينه امعاهم وفات فيه قعد حتى امين  
جوا للزاوية «الفرجاني» وامعاه باصكه قعدوا شادين مع الطليان هنا لما يجيبوا يسره فيهم  
الواحد يقولوا لافلان لافلان الفولاني هذا راجل طيب والراجل كان يعطى فينا فى خبر على  
العرب . . هذا هو يعدموه زى معنى «الفرجاني» وزى الناس الى مطلينه معنى تكلم فيه مع  
الكوماندو امتاع الطليان .

س . صار يعنى حياة المعتقلات كانت طبعا كلها تعذيب . يعذبوا فى الناس هكى  
ج . ايه . . ايه . كان فيه شدة الى ريناه مع اسنين مع الطليان ومع الامريكا ومع الانكليز  
يعلم الله بحالنا قد اش راينا من سنين شدة وظلم  
س . قوللى زمان طبعا المجاهدين كانوا مدائرين معسكرات والا لا

ج . ايه قبل ، مُدايرين معسكر امالا كيف معنى  
س . وكانت فيه زراعه يعنى قريبة من المعسكرات والا لا  
ج . زراعة . . مزارع شنو امتاعت شنو  
س . اللى يزرعوا فيها فى الشعير وفى الوحدات حاجة زى هادى كلها  
ج . مزارع كل حد عنده ارض توازى قطيس امين مشى بين القرنة وبين اولاد حمد وبين  
معنى كل حد ومزرعته

انتهى الوجه الاول  
شريط رقم 165/1

- س . مش قلت انت شذوك وداروكم في معسكر هكى بعدما حكموا عليكم بالاعدام وكيف يعنى الماكله والشراب واللباس والحاجات هادى
- ج . باهى . . انا قعدت ثلث سنين فى لاطاليا واحد وثلاثين شهر
- س . وين هذا قعدتهم ؟
- ج . قعدت واحد وثلاثين شهر . . معنى فى فنيانا فى بلاد الطليان يحكموا اش يرفعوه للبلاد هاذيك . . قعدت فيها 31 شهر مع ناس
- س . شن مدايرينلكم فى الطعام والشراب . .
- ج . الطعام طرف خبز من الوجله للوجله وريحه شربه اميه نص خبز وظهروا فينا معنى لاريه الصبح الساعه سبعة والا الثمانيه ناخذوا هكى غمسه بره والاخر تحت المفتاح هذا هو س ، صار توا بالنسبة قتلتي تركه الناس الى هم يموتوا شن كان يديروها التركة هادى .
- ج . اسمع كان هو عنده صغار ومالهمش . ما عندهمش معنى كذا الموجود فى البر والصندوق الى هو معنى للمستحق هم لولين وكان عنده شىء مايسد عليهم ما هو كل حد عنده معنى شىء يعلموه وشيخه وناسه .
- س . قوللى زمان الجنود الى هم المجاهدين ماكانش بيناتهم خلاف والا حاجة هكى فى بعضهم وبين الناس المدنيين الثانين الى هم مش مجندين
- ج . الواحد يتكلم عن تاريخ بلاده ويتكلم حقائق معنى فيه حقائق لازم كل من هو جاء معنى ناظر له الله سبحانه بالخير بالهدى ما يتكلم الا الكلمة الاحسن ، هذا هو فيه ناس تقعد ناس ديمه ديمه
- وفيه ناس طالمها الخير طليمه
- س . الناس الى زمان يعنى فيما بعد ماكانوش فيه خلافات فيما بينهم او ما بينهم وبين الناس الثانين
- ج . اه . . تبى الخلاف الى ، صير الى معنى حتى وقت شلاي ووقت جامعه الى ينقدوه بشى يلزمه يؤيده فيه الى معنى يخلوه مدة عمره تحت المفتاح
- س . قوللى الناس زمان يعنى الاتراك هما طبعاً بيدعوا انهم هم ناس مسلمين وانهم هما يحافظوا على الاسلام وكذا ماكانش فيه ناس منهم يقودوا طبعاً فى المسلمين العرب الليبيين فى الصلاة والا كيف كان فيه ناس الاثمه منهم والا
- ج . معنى ساعتها هاذاك الوقت وقت الى صار الحرب وجاء الطليان لطرابلس يمكن مايجيش اربع خمس زباط قاعدين منهم والاخر وقف الى باع طرابلس الكومان باع طرابلس تسقدوا فيها لول لول تمشى لسطنبول ساعتها مش باعه حتى هو رحلت منه ناس والا ما عندها كاش
- س . لا انا نحكى على عملية الاثمه

ج . والى ظهوروا والى قعدوا بعدين في التالى وظهروا معنا في سوانى بنيادم وحابروا الزباط  
ونهار اول هجمه الى معنى اعطوا لما شبحوا الجيش بالمرى ماهو عندهم مرأ شبحوا الجيش  
والطليان الى يبي يحارب بكثره حده عطوه بالقفاء ويقولوا اقاويل بالزاف .  
س . لا هادى نحكوا قتللك على الاثمه الاثمه . . يعنى كان فيه مجموعة من الاتراك يصلوا  
بالعرب الليين والا كيف .

ج . لا . لا معنى طرابلس انا ما سكنتهاش وهما قاعدين في طرابلس  
س . صار انت ما عندكش علم  
ج . ما عنديش

س . وطبعا الليين عارف فيه مجموعة من الليين انهم يصلوا . . بالنسبة لليين يعنى فيه  
ناس من رجال اولياء صالحين هكى . . كان فيه بعض الاولياء ليهم تاثير في العملية  
هاذى .

ج . لبي . . لين كيف معنى زى الرماح هذا فيه امام ويقرى في القرآن ، الرماح باهى  
جامع اولاد . . كذلك وجامع المقطوف كذلك في كل معنى جامع فيه امام كيف يصلوا  
معنى كيف ناس هذا جاء كان واحد يقولوله الفقى «على القزيطى» على اول ماجاء لجامعنا  
احنا هذا وبعدين الفقى عبدالله كذا قعد مده في لول واحد يقولوله العجيبلى الهندور هو  
معنى نسأل الخوش الى من جنبى من قبله قال جدى الحاج محمد خوامى معنى كانوا فيه  
واحد ضراريه خمسة

س . ما تقدرش تقولى علاش الناس زمان يعنى المجاهدين كانت يعنى تصمد وتقاوم  
الطليان شن الدافع الى يخيلهم هم يوقفوا ضد الطليان ويقاموه ، يحاربوه ؟  
ج . قاوموه معنى الحرب الى دار يسقدوا فيها جباهى جباهى معنى للحرب وتستشهد  
س ، لا قتللك علاش . شن الى يخلى مثلا المجاهدين كلهم يعنى يحاربوا في الطليان  
ويوقفوا ضده

ج . الى يخلينى نحارب الطليان ما بعد الكفر دنب اه توا الطليان معنى حيث لما يشد معنى  
تلقاء الجيش الى هو معارض الطليان في الحرب معنى خمسين والاميه ويردوا ناس تهلك من  
الحرب تموت معنى عشرة وخمسطاش وعشرين مازلت انت تولى معنى تلقاء جهد وماتديرش  
جهدك مع الكفار

س . صار عمليه دافع يعنى دينى الى هو حرص الواحد على الاسلام امتاعه ؟

ج . انعم . . يدافع . يدافع

س . ويدافع عن وطنه ايضا

ج . ويدافع عن وطنه . ويدافع على الشهداء الى حضرهم وينير جهده بآمانته

س . ما تقدرش تسمي دور العلماء والناس رجال الدين هاء والاثمه في عملية الجهاد في  
ناس كان ليهم دور والا لا في الجهاد .

ج . كيف ما يديرولهمش معنى الى هم .

س . يعنى كانوا يشجعوا فى الناس . وكانوا طبعا ليهم والا ماليهمش فى عملية الحرب هادى ؟

ج . معنى كل حد يشجع فى القبيلة امتاعه ويجو بيصلوا معنى ماتقول الرحة يجو اهوفيه امام الفولانى . يجو يصلوا الظهر والا العصر والا المغرب ان مش يى يقرأ عليهم معنى شنوا يلزم للمسلم .

س . صار يعنى كان موجودة الحاجات هادى ؟  
ج . كيف . . لا .

س . طبعا فى وقت الصلاة ووقت الخطب يشجعوا فيهم على الجهاد ؟  
ج . كيف . . لا . . ايه ايه مابعد الكفر دنوب واخيك المسلم لما يطلوا معنى يطيحوا الوفات . . ميات قدامك مازالت انت توا على الكفار هذا كله هناك تشجيع هذا .  
س . قوللى زمان ايطاليا طبعا جت يعنى دارت دعاية للناس على انها هيه ايطاليا طبعا تريد السلام وتريد مش عارف شنو وتريد الأمن يعنى هل فعلا الايطاليين اثروا زمان بدعايتهم على المجاهدين والا . . . لا ؟  
ج . الدعاية .

س . الدعاية على اساس انهم هم ايطاليا هى بلد مسلم او بلد طبعا تبى الخير لليسيا وتبى الخير مش عارف شن وحاجات زى هادى ؟

ج . اصبر الطليان هو الى دار الصلح مع ناس معنى الى هو على لول ماهو ماسلم السويحلى رمضان السويحلى هولول لما قعدت سنوات هونه يحارب ويسر منهم وصار المجاهدين معنى يعلم الله بحاهم وبعدين الطليان تطلب المساعدة اليسرى طلب المساعدة باهى الجهة الغربية هادى اولاد صقر والرحمة واولاد سلاق من الكوماندو امتاعها المقطوف باهى كان عندك ناس معنى ماشيه لخطر الحرب والا مهاجره والا معنى محل اهو صار الصلح الى معنى معاد عليهم خوف ابعثلها قعد عاد العرب . . . والطليان خش البلاد .

س . قوللى يعنى المجاهدين طبعا هل اثروا على الايطاليين فعلا من الناحية المعنوية كان ليهم تاثير على الايطاليين والا لا ؟

ج . المجاهدين . . . كيف مااثروش .

س . يعنى اثروا وهذا خلاهم ينتصروا والا لا ؟

ج . هذا هو معنى لما يثروا ومشوا على كلمة على الدين المحمدى آه نظر الله سبحانه وتعالى بالنصر باش الى معنى ليله الفاتح هادى ماهى من الماء للماء معنى كل من هوحتى عنده سلاحه من الطليان والا متوظف يجيبوه معها وسلم .

س . تقدرش تقوللى المكان الى استطاع المجاهدين فعلا ياثروا فيه على الطليان وينتصروا عليهم فى المعارك الى انت حضرتها طبعا . . . نجحوا هما فى دعاياتهم والا لا ؟

ج . ايهم ؟

- س . بالمشورات امتاعهم الى كانوا يديروا فيها والدعايات والخطب والواحد ؟
- ج . باهى ينجحوا والطليلان مانى قتللك يبعثوا للمقطوف يبعثوا للناس الى هى معنى عندها كلمة معنى يقبلوا منهم فيه الى ماقبلشى وفيه الى معنى .
- س . صار كانوا يديروا فى منشورات ويبعثوا للناس ؟
- ج . يديروا ويبعثوا على اول .
- س . يطلبوا الصلح ويطلبوا ؟
- ج . يطلبوا الصلح هم الطليلان هم الى يبعثوا فيه الى يقبل منهم ويغير لهم ويقوللهم باهى لم اتم معنى طلبتوا الراحة والهدو .
- س . يوافقهم هم ؟
- ج . يوافقهم هذا هذا .
- س . وفيه ناس ما وافقتش يعنى ؟
- ج . فيه ناس ماتوافقتش زى هادوله الى انعدموا بعدين وانجسوا زى المقطوف وزى ... ناس ياسره .
- س . فيه ناس طبعاً ماوافققتش على الصلح والحاجات هادى ؟ هل استمروا وفى الجهاد ؟
- ج . فيه هم هاذول الى بعدين عدموهم الى عدموهم واللى شنفوه شنفوه واللى يسروه يسروه قعد فى الحبس لين مات باصكه .
- س . المعارك طبعاً الى انتصر فيها المجاهدين طبعاً زى المعارك الى ؟
- ج . المسلمين نصروا فى حرب امتاع سدره بوغمجه نهار الهانى صار دار عليه حتى معنى ناس الى تتكلم جابت عليه كلام معنى كذا . يوم الهانى هذا المسلمين غنمت وصار موته مجاهدين . صار موت فى المجاهدين بكثره وغنموا من الطليلان غنيمة بكثره من السلاح ومن حتى كراهب غنموا وانتصروا المسلمون فى حرب امتاع الهانى وفى حرب الدول ياسره معنى غنموا محلات غنموا واحد . السويحلى لما دائرله الله سبحانه وتعالى بالنصر ماحضرتش حرب الى ماغنم الطليلان .
- س . قوللى شن كانت اخبار الناس زمان فى الحرب من ناحية هل كانت فعلاً فيه اشاعات تدور فيها بينهم . والا كيف اذا كانت فيه اشاعات كيف كانت الاشاعات هاذى الى فيما بينهم ؟
- ج . مش انتصروا اليوم المجاهدين .
- س . فى وقت الحرب زمان لما يصير الحرب يعنى وتسمع انت فيه حرب وكذا كيف كان حال الناس ، يعنى كيف كانت حالتهم فى ايام الحرب ، معنى الحاله امتاعهم كلها بصفه عامة ؟
- ج . حالتهم هذاك الوقت الى هو معنى يبي الحرب ويبي وعنده ناس معنى يحى للخط يدير جهده بحسب معرفته مع الاجانب مع الطليلان . وفيه الى البخيل هذا يقعد بخيل ديمه وخلاص هذا مانعرفه .
- س . ماتقدرش تقوللى السبب الى خلا بعض الناس تنحاز الى جانب المجاهدين

- ويعاربوا الطليان وبعضهم ينحاز الى جانب الطليان ... ؟
- ج . باهى اليوم شنو السبب معنى هذا المجاهد الى ماشى على الدين المحمدى هذا حتى يوم الطليان خش الزاوية مثلاً مش هكى ... ناس امشت على الدين الدين المحمدى معنى رقت الفوق وفيها ناس قعدت شدها الطليان يسرها هذا هو .
- س . شنو السبب الى يخلى فيه ناس نجى مع الطليان وتخدم لصالحهم فيه ناس يتجسسوا على المجاهدين وفيه ناس مابتش نجى مع الطليان بدات تحارب فيهم ؟
- ج . فيها ناس جايها الواحد زى ماقتلك زى مقال ولد السويحلى ولد هذا الاخر الزوارى خوه ولده امين قاله الزاوية قاعدين ناس عمال مع الطليان تاخذ ويجيبها المعاش من الشهر للشهر وماهاش يعدمونا ناسها يسروهم هونه يسرونا للحبس حكموا علينا مايبدين . المأبد هذا ما عنداش حكم زى الاسير معنى المؤبد .
- س . قتللك الناس الى انحازت الى جانب الطليان فيه ناس جت مع الطليان فيه والا ... لا ؟
- ج . تحارب مع الطليان فى العرب .
- س . ايه . مش فيه ناس طلينت والا لا ، الناس الى طلينت ؟
- ج . طلينت وشاده قاعده معنى .
- س . ماتقدرش تقولى شن السبب الى يخليهم يطلينوا ؟
- ج . زى ماتقول معنى يسرههم الطليان . فيه الى قاعد معنى باهى الناس الى هيه عنده دائر عليه سابق فى علمه يبي يسره الطليان ويبي يديرله الظلم وينشدو الى هو قعد مش طلب الدين المحمدى ويمجاهد على الجهاد الجهاد يارسول قعد حتى لين صار الصلح وروح من محلات اخرات وخلص وهذا هو .
- س . صار هو هذا ؟
- ج . امالا شنو تخلص الجمة من أم قرون . . هذا هوكل حد الله سبحانه يوم القيامة كل حد يوقف على العمل امتاعه .
- س . قوللى تقدرش تقولى السبب الى خلا المقاومة فى الاخير معاش حاربوا يعنى بدلوا يضعفوا شىء فشيئاً صح والا . . لا ماتقدرش تقولى شن السبب الى خلاهم يعنى ينتهوا ؟
- ج . ماهو الطليان طلب الصلح عاد قعد يجى بيعث فى رسائل للعالم . . كل قبيلة عندها معنى أمر وشيخ وامام بيعثلهم الى يوافقه هونه حتى كان عنده ناس فى محلات اخرى .
- س . صار قتللى توا الى خلا المجاهدين علاش لان الطليان طلب الصلح والا لانهم هما معادش عندهم باش يحاربوا ؟
- ج . لا الطليان هوالى طلب الصلح لما قعد مدة يحارب طلب الصلح وقعد بيعث فى رسائل للناس ومنها القبيلة قبيلة الرمح هاذى من فيها معنى فلان الفولانى الكوماندو شيخ امتاعها امامها وشيخها .

- س . نبوا نعرفوا السبب احنا شوف قدامنا هلبه اسباب يعنى هل هم فعلا ان معادش عندهم تنظيم المجاهدين زمان لما انتهت المقاومة هل هم معادش عندهم تنظيم ومعادش عندهم قاده ينظموا فيهم اوهم شعروا معادش قادرين انهم ينتصروا نتيجة لعود الايطاليين لهم بالواحد؟
- ج . الراحة طلبها المجاهدين المسلمين مع الطليان معنى الصلح لوكان معنى يعلم الله بالمجاهدين الى ضاعوا من العرب والطليان الوفات حتى هو .
- س . قوللى الناس زمان لما طلعت الناس هاوينه لما جاء الطليان طبعا فيه ناس خافت من الطليان والا لا من الاستعمار الايطالى . هل رجعوا بعدين والا مارجعوش؟
- ج . الى خاف من الطليان هذا الى مشى لتونس ومنهم الى مشى لمحل ثانى . . . رجع والى فى الاجبال رجعت وين مافيه ناس رجعت .
- س . زمان كانت فيه نزع ملكية . . . ايطاليا جت واخذت كل البلاد هكى والا لا؟ وهل كان فيه نزع للملكية من اصحابها والا كيف؟
- ج . الطليان المزارع الى خداهم ظلم يسرهم وقعدوا الليبيين توا الحواثر والاغراس والوحدات الى دراهم هاذوله كلهم ظلم .
- س . صار كان فيه نزع للملكية وحاجات زى هادى والا . لايحاج؟
- ج . الاملاك . . الطليان كل من هو الطليان لزمه خداه من غير حق من مولا ودار مزارع فى الواحد والعقبة<sup>(1)</sup> هادى امتاع تاجوراء هادى الى فى طرابلس معنى الى خداهم الانكليز هذا معنى خداهم من غير حق ومن غير واحد وحاصل الظلم الى داره فى العرب يعلمه المولى ولله الحمد اهو معنى ولت على كلمه وحده وعلى الدين المحمدي وماعندها الا النصر بقدره الله .
- س . قوللى السلاح الى كان يستخدم فيه الطليان زمان شن نوعه؟
- ج . الى كان بيدهم الى فى ايد الطليان موزر .
- س . اه قوللى زمان المجاهدين يعنى كانوا امدايرين شروط للانظام ليهم والا الى بينظم للمجاهدين لا بد ان تتوفر فيه شروط معينة والا الى واقى يدخل والا كيف؟
- ج . المجاهدين مش قتلك كل من هو ييجى على الطريق والا القرعة معنى الشيخ امتاعه يمشى معنى شن اليوم يقعد كان كنت مثل مسقدينى نحارب باهى غدوه جت كباية اخرى بتمشى نحارب . . . انا روح اليوم وغدوه يردوني يديروا غيرى هادى المسالة على الكومانده الشيخ امتاعك .
- س . يعنى الشروط لان المجاهدين كانوا امدايرين قيادة والا لا زى ماقتلى انت بكرى فيه ريس ونائب ريس فيه صندوق وامين صندوق مش عارف والا . . . لا
- ج . فيه ابيه

1- يقصد قاعدة عقبة بن نافع سابقاً «معينة حالياً» .



س . يبقى لابد الى بيدخل للمجاهدين لابد تتوفر فيه الشروط مش اى واحد يجيبوه  
للمجاهدين والا . . . لا

ج . لا هاذك الى يجيبه انت عليك عشر انفار مثلا . . . بيد معنى فلان وفلان  
ويديرهم ويبعثهم للكوماندو هذا هو

س . عملية التنظيم ليهم مافيش شروط لابد ان المجاهدين ماهو مش فيه زمان  
جواسيس وفيه حاجات مايخافوش من حاجات زى هادى والا . . . لا

ج . دواسيس

س . ايه ماهو المجاهدين لابد كانوا امدارين شروط زمان لابد المجاهد انه يشترط فيه  
انه هو مايكونش عميل لابد فيه شروط متوفرة فى المجاهدين على شان يخش والا . .  
لامش اى واحد يجي وينظم للمجاهدين يبقى امعاهم والا ماكانتش موجودة الحاجات

ج . كانت موجودة ومايسقد للحرب الا مايعرفوا فلان الفولانى الحرارى هذا معنى  
على حقيقة والا الحاج بوراوى على حقيقة هذا الى يسقدوا

س . ماشى . ماشى . قوللى باهى المساعدات كانت فيه مساعدات زمان من الدول  
العربية والا لا تقريبا انت قتلتي فيه شوى .

ج . المساعدات من الدول العربية . زى ماسقدت ليبيا للجزائر

س . والجزائر حتى هيه مش كانت تعطى للمجاهدين تساعدهم فيهم والا . . لا

ج . كيف لا كيف . . لا

س . ومصر زمان حتى هيه ماكانتش تساعد

ج . فيه كانت

س . ايه العرب فى بعضها . اليوم الحرب معنى فى طرابلس يجيبها من محلات العرب  
لاخرين فيه

س . فاش المساعدات هادى تقدرش تقولى كانت موجودة

ج . مساعدات فى الميكول والا فى لزومهم .

س . فى كل مايحتاجوه من طعام وشراب

ج . نعم

س . حتى السلاح

ج . ايه . . حتى السلاح معنى تركيا عندى بندقية امتاعت عربية تتعمر غير باللوش  
والا الواحد شن أدير الحرب هنا وكانت حتى المدافع والطققات نجي من مصر  
لبعضها كانت فيه مساعدات

س . تحفظش شعر انت على المعارك والا حاجة عندكش شعر تحفظه يعنى منظمة عن  
المعارك وعلى المعتقلات الى انت احضرتها والحاجات هادى

ج . وشنوا الشعر معنى

انتهى الجزء الثانى

شريط / رقم 1 / 165

س . قوللى الحرب امتاع العرب فى الطليان هل اثرت على حياة الناس من الناحية الاجتماعية والا ماثرتش

ج . كيف يثرت

س . يعنى تأثيرها ماهو كانت فيه اعراس وكانت فيه اتصالات ما بين الناس المجاهدين هنا . . هل لما جى الحرب اثر على الحاجات هادى

ج . كيف

س . يعنى مثلا الحفلات امتاع العرس يعنى مان مش كان يدبروا فى اعراس

ج . ايه . . . ايه باهى

س . هل الناس بعدين معاش تدبير فى اعراس والا كيف والا

ج . لا . . . لا

س . خائفة . خائفة من الحرب

ج . لما يصير النصر للمسلمين يدبروا حفلة معنى فى كل محل حفلة معنى الى هو الجهاد يارسل والنصر من عند الله . . هذا يتكلموا بيها . . . هذا هو فيه حفلات معنى كيف

س . وكان فيه حج زمان يحجوا الناس زمان والا . . . لا

ج . كان . . . وقت الطليان يحجوا

س . وقبل الحرب بشوية

ج . لا قبل الحرب يسافروا على البر . . . وقت الى جاء الطليان فى البواخر يسافروا فى البواخر

س . ووقت الحرب انقطع الحج معادش يحجوا الناس ما فيش ناس حجت

ج . معنى حرب لا . . ممنوع الى هو معنى يمشى يخل الحرب بره ويمشى يطلب المحل اخر معنى بيحارب والا هذا الجهاد

س . قوللى كان فيه زمان يعنى تغيرات فى اسماء حكومة المجاهدين هادى والقيادة كان فيه تغيرات فيها والا لا

ج . تغيرات كيف

س . يعنى مثلا يغيروا فيها انتخاب وواحد والا ما فيش

ج . انتخاب معنى واحد

يختاروا فلان هذا يعنى رئيس قيادة المجاهدين

واحد رئيس . . واحد مايحيش . . ياودى كيف لا اماله يدبروا ناس معنى تقابل الاجانب الطليان وما فيهاش معنى ماهيش على حقيقة والا الكوماندة امتاعها على خط

لا

س . يعنى كيف كان التغيير . تقدرش كيف كان سواء كان فى القبيلة او فى قيادة المجاهدين كان فيه تغير قلتلى كيف كان يتم

ج . تغيير شنو ؟

س . فى حكومة قيادة المجاهدين والمشيخة امتاع القبائل زمان مش كان الناس توه الشيخ متاع القبيلة هذا الى حكيت عليه بكرى المقطوف هذا والناس مش كانوا مشايخ امتاع القبائل والا . . لا

ج . باهى شلابى هذا قائمقام على بر الزاوية هاذى مش هكى باهى القبيلة الرحمة من هو الى يصلح بيكم انتم وبيصير عليكم .

س . من الى وصله من الى امدايه قائمقام هذا

ج . هذا امدايته التركية على ليبيا

س . من اسطنبول جاء هنا هو الى محسوب واحد كومانده شلابى قائمقام فى الزاوية باهى يبعث الرحمة هادولة من شيخ "على اشكال"

س . هذا حتى هو معينه الترك

ج . معينه جاى من اسطنبول . . . شلابى هذا

س . شلابى هذا وحتى هو معين من غادى

ج . هذا قارى فى اسطنبول وجاء هنا قائمقام على ليبيا ودار معنى ناس الى هو باهى

القبيلة الفلانية ينادى معنى عشرة خمسطاش عشرين ويجيبهم من الى معنى يصلح

بيكم تقدموه معنى شيخ والا الأمر امتاعكم . . يقولوه احنا يصلح بنا فلان الفولانى

باهى يمشى لركن القبيلة الاخرى شنوفيه يناديها شنوفيه عندكم اظن فلان يقولوه

معلوم صاحب ديانة وهو الى يصلح بينا يسجله ويمشى من القبيلة للقبيلة حتى لين

ياخذ الروسات امتاعها .

س . وكان فيه تغيرات والا . . لا

ج . تغيرات ظلم

س . لا . يعنى يغيروا يعنى يمشى فلان ويحى واحد ثانى وحاجات والا ديمه

ج . هناك الى ينقذوه بحاجة يديروا عليه شهود من القمزة وبيدلوا غير

س . كيف كانت تتم التغيرات هادى من الى يدير فيها ؟

ج . باهى انت اليوم كومانده على القبيلة هادى اليوم ماعدكش

س . ايه ايوه من الى يقوله هكى هذا ؟

ج . قائمقام الكومانده .

س . هو الى يقوله انت خلاص يعنى معاش ؟

ج . انت معنى درت الحاجة الفلانية والا معنى امرتك انا على شىء بتسقد نلس معنى

للمحل فلانى . . . . . الجهاد . . . . . القائمقام شلابى هذا وين معنى مصلحة لليبيا هو مبيداها

س . قوللى هذا هو الى كان ماسك حركة الجهاد والا كيف ؟

ج . هو .

- س . من الناس الى كانوا ماسكين حركة الجهاد زمان هنا ؟
- ج . حركة الجهاد مش قلتلك كل قبيلة وجهدها وخاطرها وكل شيخ قبيلة بيعث شىء معنى ولكن قبيلة الشوى شوى والياسره والا مرة دز للشيخ المقطوف راك بتسقد اليوم معنى عشرين مجاهد ، يسقدهم .
- س . الائمة متاع المساجد والناس امتاع الدين حتى هم كانوا فيهم تغيرات والا لا يغيروا فيهم والا لا ؟
- ج . الائمة ، الائمة هادوله معنى شنو فيهم تغيرات كانش الى معنى يلقوه ينقدوه بشى الى هو يخص المسلم يغيروه كيف لا .
- س . يعنى كيف تغيرات ؟
- ج . فيه ، فيه تغيرات مدايرنك لهل المسجد معنى تورى الى يعرف والى مايعرفش مش هكى وانت مادرش الوصلات معنى ويتاخر نجيبوا غيرك هادى هى الى هناك وهادى الى معنى لازمة كل مسجد .
- س . قوللى طبعا فيه ناس زمان كانوا ساكنين فى الصحراء اللبره بعدين على الناس كانوا يجرسوا فى التجارة امتاع القوافل الى هى الداخلية هادى تجارة القوافل ، يعنى شنى كانت صلتهم بالحرب هادى والا ماكنش عندهم صلة بكل والا كانوا بعيدين ؟
- ج . تجارة القوافل .
- س . ايه الناس الى كانت تحرس فى تجارة القوافل كانوا طبعا هم يجرسوا فى التجارة شن كانت صلتهم بالحرب يعنى ؟
- ج . الناس الى تحارب معنى كان خصهم شىء وهوليهم معنى لزوم المجاهد مايقصرش فيه لزوم المجاهد باهى توارت معنى ناس مجاهدين الطليان خش الزاوية هادى وقت ناس رقت ناس جت معنى المحل الحرات وبثر الغنم وكذا معنى يقبلوهم بشى بلزومهم ويفرحو بيهم الى معنى مجاهدين معنى جوا من محل آخر .
- س . يعنى ومن ناحية الحرب انهم هم . . . يعنى لما يجوا للحرب ما يمنعوهمش يعنى ما يمنعوهمش ؟
- ج . كيف يمنعوهم هم .
- س . هما كانوا يجوا والا مايجوش ، كانت عندهم صلة بالناس المجاهدين والا ماكنتش ؟
- ج . كيف هم يجي منهم حتى ناس معنى مجاهدين يحاربوا للخط حتى هم معنى شادين البرتوا بثر الغنم معنى مايجوش منه يحاربوا هنا للزاوية .
- س . لا نحكى على المناطق البعيدة شوى متاع الصحراء هادى ؟
- ج . متاع الصحراء ايه ، ، باهى ترهونة كذلك ، ، معنى الرقيعات كذلك كل يجي منهم بانذات للحرب فى وين الحرب فى وين معنى يجوا منهم شوى .
- س . قوللى الناس الى هيه فقدت املاك امتاعها الناس الى فقدت الاملاك امتاعها والا لا خدمت مع الطليان ، هل هيه لما خدمت مع الطليان تبي تعوض الاملاك امتاعها والا شن الى خلاهم ؟

ج . الاراضى الى خذتها الطليان ودارتها مزارع ، ، معنى كان فيها واحد يخدم باليومية ،  
يصير باليومية وكان هو وقت الى معنى مش الطليان كل من عنده ارض فيها ان شاء  
الله حتى الوفات مصالح هيه صار صحت ليه .  
س . باهى اما لا يحاج احنا على العموم نشكرك وبارك الله فيك على هذه المعلومات .

انتهت المقابلة

## ملخص مقابلة ابوراوى عبدالحميد ابراهيم . 163/1 و 164 و 165 و 166

عند وصول خبر قدوم الايطاليين الى الزاوية هب الاهالى الى مدينة طرابلس وذلك للحصول على الاسلحة من مخازن الجيش التركى بسانية الباشا حيث يوجد عدد من الضباط الاتراك فقد قام المتحدث ومجموعة من الاهالى بجلب كميات من البنادق وقاموا بتسليمها الى قائم مقام الزاوية « شلابى » وفي منطقة قرقارش قامت البوارج الايطالية بقصف القافلة الا انها لم تصب احد .

حضر المتحدث معركة نزول الايطاليين على قرقارش وهى اول معركة جرت على شاطئ طرابلس بعد ذلك انسحب الضباط الاتراك نحو سوانى بن يادم ، اثناء معركة الهانى قدمت مجموعة من المجاهدين من منطقة مصراته وساهمت فى معارك الجهاد التى جرت بعد ذلك ومنها معركة سدره ابو غمجة « بئر طبراز - سدره الجلالة » حيث استشهد عدد من افرادها هناك وقد شارك المتحدث فى هذه المعركة صحبة عدد من افراد قبيلته كما شارك المتحدث فى معركة السكوم « سيدى سعيد » . رمضان السويحلى كان يقود محلة مصراته التى سبق الحديث عنها .

من رفاق المتحدث فى معركة السكوم الشنقىرى الاعيور والشيخ الطاهر الهندورى وقد استشهد شنقىرى الاعوير .

قادة المجاهدين فى هذه المعركة الشيخ « محمد المقطوف » ومحمد شلابى وشاركت فيها مجموعة من القبائل منها قبيلة الرحمة التى ينتمى اليها المتحدث وقبيلة أولاد سلامه وبعد مرور فترة من الزمن على مجيء الايطاليين الى ليبيا حرم على الليبيين دخول طرابلس واصيبت البلاد بمجاعة فاتجهت مجموعات من الاهالى نحو الحدود الغربية وذلك لجلب بعض الحاجيات من تونس وفى منطقة الناظور بالقرب من الحدود الليبية التونسية جرت معركة بين الاهالى المتجهين الى تونس والقوات الايطالية اسفرت عن اسر عدد من المواطنين يقدر عددهم بنحو 29 شخص من بينهم المتحدث وبعد مرور احدى عشر يوما على اسرهم عقدت محكمة خاصة بشأنهم اصدرت حكمها بالسجن المؤبد فى حق 23 منهم ونفذ حكم الاعدام فى 6 أشخاص ، نقل المحكومون الى زوارة ومنها الى طرابلس حيث نقلوا الى جزيرة قافنيانا بايطاليا كمنفيين حيث نفى سعدون السويحلى وعدد آخر من الليبيين كما كانت الجزيرة تضم عددا من الايطاليين المحكومين باحكام مختلفة . طلب الايطاليون من سعدون السويحلى مخاطبة اخيه رمضان لاطلاق سراح الاسرى

الايطاليين لدى رمضان مقابل اطلاق الايطاليين سراح المنفيين هناك ومن ضمنهم سعدون واحمد السويحلي ، في بداية الامر رفض رمضان عندها زاد الايطاليون من سوء معاملتهم للمنفيين بعد ذلك تم الاتفاق على اطلاق سراح الاسرى الايطاليين في مقابل اطلاق سراح وارجاع المنفيين الى بلادهم وقد مكث المتحدث في المنفى 31 شهرا .

كانت قيادة المجاهدين تكلف مجموعة من المجاهدين للقيام بعمليات الاستطلاع وترصد تحركات العدو لتقوم باعداد خطة وفق ذلك ، نتيجة لحرب الابداء والتنكيل هاجر عدد كبير من الاهالي الى المناطق المجاورة مثل تونس وقامت السلطات الايطالية بمصادرة اغلب الاملاك الخاصة بالمهاجرين ، قام الليبيون بتقديم المساعدات العينية للشوار الجزائريين اثناء الثورة الجزائرية الكبرى وقام الايطاليون بالقبض على عدد من المجاهدين اثناء فترة الجهاد واصدرت المحاكم الايطالية حكمها بمصادرة املاك عدد منهم وكذلك بالسجن المؤبد والاعدام على البعض الآخر انضم بعض الليبيين الى الجانب الايطالي وسخروهم في عملية الحوسسة على المجاهدين وكانت قيادة المجاهدين تكلف شيوخ القبائل بتجهيز عدد من افرادها وذلك للمساهمة في الجهاد الى حين قدوم مجموعة اخرى تتولى مهمة الدفاع والتصدي للعدو ، ساهمت النساء في حركة الجهاد وذلك بتشجيع المجاهدين بالزغاريد وجلب الماء استخدم المجاهدون عدة انواع من البنادق هي ابو صوانه وهي بدائية بسيطة والموزر والكاباك وابو صرة والبومشطة التي تتسع لست طلقات ( نوع ايطالي ) ، كان تموين المجاهدين يتم ذاتيا فالمجاهد عند ذهابه الى خط الحرب يحمل معه تموينا يكفيه مدة مكوثه هناك .

فرضت ضرائب لتمويل حركة الجهاد على الاهالي الاغنياء . كان هناك عدد من الاطباء والمرضى يقومون بعلاج جرحى المعارك كما كان هناك عدد من الاشخاص يجيدون العلاج بالطرق الشعبية . اغلب شهداء المعارك يقوم المجاهدون بدفنهم في مكان استشهادهم عقب انتهاء المعركة .

اساء الايطاليون معاملة المنفيين الليبيين فكانت الوجبة تتكون من قطعة من الخبز وقليل من الطبخ .

هب الليبيون لمقاومة الغزاة الطليان وذلك دفاعا عن الدين والوطن والعرض قام فقهاء الدين والعلماء بدور فعال في تحريض الناس على المقاومة والتصدي للعدو الايطالي . لم تستطع دعاية الايطاليين التأثير على الروح المعنوية للمجاهدين واستمرت حركة الجهاد رغم قلة الامكانيات . . .

230	Ali Ben Hannon	30	Menseia	261	Mahima Ben Mahammet	60	
231	Sahat Ben Kaman		"	262	Mohitar Ben Rifa	28	
232	Ali Ben Hasseni	30	"	263	Salah Ben Mohammet	20	
233	Ali Ben Mahammet	25	"	264	Habibella Ben Mahammet	29	
234	Haniet Ben Mahammet	50	"	265	Eregh Ben Mahammet	70	
235	Mahammet Ben Harnet	16		266	Mahammet Ben Salen	50	
236	Hannor Ben Burahe	70	"	267	Mosbaher Ben Barcha	28	
237	Halif Ben Mahammet	19	"	268	Haridella Ben Sudan	10	Dahara
238	Hannor Ben Ali	50	"	269	Sahat Ben Sudan	10	Trispoli
239	Salen Ben Ali	59	"	270	Salen Ben Harp Salen	63	Dahara
240	Haridella Ben Hassat	10	"	271	Hir Ben Haridella	20	Menseia
241	Mahammet Ben Habouch	50	"	272	Hassen Ben Mahammet	69	Trispoli
242	Melior Ben Menseia	29	"	273	Ben Ben Slama	69	Dahara
243	Mahammet Ben Hagiali	30	Trispoli	274	Habib Ben Slama	40	"
244	Hassier Ben Harnet	30	Menseia	275	Mahammet Ben Halif	60	"
245	Harnet Ben Gasmam	59	Dahara	276	Haridella Ben Sudan	10	Trispoli
246	Mahima Ben Messut	39	Menseia	277	Mabruch Ben Barcha	20	Menseia
247	Hadi Ben Burahe	30	"	278	Mahammet Ben Halif	10	Trispoli
248	Salah Ben Salen	29	"	279	Harnet Ben Salen	50	"
249	Leiah Ben Garen	50	Trispoli	280	Ali Ben Mabruch	60	"
250	Mahammet Ben Mahammet	30	"	281	Mahammet Ben Kiamati	60	Menseia
251	Mahammet Ben Mahammet	60	Trispoli	282	Alfostafa Ben Kour	50	"
252	Salah Ben Mohitah	29	Menseia	283	Kantun Ben Suez	50	"
253	Harnet Ben Mahammet	20	Trispoli	284	Harnet Ben Haridella	10	"
254	Haghir Ben Mahammet	10	Menseia	285	Demet Ben Chahat	18	"
255	Mahammet Ben Mahammet	30	"	286	Haridella Ben Salen	20	Trispoli
256	Harnet Ben Hannor	51	Trispoli	287	Halif Ben Gammal	11	Menseia
257	Ali Ben Haridella	50	"	288	Ali Benet Mahammet	60	"
258	Harnet Ben Suez	20	"	289	Messut Ben Mabruch	10	"
259	Ali Ben Salen	10	"	290	Halif Ben Ali	10	"
260	Ali Ben Ali	29	Menseia	291	Salen Ben Mahammet	59	Dahara


قائمة ببعض المواطنين الليبيين الذين تم تقيهم إلى إيطاليا على إثر إنتصار المجاهدين في معركة الهاني في 26 / 10 / 1911م ومن بين هؤلاء (جمعة محمد سعد الشريف) .  
انظر ، دار المحفوظات التاريخية بطرابلس .



1	Aglila ben Salem El Seitoni	Mogagga
2	Mohammed ben Ali ben Mohammed	"
3	Salah ben Ibrahim	"
4	Kreica ben Messoud	"
5	Mansahud Angar	"
6	El Sebbani ben Omar	"
7	Burtona ben Mohammed	"
8	Kalifa ben Abdussalam	"
9	Abdalla ben Omar	Drahib
10	Mohammed ben Mohammed	"
11	Giuna ben Abdalla	"
12	Mohammed El Dali	"
13	Ali ben Salem	"
14	Salem ben Omar	"
15	Saad ben Mansaud	"
16	Musab ben Mohammed	"
17	Mohammed ben Abdussalam	Aulad Iusef
18	Ali ben Ibrahim	"
19	Said ben Mohammed	"
20	Mohammed El Fituro ben Han	"
21	Ali ben Ali	"
22	Ali ben El Saied	"
23	Ali ben Matrah	Hanadat Sart
24	Arkluf ben Hamed	"
25	Omar ben Ali	"
26	Abdussalam ben Mohammed	"
27	Hamed ben Ibrahim	"
28	Mohammed ben Giuna	"
29	Saad ben Said	"
30	Mohammed ben El Hammali	"
31	Mohammed ben El Hag Mohammed	"
32	Hamed ben Ali	"
33	Dau ben Kalifa	"
34	Saad ben I'Amr El Tibi	"
35	Ali ben Saied	"
36	Salem ben Ali Kassak	"
37	Muttah ben Mohammed	"
38	Salem ben Hussein Baccous	Masanga Solobin
39	Faragi ben Mohammed	"
40	Baccor ben Hago Ramadan El Solobi	"
41	Zabruk ben Issa	"
42	Saad ben Kalifa	El Abeter
43	Salem ben Abdussalam	"
44	Mohammed ben Musab	"
45	Ibrahim ben Salah	"
46	Mohammed ben Hamed	"
47	Muttah ben Dubakor El Amari	"


قائمة ببعض المواطنين الليبيين الذين تم تقيهم على اثر إنتصار المجاهدين في معركة القرضابية في 29 / 4 / 1915 م ومن بين هؤلاء (محمد بن عبد السلام اليوسفي).

وتدعى النواحي التي لا تستعمل بها قبة راسها حرس مخططاً بقبعة لاخرها قبة مصلانا باليه من احد مكانايات




رسم: بنائى أوفى - حسب المخطط - يوصفح المجد يتر عن أهرنق الوطن من جدران الغزو الاستعماري الإيجالي  
المصعد : رسم الزمان والمطويات - مركز دراسات جهاد المبيين ضد الغزو الإيطالي .

كل ١ ٣٣ في المخرقة يقابل 100 شخص



رسم بياني أولي - حسب السنوات - يوضح عدد المبعدين  
عن ليبيا من جراء الغزو الاستعماري الإيطالي .  
المصدر :  
شعبة الوثائق والمخطوطات بمركز دراسة جهاد الليبيين ضد الغزو الإيطالي  
= لكل 1 سنة في المخطط 100 شخص .




رسم بياني أولي يوم منح الأماكن . الحق أبعد إليها الذين أهدى الوطن من جراء الغزو الاستعماري الإيطالي  
 المحدثين : شعبة الوثائق والمخطوطات بمركز دراسة جهاد الليبيين ضد الفز والإيطالي .  
 • ملاحظة : رسم 1 رسم في المخرعة وتجاوز 75 شويضا .





طرابلس الغرب  
 مصرية (البحارة الإيطالية) أكاديس من القتل الحرب المدين عينية طرابلس وحرقهم أخفود الإيطاليون المدحرون بالسلاح . وقد تميل بعض الضباط  
 صهوة خيول حربية المصنوعة من كلالهم .



## | معجم توضيحي لبعض المفردات العامية |

« أ »

اتريك : كهرباء  
احنا : نحن  
استاجعوا : مرضوا  
استاصلوا : اتصلوا  
اطناش : اثنا عشر « 12 »  
امالى : اصحاب ، اهل  
امين : من اى جهة ؟  
اوطا : اسفل  
ام السبعه : لعبه شعبية  
امكرسنه : الارض المبلطه  
انفلقت البيعه : تفرقت جموعهم  
اتلمت : تجمعت  
انعزق فيهم المدفع : بدأت المدفعية فى القصف  
انذهبت شيرتنا : غير قادرين على التفكير السليم  
ايه : نعم مداس : حذاء  
امداس : حذاء  
التمينا : اجتمعنا .

« ب »

بابور : سفينة  
بارات : جمع باره وهى عملة معدنية تركية  
بارسات : تقلب الزمن .  
بارسليرى : كلمة ايطالية تعنى الرماة ( القناصة ) وهم جنود ايطاليون . ظ - BERSA  
GLIERI « .  
باستا : كلمة ايطالية تعنى كفى .  
باش : لكى .



باصكه : كثيرون .  
 بالتهمة : بطريقة عشوائية .  
 بالكش : على أمل .  
 بالسيف : بالاكراه .  
 باله : جاروف .  
 بالوصيه / بالوصيه : شرطه .  
 بانت : ظهرت .  
 بانده : المجندون المحليون من قبل الايطاليين  
 بانيو : كلمة ايطالية تعنى حوض الاستحمام  
 باهوات : باشوات .  
 باهيه : جيده .  
 باينات : واضحات .  
 بتاتى . براميل .  
 بت قداهم : نمت عندهم .  
 بجاوى : سخي كريم .  
 بحدانا : بجوارنا  
 بختك : حظك  
 برا / بره : الاستمرارية .  
 براريك : جمع براكه . وهى كلمة ايطالية ، تعنى بيت مصنوع من الخشب او  
 الصفيح .  
 براطيل : جمع برطيله وهى القبعه .  
 براقادير : كلمة ايطالية تعنى قائد فرقة عسكرية  
 برانده : سرير .  
 برانيه : غرباء  
 برط : ميناء .  
 برقيزى : مدنى او مواطن .  
 برمونا : نقلونا من مكان الى آخر .  
 برميستو : كلمة ايطالية ، تعنى تصريح  
 بريح : النداء يقصد بها المنادى للجهاد .  
 بريمه : كلمة ايطالية تعنى الاولى .  
 بزعوا : سكبوا .  
 بزيم : صنبور .

بسكوله : ميزان .  
بشماط : خبز مجفف .  
بطاله : عمل سيء .  
بطلت : ضعفت وهزلت .  
بطلوا : كفوا .  
بعتالى : بعد ذلك .  
بعدين : بعد فترة .  
بقشيش : اكرامية .  
بكرارى : من أنواع التحيل .  
بلاقيش : بثرات .  
بلغه : نعل  
بلى فيهم : كلهم .  
بنات القود : الابل .  
بوسطه : يريد .  
يوركان / يورقان : رداء من الصوف يستعمله الرجال .  
بوليط / بوليت : تذكره  
بونطوات : الغرز التى تخيط الجرح .  
بيت الراحة : دور مياه .  
بيتو : عملة نقدية .

## « ت »

تالى : خلف .  
تاليه (ال) : الاخير .  
تبى : تريد  
تتسقد : تبدأ فى المسير .  
تنتظر : تقفز .  
تحزيز : تهديد .  
تحسسوا بهم : شعروا بهم .  
تخريش : تنقية الارض من الاعشاب الضارة .  
خربش الكتاب : أفسده  
تخلى : تترك .

تدمغه : تجرحه في رأسه .  
ترنقيات : إحدى وسائل النقل (ترام)  
تريس : رجال شجعان مفردها (تراس)  
تريونار : كلمة ايطالية تعنى المحكمة .  
تزيينة لحاهم : حلق لحاهم .  
تساسى : يتسول .

## « ت »

تساكر : جمع تسكره وتعنى جوابات .  
تسبس : تدخن  
تسيترات : تصغير تستره وهى المنشار  
تفاحه : رصاصه  
تفريغ : رمى  
تفلقت البيعه : تشتت مجموعهم  
تقربعت : انفجرت  
تقليه : التموين والعتاد  
تكرشوا : تمسكوا  
تكرهاكر : تسحبها سحباً  
تلطاش : ثلاثة عشر « 13 »  
تمساية : عند المساء  
تنشرك : تتمزق  
تهبيك : ضرب عشوائى  
تهدل : تهطل  
تهلilt الفجر : طلوع الفجر  
توه ، توا : الآن  
توج : صوت القنبله فى الهواء  
توازير : جمع تازير يستعمل كفرش  
تولى : ترجع  
تباترو : مسرح  
تيرسه : كلمة ايطالية تعنى الثالثة  
تيسرت : وقعت فى الاسر

تينيتى : رتبه عسكرية ملازم اول .

« ث »

ثلث ايم : ثلاثة ايام .

« ج »

جابه : جاء به

جافار : خندق

جبخانه : كلمة تركية تعنى مستودع الذخيرة ( عتاد ) .

جيد : عاد او رجع

جراريد : أفواج متدفقه .

جردينات : حدائق .

جريده : صحيفه .

جغيمه : جرعه .

جلب : نقل الحيوانات الى السوق .

جلوه : بكسر الجيم تعنى ناحية ويفتحه تعنى النزوح او الهجره .

جناقه : هزيل وضعيف البنيه .

جندرمه : كلمة تركيه تعنى الشرطه .

جوادير : خيول .

جهيمه : مبكره .

« ح »

حاشيه الوادى : ضفه الوادى .

حايزه : استولى عليه .

حبيله : اسلاك شائكه .

حتواله : بقيه .

حتيه : منعله « نعل الحصان » .

حدر : نزل ، انحدر .

حطايا : جمع حطيه وهى ما انخفض من الارض وكثر ماؤه .

حطوه : وضعوه .  
 حقها : ثمنها .  
 حكر : قدر .  
 حليت : فتحت .  
 حمل : ما يحمله الجمل او كساء يستعمل للغطاء ويصنع من وبر الابل وصوف الاغنام  
 وشعر الماعز .  
 حوائز : مزارع .  
 حوش : منزل .  
 الحومه : المنطقة .  
 حونن : يحن الى .  
 حويره : تصغير حاره ، تعنى اربعه .  
 حولى : الحروف الذى يبلغ السنه ، او الكساء المصنوع من الصوف ويعرف فى بعض  
 المناطق بالجرد .  
 حولوا : انتقلوا .

## « خ »

خاطر : العدد الكثير من الناس كما تعنى الضيف .  
 خبطه : (ال) المعركة .  
 خربت الكاوزه : خربت القضية او المسألة .  
 خرافه : قصة او حكاية .  
 خطره حرفه : رحلة غير موفقة .  
 خليت : هجرت .  
 خشوا : دخلوا فى .  
 خوجه : كلمة تركيه تعنى معلم واستعلمت هنا بمعنى غنى .

## « د »

داجين : مندفعين بكثره .  
 داخوا : اصيبوا بالدوار .  
 داروهم : وضعوهم .  
 داروا : فعلوا .  
 داوريه : خفاره .  
 داوى : «ال» الطبل .  
 داروابيه : التفوا حوله .

دازين : متقدمين .  
داروا فيه : وضعوا فيه .  
درنا : بضم الدال وتعنى تغير الاتجاه .  
درز : احدث صوتا بالاقدام .  
درز بدرز : مجموعة بمجموعة .  
دز : ارسل او بعث له .  
دزيره : جزيره .  
دروج : سلام ( بلا دروج يا مصعب رقات العالى .. )  
وبلا حرث كيف تطمع اتجيك مطيره ) .

« د »

دبش : امتعه .  
دف اللقدام : سار الى الامام .  
دفل : بصق .  
دقره : بندقيه ايطاليه .  
دقه : معركة .  
دعكه : معركة او مناوشه .  
دعس : هجوم .  
دنقوز : صبي .  
دوب : قليل .  
دكيكين : تصغير دكان : متجر .  
دماوات : دماء .  
دقليه : حمى وطيس المعركة .  
دهم : مرب .  
دوار : (ال) ذكر الحباره .  
دوه : (ال) الحديث او الكلام .  
ديل : بعض .

« ذ »

ذر : (ال) : الاطفال

« ر »

راديو : كلمة لاتينيه تعنى مذياع .  
راييات : «ال» : الحائرات .

رتم : نبات يرى .  
 رجدوا : تجمعوا .  
 ردس : ركل وهى تعنى دكه أو رماه بحجرة .  
 رديناهم : اجبرناهم على التراجع .  
 رشاده : حجره .  
 رطانه : يتكلم غير العربية ، وتعنى الكلام بالاعجمية .  
 رفس (ال) : الركل  
 رفعوهم : نقلوهم  
 رقيت : سعدت  
 ركبوا فيهم بالمدفع : بدأوا فى قصفهم بالمدافع .  
 روال : مخزن  
 روحوا : رجعوا أو عادوا  
 روسيه : رؤوساء  
 روشن : نافذة  
 ريبوز : كلمة ايطالية تعنى راحة .  
 ريقه : كلمة ايطالية تعنى طابور ، صف .  
 ريقالوا : كلمة ايطالية تعنى مكافأة .

## « ز »

زابط الرفة : باقى فى ركن البيت (يت شعر)  
 زابطية (ال) : افراد الشرطة (تعنى الحراس)  
 زامق : مختلط  
 زباط : ضباط  
 زبايلي : مشاغب  
 زرقت الشمس : اشرقت الشمس  
 زرونا : طردونا  
 زقطوط : عار . (بدون ملابس)  
 زقطى : حانق  
 زلبحونى : خدعونى  
 زميته : بفتح الزى تعنى نقلته وبم الزاى تعنى السويق  
 زوالى : فقير  
 زوايل إيل

زوز : إثنان أو إثنين  
زوفريه (ال) : تستخدم لأغراض شتى منها العزاب والمشاعبين  
زى : مثل  
زينقو : صفيح

« س »

ساعتها : فى ذلك الوقت  
اندنيلا : حرس  
سبط : نبات برى  
سبول : ذرة  
سبيب : خيل ، السبيب من الفرس : شعر الذنب من الشعر : كالسبيبه  
سبيتار : كلمة ذات أصل لاتينى تعنى مستشفى  
سبيراتيرا : كلمة ايطالية تعنى موقد يستعمل بالكبروسين  
سبيزة : كلمة ايطالية تعنى التموين  
ستان : ارض مبلطة  
سربوا : مروا فى صف أو صفوف  
سرجينتى ماجور : رتبة عسكرية  
سركلوه : طوقه أو حاصروه  
السطيل : تصغير سطل وهو وعاء يستعمل عادة لحمل الماء  
سعى : غنم  
سنفز : فطائر  
سكوادره : فرقة  
السنقى : الحربه  
سنيزه : تصغير سنزه وهى الميزان  
السهايا : الغافلات  
سورية : قميص  
سوينيات : تصغير سوانى والمقصود بها أرض زراعية صغيرة المساحة  
سييت : تركت  
سيبوا : تركوا  
السيرينا : صافرة الانذار  
سيقاريا : ورشة نجارة

« ش »

شادة : ماسكة أو مرابطة



شبحوا : رأوا  
شبردق : أسلاك شائكة  
شرشور : حصاة  
شريكه : قطعة صغيرة من الارض .  
شكاير : حذاء .  
شلالك : جمع شلاكه ، أحذية قديمة  
شلطها : ضربها بعصاة رقيقة أو بسوط  
شليتيات : ملابس بالية  
شمندفير : قطار  
شنه : غطاء قديم للرأس  
شوافات ال : الاستطلاع  
شوشان : كلمة تطلق على الرجل ذو البشرة السوداء  
شوشاو : كتكوت  
شوشه (ال) خصلة من الشعر تترك في أعلى رأس الصبى  
شوعه (ال) الفرس  
شويه : قليل  
شيايين : شيوخ (كبار السن)  
شيشمه : صنبور ماء  
شيشه : قنينة  
شيطى : قارب أو سفينة

« ص »

صبه لوله (ال) : المجموعة الاولى .  
صبيت : وقفت  
صقالة : رصيف بحرى  
صكروا : أقفلوا .  
صمطه : ضربه  
صونية : صحن

« ض »

« ط »

طابونى : نوع من أنواع النخيل  
الطابية : سد ترابى يستعمل كحدود بين المزارع .

طاسه : كوب  
طاشوا : فزوا  
الطبجيّه : تطلق على رملة المدفعية أو على نوع من البنادق التركية  
طرّمبه : مضخة  
طرى : دُكّير  
طويقيه : تصغير طاقية وهى غطاء الرأس .

« ظ »

« ع »

عشيشات : خيام  
عطيب : سىء  
عمارة : ذخيرة  
عماهم : معهم  
عواويل : أطفال  
عويله : أطفال  
عوين : زاد المسافر

« غ »

« ف »

فاشلة : رباط من القماش الخفيف يستعمل لتضميد الجروح .  
فاقوف : عربة قطار .  
فبريكات : مصانع  
فرقيه : تقسيم شيء معين على مجموعة من الناس  
فرمادجو : جبنه  
فزعنا : إستجبنا لنداء الحرب  
فزيت : نهضت على عجل  
فلاقة : المجاهدين  
فلوس : النقود  
فلوكه : قارب  
فورتيات : تحصينات

فوسى : خندق  
فوشيك : عتاد البنادق  
فياكه : تراخى أو تكاسل  
فيسع : بسرعة  
فيشو : مكتب  
فيرمنا : وقعنا  
فينو : نبيد مصنوع من العنب

## « ق »

قارابيللا : نوع من المسدسات القوية  
قاويطة : صحن مصنوع من معدن الألمنيوم يستعمل للاكل .  
قبطان : نقيب  
قبلى جنوبى  
قبيت : أصبحت  
قحوشوه : دفعوه  
قداش : كم  
قدو : فى إتجاه  
قramات : توزيع المؤن على المواطنين  
قرطلة : سلة  
قرنصنا : إنكمشنا  
قروب : مجموعة  
قشعوا : إنتقلوا  
قطعى : لص وقاطع طريق  
قعمز : جلس  
قلفطوهم : قبضوا عليهم  
قلم يكت : صرير القلم على الورق  
قناريه : منجم أو نفق  
قوز : المستدير من الرمل ، الكثيب المشرف وجمعه قوز ، وقيزان .  
فيطرن : خيمة

## « ك »

كابو : كلمة ايطالية تعنى الرئيس (مشرف)

كارطيه : إطلاق الرصاص بصورة عشوائية .

كارى : مؤجر

كاط : طابق .

كالشوات : ركلات بالاقدام

كبابيس : جمع كبوس وهى اغطية الرأس التى تصنع من الصوف

كبابيط : معاطف

كبانىة : مجموعة

كبايا (ال) : من لا عائل لهم .

كبران : مشرف عمال .

كحيله : الابل .

كدرّ (ال) : الضيق .

كدسنا : جمعنا .

كرانبير : شرطة ايطالية .

كردون : تحصين .

كرعيه : اقدامه .

كرموس : تين .

كركم (ال) : نوع من البهارات ذات لون أصفر .

كرنتينا : حجر صحى .

كرهبة : سيارة أو عربة حربية .

كفخه : لطمه شديدة .

كنشيلو : كلمة ايطالية تعنى باب الحديد الكبير .

كهنا : نظرنا من مكان مرتفع .

كوت : الجواد اصيل (قوى البنية) .

كوجينات (ال) : المطابخ .

كورنى : عمل بدون مقابل .

كوفينات (ال) : المعتقلات .

كول : مجموعة عسكرية .

كومانده : أمر .

كونجيدى : دفتر صغير .

كوينته : خامسة .

كيوانه : قافلة .

«ل»

لابس : مرتدى ثيابه .

لاربه : كلمة ايطالية تعنى الهواء ، والمقصود بها هنا المكان الذى يخرج له السجناء لقضاء وقت فيه .  
لاكوا : كلمة ايطالية تعنى الماء .  
لايج ياسر : اناس كثيرون .  
اللدون : قريب .  
اللط : تعنى اللطم العنف ضرب الخد وصفعة الخد بالكف .

لفاقه : الوشاة .  
لقيت : وجدت .  
لمدوهم : جمعوهم .  
لمحال : جمع محله وهى مجموعة من المجاهدين .  
لمسى : نوع من أنواع النخيل .  
اللوايا : الصعاب أو المشاكل المستعصية .  
لوطى : تحت أو أسفل .  
لين : إلى أين .

#### «م»

مابيناتهمش : لايفصلهم شيء .  
مابتش : رفضت أو لاتريد .  
ماجن : صهريج .  
ماء عدّ : مياه جوفية .  
ماك غابى : كما تعلم ، او لاخفى عليك .  
ماكينات (ال) : الآلات .  
مانحكراش : لا أستطيع تقديره .  
مانقه : كلمة تركية تعنى حظيرة من الجنود .  
مانيش : لأريد .  
ماهناش : لا يوجد .  
مبسوط : غنى .  
متخرخط : منحدر .  
متغشش : غضبان .  
مقاصى : متباعد .  
محرمه (ال) : المنديل .  
مخليين : تاركين .  
مدابره : مكنة .

مدَرَق : مختفى ، أو متخفى .  
مدنة (ال) : المكان المدمر على أثر وقوع معركة .  
مرش (ال) : الزجاج .  
مرطه : مكيال للحبوب .  
مروحين : راجعين .  
مستحق : محتاج أو فقير .

مسلسلين : مربوطين بالسلاسل  
مسواق : عصا  
مشفة : أداة تستعمل لثقب الجلد  
مشيط : غصن رقيق يستعمل للضرب  
معسكر : مقفل  
مصوقر : مضمون  
مطاقشة : مناوشة  
مطاييه : مصالحة  
مطبس : منحني  
مطرطشه : مبعثرة  
المعشيه : الفرس .  
معقرزين : إختلاط الاشياء ببعضها .  
مفرشكين : مستريحين .  
مقات : اكل .  
مقفى عليهم : لاحق بهم .  
مقنبر : جالس القرفصاء .  
مكلتش : مقيد بالاصفاد .  
مكلحة : بندقية .  
ملال : بقايا النار وتعنى هنا الارض شديدة الحرارة .  
ملزوم : محتاج .  
المناصب : حجارة توضع تحت القدر وفي العادة يكون عددها ثلاثة .  
منطاز : جندي أول .  
من تاء عن : من منعك .  
من كل صبيه : من كل اتجاه .  
منين ؛ من أين .  
كاجاة : أهاجيز الحرب .  
مهنبر : مكتئب .

مهریسته : جنود یرکبون الابل .  
موتیین : مجهزین .  
موس : سکن .  
موحر : له علامه ممیزه .  
مونه : تموین .  
میرط : معبأ .  
میکول : اکل .

« ن »

نبیک : نریدک .  
نتبقت : تمكنت من الخروج .  
نحوسوا : نتجول على غير هدى .  
نصیب : کثیر .  
نضنا : قمنا .  
نطق فيه : نصل اليه .  
نعانى فى المجاریح : أقوم على خدمة الجرحى .  
نقزوا : قفزوا .  
ننهضوا : نرفعوا .  
نوّ : حرارة الجو مرتفعة .  
نواله ( ال ) : الطهارة .  
نیشان : هدف .

« هـ »

الهانة : الذل  
هباکه : جرح عمیق فى الرأس  
هجینه : هاجرنا .  
هدرزة : حدیث أو دردشة  
هذیک : تلك  
هربوده : خرقة بالية  
هشوم : خراب  
هکی : هكذا  
هلبه : کثیر

هلى : الذى  
هندز : قدر  
هندى : تين شوكى  
هنشير : بناو اثرى قديم على مرتفع

« و »

واتيه : جامزة .  
واجد : كثير .  
وازى : إختار .  
وشاشينه : اطفال .  
ولن : رجعوا أو رجعن .  
وليت : رجعت .  
وين : أين ؟  
وليه ( ال ) : المرأة .

موسى يوسف الدريسي

« ى »

ياسرين : كثيرين  
يبي : يريد  
يندرهب : يتدحرج  
يتدعدع : يترنح  
يجى : تقريبا  
يدنى : يقرب  
يرعيكن : ينظركن  
يزقب : يقفز أو يدخل فى .  
يشاوخ : يتحدث  
يصلبها : يدفعها .  
يطبسوا : يبدأوا .  
يعقل : يختبىء .  
يفزع فيكم : ينجدكم .  
يفلق : يدمر .  
يقحز : يحبو .  
يقرضها : يقطعها .



يكرتنوا : يحجزوا .  
يكروا : يسحبوا أو يجروا .  
يلاه : عنده أو بجواره .  
يمزط : يدهس .  
يمقمق : يمقمق أو يمكمك العظم أمتصه امتص العظم العظم بما فيه من مخ .  
ينقلوها : يقتلعوها أو يرفعوها

متاح للتحميل ضمن مجموعة كبيرة من المطبوعات من صفحة  
مكتبتي الخاصة  
على موقع ارشيف الانترنت  
الرابط

[https://archive.org/details/@hassan\\_ibrahem](https://archive.org/details/@hassan_ibrahem)

## فهرس الاعلام

محمد يوسف الدريسي

- ابراهيم تركية : 71 و 92  
 ابراهيم الحداد : 94  
 ابراهيم الشاوش : 277  
 ابراهيم شعبان : 214  
 ابراهيم عمر : 112  
 ابراهيم مصباح اشليف : 9  
 ابوبكر النعاس : 112  
 ابو رتيمة محمد : 148  
 ابوراوى عبدالحميد ابراهيم : 211 . 212 . 131  
 ابونويجي الشلماني : 18  
 احمد اشتوي : 69، 75، 91، 93، 96، 131، 258  
 احمد دخيل : 135  
 احمد السني : 48، 207  
 احمد الشريف : 48، 51  
 احمد الفرجاني : 99، 101، 229، 231  
 احمد عبدالله الشريف : 8، 9  
 احمد على الدهماني : 45، 46، 68، 73  
 احمد مسعود : 220  
 احمد المريض : 89  
 احمد منصور الصابري : 161، 197  
 ادريس السنوسي : 30  
 ارحومة على : 187  
 ارواق درمان : 30  
 اسحاق باشا : 105، 145  
 اشتوي السويحلي : 93  
 احمد الدريسي : 187،  
 احمد الاشهب الجمري : 49  
 احمد زغبية : 70  
 احمد عقوب : 72  
 بركة الشليب : 195

- بوبخنوق: 22  
 بوجندية: ( 22  
 بوسيف يونس الشلحاني: 22  
 بوضياء محمد: 148  
 بوقرين: 182  
 بوكيكيص ( 23، 24  
 بلقاسم صقر: 183  
 بلقاسم عمر المنتصر: 191، 192  
 بونوارة: 169  
 التهامي قليصة: 131  
 توفيق القاسمي: 208  
 جمعة سوف: 180  
 جمعة عبدالله: 149  
 جمعة عم سعد الشريف: 6، 7، 14، 16، 259  
 جويذة: 22  
 حركات الجنزوي: 196  
 حسن بوليفة: 24  
 حسونة باشا: 104 - 151 - 187  
 حسين التونسي: 63  
 حسين القرتملي: 195  
 حسين الفورق: 62  
 حليلة الحاج الصغير: 97 - 98  
 حمد الازرق: 137  
 حمودية الفقه: 105  
 حمودية بن ميلاد: 105  
 حميدة المبسوط: 228  
 خليفة شهيون: 180  
 خليفة بن عسكر: 195  
 خير بن احميدة: 173  
 رجب على يوسف: 23، 24  
 رحومة بن عبدالله: 180  
 رحومة الطويل: 66  
 رحومة بن علي بن زايد: 182  
 رزق عبدالله عاشور عوض العوامي: 152، 153، 159

رمضان السويحلي (رمضان اشتيوي) 48، 49، 50، 51،  
2، 235، 239، 248، 249، 257

رمضان العماري 101، 150  
رمضان القريتل: 195، 196، 210  
رمضان بن محمد: 99، 101  
الزاوس « الجاوس ، الضاوس » ، 106  
الزروق الرعيض: 24

ساسي خزام: 170، 179، 186  
الساعدي اللاقي: 38  
سالم بن زايد: 179، 193  
سالم بن عبدالله: 180  
سالم الزغلي: 59  
سالم عمر: 149  
سالم الكبي: 30  
سالم البيدي: 202  
سالم منصور الصابري: 191  
193  
200  
208  
210  
216

سعد بن جبران: 146  
سعد بن زايد: 159  
سعد بن شهبون: 168  
سعد بن عبدالمولى: 105  
سعد بن نصر: 105  
سعد مسعود: 149

سعيدون) محمد اشتيوي السويحلي) 48، 69، 74، 75،  
91، 92، 95، 118، 130، 131، 151، 221، 222، 225، 236، 247، 258، 258

سعيد بن زايد: 182  
سعيد الزيتوني بن محمد: 113  
سعيد بن عامر: 171

سعيد بن عبدالرحمن: 187  
 سعيد محمد 149  
 سعيد بن كروده: 172  
 سلطان بن شعبان: 151، 171، 187، 195، 196، 215، 216  
 سليمان الباروني، 163، 164، 165، 178، 183، 192، 190  
 سليمان منينة: 23، 24، 34، 35  
 سوف (محمد سوف): 146، 163، 170، 180، 182، 195، 207  
 سويل الجازوي: 152، 153، 154، 158، 159  
 الشارف بن صالح: 105  
 الشريف بن عبدالرحمن: 215، 228، 242،  
 شلابي (على شلابي)  
 69، 96، 213، 217، 220، 226، 23، 231، 233، 247، 255.  
 الشنقيري الاعيور: 214، 257  
 الشيباني عمر: 148

صالح بن ابراهيم: 148، 170  
 صالح الشريف: 27، 38  
 صفى الدين السنوسي: 48  
 ضو بالحاج: 187  
 ضو بالخير: 99  
 ضو السايح: 99  
 الطاهر الهندوري: 257  
 عائشة عبدالعالى: 152، 153  
 عامر المعكف: 172  
 عبدالرحمن الشريف: 215  
 عبدالسلام الطاهر: 236  
 عبدالسلام عبدالسلام حمد سالم: 98  
 عبدالعاطى الجرم (الجرم) 178، 206  
 عبدالقادر مزتره: ص 215  
 عبدالقادر الكوربو: 183  
 عبدالقادر المنتصر: 90  
 عبدالكافي الكزة  
 18، 30  
 عبدالله الاسود: 47

عبدالله اميه: 76، 73، 72  
عبدالله تمسكت (تامسكت) 208، 207، 206  
عبدالله عمر: 176، 148  
عبدالله القهواجي: 15  
عبدالله المجدوب: 81، 80  
عبدالله مخلوف: 24  
عبدالله الهلال: 183  
عبدالمجيد كعبار: 208  
عبدالنبي بالخير: 144، 143، 96، 89، 3  
عبدالواحد: ص 5  
عيده المحجوب: 173  
عثمان الشامخ: 87، 36

## ع

العجيلي الهندور: 247  
عقيلة سالم الشتيوي: 148  
علي ابراهيم عبد الصمد: 124 ، 149 ، 113  
علي بلعم: 95 ، 88  
علي احمد الوافي: 5  
علي اشكال: 223 ، 222 ، 219 ، 215  
علي الاطرش: 124  
علي البارودي: 15  
علي حقيقة: 253 ، 252  
علي خليفة: 183 ، 180 ، 173  
علي زايد: 179  
علي سالم: 149  
علي سبير: 168  
علي سليمان: 87 ، 61  
علي صالح: 232 ، 228  
علي علي محمد: 149 ، 113  
علي عمر الشوشان: 85  
علي غومة: 206  
علي الفرجاني: 99

عمار زقلوط : 103 ، 105  
عمار التابت : 99  
عمر البابور : 24  
عمر باري : 171  
عمر ابونعجة : 234  
عمر الجديدي : 182  
عمر القاضي : 186  
عمر المختار : 99 ، 147  
عمر المتصر : 93  
عوت المحمودي : 224  
عيسى سمهود : 215 ، 216

## غ

غراسيان : 108 ، 109 ، 208

## ف

الفاندي : 196  
فرج محمد : 11 - 16  
فرج المرغى : 118  
فضيل الشلهان : 18 ، 30 ، 31 ، 33 ، 44  
الفتوري بن محمد : 113 ، 124 ، 401 ، 208

## ك

الكريك ( اشتيوى الكريك ) : 90  
كريم مسعود : 148

## م

المبروك عمر القاضي : 186  
المبروك المتصر : 103 ، 105  
المبروك الورفلي : 137

- محمد بن احمد : 168  
 محمد احمد أمبارك : 168  
 محمد اقتيديه : 206  
 محمد ابودابي : 196  
 محمد ابوزيد : 105  
 محمد بوقرين : 161  
 محمد الحداد : 163  
 محمد الحريزي : 161  
 محمد بن حسين : 86  
 محمد الدالي : 149  
 محمد الرعيض : 88 ، 89  
 محمد سعيد الهريش : 160 ، 161 ، 181 ، 182  
 محمد سوف : 145 ، 174 ، 190  
 محمد شلاي : 213 ، 257  
 محمد عبد السلام اليوسفي : 97 ، 98 ، 149 ، 150  
 محمد بن عبد القادر : 46 ، 95  
 محمد العجيلي : 163  
 محمد علي محمد : 148  
 محمد الفاندي : 183  
 محمد فرحات : 214  
 محمد الفيتوري عون : 149  
 محمد المقطوف : 213 ، 214 ، 224 ، 257  
 محمد النوازي : 128  
 محمود محمد عمر الشريف : 178 ، 18 ، 43  
 مختار عقوب : 72 ، 180  
 مرسال : 183  
 مرعي ابوسنية : 112  
 المريض ( احمد المريض ) : 69 ، 70 ، 96  
 مسعود الغفار : 148 ، 212  
 مصباح الفيتوري : 214  
 مصباح بن كادير : 186  
 مصباح كريدغ : 171 ، 178 ، 185  
 مصباح محمد : 113 ، 149  
 مصطفى الترجمان : 69 ، 96



المطردي : 227  
مفتاح بن عامر : 178 ، 180 ، 178  
المعداني : 82  
معيوف : 66 ، 67  
المقطوف : 219 ، 225 ، 227 ، 228 ، 229 ، 230 ، 231 ، 248 ، 249  
منصور البابور : 23  
مهديه علي شهبون : 160 ، 161 ، 181  
موسوليني : 144 ، 145  
ميان : 108  
ميلاد البوري : 65 ، 147  
اليلوقي : 193

## ن

ناصر بن غوله : 71  
نصر بن زايد : 182  
نصر الفار : 166 ، 171 ، 173 ، 178 ، 187  
نصر القديري : 194  
نوري البوسيفي : 99  
نويجي الشلماني : 31

## هـ

الهادي (الهادي كمبار) : 208  
هلال السنوسي : 157

## و

الوحيشي بن صقر : 171 ، 172 ، 178 ، 185 ، 186

## ي

يوسف خريش : 95 ، 142 ، 151  
يونس حسن الشلماني : 22

## فهرس البلدان و الاماكن

### أ

- آبار مجى : 112  
 الايبار : 3 ، 16 ، 19 ، 44  
 اتينا : 188 .  
 اسبانيا : 173 .  
 اسطنبول : 166 ، 170 ، 179 ، 190 ، 254  
 ام الجوابى : 236  
 امريكا : 231 ، 242  
 اوستيكا ( جزيرة ) : 23 ، 64 ، 65 ، 66 ، 70 ، 96 ، 111 ، 118 ، 125 ،  
 131 ، 139 ، 151  
 اوروبا : 221  
 ايطاليا : 6 ، 9 ، 16 ، 44 ، 45 ، 71 ، 72 ، 83 ، 96 ، 97 ، 100 ، 115 ،  
 116 ، 117 ، 118 ، 120 ، 130 ، 131 ، 138 ، 140 ، 141 ، 150 ،  
 154 ، 167 ، 181 ، 184 ، 190 ، 192 ، 193 ، 197 ، 198 ، 199 ،  
 201 ، 205 ، 206 ، 210 ، 234 ، 246 ، 258

### ب

- باريس : 167  
 باليرمو : 64 ، 96  
 بثر الاسطى ميلاد : 99 ، 138  
 بثر باللفاء : 25  
 بثر باللفاع ؛ 25  
 بثر الحلو : 169  
 بثر الغنم : 221 ، 223

بشر الكرمة : 187 ، 186 ، 165  
 برقة : 25  
 بركات الخانشة : 185  
 بريشيا ( جزيرة ) : 80 ، 96 ، 168 ، 188 ، 190  
 بريطانيا : 83  
 البطنان : 19 ، 24 ، 26 ، 27 ، 28 ، 29 ، 38 ، 44  
 بن قردان : 106 ، 107 ، 150 ، 166 ، 171 ، 187 ، 188 ، 215 ، 224 ، 228  
 بنزرت : 188  
 بنغازى : 18 ، 24 ، 125 ، 172 ، 179 ، 194 ، 197  
 بنينة : 25  
 بوجمران ( وادى ) : 93  
 بوشول : 166  
 بوعجيلة ( سيدى بوعجيلة ) : 107 ، 185 ، 186  
 بوغيلان : 193 ، 206 ، 207  
 بوكماش : 163 ، 164 ، 166 ، 169 ، 172 ، 179 ، 182 ، 183 ، 184 ، 185 ، 190  
 بومليانة ( بشر ) : 10  
 بونومة : 174 ، 173 ، 184  
 بوهديمة : 81  
 بويرات الحسون : 48

## ت

تاجوراء : 66 ، 102 ، 138 ، 150 ، 251  
 تاغمة : 186 ، 214 ، 217 ، 219 ، 221 ، 223  
 تاورغاء : 76  
 تراميتى ( جزيرة ) : 3 ، 14 ، 16  
 تركيا : 179 ، 252  
 تشاد : 222  
 تغسات : 207  
 تليل : 172 ، 185  
 التميمى : 40  
 ترهونة : 13 ، 70 ، 96 ، 89 ، 97 ، 98 ، 99 ، 105 ، 107 ، 108

113 ، 118 ، 119 ، 135 ، 136 ، 138 ، 145 ، 146 ، 147 ، 150 ،  
 151 ، 188 ، 208 ، 255  
 تونس : 78 ، 105 ، 106 ، 107 ، 135 ، 145 ، 166 ، 170 ، 172 ،  
 175 ، 181 ، 185 ، 187 ، 188 ، 190 ، 205 ، 221 ، 222 ، 223 ،  
 224 ، 236 ، 251 ، 257 ، 258

## ج

جادو : 164 ، 170  
 جامع المقطوف : 247  
 الجديدة : 95 ، 99 ، 100 ، 169  
 جرمانيا : 77  
 الجزائر ، ( الدزائر ) : 223 ، 253  
 الجميل : 103 ، 104 ، 106 ، 169 ، 170 ، 185 ، 229  
 جنان بن نصيب : 106 ، 185  
 جنزور : 102 ، 103 ، 105 ، 125 ، 140 ، 145 ، 183 ، 186 ، 192 ،  
 194 ، 195 ، 196 ، 205 ، 210  
 جوف المنطيس : 30

الحارة ( مكان بالمدينة القديمة : 235  
 حبس الفار : 136  
 حبس البقر : 165 ، 170 ، 183 ، 185  
 الحراقة : 183  
 حوش التواق : 46  
 حوش جبارة : 94  
 حوش حريب : 94  
 حوش ماطوس : 94  
 الحوض : 166

خشم معروف : 124  
 الخضراء : 147

د

درنة : 154 ، 159

الدافنية : 93

ر

الرابطة : 208

راس جدير : 46 ، 48

الراس الأحمر : 182

راس اللفحة ( الافعى ) : 71

الرحيمات : 98

روما : 168 ، 188 ، 190

ز

زارة ( عين زارة : 146 ، 176

الزاوية : 3 ، 5 ، 105 ، 107 ، 145 ، 162 ، 163 ، 164 ، 167 ، 173 ،

194 ، 214 ، 217 ، 218 ، 228 ، 229 ، 230 ، 231 ، 232 ، 233 ،

235 ، 236 ، 237 ، 238 ، 241 ، 242 ، 245 ، 246 ، 251 ، 255 ،

256 ، 258

الزروق : 23 ، 45 ، 46 ، 47 ، 48 ، 63 ، 73

زليطن : 57 ، 87 ، 90 ، 145 ، 209

زمزم : 132

زواره : 104 ، 105 ، 162 ، 164 ، 165 ، 172 ، 174 ، 180 ، 185 ،

187 ، 188 ، 194 ، 196 ، 215 ، 216 ، 217 ، 219 ، 220 ، 225 ،

229 ، 232 ، 236 ، 245 ، 258

الزيغن : 72

س

سانية الباشا : 210 ، 212 ، 216 ، 230 ، 233 ، 257

سانية الميلاقى : 193  
 سانية سيدى عبد الله : 185  
 السرايا الحمراء : 14 ، 70 ، 96 ، 136  
 سرت : 48 ، 49 ، 50 ، 52 ، 53 ، 57 ، 62 ، 71 ، 81 ، 96 ، 109 ،  
 111 ، 112 ، 114 ، 115 ، 116 ، 118 ، 119 ، 130 ، 131 ، 140 ،  
 151  
 السطيل ( منطقة يتونس ) : 216  
 السكوم : 174  
 سوق الجمعة : 231  
 سلوق : 17 ، 18 ، 19 ، 40  
 السلوم : 25 ، 57 ، 58  
 سوانى بن يادم ( السوانى : 80 ، 81 ، 82 ، 83 ، 84 ، 96 ، 103 ، 143 ،  
 144 ، 161 ، 182 ، 195 ، 196 ، 205 ، 218 ، 221 ، 234 ، 247 ،  
 257  
 السودان : 222 ، 223 ، 224  
 سوسة : 154 ، 163  
 سيدى سعيد : 174  
 سيدى الشعاب : 104  
 سيدى الصيد : 97 ، 98  
 سيدى عبد الجليل : 210  
 سيدى عبد الرحمن : 107  
 سيدى عبد الكريم : 138  
 سيراكوزة ( جزيرة ) : 3 ، 129

## ش

شارع الشط : 82  
 شارع بن عاشور : 10 ، 14  
 شارع ميزان : 71 ، 72  
 شقران : 87

## ص

صبراتة : 160 ، 161 ، 181 ، 182

صرمان : 162 ، 167 ، 182  
صلب الحلق : 30  
الصمعة الحمراء : 70 ، 188 ، 193  
ط

طبرق : 3 ، 19 ، 44  
طرابلس : 3 ، 6 ، 8 ، 11 ، 13 ، 57 ، 61 ، 65 ، 62 ، 65 ، 67 ، 68 ،  
70 ، 71 ، 72 ، 74 ، 75 ، 76 ، 77 ، 78 ، 80 ، 81 ، 85 ،  
90 ، 92 ، 96 ، 103 ، 107 ، 114 ، 115 ، 116 ، 117 ،  
118 ، 119 ، 120 ، 125 ، 136 ، 140 ، 141 ، 142 ، 144 ،  
151 ، 164 ، 167 ، 168 ، 172 ، 173 ، 175 ، 176 ، 178 ،  
179 ، 180 ، 188 ، 192 ، 193 ، 194 ، 195 ، 196 ،  
197 ، 205 ، 210 ، 212 ، 215 ، 218 ، 220 ، 228 ، 229 ،  
230 ، 231 ، 232 ، 235 ، 236 ، 237 ، 239 ، 240 ، 241 ،  
246 ، 247 ، 251 ، 257 ، 258 .

الطقطامة : 186 .  
طلميثة : 24 .  
طويلة الصنور : 170 .  
طويلة غزالة : 182 ، 183 .  
طيلمون ( زاوية ) : 31/18 .

ظ

الظهرة : 82 ، 193 .

ع

العجيلات : 104 ، 150 ، 151 ، 164 ، 169 ،  
171 ، 173 ، 186 ، 187 ، 213 .  
العزيزية : 103 ، 208 .  
عقار : 169 .  
العقريية : 102 ، 106 ، 107 .  
العقيلة : 18 ، 244 .

العلايقة ( سوق ) 186 ، 173 .  
العمارات : 98 .  
عين الثنية : 30 .  
عين الغزالة : 30 .  
عيون الذبان : 169 .

## غ

غات : 13 .  
غريان : 13 ، 107 ، 169 ، 186 ، 188 ، 190  
191 ، 192 ، 193 ، 194 ، 206 ، 207  
208 ، 219 ، 229 .  
غوط الرمان : 99 .

## ف

فافنيانا ( جزيرة ) : 3 ، 19 ، 33 ، 34 ، 44 ، 218  
220 ، 246 ، 257  
فرنسا : 167 ، 169 ، 188 ، 190 .  
فزان : 185 ، 194 ، 208 .  
فساطو : 170 .  
فندق الهنشيري ( فندق بسوق الترك ) : 81 .

## ق

قابس : 167 .  
قاريونس : 44 .  
قاعدة عقبة : 251 .  
قايتا ( جزيرة ) : 3 .  
القبة : 3 ، 153 .  
قرجي : 102 .  
قرقارش : 7 ، 141 ، 143 ، 196 ، 212 ، 213 ، 218 ، 234 ، 257 .  
القرهبوللى : 102 .  
قصر بوكماش : 173 .



- قصر بوهادى : 52 ، 53 ، 55 .  
 قصر تليل : 169 .  
 قصر الجفارة : 218 .  
 قصر حمد : 46 ، 47 ، 91 ، 95 .  
 قصر خيار : 100 .  
 قصر سرت : 54 ، 56 .  
 قصر سوسة : 145 .  
 قصر العجيلات : 186 ، 187 .  
 قطيس : 194 ، 218 ، 221 ، 245 .  
 القلعة : 214 .  
 قمينس : 18 ، 30 ، 31 .  
 قوز التيك : 95 .

## ل

- لييا : 145 .  
 ليون : 167 .

## م

- مالطا : 64 ، 96 ، 212 .  
 المانيا : 70 ، 77 ، 79 .  
 مدينين : 167 .  
 مدرسة الفنون والصنائع ( او مكتب الفنون والصنائع ) : 9 ، 10 ، 15 ، 16 ، 193 ، 210 .  
 المردوم ( وادى ) : 144 .  
 مرسى طرابلس : 233 .  
 المرصص ( زاوية ) : 18 ، 44 .  
 المقرون : 19 ، 24 ، 25 ، 44 .  
 مسلاته : 89 ، 138 ، 143 ، 145 .  
 مصر : 24 ، 145 ، 222 ، 223 ، 252 .  
 مصراته : 3 ، 22 ، 45 ، 46 ، 48 ، 49 ، 54 ، 55 .  
 57 ، 63 ، 70 ، 71 ، 72 ، 76 ، 80 ، 82 ، 83 .  
 87 ، 90 ، 91 ، 92 ، 96 ، 107 ، 119 ، 125 .

130 ، 131 ، 138 ، 146 ، 147 ، 162 ، 167 ، 182  
188 ، 194 ، 195 ، 208 ، 212 ، 213 ، 229  
230 ، 257 .

المعيطنات : 106 .  
المغرب : 7 .  
الملاحة : 173 .  
الملايطة : 89 ، 91 .  
المنشية : 3 ، 8 ، 14 ، 185 ، 193 .  
ميلانو : 80 ، 188 ، 199 ، 202 .  
ميمون ( وادي ) : 95 ، 144 .

## ن

نابلس : 188 .  
نابولي : 77 .  
الناظورة : 257 .  
نقد ( وادي ) : 95 .  
النقازة : 87 .  
النواحي ( النواحي الاربع ) : 195 .  
النواهمة : 72 .  
النوفليين : 14 .  
النيجر : 222 .

## هـ

الهاني : 10 ، 179 ، 182 ، 190 .  
الهند : 28 .

## و

وادي الاتل : 219 .  
وادي يفرن : 143 .  
ودان : 7 .  
ورشفانة : 195 .

ورفلة : 48 ، 90 ، 98 ، 99 ، 107 ، 108 ، 119  
138 ، 142 ، 144 ، 146 .  
الوطية : 167 ، 188 .

ى

يفرن : 231 ، 236 ، 214 ، 221 ، 223 ، 232 .  
اليونان : 102 .

## فهرس القبائل

### -أ-

- اولاد احمد : 137 ، 245 ، 242
- اولاد امبارك : 98
- اولاد جربوع : 231
- اولاد سلاق : 230 ، 248 ، 257
- اولاد سلطان : 168
- اولاد صقر : 214 ، 218 ، 228 ، 229 ، 230 ، 237 ، 241 ، 248 .
- اولاد عون : 193 .
- اولاد الفقى : 161
- اولاد معرف : 112
- اولاد يوسف : 98 ، 99 ، 123 ، 124 ، 149

### -ب-

البراعصة : 30 .

### -ج-

جرايريه : 179 .

### -ح-

- حمادى : 103
- الحرارات : 255 .
- الحمودات : 99 ، 113 .
- الحميدات : 112 ، 124 .

-خ-

الخطاطبه : 171 ، 181 .  
خويلد : 158 ، 188 .

-د-

الدراهيپ : 148 ، 149 .

-ذ-

الذكيران : 45 ، 95 .

-ر-

الرعيضات : 88 .  
الرقايقيه : 172 ، 185 .  
الرقيعات : 255 .  
الرحمه : 215 ، 230 ، 248 ، 254 ، 257 .  
الريانة : 188 .

-ز-

الزايديه : 179 .  
زروق : 95 .  
زواعه : 161 ، 180 ، 181 ، 182 .

-س-

سعنات : 164 ، 182 ، 188 .  
السواعديه : 206 .

-ش-

الشرفا (شُرفه) : 6 .

الشوارنه : 89 .

-ص-

الصوالح : 94 .

الصعيان : 164 ، 167 ، 182 ، 185 ، 215 .

-ع-

العمامره : 101 .

عجيلات (قبائل) : 125 ، 182 ، 184 .

علالقة : 161 ، 162 ، 164 ، 165 ، 166 ، 167 ، 168 ، 171 ، 174 ،  
178 ، 182 ، 184 ، 185 .

-ف-

فرجان (فرجان الداوون) : 127 ، 244 .

الفواتير : 90 .

-ق-

القذاذفه : 99 .

قيزان (قبيلة) : 192 .

القواسم : 206 ، 208 .

-ك-

الكوارغيه : 215 .

-م-

مارغنه : 81 .

معدان : 118 .

-ن-

نوايل : 185 .

-و-

ورشفانه : 202 .

## فهرس المعارك

### أ

أسقفه : 19  
الأكواش : 100 ، 101 ، 102 ، 105 ، 150

### ب

بوعجيلة : 105  
بوعرقوب : 100 ، 104 ، 145 ، 150  
بوكماش : 161 ، 166 ، 170  
بونومة : ، 161 ، 174 ، 183 ، 184  
ابوعزة : 229  
بشر طبراز : 257  
بشر الغشم : 214 ، 219 ، 243 ، 225  
بشر الكراريم : 96

### ت

تأقرفت : 208

### ح

الحمام : 95  
حوش حميده (بزاوية المحجوب) : 96

### ج

الجديدة (العجيلات) : 145 ،  
الجمعية : 19 ، 44  
جنزور : 125 ، 150



الدورانية : 169

الرأس الأحمر : 162 ، 163

السداة : 95 ، 147 ، 210  
 سدره بوعمججة : 249 ، 257  
 سدره الجلابه : 257  
 سدره القرطيلي : 196  
 السكوم : 214 ، 215 ، 218 ، 228 ، 229 ، 230 ، 257  
 السلجية (التقازة) : 95  
 سواني بن يادم (معركة السواني) : 72 ، 89 ، 162 ، 176 ، 212 ، 234  
 سواني العوكلي : 96  
 سواني اللساني : 102 ، 150  
 سيدى زلى : 95  
 سيدى سرور : 95  
 سيدى عبدالجليل : 170 ، 172 ، 257  
 سيدى عبدالجليل : 195

العقريته : 105  
 عين كعام : 95  
 عيون الزمان : 167

غوط الديس : 187  
 غوط الرقان : 145

قرش ناب : 221  
القرضابية : 51 ، 64 ، 96 ، 107 ، 108 ، 114 ، 131 ، 135 ، 138 ،  
141 ، 145 ، 150 ، 151 ، 164 ، 169 ،  
قرقارش : 150 ، 220 ، 258  
قصبة سغيط : 206 ، 207  
قصر احمد (يوم السبت) : 94 ، 98  
القطار : 95  
الفنه : 221

## م

المدور (أو رأس المدور) : 19 ، 44  
مرسيط : 194  
المشرك (سواني المشرك أو بشر تاجموت) : 96

## ن

الناظورة : 258

## هـ

الهاني : 3 ، 8 ، 99 ، 150 ، 161 ، 162 ، 212 ، 213 ، 218 ، 220 ،  
230 ، 249 ، 257 ، 251  
592

حسن يوسف اللواتي

متاح للتحميل ضمن مجموعة كبيرة من المطبوعات من صفحة  
مكتبتي الخاصة  
على موقع ارشيف الانترنت  
الرابط

[https://archive.org/details/@hassan\\_ibrahem](https://archive.org/details/@hassan_ibrahem)

قطاع سوزو وصناعة - مطابع الثورة العربية / طرابلس

هنا يوسف اللواتي

متاح للتحميل ضمن مجموعة كبيرة من المطبوعات من صفحة  
مكتبتي الخاصة  
على موقع ارشيف الانترنت  
الرابط

[https://archive.org/details/@hassan\\_ibrahem](https://archive.org/details/@hassan_ibrahem)